

9622

160 208


16 248

CCIS

Dipl. 5151

Thysius  
LB 541.846

Sabin No. 95444  
First edition



ANTONII THYSII JC.  
HISTORIA NAVALIS,  
*Morū sive Benedicteyrn.*  
CELEBERRIMORUM  
P R A E L I O R U M.

Q V A

Mari ab antiquissimis temporibus usque ad Pacem Hi-  
spanicam Batavi, Fœderatiq; Belgæ, ut plurimum victores  
gesserunt, luculenta descriptio.



LUGDUNI BATAVORUM,  
Ex Officina JOANNIS MAIRE, MDCCLVII.

Библиотека  
Музея изобразительных



Библиотека  
Музея изобразительных  
искусств  
Ex officina

CELSISSIMIS FOEDERATI  
BELGII PATRIBUS,  
NEC NON  
*Præpotentibus & Illustrissimis*  
HOLLANDIÆ PROCERIBUS,  
DOMINIS SUIS,  
Submisse dicat, consecratque  
ANTONIUS THYSIAS.

 Ircum fluum Oceanum, libertatis Vestræ primum vindicem, indomiti Martis cruento-rumque præliorum vastum cubile, divitiarum largitorem, commerciorum tutorem, Reip. Vestræ statorem vobis exhibeo, P A T R E S A U G U S T I , imo ipse se totum Vestræ Potentiaæ offert, atq; triumphos innumeros, continuosque & undique tincta hostili sanguine sua æquora heic ostentat. Nimirum quam late patent maria, virtus

## D E D I C A T I O.

Vestra patuit, imò quà immoto & pigro fri-  
gore non aquarum vortices , sed glaciales  
& horridæ rupes eriguntur , Fortitudo  
Vestra naturam deficientem fatigavit. Ut  
illa, quæ illustria antiquis contigere tem-  
poribus , silentio prætermittam , attonitus  
adhuc hæret orbis,in hoc angulo terre con-  
cussam potissimum mari Hispаниæ domi-  
nationis potentiam , Orientis atque Occi-  
dantis opes flagellatas , totam ferme Euro-  
pam in belli partes tractam, quasi de impe-  
rio universi ageretur , neque minus Fœde-  
ratos domesticis victoriis nobiles, sui secu-  
ros, in ipsam Hispaniam, in Asiam , Africam,  
& Americam belli tempestatem classibus  
suis effuditisse. Exquis limitibus Batavi so-  
ciique arctantur,majestas,virtus,gloria nul-  
lum terminum habet. Batavia hodie etiam  
extra Bataviam colitur , atque Orienti for-  
midabilis est. Quinimo per totum terrarum  
orbem, quem non semel tanquam insulam  
circum

## DEDICATIO.

circumnavigarunt, Batavorum nomen latissime se diffudit, atque venerationem cunctis admodum populis intendit. Qua sol oritur, caditque, arces, castella, oppida, imo ipsa regna constituta sunt. Legationes remotissimarum gentium, Indorum, Persarum, Turcarum, liberaliter suscepitæ, auditæ, fœdera percussa, quasi in nostra fortuna omnium fortuna sita esset. Iactent Phœnices, Carthaginienses, Græci, & rerum domini Romani maritimam potentiam, longe inferiora sunt Nostratium expeditionibus. Magnitudo rerum mari gestarum omnium admirationem excedit. Erunt aliquando illa tempora, cum posteri fidem non adhibebunt, neque nos crederemus, nisi nostris ea contigissent temporibus. Victor ubique nobis Oceanus non simpliciter indulxit, victorias victoriis cumulavit, denique incremento amplius non reliquit locum. Illa nunc demum magna est felicitas, felici-

## D E D I C A T I O.

tate sua posse continuò uti. Ingentium  
sæpe imperiorum nutarunt fastigia , quod  
Proceres iisdem artibus non conservarent  
imperia, atque peperissent. Mari vindicata  
primum libertas, mari in immensum crevit,  
mari conservanda, tutanda. Vos autem, PA-  
T R E S A U G U S T I , in id semper incubuistis,  
& adhuc incumbitis, uti vasta æquora com-  
merciis pateant ; neque violentia hostium,  
vel insidiis prædonum intercipiantur. No-  
stis nimirum in Oceano nostras opes sitas,  
& mercaturam animam esse nostræ Reip.  
Fuit hactenus (absit invidia dicto) hæc spi-  
thama terræ, quæ mari passim cingitur. exe-  
diturque, horreum publicum totius Euro-  
pæ. Effundit etiam extremus Ganges in  
Rhenum suas divitias, imo quicquid uspiam  
locorum est, hic emitur venditurque, dum  
ad ultimas oras vela nostra dimitimus, co-  
lonias erigimus. Tantum est mare sibi ob-  
noxium habuisse , ut qui illi leges ponere  
potuit,

## D E D I C A T I O.

potuit, etiam universo possit. Accedit quod maritimæ Respublicæ æternitatem quan-dam sibi polliceri queant, terrestres utplu-rium velut senio paulatim & languore consumantur. Dum itaque bello animosi, pace quieti, maria movetis, secure navigia deducitis, media pace nos bellum inchoa-mus literarium non cruentum, sed inno-xium, à quo ne ipsæ quidem pacatæ Musæ oculos avortant. Etsi autem verba factis ex-æquari nequeant, diu tamen mecum luctan-do honesta tandem me cepit ambitio, ne-que me quietum esse sivit, donec in inquieto Oceano fluctuantem calatum ponerem. Dirigimus heic aciem in mediis fluctibus, in ipsis aquis excitatos igneis, incensisque navibus ardantis veluti cæli trucem & horrendam faciem securi aspicimus, ho-stem vincimus, triumphamus; denique si iniquior sors obtigerit, mortem atque vitam juxta æstimamus. Hæc mea prælia,  
imo

## DEDICATIO.

imo vestra , & quidem celeberrima , usque ad Pacem Hispanicam , Nomi ni Vestro submisse inscribimus , P A T R E S Au gusti , qui bello , pace nobiles , ita Reip. vestræ potentiam auxistis , ut , sicuti pleraque mortalium habentur , invidia ex opulentia orta sit. Infita est ea mortalibus , in primis iis , qui ætatem in excelsò agunt , natura , recentem aliorum potentiam ægris oculis aspicere , & quos vel pares vel inferiores viderunt , nolle ferre superiores . Sed justo imperio , æqua & tranquilla moderatione Vobis hæc contigit felicitas , ut felicitatem Vestrā tueri vēritis , possitis que. Quæ uti perpetua sit , Deum immortalem , rogo , & obtestor. Datæ Lugduni Batavorum , mense Ianuario , Anno c I C L V I I .

HISTO-

HISTORIA NAVALIS  
BATAVORUM,  
*Sive*  
CELEBERRIMORVM  
P R A E L I O R U M  
Q VÆ

Mari ab antiquissimis temporibus usque ad Pacem  
Hispanicam , Batavi ut plurimum victores gesse-  
runt , luculenta descriptio.

P R O O E M I V M.

**D**UM totiens inter Batavos aliasque Natio-  
nes horrendum in ipsis aquis belli mariti-  
mi exarsit incendium , & sanguine humano  
tinctus Oceanus cadavera volvit , nobis  
etiam inhorruit calamus , & ad prælia secu-  
ra se accinxit. Batavorum olim , & nunc  
sociarum gentium prælia celeberrima navalia usque ad Pa-  
cem Hispаниcam describere in animum induximus no-  
strum. Lente properavimus , & mente bene composita diu  
cum nobis ipsis morati , quia & eruenda erant ex antiquis  
autoribus , quæ ad institutum nostrum conducunt , & publi-  
ca quoque ex autoritate Procerum inspicienda fuere mo-  
numenta , quorum multitudo facile animum distrahere po-  
test. Ubi veritas latet , diligenter nobis inquirenda fuit , quæ

A cunctan-

## H I S T O R I A

cunctando demum elicitur. Illa omni odio vel favore debet esse antiquior. Nonnulli ita Historiam scribunt, ut ne sibi quidem ipsis credant, nos nullis affectibus, sed sola veritate vincemur, atque interius abdita & secreta rerum perscrutabimur. Adeste vos Batavi, quorum virtus semper inconcussa fuit: qui, ut olim socii & fratres Romanorum fuistis, ita nuper admodum mari terraque victores incredibili virtute Potentissimo Regi Hispaniarum, qui utrumque veluti solis limitem suo terminabat imperio, non tantum libertatis nostræ confessionem, sed & ipsam pacem extorsistis. Ecce, ecce, etiam adhuc vobis maria aperta sunt, nisi socordia vestra ea claudit. Vos virtutem iterum antiquam exerite, qui mare hactenus pro domicilio vestro habuistis. Turpe est domus propriæ desertorem esse.

### C A P U T I.

D E

### *EXPEDITIONIBVS ANTIQVIS TEMPORE ROMANORVM.*

**B**ATAVORUM inclytam virtutem & terra & aqua celebrant veterum monumenta. Magis autem incurserent in omnium oculos, si decora Nostris Scriptorum ingenia suppetiissent, quorum tum omnis vita procul ab otio literato in negotio militari versabatur: non quod illis ingenia defessent, sed quod Marti suo devoti rebus agendis, & bona tanquam famæ incumberent, cætera vero negligerent. Vicere aliquo-

aliquotiens Romani, quia Batavi vincere potuerunt. Ipse Iulius Cæsar, qui cœlo & sideribus famam terminavit, in plerisque expeditionibus fortissimum militem Germanum, præcipuumque virtute Batavum habuit, in quo magnum semper momentum victoriæ fuit. In Bello utique Alexandrino cum transgressum fluminis Nili Rex Ptolemæus impidiret, Equites nostrates vada fluminis quærentes, demissoribus ripis primi transnatarunt, & conjunctâ cum legionario milite operâ magnam hominum multitudinem cecidere, qui repentina impetu perterriti frustra in fuga spem salutis collocaverant. Sub Augusto Prætoria cohors fortissimos, & fide primos Batavos habuit, quos Drusianæ expeditionis comites fuisse, cum secundo Rheno in Oceanum veheretur, populosque vicinos subigeret, vix dubitandum arbitror. Sub Tiberio Imperatore Germanicus, fabricata classe mille navium, in Insula Batavorum moratus, Oceano ad Amisiā flumen exercitum movit. Quis & Batavi aquis assueti, & natandi periti se immiscuere. Cum ad Amisiæ levam partem ventum esset, plures dies transeundo in dexteram consumpti. Et equites quidem cum legionibus intrepidi prima æstuaria, nondum accrescente unda transiere: postremū auxiliarium agmen, & inter eos virtute primi Batavi, æstuaria non morantes, temerario ausu aquis ipsis insultarunt, & dum artem natandi ostentant, præcipiti aqua turbati, nonnulli hausti abreptique sunt. Generosis nimirum spiritibus omnis mora adversatur. Et quandoquidem eos aqua ab hostibus dirimebat, primò cum aquis certarunt, ut validiore postea impetu in hostes irruerent. Sed flumen iterum Visurgis Romanos Cheruscosque

interfluebat. Ibi, qua celerrimus amnis, Cariovalda Dux Batavorum erupit in Cheruscos: atque per insidias hostibus cinctus, prævalido robore in medium agmen se proripuit, atque, uti virtus lacessita extrema tentat, tamdiu fortiter pugnavit, donec congestis telis & suffosso equo labeatur, atque ita corpore saucius, animo integer succumbet. Secuta terrestri prælio ingens de Arminio victoria. In qua expeditione Germani Batavique in fronte aciei constitere. Sed terrestria prælia prætermittere visum fuit, fluctuantem Oceanum, & flumina præliis sanguinolenta noster calamus sequitur. Sub Claudio Ganascum, qui natione Caninefas erat (Caninefates autem inter Batavos censentur) naviis suis Galloru oram maxime vastasse memoriæ traditum est. Eodē imperante, Britannicis expeditionibus incredibilis virtutis experimenta Batavi dedere. Bellum dein de sub Vitellio grave inter Romanos Batavosque exarsit. Namq; Civilis contumeliarum impatiens, maxima cura ultum ire injurias festinabat, quas concoquere generosus ejus spiritus nequibat. Vindictæ lacessiti aculei quocunq; modo concéptum dolorem pensare cupiunt. Julium Paullum Regia Batavorum stirpe satum Fronteius Capito falso rebellionis reum obtruncari jussérat. Injecta Cívili vincula, grandi libertatis opprobrio, animum sublimem, injuriarum impatientem, supra modum exasperaverant. Accusatus sub Nerone, & à Galba absolutus, sub Vitellio ad supplicium iterū ab exercitu postulatus fuerat. Erat Cívili ad simulanda negotia altitudo ingenii inaccessa, prompta audacia, atque inter suos magna autoritas. Dum itaque suis consiliis ve- lificatur, Vespasiani amicitiam studiumque partium nota

## N A V A L I S.

§

Principum arte prætendit. Cæterum Batavi, quorum libertas aspero delectu non tantum minuebatur, verum, quod minime ingenuis ferendum erat, etiam adolescentes ad nefaria supra trahebantur, facile ad res novas incitabantur, & Duce Brinione junctis Caninefatibus, Frisiisque, proximo occupato Oceano, castra Romanorum ex improviso invadunt, obvios palanteisque promiscue cædunt, castellis exitium quoque minantur, nisi Præfecti Romanorum, incensis iisdem, quod defendi nequirent, calamitatem hostilem antevortissent. Interea Civilis, omnia alia simulare, aliud vultu ostentare, aliud pectore clausum premere, ultro Præfectos reprehendere, quod castella deseruissent, cum sua cohorte Caninefatum tumultum comprimere proclive fuisset. Detectis consiliis, quod multitudo militaris, quæ studio aut ira præceps agitur, sua occultare facinora impotens est, Civilis Caninefates, Frisos, Batavosque in aciem protrahit. Haud procul à flumine Rheno directa acies Romanorum stetit. Simul naveis adversæ victoriam animo volvebant. Post modici temporis certamen, Tungrorum cohors ad Batavos profugit, consternati milites à sociis hostibusque passim cæsi. Neque minor classis calamitas, cum Batavi nonnulli, qui classiariis Romanorum immixti, remigia torquebant, tanquam ex imperitia eorundem munia impedirent, mox contra nitendo Fortunam corrumpere, naveis hostili ripæ objicere, Præfectos centurionesque alia imperantes confodere, cæteros armis territare, donec universa quatuor & viginti navium classis, aut ultrò in aduersas partes iret; vel summo opprobrio caperetur. Ita Batavi navium armorumque, quis indigebant, potiti non tan-

A 3

tum

tum necessitatibus suis, verum etiā gloriōsæ famæ consuluēre, cum per Germanias Galliasq; libertatis pristinæ vindices auctoresque celebrarentur. Sub Vespasiano eodem bello Belgico, Caninefates classem hostilem Britannicam, quæ Batavis imminebat, qua Oceano ambiuntur, ulti aggressi, majorem partē navium depressoſerunt, aut ſuperarunt. Addiderat quoq; postmodum Civilis obliquam in Rhenum mollem, cuius objectu retortis violenter aquis, campis etiam ſuopte ante ingenio humentibus flumen ſuperfundebatur. Batavi aquis affueti & natandi periti Romanos armis graveis, & aquarū insolentes in proprio veluti fatigabant elemento. A Romanorum ferocissimo quoque cæptum certamen, ſed impari conatu. Cæterum ſubito ingens illos abripuit conſternatio, cum profundis paludibus arma equique hau- rirentur. Ipsi fluctuantes, vel paludibus immersi certa pernicie, à Batavis, qui notis vadis insultabant, tanquam na- vali pugna inter aquas impetebantur. Alio iterum prælio Romanorum classis, quæ circa Noveſium Bonnamque ſteterat, injectis vinclis una cum prætoria navi à Batavis turbata, ingentique abrepta infamia. Et niſi Cerealis Ro- manorum Dux alibi noctem egiffet, vivus in potestatem veniſſet Batavorum: qui prono amne vecti nocte caligi- noſa, nullo prohibente, caſtra ſuperarunt. Plures ſomno- ſe reficientes, alto Noſtrorum ſilentio, tabernaculorum funibus inciſis, ſuis cubilibus preſſi facile trucidabantur. Alii inſolito tumultu exciti ſubito arma quærere, ſtri- etis mucronibus, veste nondum composita, per vias ruere, ægre tamen ſe ſuosque defendere. Ipſe Imperator adhuc ſemisomnis & propemodum nudus evaſit. Civilis Fortunā ferox,

ferox, vasto animo, uti in rebus secundis fieri solet, majora tentat. Biremes, reliquasque quæ simplici ordine agebantur, & ingentem lintrum multitudinē colligit, captivas naveis vericoloribus sagis pro velis instructas in opprobriū & contumeliam hostium, simulque totam navalem aciem ostentat, qua Mosa Rheno auctus vastum alveum in mare Oceanum præcipitat. Cæterum Cerealis cum Civilis promptum audacia tumultum ex tumultu, bellum ex bello ferere videret, adeoq; summa ope enīti, uti mari leges poneret, adventantesque commeatus ex Galliā interciperet, classem contra direxit, magnitudine navium & classiariorum peritia potiorem, verum numero longe inferiorem. Neque animus utrique incepta patrandi deesse videbatur. Civilis victoriā immodicus animi, ulteriora tentandi cupidine flagrabat: Cerealis metuebat, ne in conspectu novam contumeliam acciperet. Batavi prospero vento, Romani secundo flumine promovebantur. Ubi utrinque in propinquo classis stetit, mutuo telorū jactu velitationes gliscebant: præliū justum confectū non est, forsan quod terror & formidolosa Batavorū manus mentē consiliumq; hostibus eripuisset. Mirabile porrò est, quod in Agricolæ vita memoriæ prodidit Tacitus, (Batavorum) auxiliarium ope Iuliū Agricolam, tentatam antea, sed infeliciter, Monam Britanniæ insulam in ditionem accepisse, quando non classe aut navibus insulam ingressi, sed depositis in litore sarcinis patrio nandi usu, quo se pariter, & equos atque arma regunt difficultatem omnem superavere, quum obstupefacti hostes, qui mentem oculosque in classem navesque intendebant, nihil invictū ita præliantibus crederent. Sub Adriano

Equi-

Equites Batavos armatos Istrum tranatasse , magno ob id  
terrore consternatis barbaris Dacis , qui se arbitrio victo-  
rum permiserunt, Dion Cassius autor est. Ab his tempo-  
ribus usque ad Comitum tempora , fatalibus silentii te-  
nebris cuncta ferme involuta latitant , nisi quod inter Fran-  
cos , qui ad Rhenum juxta Oceanum sedem posuerant , vi-  
cinosque Batavos à Valeriani imperio , usque ad Juliani  
Principatum acerrima exarsere bellorum incendia , donec  
mutuo attritis viribus Franci in corpus nomenque Batavo-  
rum coälescerent . Quorum incredibilis maritima vir-  
tus , atque audacia Europæque , Asiæque , atque ipsi Africæ  
ingentem horrorem incussit. Quippe sub Probo Impera-  
tore , anno C C L X X X sedecim millium armatorum ho-  
minum multitudo in Pontum Euxinum se effudit , cunctas  
naves , quîs mare constratum , repento impetu invasit , di-  
ripiuit. Neque interea viri fortissimi tempus trahere , ve-  
rum instar fulminis cuncta prosternere , mare internum sub  
jugum mittere , Asiæ Græciæque oram populari , Lybiā  
infestare , Siciliam nobileisque illas Syracusas deprædari ,  
denique aucti immensis opibus per fretum Gaditanum cir-  
cumnavigata Hispania in Bataviā reverti. Trajecisse aliquo-  
tiens Batavos in Britanniam , sub Valentiniano etiam Lon-  
dinum cepisse , Britanniæq; rectorem Civilem datum Am-  
mianus commemorat . Posterioribus temporibus , ante-  
quam Comitum virtus Barbarorum violentiam fregit , Wil-  
ti , Slavi , & in primis ferocissimi Normanni , qui infestam sui  
pelagi rabiem imitabantur , modo maria pyratica fatigabant ,  
modo Bataviam , quæ tum Frisia dicebatur , fœdis populationi-  
bus vexabant ; & quanquam summopere contra enitebantur

Batavi,

Batavi, nihil tamen profuit virtus, dum fatalis calamitas cuncta turbaret, atque horrida illa tempestas prædonum, instar rapidissimi fulminis obvia quæque concuteret. Sub imperio Caroli Magni anno DCCCX Danorum Rex Godefridus classe ducentarum navium Frisiā populatus, furiosos impetus non tantum mari strinxit, verum & aduerso ignium fure, truculentisque cædibus cuncta implevit. Queis occurrēndum ratus Imperator, Flandros ad expediendam classem incitaverat. Cæterum dum res nostræ in summo versabantur discrimine, Godefridum opportuno tempore violenta fati necessitas abripuit, quem alii à satellite, alii à proprio filio, cuius matrem superinductâ aliâ thalamo ejecerat, obtruncatum referunt. Hinc pro tempore secura quies deposito armorum furore. verū sub Ludovico & Lothario non minor clades, ita ut hæc regio continua calamitate nobilis esset. Incensa aliquotiens oppida, pagi, arcesque; promiscue in omneis cædibus sævitum, ipsi sacerdotes pro victimis ante aras jugulati, vastities ubique incolarum, maria impedita, facies rerum ubique miserabilis, donec primus Comitum Didericus Normannorum truculentam ferociam contunderet, frangeretq;.

## C A P U T II.

DE

## PVGNA CIRCA DAMIATAM

ÆGYPTE VRBEM. ANNO M C C X V I I I.

**A**D bellum sacrum jam ante Principes Christianos religiosa pietas concitaverat: cui Fredericus Barbarossa Im-

B pera-

perator, Philippus Flandriæ, Florentius Hollandiæ, & Otho Geldriæ Comites nomina dederant. Verum ubi Cæsar aquis haustus mortalitatem implevit, Florentiusq; item fato cessit, in pejus labi res Christianorum cœpere. Anno demum mille-simo ducentesimo decimo & septimo iterum præter alios plures Gulielmus Florentii filius sacræ se militiæ dedit. Vlardin-ga, antiquum & nobile Hollandorum olim oppidum, Mosæ flumini incubit, aquarum violentia detrita, dum ad se cuncta trahit Neptunius amnis. Trecentarum naviū classis ibi in anchoris stetit, quæ ubi ventis secundis vela intendit, Galliæ Hispaniæq; oras prætervecta, Olyssiponem Principē Lusitanicæ urbem appulsa est, ubi cum Comes Alchaciam castellū Saracenorum, qui totā Hispaniam infestabant, vi domuissest, sequenti vere in Syriā devectus, Damiatæ urbis, quæ Nili ostio Tanaitico incubit, obsidionē, collatis cum aliis Christianis Principibus consiliis, decrevit. Oppidum illud Ægypti tum claustrum censebatur, & maritima potentia nobile. Tamiatin etiam prædicat Stephanus de Urbibus. Non esse Pelusium antiquorum juxta cum eruditis censeo, cum ad Tanaiticum ostium se expandat. Turris immensi operis, & multi militis capax, aditum urbis præcludebat, atque interius catenæ veluti fluctibus injectæ ingressum navium prohibebant. Neque obsidione urbem premere facile, nisi munitissimo illo propugnaculo superato. Diu ibi laboratum, vincendi tandem pertinacia novam artem invenit: sicuti ingenium mortalium tum valet, cum necessitas & gloria urget. Quinet dum dubius animus huc atque illuc fluctuat, in præcipiti malo incerta consilia non imperite adhibentur. Autores erant Kenemarii, ut ferratis in prora navibus vento secundo catenas per-

perrumperent. Difficile hoc factu videbatur, cum crassitiem  
quinque pedum æquasse strictas catenas traditum sit. Verum  
multa experiundo eveniunt, quæ nemo mortalium contin-  
gere posse, sibi persuadere potuit. Quippe serratae naves,  
tumido & secundo vento delatae, perruperunt crassos illos  
obices, tela & lapides desuper jactantibus Saracenis. Cru-  
entum ibi nostris certamen fuit, quia tuti & securi hostes ex  
alto certos & lethales ictus in inferiores intentabant. Tolle-  
nonibus & sambucis demum in sublime attractis, quæ jam  
fastigio turris æquales erant, æquali certamine dimicatum  
est. Verum ubi emissum machina incredibili impetu saxum  
tabulata frangeret collideretque, infractus tamen & intre-  
pidus nostris animus stetit. Quippe dilapsis propugnatori-  
bus in inferiora, spiritus tamen in sublime se erexit. Ille so-  
let esse Batavorum genius, ut assiduâ industriâ & celeritate  
omnes labores superent. Uti enim in otio luxui & desidiæ  
propiores sunt, ita in negotio assidui, temporis parcii, con-  
tinuis laboribus robustum, strictumque corpus sibi parant,  
quîs veluti nutriuntur. Nulla iis quies vel tranquillitas, nisi  
prava Fortunæ correxerint. Præcipue nautica pubes in con-  
trario & frigido elemento ignibus suis plus satis incalescit.  
Tollenone itaque dilapso, novum opus incredibili celeri-  
tate fabricarunt, ut veluti munere divino transposita illic  
machina videretur. Junctis duobus naviis quatuor mali,  
totidemq; antennæ erectæ, fastigioq; eorum instrata tigna,  
cum lorica coriis obducta, quorum ea natura, ut impetum  
lapidum telorumq; fstant, comprimantque, non incerto in  
nostra quoque militia experimento. Ab imo scâlae suspen-  
sæ validissimis funibus, triginta pedes ultra proram subli-

mes prominebant. Inusitatum hoc Barbaris machinamen-  
tum (Sambucam tamen non dissimili modo describit Poly-  
bius) horrorem incuslit, Saraceni tamen acriter resistere,  
audacia certare, rigido lapidum ictu impetere, horrido igne  
pice & vivaci sulfure incenso affligere, ita ut haustus ignis  
visceribus, nonnullis spiritum intercluderet. Verum Nostri  
animi igne superiores hac ferali flamma, tam densis telo-  
rum imbribus Barbaros obruunt, ut compulsis ad interiora  
turris hostibus tabulatum superius tenerent. Plures, dum  
per fenestras se in aquas præcipitant, vitando mortem, in-  
certam incidere. Verum Saraceni interius pressi superiores  
nostros acri & mordaci fumo abegerunt. Hæc autem cala-  
mitas occasio fuit majoris virtutis, quæ lassita omnem  
patientiam superavit. Ambitus turris modica terra cinge-  
batur. In hanc insultans magno impetu noster miles, dola-  
bris portas perrupit. Ita cessere certis conditionibus vali-  
dissima claustra, sicut nihil fortitudini & labori invium est,  
Nostrorum sociorumq; violentiæ. Turri superata, novus &  
immensus labor urbem ad dditionem cogere, quæ tribus  
munitissimis muris cincta inexpugnabilis erat. Itaque lenta  
potius fame premere cives, quam irrito nixu armorum vi-  
sum fuit. Interea Corradinus, qui Saladino mortuo apud  
Saracenos sumnum imperium obtinebat, enixe cuncta  
procurare, quæ ad tantæ urbis liberationem excogitari po-  
terant. Quippe necessitas cum utilitate juncta eum urgebat,  
quæ magna sunt virtutis incitamenta. Aliquotiens castra  
nostra non sine clade adortus, aliter fortunam tentan-  
dam ratus, eliciendo Nostros, qui campestri huic prælio pa-  
rum assueti erant, pene ad extremā eos calamitatem rede-  
gisset,

gisset, nisi rex Hierosolymorum Ioannes Barbaros singulari fortitudine stitisset, atque ita Nostris se in castra recepissent. Neque verò miles noster frangi animo, sed spiritum ex adverso casu sumere, & quod sublimis mentis indicium, non cedere obsidionis oneri, sed obniti. Omnia perrumpit constantia & assiduus labor. Et sapientis est cunctando vincere, ubi pugnando non licet. Potior est illa victoria, quæ certa et si tardior, quam quæ per incerta casuum temerario acquiritur. Post annum itaque obsidionis (addunt alii septem menses) Nonis Novembribus Anno cccc xix. civitas adacta est potestati Christianorum se dedere, multis millibus fœda peste consumptis. Guilhelmus Comes re bene gesta sequenti anno domum reversus est.

## C A P U T III.

*PRÆLIVM INTER HOLLANDOS**ET FLANDROS, A N N O c I C C X C V .*

**P**LURES Flandrorum propter Zelandicas insulas bellorum motus contra Hollandiæ Comites exarsere. Vicibus suis modo quies, modo turbulentus belli furor aquis atque terris incubuit. Neque fœderum ulla sanctimonia, adeò præceps dominandi libido transversos abripuerat. Guido Flandriæ Comes hac tempestate in spem occupandę Zelandiæ adductus, quod Nobilitas ejusdem minus æqua Comiti Florentio esset, classem in advorsa litora stringere meditabatur, jamq; adeo morte, rapinas, postremo omnia, quæ hostilis animus lubet, minitari. Interea Florentius,

animi acer, gloriæ militaris avidus nihil intermittere, quod ad tanti belli molem necessarium duceret, antequam ipse adventaret, per Legatos populum ad fidem adhortari, denique coacta militari juventute ipse Vlissingam contendit. Heic non morandum ratus, arma hosti opponere, quam eundem operiri potius duxit. Renessius itaq; jussu Principis Flandriam armata manu invadere, Slusam ignibus fœdere, agros quaquavorsum populari, tribus denique millibus Flandrorum cæsis vel captis in Zelandiâ revorti. Frisii quoque duce Brederodio animo feroces, ex vicinâ Flandriæ insulâ Catzandiâ prædam agere, trahere, rapere, militem contra nitentem cædere, postremò, tanquam insulâ capta, lubidini ac licentiæ victorum cuncta exponere. Flandri, quos non mediocris dolor incessebat, sibi speratam victoriam non tantum adimi, verum contra hostes insolentes dominationem in propria regione agitare, ne viderentur socordia, vel ignavia bonam occasionem corrumpere, Beerlandiam ignobilem Zelandię insulam invadunt, & populantur. Florentius, qui jam ante Zirizeam profectus fuerat, mature admodum Dodinum Everingū, & Borsalium expedita classe & milite, eò contendere imperavit. Quibus hoc optimum factu visum fuit, uti alter subito concito tumultu hostem à tergo adoriretur, alter fugientem ad naves militem sisteret, & classe naveis illorum disturbaret. Et quidem consilium hoc probe cessit. Inopino enim tumultu excitis Flandris, facile oppressi, pauci virtutem armis ostentabant, reliqui, in morem pecudum fugati, sparsis armis ad naves se recipere nitebantur. Cæterum dum Nostri sua classe hostiles naves attentant, metu hostes consternati, undique circum-

cumventi, animo & corpore facile succubuerent. Fœda illa & miserabilis strages fuit, namque aut ferro cedebantur, aut qui natando assueverant in profundum insilentes, diu cum fluctibus luctati, magis aut minus mature, postremo tamen aquis obruerantur. Plures quam mille tam ignobili letho perierte. Ex tribus millibus hominum, quos in Zelandiam trajecisse constat, trecenti modo navibus incolumes sua testigere litora. Una quoque navium, quæ fugientes vectabat, majori nostrorum violentiæ cessit. Captivis imperator effusus clementia parci voluit, eò quod inconsulta multitudo huc atque illuc fluctuans Duces Factionum ut plurimum sequitur, ipsa culpæ expers ex aliena libidine vitam agit, & prout illorum, qui dominantur, similitas vel arrogantia fert, ita bonum malumque publicum existimat. Nudos tamen in patriam remitti placuit, retentis iis, quos dignitas vel opes in excelso collocaverant. Contigit hæc victoria Anno cccc xcv vicesimo & septimo Octobris die.

## C A P U T IV.

*PRÆLIVM INTER HOLLANDOS  
ET FRISIOS ORIENTALES*

ANNO cI ccc xcviii.

**A**nnus agebatur millesimus ducentesimus & nonagesimus octavus, cum fœdis admodum conditionibus, Frisiae Occidentales victoris Comitis arbitrio se suaque omnia permitterent. Wilhelmus Trajectinorum Antistes irâ concitus & æstuans, Orientales Frisios ad arma concitat, cui, cum Pontificis Romani jussus obtenderetur, morem non gerere

gerere magna illos relligio incessebat. Cum non modica  
hominum confluxisset multitudo, Præsul, quem pacis artes  
magis decebant, desiderio belli quam maxime flagrabat, &  
confestim milite navibus imposito, vento secundo juxta  
Monachodatum militem terræ exponere satagebat, cæte-  
rum incolarum & rusticorum ferocia incepto patrando ob-  
stitit. Sicuti autem maxima quæque facinora impetu valent,  
mora evanescunt, ita in celeritate præsidium rati vicini Ke-  
nemarii & Waterlandi, quorum animos horridos cælum  
& salum induraverat, expedita classe Australem sinum in-  
grediuntur, & primo insultu navem milite refertam à cæte-  
ris abstractam facile expugnant. Leve quidem hoc initium,  
sed futurę victorię non incertum fuit præludium. Prout-  
enim prima quæque cedunt, talem exitum Fortuna ut pluri-  
mum indulget; quę ubi nutare cepit, præcipiti gradu à sum-  
mo declinans ad infima prolabitur. Felicitate gliscit auda-  
cia, adversa rerum etiam fortissimum quemque dejiciunt.  
Diu acriter admodum certatum. Multitudini navium hostis,  
Noſtri agilitati fidebant. Tandem, quanquam contra vim  
majorem pervicax hostis obniteretur, captis aut depresso  
pluribus navibus fœda fuga ſibi consuluerunt; quis fugien-  
tibus majus periculum, major clades, quā certantibus. Mu-  
ulta hominum millia cecidere, plurimi capti. Antistes clade  
tanta perculsus, cum vix cymba evallisset, ad moderata post-  
modum pacis consilia flexit, quam tamen iterum perfide  
rupit.

CAPUT

## CAPUT V.

## PRÆLIVM INTER HOLLANDOS

ET FLANDROS, ANNO CIccciv.

CUM Philippus Pulcher in Galliâ rerum potiretur, Régiique exactores Flandros violentius premerent, atterrerentque, primò seditiones motæ, dein ad bellum ventum est. Tota Flandria excepto Gandavo, Gallorum nomen ejuravit. Tumultuum scintillas accenderat Petrus Coningus, artificio fullo, quem inconsulta plebes, quæ rerum novarum studio suis sæpe periculis lætatur, patronum elegerat. Accessit autoritas, dum se socium laborum periculorumq; exhibent, Guido Namurcæus, filius Comitis Guidonis, & Guilhelmus Juliacensis ejusdem ex filiâ nepos. Huic bello se quoq; involverat Hannonii gener Atrebatensium Comes. Cui cum accessissent sub-imperio Osterbandii Hannoniorum auxilia, prope Cortracum fortiter dimicatum est, à Flandris victoria stetit. Cumque iidem Hannoniam infestarent, sicut post victoriam Fortuna impetu valet, Ioannes Hannonius Hollandiæ Comes, opem Batavorum implorans facile impetravit. Verum ea militandi ratio melior Proceribus sedit, ut Hollandi Zelandiq; ipsam in Flandriam irrumperent, quò relicta Hannonia propria defendere Flandri cogerentur. Guido in Catsandia militem suum coegerit, unde facilis & opportunitus in Zelandiam appulsus. Verum Guilhelmus trajecto frèto acri certamine Flandros Catsandia ejecit, atque Arnemudam reversus, victor per ora cunctorum volitabat. Vetus fuisset hostis, nisi proditio vicisset,

cisset, quæ lubricum adolescentiæ in transversa abripuit. Prima illa çtas facile proditorū artibus patet, dum sub specie amicitiæ tutò inimici imponunt. Labante Fortuna tota fere Flandro Walachria cessit, Guilielmus Medioburgo occupato Zirizeam se receperat, quæ arcta mox obsidione pressa. Adventu Comitis ex Hannonia induciæ compositæ, sed mox ejusdem senectus, cursu vitæ pene jam confecto, annis & morbo ingravescens, in præsentem contemptum incidit. Devicta tota fere Zelandia, in sola Zirizea momentum Fortunæ stabat. Tota quoque nutabat septentrionalis Hollandia, Harlemo excepto, sed illa virtute & odio in hostem concitata brevi jugum excussit. Hollandia ejectus Flander Zirizeam magno molimine obsedit, sed inaudita civium virtus omnes conatus contudit. Nullo modo se dederat, pertinax illorum fuit fortitudo. Magna autem pars est victoriæ vincere velle, & morti potius quam alienæ potestati succumbere. Qui potuit mortem contemnere, omnia contempsit. Tranquillitas animi, & absoluta libertas supra omne hostium imperium est. Armis, annonâ fatigati hoste tamen superiores fuere. Ultima jam fortissimis civibus incumbebat necessitas, nisi trahendo obsidionem validâ manu suppetias ferret Osterbandius. Ita inter metum atque spem dubii adversa & secunda sibi pollicebantur. Regneri Grimaldi Præfecti maris, nomine Regis Galliarum suppetiæ expectabantur. Sicut autem non ignavia & socordia, sed industria & vigilantia imperia continentur; ita Guilielmus nihil minus quam segnis, aliquotiens Regnerum officii & extremæ Zirizeanorum calamitatis monuerat. Ille longas moras circa Caletum necundo, tandem anchoris solutis

solutis in laxum Mosæ ostium feliciter appulit, atque undecim triremibus, aliisq; triginta & octo navibus, juncta Osterbandii classe rectâ Zirizeam petuit. Cuncta quidem mortaliū incerta, nihil incertius mari, quod elementum ventorum habris agitatū ancipi fluctu movetur. Ventis inquis fluctibusque adversis jactati decimo & tertio die Greveningam (quam maritimam sedem hodie Gravelingam indigent) locum non longe à Ziriza dissitum appulere. Incensis ignibus patuit civibus pulcherrimus prospectus veluti adventantis victoriz, quam & animo ignei conceperant. Ipsi quoque excitatis ignibus beneficium agnovere, antequam peractum esset. Namque in conspectu classis nostræ certam sibi liberationem spondebant. Nulla res magis animos dubios obsessorum, & ad desperationem inclinantes erigit, quam propinquum in conspectu auxilium. Sperant ad extremum usque, & sibi secundam Fortunam pollicentur, et si exigua evitandi pericula spes suppetat. Belli dux nihil magis timebat, quam ut illum fortissimi cives vel hostem timere, vel desperare crederent. Itaque postero die prope Zunnemariam prætervectus Scaldiæ insulæ oram, in hostium, & oppidanorum conspectu anchoras fixit. Nullum aliud avertendorum periculorum remedium erat, quam extrema pericula adire. Neq; consilia in incerto erant, quia nulla alia ratio subsistere poterat, quam navalí prælio cum hoste configendi. Hostem sua veluti potentia (ducenta enim millia hominum habuisse in hac obsidione Stokius refert) & rerum successus defendebat, nostros vincendi ultima cupido urgebat. Ioannes Renessius, qui cum Flandro arma junxit, crebris Trajecto literis Guidoni autor fuerat, ne fortu-

nam incerto maris committeret; Regnerum archithalassum  
militiae illius veterem esse, terrestri prælio magis assuetum  
suum militem, si uspiam in mari Fortunam dominari, non  
nunquam turgidum, aliquando tacitum & quietum mare  
noxium esse. Verum gloriæ cupido abripuit Guidonem, qui  
terrestri gloriæ maritimam jungere satagebat. Parte exerci-  
tus ad Zirizeam relicta, cum cæteris classi se commisit, &  
navigiis & numero militum superior. Guilhelmus annonæ  
causa nonnullas naves emiserat, quîs præsidiariæ longæ ad-  
jectæ erant. Hæ frumento onustæ in Zelandorum classem in-  
ciderunt, atque in manu victoris fuissent, nisi longæ impe-  
diissent. Acri prælio fusi hostes, prædæ tamen inhiabant, atq;  
extremas navium tentabant. Pugnare & defendere res suas,  
longe difficillum, præcipue vago & fluxo elemento. Una  
nostrarum, accendentibus mox aliis, ita quatuor hostium  
naves adorta, ut fluctuantes per adversa & extrema, ne ma-  
ris & navium obsidione premerentur, relictis suis navigiis  
terrestri fuga sibi consuluerint. Initia belli præliorumque  
fama constant, victosque infortunium dejicit, raroque vi-  
ctis redit in præcordia virtus. Serio itaque decretoriis armis  
hostem aggredi Osterbandio visum. Dies illuxerat Au-  
gusti decimus, cum ingens navale inchoatum prælium.  
Quatuor in fronte navibus imperabat Ioannes Padrogus,  
militiae maritimæ gnarus, sed vadourum in his locis imperi-  
tus in sicco arenarum hæsit. Expectare itaque tempus Gu-  
lielmus debuit, donec fixa navigia æstu maris attollerentur.  
Occasionem hanc nauctus Guido Namurcæus, incendiendi il-  
las spem concepit. Incendiariæ navi flamma suggerebatur,  
quæ sulfure atque bitumine fovebatur. Hanc secundo vento  
pubes

pubes nautica in nostra immittebat navigia, & ubi propter ignem in scaphas desilierat, etiam contis sed frustra promovere nitebatur. Padrogus in aquis incendium metuens, velis madidis, quantum in se erat, naves tegere, quo subita ignis vis obtunderetur. Verum dum subito ventus vortitur, suis pene ipsi flammis hostes perierunt, sociique, qui scaphæ se commiserant, ægre ad terram delati evaserunt. Sequenti nocte somno & quieti se Nostri dederant, nihil ausurum Guidonem rati: sed ille somno viatos pressosque credens, subito in nostram classem invehitur, primoque assultu quatuor captis, cæteras magna vi adoritur. Vigiles militem excitare, tumultu omnia implere, miles contra excusso somno fortiter obniti, adversa suę socordię imputare, turpe censere victū victori incumbere: Osterbandius verò consternatos confirmare, incitare, ad virtutem suo exemplō cogere. Neq; minus Guido suos urgere, ultimū hoc prælium laborū finem prædicare, immortalem gloriā, opima spolia, quis militaris juventus potissimum incitatur, ob oculos ponere. Audendum tantum, cætera in proclivi esse. Occupatis quatuor navigiis percuslos hostium animos. Victoria in jam inchoatam, turpe fore si non persequantur. Ita utrinque expedita classe prælium adoriri, clamore nautico cælum implere, arma armis nectere, telis tabulata navium tegere. Cruenta hæc maxime pugna, quia in angustiis certa tela figebantur. Utrinque vitæ prodigi mortem incurvant, neq; inulti in armis moriebantur, dum furor ultius mentē præcipitem agebat. Guido Namurcæus numero navium & densitate potior, pluribus suis singulas Hollandorum cingere, atque opprimere tentavit. Quod unus ex præfectis

nauticis conspicatus, singulari spiritu hostium vitæque contemptor, in medium hostilem classem prorumpit, hæc ratus cæteros, ut auxilia & suppetias ferrent. Hoc exemplum cæteros traxit, ne amicum in præsenti periculo deserere viderentur, quibusdam etiam pudor ad virtutem incitamentum fuit. Tum primum atrox & cruentum consertū prælium, adverso corpore passim tela figebantur, in caderibus vindictæ adhuc cupido hærebat. Guido spe potiundæ victoriæ incensus edixerat, ut nulli parcerent, atque in exorabili lege omnes ad internacionem usque delerent. Altius hec in pectus Nostrorum descendit crudelitas, itaque in animum induxerunt suum, si se subducere ex ruina nequirent, eadem hostem involvere. Extremæ necessitati addita est extrema virtus, quæ ita in immensum creverat, ut mortem juxta atque vitam contemnerent. Horrendo clamore in hostem irruere, cedibus passim grassari, victoriæ spirare. Neque minus hostis nostros premebat simul junctis viribus. Una ex Flandricis navibus, corbe superius ad mali culmē milite stipatâ, atrociter nostris imminiebat, quia ex alto in depressa certa tela immittebantur. Vieta demum est calamitas infracto pectore, dum Fortuna vicit. Pressa forte nimia gravitate corbis, ruptis vinculis militem subito, vel in mare præcipitem egit, vel collisis membris tabulatis impedit. Ibi Batavica pubes hostili calamitate accensa audaciter in transtra hostium transilivit, atq; sanguinem suum hostili sanguini miscuit. Neque Flandro animus subsidit, cui exstiente ex imis præcordiis spiritu concitum in vindictam corpus, & assueta sanguini truculenta manus. Verum quia hosti difficilis ad salutem recursus erat, plures

con-

confossi, plerisque naves in fugam acte, aut aquis mersæ  
obrutiæque. Interea Padrogus, qui diu in vadis hæserat,  
pugnandi potestatem non habuerat, tandem æstu flui-  
tantibus naviis, majori confidentia fessos ubique, qua  
vela direxerat, pressit, devicitque. Ita ad meridiem pugna-  
tum, ad septentrionem ægre hostis pellebatur. Neque tu-  
tum erat se subducere, ne fugientibus similes virtutem ho-  
stium accenderent. Artificio hoc usus Osterbandius, quia co-  
minus certamen conserebatur, ut ignita in hostium naves  
ligna immitteret, quis extinguendis dum occupatur miles  
& nautica juventus, fumo denso in oculos converso, incertis  
ictibus dimicabant, dum amicos passim hostium loco truci-  
darent, à nostris autem pressi certo occumberent. Ita metu  
exteriti degeneri trepidatione fuga sibi consulunt. Dum  
hæc in dextera parte geruntur, dubius rumor ad aures Oster-  
bandii venit, Nostros alterâ fugæ proximos esse. Properanti  
ad suppetias ferendas nunciatum, hostem quoque in ea parte  
debellatum. Nam consternati clade sociorum, juxta primâ vi-  
ctoriam alterâ veluti obrulerant. Tam bonis auspiciis Fortu-  
nam prensare, atq; hosti fugienti insistere visum fuit, ne tem-  
pus ad colligendas vires caperet. Sed Flander & terrore & ne-  
cessitate victus, relictis turpiter naviis, telluri se commisit.  
Naves occupare sufficiebat cordato Imperatori, ne hostes, à  
tergo pressi, dum extrema præ oculis, ad audaciâ accingeren-  
tur, & ultima necessitas pugnandi legem imponeret, fatali  
sæpe in bello rerum mutatione, ut exiguis momentis sors  
belli invertatur. Interea fractus Fortunâ non animo Gui-  
do, etsi dispersos passim & fugitivos suos videret, omnia ex-  
periri, & sicut magnum Imperatorem magnus animus decet,

extre-

extrema tentare , etiam aggredi Osterbandium , sed frustra ausus. Interea cives fortissimi Zirizeani interspem metumque positi , Martis dubii eventum , negotiumque Fortunæ expectabant. Obscurum noctis prospicere non permittebat , & mendax rumor , autore Flandro , qui circa urbem vagabatur , animos perculerat , quo victum Osterbandium , classem fugatam , ferebatur. Dubia tamen fides , sive quod indices suspecti essent , sive quod firma & credula spes illud non admitteret . Verum ubi prima lux noctem abegit , hostibus victis vel pressis , gaudio tripudiare , Deo gratias agere , qui gravissimè afflictos liberasset , confusæ antea menti gaudia reddere , eo lætiores , quo majori ante dolore fracti turbatique fuerant. Juvenes , senes , pueri stipati manus ad cœlum tollere , sibi invicem gratulari , & prout cuique publica lætitia verba dictabat , effundere. Guilhelmus victoriam prosequendam ratus pressos ulterius fatigare ; ne hostis iterum vires colligeret , omnem occasionem præcidere , sicuti præliorum maritimorū incerta est & lubrica possessio. Guidonis Prætoriam navem quatuorq; alias cinxerat Regnerus Archithalassus , sed Guido incredibili animi magnitudine ita Gallis restitit , ut ad Nostros se recipere cogeretur. Osterbandium hoc egre ferente pugnandi iterum præceps cupiditas rapuit , ne ille elaberetur , in cuius captivitate potissimum momentum victoriæ erat. Post grave prælium Guido victus captusque Nostris cessit , qui tanto furore & odio correpti in eum fuere , ut , nisi propere Gulielmus violentis manibus eum subduxisset , atque Regnero in Galliam deducendum obtulisset , extremam vim passus fuisset. Nihil acrius accedit mortalium pectora , quam vindictæ cupido.

Alie-

Alienis calamitatibus humana sorte ut plurimum indolescimus, propriis ad ulciscendum urgemur. Guido multarum calamitatum autor fuerat, cuius sanguine tantum crimen vindictę cupido militi expiare visum fuit. Neque multum incusari militare vulgus poterat, nisi malum exemplum Principibus esse censuisset Comes, in Principum vitam s̄avire. Subtractus itaque illorum ferocię Guido in Galliam ablegatus, ut honestā ibi includeretur custodiā. Hoc prælio decem millia hostium cæsi, captivorum numerus subductus non fuit. Mille & centum naves (inter quas procul-dubio etiam minores) captæ cum omni militari apparatu. Quo prælio gravi Flandrico bello finis impositus, undecimo die Augusti, cum à matutino tempore usque ad meridiem sequentis diei magnā utrinque fortitudine dimicatum esset. Tunc consummatum plenumque bonum habet Fortuna, cum calcato omni malo in tuto posita est. Itaque postquam Regnerus cum captivo Guidone in Gallias abiisset, Gulielmus Zirizeam contendit, partim fovendis curandisque vulneratis, partim ut hostilem militem, qui ante urbem à Guidone relictus, vi & armis subigeret. Plerique navibus consensis vela intenderant, ut Flandriæ litora pertingerent. Reliquis, quia omnes navigia capere non poterant, inter arenaceos colles Scouwanę insulæ refugium fuit. Queis, nisi extrema mortis intentaret victor Gulielmus, jugum accipere consilium erat. Noverat Osterbandius de vita desperantibus non esse nimis acriter insistendum. Sic uti ictus scorpionum tum maxime letales, cum extrema imminent: ita etiam hostes tum s̄aþe maxime lædunt, cum in angustias redacti, unde pedem referre nequeunt, in fu-

rorem rapiuntur. Sex itaque millia dedititorum in potestatem Osterbandii venere, parati jussa facere. Carceres ubiq; captivis pleni premebantur, qui veluti pecudes in sua tenebricosa antra abigebantur, nisi quod mille in tanta captivorum frequentia facile elapsi fuerint. Ita Scouwanâ insulâ liberatâ, cæteræ civitates solo terrore victæ, Middelburgen-ses etiam victori gratulantes occurserunt, more mortarium, ut ii, qui maxime adversi fuere, primi plerunque officiis certent. Eversa à Flandris mœnia restitui jussit Osterbandius, ordinataque Rep. tristis nuntius venit, parentem, qui diu morbo gravi decubuerat, præ nimio gaudio tantæ victoriæ vitam cum morte commutavisse.

## C A P U T VI.

*PRÆLIVM INTER MARGARITAM,*

*FILIVMQUE EIVS GVLIELMV M,*

*A N N O C I C C C L I .*

**H**Ac tempestate, scissâ in partes Hollandiâ, in mutuam civium perniciem ambitiosus Procerum populique furor gladios strinxit. Cabeliavios Houxiosque se indigebabant, & cinericeo vel rubro pileo insignes distinguebantur. Illi & quidem validiores Gulielmo, hi Margaritæ fabebant, revera factionum Principes bonum publicum simulantes pro sua quisque potentia, vel utilitate, implacabili odio certabant, populus semel concitatus studio partium suis admodum lætabatur periculis, & ferocienti mari similis, neque humani neque divini quicquam reliquum fecit.

Paren-

Parentum liberorumque diversa sacramenta, cædes promiscuæ, vastities urbibus & pagis, templa violata, agri cognato sanguine imbuti, & tanquam sanguinem extincturi ignes passim crepitabant. Scelera sceleribus tegebantur, & propinquos consanguineosque occidisse virtus vocabatur. Utrinque & victores & victi Patriæ sibi que graves. Dum ita nullo pudore flagitii inconsultus populus agitabatur, Cabeliavii, qui Margaritam imperio ejecerant, & contra nitentes hostes Reipublicæ pronunciaverant, ubi perfecto scelere magnitudinem ejus percepere, animo impuro & inquieto Deo hominibusque infesti, Gulielmo, ut contra matrem parricidalia arma stringeret, iteratâ legatione persuadere tentant, cuius licet primò obstinatum animum tandem expugnarunt. Consternati adventu Gulielmi Hoexiorum primi magnis itineribus in Hannoniam contendunt, effictim rogam Comité, ne laboranti & fatiscenti Reip. deesset, Cabeliavios perfido furore omniū cervicibus & fortunis imminere, eosdem impotenti dominatione matri eripuisse imperium, ut filio traderent. Sese, quia pro illius auctoritate pugnarent, crudeli illorum potentia obnoxios, Deūm hominumq; fidem implorare, atq; suppetias contra vim publicā postulare. Abrepta iracundię oestro impotens sui fœmina, acerba quæq; filio minabatur, nisi imperio recederet. Verum nullis ille territabatur ininis, quibus bellum non geritur, sed robore. Margarita itaque Anglorum Regis Eduardi subsidiis militem colligit, & in Walachriam vela dirigit. Cujus auditō adventu Gulielmus ad omnes imperii curas intentus, constituit certaminis copiam facere, comparataque ingenti classe extrema omnia experiri. Neque è re ju-

dicavit adventum matris opperiri, cum præsentia Principis  
venerationem intendat, mobilisque plebes auctoritate &  
veluti præsenti numine terreatur, quæ nunc illi Proceribus-  
que obnoxia, vel novarum rerum studio præceps agebatur,  
vel si incepsum facinus non probaret, contra niti ex impo-  
tentia nequibat. Proceres quoque tot facinoribus cōoper-  
ti, si prospere res non cederent, omnia atrocia atque aspera  
sibi eventura non ignorabant. Itaque nisi victores, vitam  
atque mortem juxta æstimabant. Prælii utrinque copia fa-  
cta inter Brilam & Gravesandam, qua vasto & præcipiti o-  
stio in mare Oceanum Mosa aquas suas emittit. Guliel-  
mus manu, voce, gestu, suos accendere, nullam salutis spem  
nisi in victoria proponere, heic aut virtutis immensa præ-  
mia, aut moriendi fœdam conditionem præstò esse. Satius  
esse pugnando occumbere, quam instar pecudum postmo-  
dum mactari. Facile fuisse novum aliquod facinus incipere,  
Principemq; eligere, nunc eundem armis tutandum. Contrà  
mater supra sexum animata ita suos allocuta: Virtute vestra  
& probitate fretæ obviam hosti an filio ire, certamen con-  
ferere, impotentem proditorum, qui immani avaritia,  
cruentis manibus, intolerabili superbia omnibus probis in-  
fultant, dominationem confringere, libertatem opesque  
vestras armis tegere, mihi consilium est. Sua nunc cuique  
dextra vindictam tot malorum pariet, atque iniquam om-  
nium sortem excutiet. In manibus nunc vestris liberta-  
tem, opes, gloriam patriæ, salutem, portatis. Rogo & ob-  
testor, ut quo animo fœdam virtæ conditionem tolerastis,  
eodem virtutem experiamini. Ego imperatrix, ego miles,  
periculorum consors, hic & animo & corpore præsentem-  
me sisto,

me sisto, & mox, ut spero, Comes, nunc perfidia Procerum extorris, vobiscum agam. Ita accensi dissono clamore, infestis utrinque navibus concurrunt tanto ardore atque audacia, ut, nisi vincerent, mortem ipsam elegisse viderentur. In primis Cabeliavii, quos fortis ipsa rei necessitudo fecerat, tam furioso impetu pugnabant, ut victoriam tandem extorquerent. Namque propria salus eos supra modum efferaverat, non ignaros extrema viciis imminere. Accessit & novi Principis autoritas, quem ne temere elegisse viderentur, tutari summa ope nitebantur. Cæsus Præfectus classi Anglicæ, plures alii, inter quos ex primâ nobilitate Costinus Renessius, ac Florentius Hamstedus mortem oppetierunt. Theodericus Brederodius, expeditionis præfectus manu & consilio promptus, fortiter pugnando, magnis difficultatibus circumventus, captivorum numerum auxit. Margarita tanta calamitate oppressa, diffidens rebus suis in Angliam profugit, cæteri periculo præsenti percussi, mortis metu nutantes, cum ne quicquam semel territi animi confirmarentur, cum totâ classe Principem suam insecuri, victoriam & imperium Gulielmo reliquere. Quanta fuerit prælii atrocitas inde liquet, quod nonnulli autores supra fidem, integrum triduum Mosam sanguine decolorem præcipites aquas egisse memoriae tradiderint. Pax pro arbitrio victoris ita constituta, ut illa, quoad viveret, in Hannonia duntaxat rerum potiretur, cætera omnia Gulielmo cederent.

## CAPUT VII.

## DE PRÆLIIS TEMPORE IACOBÆ.

ANNO CLO CCCC XXVI.

**N**ULLA admodum quies in Batavia fuit, cum inquieti ingenii Princeps Iacoba Bavara rerum potiretur. Accedebat lubrico, & impotenti animo summa in matrimonii contrahendis dissolvendisque levitas, ambitio, & crudelitas. Quæ vitia varia Fortuna pensabat. Aliquoties terra vietrix, mari semper inferior. Repudiato marito Ioanne Brabanto ad Hunfridum Glocestriæ Ducem, fratrem Henrici V Angliæ regis, animum inclinaverat. Hinc rebus in Hannonia adversis ipsa captivitati mancipata, Hannoniæ regimen priori marito, Hollandiæ tutela Philippo Burgundo cessit, qui rebus turbulentis fortunam prensabat. Gando, ubi detinebatur Iacoba, assumpto virili habitu elapsa, præcipiti audacia in Hollandiam venit, atque supra promissa Fortune generosum animum erexit. Sicuti autem presentia & auctoritas Principis facile labantes animos fulcit, Scoonhovia primum, mox & Gouda, & Veteres Aquæ Dominam agnovere. Rerum novarum cupidi Ultrajectini etiam fœdere se obstrinxerant. Hinc cruentis admodum præliis civilia arma insonuerunt. Maritimo certamine bis pugnatum est. Dux Glocestriæ ex Britannia Brouwershaviam versus, quod Scaldie oppidulum est, dominum Filia-terre cum ingentibus copiis miserat, ut suppetias uxori ferret, quæ infelicem animum magnâ rerum potiundarum cupi-

cupiditate distenderat. Neque minori apparatu resistebat Philippus Burgundus, eo acrius, quod pro imperio & summa potestate pugnari non ignoraret. Directæ utrinque acies in fluctibus, & milite armato tabulata navium ferrebat, neque igneum fervorem Oceanus extinguere poterat. Summa cum prodigalitate sanguinis diu acriterque dimicatum, nutansque Fortuna tandem à Philippo stetit, cum Henricus Borsalius toparcha Veriensis, classis Praefectus, animo & corpore validus, incredibili virtute victoriam patrasset, & ob præclara facinora Equestrem obtinuisse dignitatem. Plures ex Britannis cæsi, nec pauci ex Nobilitate Zeelandicâ, qui Jacobæ favebant. Illa tamen inconcuso animo stetit, & supra sexum, supra cladem invicta fuit. In Hollandia dubia sorte usq[ue], classem circa Wiringam expedivit, cuius miles Enchusam ipso meridie ingressus, centum ex primoribus civium à geniali mensa detractos capite multavit. Invisa hæc populo crudelitas incitamentum vindictæ fuit. Crudelitas crudelitatem parit, atque exemplo suo docet: nihilque acrius fatigat & pungit mortalium pectora, quam vindictæ cupido. Sequens annus, qui erat clo cccc xxvii, ultimam calamitatem justumque talionis exemplum Jacobæ attulit. Ingenti illa classe ausa tentare maria, sub ductu Guilielmi Brederodii, cuius miles cuncta in ditionem Principis redacturum vane jactabat: verum contra obniti Harleum, Amstelodamum, Horna, aliæque maritimæ civitates, quæ potentia navalí pollebant. Magnâ sui confidentiâ obviam hosti itum. Iacet in ultimis fere Hollandiæ finibus Wiringa insula, quæ quondam continentali hærens, simul cum Tessalia ab Oceano divisa, cum Anno clo c lxx hor-

renda

renda tempestate, & violenta maris s̄ævitia insulæ à terra  
avulsæ, atq; infuso stagnantes æquore campi vasti sinus spe-  
ciem exhibuerunt. Prope hanc insulam stationem classis  
posuerat Brederodius animi acer, militiæ intrepidus. Na-  
ves Cœtitatum, quia multo Brederodii naviis majores e-  
rant, proprius accedere nequibant, quod aquæ minus pro-  
fundæ & cæcis vadis cinctæ eas non admitterent. Neque  
vero confœderati desidia & socordia ibi tempus contrivere,  
sed in conspectu adversariorum anchoris fixis, ita illo-  
rum naves pressere, ut nullus nisi pugnando exitus esset.  
Gulielmus jam ante cum Texelia insula conditionibus fa-  
ctis, novas quoque amicitiæ leges Wîringæ parabat, probe  
gnarus, quantum in his insulis, quæ claustra essent Oceanî,  
momentum positum esset. Verum ubi temporis commo-  
ditas consilium destruxerat, armis sibi viam quærere in ani-  
mum induxit suum. Iussit itaque militem cum nautica pube  
propere se classi committere, cibo corpus & spiritus refice-  
re, dein minoribus naviis hostem adoriri. Luncta virtuti  
sagacitas, tūm demum manus conserendi, ubi incrementum  
maris resederat, sperans majora Cœtitū navigia vadis hæ-  
sura, neq; proclive fore, ut fluctibus attollerentur. Ingenium  
duci prudentia validum, consiliumq; hoc firmis rationibus  
nitebatur. Quippe pluribus junctim naviis cum pauciori-  
bus, quæ se jungere nequibant, proclive erat præliū. Consi-  
lium hoc posterior miles evertit, qui animo defectus, neque  
morem gerens jussis, Fortunam primum priorum naviogio-  
rum expectabat. Ita quibus junctis victoria in manu fuisset,  
separati facile victi. Etsi enim qui in principio stabant for-  
tissime dimicarent, & pericula summâ virtute propelle-  
rent,

rent, à suis tamen turpiter relictī, tandem victi vel ferro, vel aquis occubuerunt, vel inter captivos numerum implevēre. Prima acie victa, omnibus admodum navigiis occupatis, subsidiarius miles in fugam actus, ab adversa parte interceptus, ita ut nulli vel pauci admodum evaserint. Fœderati enim, ubi victoriam adepti sunt, nihil reliqui victis fecere. Brederodius cum captivis Enchusam delatus in præsenti mortis periculo versabatur. Octuaginta captivorum sanguine crudelitati in cives Enchusanos superiori autumno exercitæ litatum est. Pluribus suffragiis propter venerationem antiquæ nobilitatis exemptus est ferali supplicio Brederodius. Hoc prælio res Iacobæ ad incitas redactæ omnem spem dominationis exemere, neque enim vires vel copiæ illæ suppetebant, sine quib; extrema omnia experiri dementia videbatur. Ab illa itaque tempestate otium iterum & tranquillitas Reip. incubuit, atq; ita lites compositæ, Anno cccc xxviii, xiiii Maji, ut Philippus harum regionum tutor, & post mortem Iacobæ legitimus hæres esset.

## C A P U T VIII.

*BELLVM MARITIMVM CVM  
OSTERLINGIS, AN. CL cccc xxxix.*

**B**E LLUM hinc maritimum inter Batavos Osterlingosque, atque alios maris Balthici accolas grave exarsit. Belli causa insolens navigatorum direptio. Cunctis admodum mortalibus injuriæ suæ graves videntur, nullæ graviores, quam quæ cum jactura bonorum conjuncte. Repetitio  
E postu-

postulata, surdis ad id Septentrionalium auribus. Osterlin-  
gi, inter quos Lubeca, Hamburgum, Rostochium, Wisma-  
rium, cum Erico Rege Danię, Duce Holsatię, Pomeranis,  
& Borussis, denique cum Hispanis, Venetisque, qui iis quo-  
que in locis tum commerciorum commoda querebant,  
clanculum contra Hollandos fœdus percussere. Ita rupto  
fœdere generis humani conglobatę gentes commercia Ba-  
tavorum interpellabant, jam tum stimulante invidia, ne  
maritima illorum potentia nimium cresceret. Infesti hi  
piratę turbare ubique maria, bona diripere, naves perfo-  
rare, captivos fœdis carceribus addicere. Philippus Bur-  
gundus componendis litibus diem dixerat. Accessere ur-  
bium Vandalicarum legati, viri nobiles, Equestris ordi-  
nis duo, Henricus Rapesilverus, Dantiscanus, & Henricus  
Voratius, Lubecensis. Hollandi & suos miserant rerum gna-  
ros, inter quos præcipuus ex Amstelodamensi Magistratu  
Everardus Iacobæus. Damnum tabulis annotatum cense-  
batur quinquaginta millium aureorum. Restitutione à  
Vandalicis civitatibus denegata, apertum iis bellum indi-  
ctum fuit. Interea fabriles operę fervebant, laboribus dies  
noctesq; continuatę, tantaque velocitate naves constructę,  
ut ipse arbores in rates subito mutatae viderentur. Maxi-  
mum bonum Hollandis in velocitate erat, nam tarde clas-  
sem expedire, idem erat atque suas opportunitates corrum-  
pere, hostem stabilire, atque vires suppeditare, que postea  
frangi nequirent. Pluribus itaque bellicis naviis in altum  
profecti horrorem Oceano intulerunt, & prima statim ex-  
peditione viginti hostium navigia cepere, litora Hispanię  
infestarunt, ita ut quicquid ex portibus solveret, prædece-  
deret.

deret. Tres Biscajenses occupatę, una item Veneta pretiosis mercibus opulenta, bonis direptis igni tradita. Edixerat Burgundus, sicuti magna consilia sæpe impetu valent, ut cunctis admodum naviis, quæ Septentrionem petebant, manus hostiles injicerentur. Neque mora, nostris ratis ubique mare sulcabatur, eò denique magnitudinis gloria virtutis Batavicæ processit, ut potentia maritima non amplius Fortuna egeret, sed supra omnem fœlicitatem posita esset, atque hostibus horrorem incuteret. Nullis nisi Hollandicis velis aquæ pervię erant, & in signum purgati Oceani supremis in malo corribus scopæ constitutę. Anno cl<sup>o</sup> cccc xl ingens Osterlingorum classis cum viginti tribus Borussorum naviis sine ullo fere prælio solo terrore superata est. Borussi relictis sociis intentis velis fugæ consulerant, sed seorsim excepti primi in victorum manus venere. Secuta hinc totius classis deditio. Quia victoria flamma virtutis pubi nauticæ in immensum crevit, neque prius sedari potuit, quam fortitudinem cum gloria æquaret, imo famam superaret. Magni animi proprium est neque adversa fortunâ dejici, neque secundâ insolescere, & in victoria fœlicitati posse modum ponere. Raro victor se ipsum & affectus vincit. Utrinque victor Batavus etiam hosti pepercit, nulli sanguinolentas manus intulit, nullum vinculis & carcere clausit, sed omnes sine lytro libertati asseruit. His difficultatibus circumventus hostis per aliquod tamen tempus lacertos movit, sicuti morbo fere absulti huc atque illuc vortere corpus solent, nullamque requiem inveniunt. Tandem Anno cl<sup>o</sup> cccc xli, die S. Iacobi circa Norvegiā tria immensæ molis bellica navigia veluti castella maris

procul se ostentabant, queis occurrabant sex, vel ut alii referunt, tres depresso nostrorum naviculae, quadringentis circiter & quinquaginta viris refertae. Illi manu prompti, mari supra modum exercitati, gloriae militaris appetentes, praedę cupidi, quæ etiam mediocres virtute viros transversos agit, statuerunt se objectare periculis, & fortunam tentare. Ludibrio ea res Osterlingis habita, jactatumque per facetias militares naviculas Batavorum omnes simul uno suo navigio collocari posse. Dum tam altos & superbos spiritus gerunt hostes, contemnendo nostros facile superati, quibus neque consilium, neque virtus deerat, nullumque inceptum frustra erat. Incredibili enim fortitudine hostem adorti, & in tabulata navium prosilientes, passim eundem ferire, occidere, ita ut cadaveribus omnia constrata, sanguine humano tingeretur Oceanus.. Nonnulli ex hostibus frustra contra nitebantur, postremo vel telis concidebant, vel in mare præcipites se agebant, atque aquis absorbabantur. Qui reliqui erant capti, atque inter eos Praefectus Petrus Brantius, cuius captivitas in causa fuit, ut tam cruento bello mirabil modo finis imponeretur. Nam dum opima inter se dividabantur spolia, forte Brantius civi Hornano admodum honesto cessit. Qui non hostilem in modum eum exceptit, sed ita flexit animum, ut beneficiis novo modo hostem vincere summa ope niteretur. Novis vestimentis indutum, viatico instructum, nullo redemptionis pretio solis promissis fidens in columem dimisit. Is ubi domum reversus, humanitatem Hollandorum in cœlum extollere, captivos ibi non tanquam hostes, sed tanquam amicos & necessarios excipi, contra illorum tyrannidem acriter increpare, tenebricosis & cæ-

& cæcis carcerum antris Batavos includi, quēis vel pœdore vel fame, deformati ærumnis miseram vitam terminarent. Non mirum rebus advorsis usos. Deum tantorum scelerum vindicem esse & futurum. Et quandoquidem Batavi sola probitate tuti essent, illine sceleribus securitatem quærerent? E re publica fore, ut quocunque modo paci novæque amicitię, incumberent. Finem belli non expectandum, quo victores vicitis leges imponerent. His similibusque verbis, uti inter suos magnâ pollebat auctoritate, primo popularium animos ad mitiora paulatim flexit, ita ut exiguo post tempore Hafnię de pace agi cœptum fuerit. Inter Danos Borussosque & Hollandos perpetua & solida pax percussa. Cum Vandalicis civitatibus duodecennales inducię constitutę, quæ finitæ iterum atque iterum prolongatę, donec nullo amplius molimine tacito suffragio sponte otium & quies mari terræque incubuit.

## C A P U T I X.

*DE MARITIMO BELLO INTER  
GALLOS ET HOLLANDOS, ANNO cI-  
cccc lxxi. & seq. SVB CAROLO  
BURGVNDO, ET MARIA.*

**A**NNO admodum cI cccc lxxi iterum turbatum mare, & cum inquieto elemento inquies publica. Causa motuum, quod Comes Warvicensis, Eduardo IV, Regi Angliæ, cuius sororem Carolus Burgundus in uxorem duxerat, suppetias ferente Ludovico undecimo Galliæ

Rege, hostilia intentaret. Atque adeo rerum humanarum domina Fortuna sæviit, ut ipse postmodum Rex regno pulsus in Hollandiam aufugerit, atque uti inconstanter se res humanæ habent, & huc atque illuc feruntur, sequenti anno valida classe Angliam petens post atrox prælium pristinæ restitutus fuerit dignitati. Interea antequam Rex regno pelle-retur, Comes Warvicensis conniventia Regis Galliæ naves Hollandicas passim diripiebat, triginta navigia sacro die Paschatis interceperat, & totum veluti mare jam animo invaserat. Sed ille cruento admodum prælio à Præfecto maris Anglo Comite Scallie exceptus, injuriam nostris illatam pensavit. Restituta cuncta navigia singulari Angli humanitate. Sed Warvicensis nihil minus tanquam tempestas publica mari & nostris litoribus imminebat, atque iterum circa festum Pentecostes viginti nostratium naves occupavit, non tam in dimicando, quam in prædando momentum victoriæ ponens. Verum Henrico Borsalio Veriæ domino, Præfecto maris Batavico, non erat animus ab ignavia & cordia corruptus, sed expedita triginta sex bellicarum navium classe xvii Kalendas Julias litora Normanniæ petiit. Atq; adeò prædones (neq; enim hostium nomen iis competit) cruentis manibus & immanni avaritia nobiles, quîs totum veluti mare quæstui erat, ad Sequanæ ostium ita excepti, ut decem nostrates naves jam ante captas ferrum restituerit, reliquas ignis consumpserit. Ex quo tempore tantus metus animos prædonis corripuit, ut sibi diffidens maria tentare ausus non fuerit. Ex his initiis anno sequenti grave bellum inter Galliæ Regem Batavosque erupit. Immense molis navigia mari Rex commiserat, inter quæ

quæ cætera omnia supereminebat, cui Columnæ nomen inditum, revera columna & fulcrum Oceani, quæ piscationibus halecum valde infesta, pluribus piscatoriis cymbis captis, mare & punctionem turbabat. Naucleris lemborum captis singulis redemptionis pretium centum aurei constituti, quos pro navigiis mercibusque quæ dimittebantur, tamdiu vinclis mancipabant, donec constituta pecunia persoluta esset. Piscatores perculsi tanta clade animum despondere, ubique trepidare, periculo ancipi fugè consulere, qui nondum mare ingressi domi mansitare, cum omnibus in locis infesta vis hostium esset, & ferro mare clausum teneret. Sed non diutina hæc fuit dominatio: rostratæ enim Batavorum naves vi atque armis claustra Oceani perruperunt, classemque Gallicam mari expulère: secutæque inducijæ usque ad exitum anni cī cccc LXXIV, quantis jam tum viribus mari polleret Batavus, indicarunt. Finito quietis tempore, atrocious bellum recruduit, & clade Batavorum nobile. Galli enim nihil pensi moderatique habebant, maria invadere, direptionibus polluere, vastare omnia, sibi quisque trahere, rapere, ut commercia nostra interciderent, navigationes frustrarentur. Quapropter Amstelodamenses, qui tum appetente vere navigationem in Hispanias moliebantur, edicto Caroli quatuor præsidiarias naves contra insultus prædonum instruxerunt, onerarias etiam quinquaginta majoribus minoribusque bellicis machinis, milite denique conscripto muniverunt. Ita ex sententia rebus paratis compositisque, cum Enchusanis, Hornanisque, qui suas itidem naves acriter expediverant, classis circiter octuaginta navium vela ventis dedit, quæ con-

junctis

junctis copiis profundum secans hostium molimini non patuit, neque ulli insultui obnoxia fuit. Cæterum ubi sale onusta domum reverteretur, longe alia rerum facies fuit, imo fœda atque miserabilis. Contemptus hostium & sui securitas tantam calamitatem peperit. Incesserat & avaritiæ tabes animos mercatorum, qui forum præoccupare tentabant. Ita dispersis à se invicem nostris naviis, dum nihil consilio atque imperio ageretur, hostis, qui prope Clasduum occurrerat, prudenter magno impetu, in medium classem erupit, ne vires suas Nostri conjungerent. Tum advoris navibus concurrere, implicare, perturbare undecunque Nostros, qui repentina metu perculti se expedire nequistabant. Et mox rapidos globos tormentis majoribus excutere, igneis in naves nostras jaculari, denique tantus horror nostræ classi immissus est, ut deditio singulæ naves sibi consulerent. Ita sine ullo fere certamine victoria hostibus parta, tota classis octuaginta admodum navium occupata. Plerosque itidem captos nonnulli referunt, nisi quos cymbis fugientes vicinum littus exceperat: alii, omnes fere ex naviis, quæ versus Clasdunum aufugerant, in tellure se recepisse, & summa cum ignominia domum reversos, commemorant. Neque tantum opum, sed gloriæ potissimum deminutio tetigit gloriofa Batavorum pectora, quibus industria militaris, victiarum multitudo, maritimæ militiæ magna peritia, animus denique belli ingens semper abunde fuerant. Hæc clades præ cæteris Amstelodamenses & Hornanos (xxx horum naves captæ) graviter afflixit. Plurimi mercatores ad incitas redacti, & subito ex divitibus pauperes infra omnem sortem Fortunæ deprimebantur.

Non-

Nonnulli tā insolita mutatione commoti vel in amentiam impellebantur, vel igneis furoris conceperunt. Porrò Carolo dein circa Nanceium occupato, mari erant Alcyonia: sed eodem mox ibidem extincto, asperrium iterum bellum sub Maria, quæ sola tum patri hæres relicta, Oceano incubuit. Namque Gallus, cupidine præde, atq; superbia agitatus, solus in aquis dominabatur, exclusisque Hollandis Zelandisque passim grassabatur. Interea Batavi, quibus supra fortunam sublimis animus, parabant omnia, quæ ad justam classem expediendam necessaria, prorsusque nihil intactum relinquebant. Triginta quinque munitissimas naves obviam hosti miserant, eæque tantum terroris incussere Gallo, ut terga dare cogeretur. Anno cl<sup>o</sup> cccc LXXVII mense Augusto decem iterum Nostratium naves, quas oppidum jam tum potens Amstelodamum expediverat, ingentis molis corbitam (caraquam vocant) mercibus exoticis divitem compellant, imperantque, ut velum dimitteret. Illa parvitatem nostrarum navium ludibrio exponere, imperium detrectare, monere ne irritando majorem vim in exitiū suum converterent. Serum diei erat, neque per noctis tenebras certamen conserere tutum videbatur, quia incerta maris & pericula caligine augentur. Per totam itaque noctem insecuti, ubi dies appeteret, summo impetu navem adorti, solo terrore, explosis aliquotiens tormentis, superarunt, atque in Zelandiam vexere. Captis dein octodecim Gallorum navibus, hostis incertus variusque formidine exagitabatur. Nostra classis, quæ circa Diepam stationem fixerat, elicere hostem sed frustra nitebatur. Ubi hoc parū Nostris processit, scaphis terrā naeti, vicinos pagos depopulati luculentam

prædam retulerunt. Ita inclinante autumno domum reversi Gallos prædonesque alios, qui profunda avaritiâ maria turbabant, expulere, incredibili Batavorum gloria, & ex sociâ hostium infamia.

## C A P U T X.

*BELLVM INTER FLANDROS ET  
HOLLANDOS, ANNO CI<sup>o</sup> cccc-  
LXXXIIII. & seq.*

**V**BI Maria vivis excesserat relicto impubere filio Philippo, tutela Maximiliano relata fuit. Invisus ille Flandris erat, vel quod gens inquieta novum imperium detrectaret, vel quod nimiis exactiōibus attereretur. Quippe Princeps inconsultus, et si non male indolis, subditorum opes graviter flagellabat, pessimis quoque adulationum magistris animum & aures addixerat, quibus nihil præter avaritiam consulti erat, & quod reliquum erat, summa adipiscendi libidine ad se trahebant. Hinc discordia animos Flandrorum diviserat, qui semelrupto amicitiae fœdere in injurias proni auctoritatem Principis impetebant. Confortes imperii in Flandria quatuor constituere, gravi admodum diffidentiæ an contemptus exemplo. Dein comitiis Gandavi indictis tutela tantum illi pro tempore decreta, juramentoque fulta fuit. Abdicata postmodum illi potestas, quod vocatus ad Comitia Flandriæ, præsentiam dignatus videretur, & ad Ultrajectinam obsidionem animum accinxisset suum. Hoc superbiæ vorterant Patres, cum inviso semel imperio cuncta in pejorem partem trahe-

traherentur. Philippum itaque filium vix dum quinquennem Comitem renunciant, quatuor tutores, dum ejus ætas infirma, imperio præponunt. Hinc grave inter Flandros Hollandosque & Brabantos bellum exarsit: vastatæ regiones, turbatum mare, navigationes impeditæ, crebræ admodum velitationes, nullibi quies. Media quidem æstate anni cI⁹ cccc lxxxiv compositæ turbæ, post aliquot annos captivitate Maximiliani, qui Brugas, contenderat, recruduerunt. Urbes inter se discordiis divisæ, vastæ regiones igne & rapina, in primis Flandria & Brabantia, neque minus Hannonia. Nec immunis ab hoc igne in ipsis aquis Hollandia fuit. Slusani enim, quibus se junxerant exules ex Hoexiorum partibus, rerum novarum avidi, Duce Franciso Brederodio, expedita classe Mosæ flumen ingressi, Roterodamum oppidum Mosæ flumini incumbens interceperant. Hinc arce quoque Woerdana occupata, agri ignibus & rapinis fœdi, vel tributis obnoxii, municipia & prætoria in cinerem acta, mare quoque infestum prædonibus, commercia impedita, ubique metus & periculum incessebat. Quis recuperandis dum summam operam impendunt Amstelodamenses, Maximilianus illorum insignia corona imperiali ornavit. Præcipue non vanus timor Westfrisos agitabat, ne Texelia capta suis imminerent finibus, & tributa pendere cogerent. Imperatum, ut cives, rustici in armis essent, signis ignium & campanarum sonitu uterentur, si hostis in propinquuo, vel litori se exponeret, ut mature prospicerent Patres, ne quid detrimenti Resp. caperet. In litore quoque vigiliæ, & sinus Australis bellicis navibus stratus gravis belli imaginem præse ferebat. Populus bello,

commerciis impeditis, exactionibus misere atterebatur.  
Nullum afflictis nisi in pace remedium, quorum Fortunas  
bellum non tantum concusserat, sed pene everterat. Anno  
demum c I o c c c c l x x x i x ingruente autumno, in-  
tercedente Rege Galliæ, icta utrinque pacis fœdera. Quæ  
tanto gaudio excepta, ut etiam ipsi agri hactenus in-  
culti, mare classibus turbatum lætari viderentur. Dum  
enim præter spem nihil reliqui erat, insperatus hujus belli  
exitus omnium animos mirum in modum affecit. Sed  
post tam sævam tempestatem non diurna mari quies &  
otium. Vbi fœdis procellis intumuit mare, non statim  
quiescit, sed fluctibus suis adhuc attollitur: ita post tempe-  
statem belli maritimi, infesta tamen pelago incubuit præ-  
donum rabies. Quippe anno c I o c c c c x c i Slusani, pa-  
cem detrectantes, præde assueti, justis bellicis navigiis  
fauces præcipue se stringentis Oceani premebant, ita ut nul-  
lis navigiis nequidem frumentariis aditus pateret. Eo de-  
nique abiēre sceleratे insolentie, ut duce Joanne Naeldvi-  
ceno maritimum pagum Wycum nomine deprædati igni-  
bus feralibus subjecerint, indignante veluti vicinum in-  
cendum Oceano. Marsdipam inde ingressi, nihil contra  
molientibus Batavis, per totam æstatem hinc mari Oceano,  
inde sinui Australi deprædationibus imminebant. Ita igna-  
via & socordia nostra mare à prædonibus clausum nervos  
potentie nostrę succidebat. Ipsa quoque Texelia & Wirin-  
ga vicinę insulę vietum & annonam suppeditabant, inco-  
læque malarum artium insolentes facile hostibus credulas  
aures dederant, qui obtentui habebant, se non tanquam ho-  
stes, sed amicos venisse, ut servili tributorum onere eos libe-  
rarent,

rarent. Vetus ac pridem insita gentibus nostris est libertatis cupido. Et sequuntur facilius, qui servile putant cogi: duci volunt, non trahi. Ubi legitimus imperandi modus adest, faciles in omnia obsequio, ubi extrema imperantur, nihil non audent. Ad incitas redacti bello & nimiis exactionibus, sumptibus pares non erant. Texelia & Werringa jam diu contumax nova omnia optabant. Itaque facile credidere hostibus, ita comparata mortalium natura, ut lubentes admittant, quæ tacite mente vovent. Ita prædones etiam opitulantibus nostris ostia maris suis occlusere naviis, occupatis pluribus mercatoriis navibus, cymbisque, quæ ad halecum capturam se expediverant, cæteris metu inhibitis profundo se committere. Hinc caritas annone, & ultimum rerum humanarum supplicium fames graviter Hollandiam concussit, ita ut non naturalia & fœda alimenta in usum necessitas verteret. Et cū de tributis nihil remitteretur, primo obsequii impatientia, dein seditio in ancipiti Remp. posuit, cum pleriq; nihil spei nisi in simultibus haberent. Idem circa Zelandiā prædonum furor, quos tamen oppressos, circa Slufsam XL bellica navigia, minora XLIII à Ioanne Egmondano capta, Historici commemorant.

## C A P U T X I.

## DE GELDRO- FRISICO BELLO,

PRÆLIISQUE MARITIMIS, ANNO

c I o I o IV &amp; seq.

BELLUM hinc Geldricum Frisicumque contra Batavos, non tantum terra, verum & mari exarsit. Inter Caro-

lum Geldrum & Philippum Burgundum contentiones eò eruperant, uti sanguinem uterque, quam omnia mallet. Causa belli insita mortalibus habendi & dominandi cupido, Geldro avitum imperium vindicante, Burgundo sua jure emptionis retinente. Primis decem undecimve annis placidè tantum arma tentata, sed anno clo 15 iv furor belli efferbuit, ita ut postquam semel itum esset in arma, ad internecina odia ventum sit. Ubique rapine agrorum, fragores tormentorum, mare sanguine imbutum, vastationes & cadavera urbium cum horrore conspiciebantur. Maritimas velitationes & prælia recensere nostri propositi est. Igitur Geldri undique regionem nostram tentabant, atque homines terre assueti, etiam in ipsis aquis proprio veluti nostro elemento, adoriri ausi sunt. Imperatum à Principe civitatibus maritimis, ut bellicis navibus sinum Australem insiderent, quo hostis prædæ appetens, avaritia ardens passim vagabatur. Præfectus itaque Petrus Leovardus summa ope nitebatur, ut mare prædonibus vacuum redderet, commatum armorumque vecturam impediret. Sed Geldrorum animus magis magisque indies ferox omnia magna volvebat. Quorum classis cum septingentis armatis militibus Hardervico solvens, ausa in Hollandiam transmittere, oppidum Monachodatum per insidias occupare tentavit. Sed Waterlandis rerum gnaris animus federat, virtutem suam experiri, hosti aquis obviam ire, patriam & libertatem armis tegere & defendere. Acriter tum dimicatum, advorsa in pectore vulnera, acervi trucidatorum corporum, denique ipsa cadavera adhuc vindictam spirare videbantur. Sed nostris Fortunam acriter prensantibus victoria

ctoria cessit, pluribus cæsis, nonnullis captivis. Anno ejus  
sæculi sexto Princeps noster prosperam contra Geldros  
susceperebat expeditionem, Arenaco enim occupato cunctæ  
admodū Urbes ab uno latere Rheni victori patebant: sed in  
medio successu ulterius progredi socrus intempestiva mors  
non permisit, namq; in Hispaniam profecturus pacem cum  
Geldro iniit, sed non diuturnam. Fortuna enim sævire, pressit  
miserere, ac turbare omnia cœpit, sicut res humanæ se ha-  
bent, ut prospéra adversa sequantur, & nihil stabile firmum-  
que inveniatur. Postquam enim Philippus regnum Casti-  
liæ adeptus esset, paucis post diebus non incerta veneni  
suspitione, Burgi in Granatensi ditione vitam cum mor-  
te commutavit. Hinc omnia in pejus labi, & dum tenera  
Caroli, qui postea quintus appellatus, ætas contemptui es-  
set, fluctuaretque sine Principe Resp. Geldri occasionem  
nacti, qui ex commodo suo pacem bellumque æstimabant,  
arma sumsere, & recuperatis cunctis admodum oppidis, quæ  
superiori æstate amiserant, insuper Wesopo & Muda ca-  
ptis, maria & terras infamibus rapinis vexabant, nullibi  
victoriæ temperabant. Sicut autem rebus secundis inso-  
lescere animus mortalium solet, atq; magna Fortuna licen-  
tiam sibi & audaciam usurpat, anno sequenti ingenti moli-  
mine Amstelodamum superare tentarunt, ut ita ubique opes  
patriæ lacerarent. In Tya flumine propugnaculum, quod  
rubrum vocabatur, palis compositum erat. Jamque eo oc-  
cupato urbi imminebant. Verum Amstelodamensium ea  
virtus fuit, ut extremi periculi unicum remedium crede-  
rent omnia pericula superare, & ardentि animo in fœdam  
fugam hostem pellerent, propugnaculoque dejicerent. De-

pressit eos hæc calamitas , atque per aliquod tempus quietem peperit. Verum anno ejus sæculi duodecimo animus inquietus & sui impotens sedari nequibat , sed ad maturandam novam expeditionem contra Amstelodamenses eos incendit . Sed & hic Fortuna civium prævaluit , quamquam hostes , qui ultra mille ac centeni eò confluxerant , ingens illis damnum inflixerint , cunctis navigiis , quæ extra palorum septa anchoris consistebant , incendio consumptis. Passim cum navigiis ferali igne commercia crepabant , atque ipsis veluti aquis flamma incubuit . Quod infortunium non solum Batavos , sed & Anglos , Gallosque & Vandalous , quorum ibi naves frequentes in anchoris fixæ erant , concussit. Non minor tempestas in sinu australi surrexit , qui rapinis fatigabatur , & pro lubidine victorum vicini agri fœdabantur , municipia in cinerem redigebantur. Gratum tale Geldris bellum erat , quod facile tolerabatur , dum domi rebus accisis , in externâ regione ex prædâ dvitias & opes cumularent. Biennio post pactæ induciæ , sed instabiles , in gravius bellum anno decimo sexto ejusdem sæculi eruperunt . Cum enim Princeps Carolus , cuius vernans ætas vix decimum & sextum annum attigerat in Hollandiam cum imperio accessisset , otii impatientes Geldri cum Alberto Saxone in Frisiâ bellum cepere. Magnis promissis imperium pollicentes nonnulli ex Frisiis , qui Saxonis pertæni novas res quærebant , Geldrum incitaverant. Ita Frisia discordiis civilibus fessa suis armis peregrinum dominum accersivit. Iamque adeo Geldrus plerisque urbibus occupatis ad incitas Saxonem adegerat , qui , cum extrema omnia experiri animus non esset , omne suum jus certis conditionibus

nibus Carolo Principi cessit. Hinc ortum Geldro-Frisicum bellum, quod sola calamitate nobile. Primum & quidem prosperum cum Frisiis prælium, qui suis navigiis, quæ tamquam propugnacula eminebant, mare clauerant, adeò ut nec Flevi Huenta nec Tessalia summo nostrorū detimento paterent. Florentius Iselsteinius, primus Buræ Comes, bellis navibus auctus, & armato milite circiter trium millium stipatus, magna virtute hostilem classem prope Worcum Frisiæ oppidum adoritur, vincit, plurimos occidit, cæteros captivos Enchusam mittit, qui diutino carceris pædore & illuvie pressi, dein ut prædones Prætori traditi passim infeli ci ligno suspensi sunt. Sequens annus, qui erat decimus septimus ejus sæculi, Hollandiæ clade memorabilis est. Cum enim Carolus Geldriæ Dux copias ingentes militum conscripsisset (ad septem vel octo millia fuisse varie traditum) & prope Cunderam ferocissimus prædonum dux Petrus Longus suū junxit militem, (cccc Chronicon Frisiæ nondum luci datum fuisse testatur) viii calendas Quintileis classis CL navigiorum vento secundo prima luce cum toto excercitu aquis se dedit, & in litora Borealis Hollandiæ multo adhuc die vœcta terrorem ingentem vicinis urbibus injecit: ubique cives trepidare, afflictare se, sibi suisque viribus diffidere, nihil pensi neque consulti habere, magnitudine classis sua pericula metiri. Atque adeò ea Enchusam prætervecta subito impetu in Medenblicum oppidum conversa, nequicquam urbana cohorte repugnante, totum incendio delevit, ut ne domus quidem reliqua esset. Ferro plerique cives perempti, cuius neque sexus neque ætas imbellis immunis fuit. Sola arx adversus hostium furorem.

igniumque violentiam invicta stetit, sub præfecto Iusto Burio, qui eam magno animo tuebatur. Ita Petrus Longus divite præda onustus cum prædonibus in Frisiam revertitur. Reliqui ex Geldris cuncta ignibus & rapinis vastant. Alcmaria in prædam versa, & post septem dierum populationem igni tradita. Idem fatum Beverovicum & Sparodatum habuere, Aspera tota sanguine imbuta. Sed Henrici Nassovii virtus, qui copias nomine Regis Caroli ductabat, ita eos in arctum egit, ut dispersi passim trucidarentur, vel atrocibus & infamibus suppliciis more latronum puniretur. In agros quoque Geldriæ arcèsque nobilium igne & rapinis sævitum. Denique Carolus Geldriæ dux Arenaco conclusus extrema Fortunæ expectabat, nisi rex Galliarum intercessisset. Interea Petrus Longus homo multis facinoribus coöpertus, ipse inquietus & turbidus maria turbabat, & in exitium nostrum captis mercatoriis navibus commercia impeditiebat. Erat huic homini in veteratum in Hollandos odium atque iracundiæ æstius, profunda atque insatiabilis avaritia, quæ in immensum rerum copia augebatur, ferox & vastus animus, inconsulta audacia, quæ illi pro virtute erat, excussoque semel metu omnia dira minitabatur. Nimia quoque fœlicitas illum transversum tulerat, more mortaliūm, qui ea qua sorte contigere, suę attribuunt peritię. Accessit & nostris ingens terror, nam terra marique graviter opes cunctorum quassabantur, & damnum unum alterum sequebatur. Ubi terra quies, mari erat belli tempestas. Neque tantum profundum, sed modo hac modo illac litora pulsabantur. Itaque pro periculi varietate timor insolitus incesserat, concursare passim, festinare, etiam fictis rumori- bus

bus credere, quasi ubique hostis adesset. Interea Florentius Iselsteinius nuspiam diligentiae & vigilantiæ parcere, animos illorum, præcipue Hornanorum, qui maxime periculis expositi, erigere, suppetias promittere, piratas belli insolitos, vinci faciles, asserere. Paucis post diebus x viii Julii indicta Delphis comitia, Patriæque Proceres prospicientes, nequid Resp. detrimenti caperet, decrevere, imposito tributo cuncta bellica præsidia contra Petrum Longum, cogere, in tempore, quod omnium rerum primum, classem dispersam aucto stipendio convocandam, facile dispersos ab hoste circumveniri, conjunctas copias etiam aduersæ parti formidabiles fore, cum non animus sed fortuna Batavis deesset; cavendum in primis, ne nostris bellicis navigiis direptis, eisdem in nostrum exitium hostes interentur, denique ad tutanda commercia conductorias naves expediendas. Ita inclinante mense Julio, Antonius Houtenus Fleterè Dominus, qui propter adversam valetudinem Domini Sevenbergæ in sinu Australi classi jam conjunctæ imperabat, cum accessissent & alia navigia urbium nomine missa, hostem lacestere ausus, atque omnia bona in proxima spe habebat. Edicto primum regio unicuique privato libertas deprædandi concessa. Cædes, incendia, aliaque belli facinora in hostem patrare jus & fas censebatur. Ita alii præde cupiditate, alii vindictæ studio, sicuti in populo varia sunt ingenia, hostem terrâ marique vexabant. Plerosque lucri cupido acrius præcipites egit. Unusquisque rapere, trahere, per vim extorquere, vel per insidias hostem circumvenire, bona inter se dividere, nisi quod de bonis direptis Præfecto cum Concilio cognoscendi facultas reliqua esset.

Verum archithalassus expedita classe animo intrepido inare tentare, hostibus vim inferre, Fortunam sibi facere, cuncta horrore implere. Incensę plurima naves, quæ prope Bunschotam in statione federant, alię fugatę in Frisiorum portus se receperunt. Ita illi, quorum prompta fuerat nemine resistente audacia, atque opes civium nostrorum flagellaverant, per summum dedecus atq; socordiam imperium maris vix conspecto hoste amiserunt. Nostri autem quibus bona erepta, maris libertas imminuta fuerat, continuis incubuerunt victoriis, portus hostiles cinxere, atque extrema iisdem intentarunt. Cum autem diurna hæc esset expeditio, & militiæ robur argentum deesset, primo nautica plebes, quibus ætas animusque ferox erat, Prefectos exigitare, pecuniam poscere, turbas movere. Jamque præsens metuebatur seditio, nisi Franciscus Cobelius Hollandiæ senator, autoritate & prudentia pollens, ideoque Prefecto mari adjunctus, literas ad Hornanos misisset, rogatum uti unica vice nummos mitterent, quos tribus intervallis pollicitati fuerant. Incipientem & nondum adultam seditionem non verbis non melioribus consiliis mitigari posse, nisi pecuniam militem, quanto ad sustentandos labores acrior esset, tanto deficiente præmio ad seditiones promptiorem fore: turpe esse victoriam sibi ipſi adimere, & cum hostem superaveris, in te ipsum militem concitare. Pecunia missa, an ab Hornanis, pro comperto dicere nequeo. Ita sopita discordia Nostri opportunitates maximas non desidia vel nihil agendo corrupere, sed hostem mari pepulere, ita ut nullibi securus tutusque esset. Cum ita in arctum res illorum redactæ essent, ut consilii nulla amplius supereffet copia, semestres inducias

inducias procuravit Rex Galliarum , cui paci promovendæ arbitrii honos concessus. Conventum ea conditione, ut Gel-drus Frisiæ jure cederet, Carolus Rex centum coronatorum millia penderet, statimque arma dimitterentur. Verum ubi soluta Arenaci obsidio, de qua ante diximus, confirmato iterum animo, conditiones à Geldro spretæ. Sequenti tamen anno, qui erat decimus & octavus, inducē prolatatę. Neque minus piraticam iterum crudelem, immoderatam, & nimis quam calamitosam Petrus Longus exercere, quibuscunque modis posset vires nostras atterere, captivorum corpora in mare projicere, nullibi misericordię vel gratię consulere, luctu & cruore omnia complere. Nostri, quamvis apud Præfectum Hollandiæ prolixæ repeterentur querelæ, jussi nihil hostile intentare, sed sua tantum tueri. Ita in immensum hostibus crevit audacia & ferocia, dum plures pauciores facile superarent, Nostri autem, si plures, aggredi hostem prohiberentur. Invisum plebi erat bellum pacis nomine involutum: fortunas, opes, gloriam, quæ prima mortales censem, hosti tradere sumimum probrum jure censebatur.. Interea languore nostro ejus ferocia augebatur. Ut cætera relatu minora subtileam, x i v Augusti imperterritus prædo aliquot Hollandorum navigia vi adortus, juxta Hornam sortem quidem primo adversam tulit: quippe primaria navi occupata, Præfecto sociisque aqua interemptis, cedere cōactus. verum idem cedendo animo non cessit, atq; iterum experi fortunam in animum induxit suum. Cum itaque pubem nauticam denuo accendisset, monuissetq; uti forti paratoq; animo essent, ingenti virtute Nostros in fugam egit, undecim navigia cepit, quingentos circiter vel ferro cæcidit, vel

aquis submersit. Miserabilis ea facies fuit & cum hoste & cum aquis colluctari, mortemque fugiendo in certam incidere. Secundæ hostium res continuò secundis tegebantur. Nam non multo post S. Lamberti die totam orientalem classem, quę ex mari Baltico in Hollandiam vela dirigebat, intercepit, Hollandis, quorum tria erant navigia, Oceanum pro sepulchro dedit. Idem vigesimo octavo Septembris viginti quinque navigiis cum quingentis, vel, ut aliqui referunt, mille & ducentis militibus nobilem expeditionem suscepit. Inuisa maxime Horna erat, oppidum validum & jam tum mari pollens. Neque diu hic dubitatum, cum continuis successibus spes aleretur, victoriamque certam promitteret. Præfectus, militiæ maritimæ impiger, consiliis tētis Hardervicum contendere se simulabat, ubi tum Carolus Geldriæ Dux agebat, nota Præfectorum arte in vulgus falsa spargere, abdita consiliorum clausa in pectore tenere. Nocte itaque intempesta primo militem, vigilum negligētia, in aggerem impellit, dein per vicum, qui postmodum Geldricus nuncupatus, urbem invadere molitur. Sed quia frequentes cives ibi vigiliam agebant, facile detectus, tota subito civitas in armis stetit. Acriter diu dimicatum, urgente prædē avido Frisio, sua defendantे Hollando. Nunquam fide minus dubia probatum, maximum ad Fortitudinem momentum, sua cuique esse, & vitæ prodigos eos, qui si vincantur, morti jam destinati sint. Extrema enim civibus, cœdem, rapinam, incendia crudelitas Petri promittebat. Unde vacillat quoque annalium fides captam fuisse urbem, quia nihil reliqui iis prædō fecisset: expulsum ex monumentis Hornæ publicis constat. Neque enim cætera curiosi ejus

si ejus anni Consules, tantum facinus silentio præteriissent.  
Ita Petrus Longus ipsis admodum induciis quaqua vorsum,  
rapinis Hollandos vexabat, & lucri contactu ac successu ul-  
terius deprædandi avara spes gliscebat. Et jam non arcana  
murmura civium audiebantur, quorum opes nullo resisten-  
te lacerabantur, & vindictę cupida plebes indignatione  
æstuabat. Finitis tamen induciis iterum novę pactę ad bien-  
nium, sublesta rursus Geldrorum fide. Anno hujus sæculi  
vigesimo secundo Geldro-Frisii viginti naviis, Gallico  
bello implicito nostro milite, oppresis Tessaliā Wiringaque  
insulis, ingens tributum extorsere. Tessalię decem Philip-  
peorum millia, Wiringæ tria millia & quingentos, sexagin-  
ta ędibus igne consumptis, indixere. Et quia tanto æri sol-  
vendo impares, obsides dati qui opibus maxime præsta-  
rent. Profligatis quoque à Carolo Geldro ante Gelmudam  
castris, calamitas calamitatem premebat. Sed bellum in Fri-  
sios à Nostris vorsum totam fere regionem sub jugum misit.  
Annus sequens latrociniis Geldrorum infamis, qui pluribus  
Hollandię vicis igne fēdati, Haga spoliata, instar fulminis  
cuncta subito prostraverant. Sed nihil memoratu dignum  
mari invenio, nisi quod jam tot per annos concitatis in mu-  
tuam perniciem animis, extingui belli furor nequiverit.  
Tandem anno vigesimo octavo, cum præfectus Frisię Geor-  
gius Scencius Tautenburgicus & Florentius Egmondanus  
militię summus magister, conjunctis copiis, multo labore  
atque acri impigraque militia pluribus urbibus captis ho-  
stem ad extrema redigisset, inclinante autumno Goriche-  
mi læta pax utrinque summa latitiā constituta.

## C A P U T XII.

PRÆLIA GALLICA, PRÆCIPVE  
ANNO C I O I O L I V.

**S**UB Carolo V bello Gallico maritima virtus Nostra-tum iterum enituit. Quippe Batavi quique acrius salo soloque animantur Zelandi, quibus nullus labos insolitus, nullum periculum formidolosum erat, anno c I o I o XLIII mense Majo, cum prædonibus Gallicis mare turbaretur, decem armatis onerariis navibus plenis velis in portum Burdegensem delati, commotis facinoris & periculi novitate oppidanis, septendecim naveis mercibus stipatas occuparunt, reliquisque incensis, ex vicina tellure ingenitem prædam diripuerunt. Cæterum Galli anno c I o I o L I tempore pacis, levitate genti insita, ex improviso classem nostram, quæ in Hispaniam tendebat, interceperant, merces in prædam vorterant. Inexpectatum hoc damnum graviter omnium animos concusserat, atque exasperaverat. Quippe immensæ divitiæ ultra duos millones æstimabantur, sive quod ita se revera habuerit, sive quod damna sua in majus augere mortalium conditio est. Restitutione negatâ, cruentum bellum sanguine maria & terras imbuīt. Itaque appetente vere, anno sequenti, quia mare Gallicis prædonibus infestum erat, interdicta publice orientem & occidentem versus navigatio. Prospiciebant enim Patres spe lucri maxima pericula sustentare mercatores, imo aleæ Fortunæ bona sua subjicere; in privatorum autem opibus publicas opes consistere. Accessit postmodum edictum,

ne ulla

ne ulla navigia mari se committerent, nisi quæ milite armato, tormentis, annona militari probe instructa essent, & juncta classe hosti resistere possent. Singulæ enim naves, quæ extra numeros diffundebantur, facilius quoque hostium injuriis patebant. Interea sequentibus annis ferocia belli aucta, obsidiones frequentes, devictis vastationes & cadavera urbium horrorem incussere. Et terra & mari crebra prælia, victoria per vices acta. Cæterum longe acerri-  
mum nobilissimumq; prælium anno cl̄o l̄o LIV, mense Au-  
gusto mare veluti lassavit. Hollandi viginti duabus mercato-  
riis navibus iter ad suos moliebantur. Quo comperto  
Gallus maximas confestim copias armat, pubem nauti-  
cam cogit, denique instructam classem novendecim navi-  
giis bellicis, cum sex celocibus in mare ducit, prædē po-  
tiundē avidus. Prope Douveram acerrime concursum est.  
Gallis erat animus ingens, potentia validus, Nostros necessi-  
tas ad fortitudinem impulit. Illos prædē cupido incende-  
bat, hos metus ingentis damni. Hostis fretus multitudi-  
ne militum, parabat injectis manicis cominus armis con-  
tendere, Nostri quia pauciores metuere, ne numero obrue-  
rentur, in tormentis bellicis, hinc atque illinc latera navium  
quassando, omnem spem habere, & cum artis tormentarię  
peritia præ Gallis pollerent, declinare, ne ullo modo rates  
fixę sibi invicem jungerentur. Postquam multum diuque ul-  
tro citroque tormentis se lacerassent, vecti in angustias freti,  
cum mari tranquillitas suda incumberet, Galli summo im-  
petu harpagonibus manicisque ferreis injectis, quindecim  
navibus cum nostris totidem numero congregiuntur. Tum  
cruentum & horribile consertum prælium, quale illud sæ-

culum non viderat. Dum enim cominus res agebatur, pro se quisque virtutem edere, ferro ferire, cadavera super cadavera volvi, fori sanguinem in mare eructare, clamor virum, vulnerorum suspiria exaudiri, denique vitam ac mortem juxta aestimare. Agilius Gallis erat classis, Nostris altior compactiorque. Illi multitudine, Nostris virtute & constantia agebant. Pubes quoque nostra nautica melius officia militaria expediebat, & ex naviis, quæ cominus non dimicabant, certis tormentorum ictibus navigia hostium lacerabant. Ita pari fere sorte à nonâ matutina usque ad tertiam atrociter dimicatum est. Galli pugnando fessi, animo fracti, spe potiundæ classis frustrati quietem ab armis pro tempore postulabant: præ fragore tormentorum, & in tanto certaminis fervore non exauditi, ad extrema consilia animum appulerunt. Ignibus enim velis injectis, (Pontus tamen Heuterus Belgas de rei summa desperantes ignem pulveri tormentario injecisse refert) ita sperabant terrore vicini incendii confestim Nostros sua navigia subducturos. Ceterum præceps hoc consilium gravem calamitatem & hostibus & Nostris infixit. Cum enim utrinque nimis tenaciter naves connexæ essent, subitus ignis magno fragore furens pleraque navigia incendit. Ita coacti utrinque desistere à pugna, hostes & amici confertim ignem extinguendo luctabantur. Novus hic hostis difficiliorque domitu, cui spatium modumque statuere non est in manu. Quamquam autem unusquisque pro se maxima operiteretur, fatigaretque industriam extinguendo incendio, frustra hoc in multis naviis tentabatur. Itaque plurimi furorem ignis declinantes in mare se præcipites agebant,

& pro-

& propinquis navibus adnatabant, & siue hostes siue amici essent, passim nullo recipiebantur intuitu. Tum Fortuna militaris rerum humanarum mirum spectaculum præbuit. Nostri qui pugnando attriti non fuerant, commiseratione victi fuerunt. Hostes recepti, qui frequentiores numero erant, subito tumultu quasdam ex nostris navibus obruerunt. Ita nihil inter hostes tutum, securitasque nullis vinculis constringitur. Igitur post sex horarum prælium ignis sex Gallicas naves combussit, una tormentis nostris ita dedolata, ut fundum peteret: sex quoque nostra navigia flammis correpta, quinque à Gallis non virtute, sed sorte & dolo superata. Numerus occisorum, vel qui aquis submersi, major à Gallica parte, quam nostra. Mille enim ex Gallis, trecenti ex Nostris violento fato occubuisse feruntur.

## C A P U T X I I I .

*D E EXPEDITIONE GEVSIORVM,  
V T V O C A N T , A Q V A T I L I V M , E I V S Q V E  
S V C C E S S V . A N N O c I C I D I X I X .  
& seqq.*

CUM crudelitas, avaritia Albani nobiles Belgii Provincias conculcaret, proscriptorum capita vel maria volverent, vel dissitæ reciperent regiones; aquatilium Geusiorum nomen primū mari terrorē incussit, præfigio certo futurę maritimę potentię. Inter eos erant plures homines nobiles, extorres, quis relicto patrimonio bonum, & æquum divitiis carius fuerat, obstinatoque in Albanum odio

maria turbabant. Primus Anno L X I X piraticæ classis præfectus fuit Adrianus Bergesius, Ohaini dominus, accessore Lancelottus Brederodius, Albertus Egmondanus, Embisius, Entesius, Ruiychaverius, aliique navium Duces, qui totam oram Hollandiæ Frisiæque, usque ad Amasin fluvium pluribus direptis navigiis infestabant. Etiam ipsa maris sæva tempestas, quæ per triduum classem fatigaverat, juvante Fortuna illorum conatus promovit. Cum enim se in Flevi stationem recepissent, biduo post septentrionalis classis sexaginta constans navigiis, vela eodem intendit, ex improviso in ipso fere portu direpta præde cessit. Postquam spatum quatuor vel quinque dierum processit, iterum Oceano veluti suppetias & opes offerente, classis quadraginta navium opportuna rapinæ fuit. Quæis & nostris animus, hostibus terror augebatur. Nam non tantum mari, sed & vicinâ tellure populationes metuebantur, quibus arcendis nonnulli Hispani missi fuere milites. Successit post Bergesium præfecturæ classis Geleinius Fiennefius Lombresii dominus, & post eum Gulielmus Comes Marcanus, qui augendæ invidiæ in odiosæ exactionis memoriam decem numeros vexillis suis inscribi jussérat. Cæterum Bossuvius, qui nomine Regis Gubernator Hollandiæ erat, ubi intelligit omnes Fortunas suas in evertenda piratica classe sitas esse, hostem infestum civium opibus sustentari, & trahendo bellum ferociorem fore, prorsus omnibus intentus militem conscribere, hortando ad virtutem erigere, expeditam denique classem duodecim bellicarum navium, anno LXX mense Februario in mare ducere, cui præerat Franciscus Boshusius militiæ maritimæ impiger. Qui ubi mare ingressus com-

perif.

perisset Geusios in Amasin Fluvium se recepisse, propere  
insecutus magna confidentia & libidine classis exscinden-  
dæ agitabatur. Igitur ex improviso adortus duo navi-  
gia superavit, reliqua in fugam egit. Insignis hic fuit Si-  
monis Rollii Consulis Hornani, qui uni ex bellicis præerat,  
virtus & industria, quem ideo charum acceptumque, Pro-  
præfecture dignitate Albanus ornaverat. Ubi victoriam  
hanc primo Fama divulgavit, contusis viribus Geusiorum,  
ut putabat, Albanus ingenti lætitia diffundebatur. Bella  
enim primo impetu valent, & læta initia victoribus ani-  
mum addunt, vietiis modum ponunt. Sed inerat Albano  
contemptor hostium animus, & confectum bellum censem-  
bat, antequam fere inchoatum esset: nescius desperatis  
audaciam pro munimento esse, &, uti cuncta mortalium  
incerta, ita maxime in lubrico consistere incertam belli  
aleam, exiguisque viribus sæpe magnos successus vel fa-  
tum vel audaciam tribuere. Quippe ex ipsa clade Nostri  
animos traxere, & supra Fortunam positi pressis manibus  
virtutem & vires exeruere. Namque non minori classe  
non multo post committere se mari ausi plerunque ostia  
portuum claudebant, nonnunquam in interiora Flevi pro-  
gressi, vel oram Frisię infestabant. Quibus augescebat a-  
nimus, quod mare ubique illis secundum esset, pluribus  
que direptis navigiis uno tempore viginti quatuor pifca-  
torias cymbas, bina vero Hispanica navigia pretiosis mer-  
cibus onusta in prædam vortissent. Ita ingens Geusici no-  
minis terror, navigatione præpeditâ, mare ubique obno-  
xiuum fecerat. Neque multo post Lancellottus Brederodius  
cum aliis Præfectis ultra viginti navigia vel diripuit, vel

ingenti vi pecunię redimi permisit. Dum ita Regię opes mari passim flagellantur, Albani industriā majori nisu clas- sis expeditur, in quam rem in maritimis civitatibus opera- rii suas operas ingenti fervore properabant. Sed Frustra Albanus nitebatur, cum difficile esset mari assuetos hospi- tio suo pellere, quin & invisa Ducis dominatione plura na- vigia ad Nostros transfugerant. Sequentibus annis, cum spe prædę plurimi allicerentur, multum quoque potentia Geusiorum increvit. Anno LXXI ineunte Martio tria ma- jora bellica navigia cum viginti tribus celocibus integrum classem triginta & unius navium superarunt. Idem horror terra Monachodamo direpto, cæteris pagis clanculum tri- butum pendentibus. Ceterum sequens annus, quam in in- certo fluctuant Principum consilia, ostendit. Dum enim unius Albani arbitrio bello togaque Resp. agitaretur, cru- delitas cum avaritia certaret, terrore & metu, quę infirma sunt auctoritatis vincula, subditi stringerentur, ab Elisabe- thā reginā idem impetravit, uti Geusi portibus Angliæ, quo hactenus perfugium habuerant, arcerentur. Ita suis con- siliis, incredibile memoratu, seipsum præcipitavit. Quip- pe libertatis primæ vindices, sub Præfecto Lumæo Comi- te Marcano, insulâ prohibiti, quibus accesserant Embda profugi, qui iisdem artibus Hispanicis per mare vagaban- tur, vel in Tessalia liburnicas Albani profligare, vel En- chusam invadere animo volvebant. Utique desperatio & ultimum necessitatis telum ad extrema adigebat. Nihil non audent illi, quibus persuasum est aut vincere, aut mori. Igi- tur adverso vento in Mosam flumen acti, cum ante duas Hispnicas naves superassent, exitu nullo patente, inter spem

spem metumque dubii hærebant. (Alii diripiendæ hostili classi, quæ ad Mosæ ostia stationem obtinebat, flumen ingressos, quæ cum se recepisset expeditionem irritam fuisse, atque ita adverso vento constrictos fuisse referunt.) Auctor primus Treslongus Brilam invadendi, quod oppidum vasto ostio Mosæ, qua in Oceanum se præcipitat, incumbit. Accensis omnibus tam calido consilio conjuratis placuit dditionem urbis nomine Principis Auriaci, regii per Provinciam præsidis, expostulare. Dum cunctatur magistratus, Lumæo probe gnaro magna facinora impetu valere, Treslongus ad australem portam tendit, Robolius Borealem effringit, exurit, , atque urbem metu percusam ingreditur. Ducenti admodum & quinquaginta urbem ceperant, cæteri classem servabant. Miles in sacerdotes potissimum & sacra nihil pensi neque sancti habuit, unusquisque opes ex templis trahere, rapere, in naves auferre. Lumæus enim oppidum deserere constituerat, nisi Treslongus, Entesius, aliquique auctores fuissent, ne tam bonam occasionem ignavia & socordia corrumperent. Ubi fama increbuit, Albanus contemnere inanes assaultus, temeritatem hilari vultu externâ specie excipere, interius revera sollicitus pectori dolorem premebat. Namq; prudentibus visum ipsam Hollandiæ clavem direptam, & per hanc jugulum Hispaniæ peti. Revera hic primum libertatis vexillum erectum, nuntante mox totâ fere Hollandia. Missus ab Albano Bossuvius cum decem cohortibus Hispanorum, navibusque in Bernissa relictis, in insulam Vornam, ubi Brila sita, nullo resistente exscenderat. Cum ad urbem ventum acriter manus confertæ, suburbio à Geusiis jam ante exusto. Ceterum

cum

cum Rochus urbis architectus se in profluentem misisset, & perrupisset emissarium, subito infuso aquore campi stagnabant, Hispano se in aggerem recipiente. Interea Treslongus, & Robolius clanculum urbe egressi naves Bernisse relietas ignibus subjiciunt, vel perforatas mergunt, vel in flumen propellunt. Tum facies totius negotii apud Hispanos incerta, atque fœda extitit. Unusquisque trepidare, neque signa neque ordines servare, dum hinc hostis illinc aqua in immensum crescens extrema minaretur. Itaque dispersi à se invicem alii in flumen prosilire, fluctuantes reliquas naves adnatare, nihil consilio omnia metu agere, plures gurges lutumve hausere.

## C A P U T X I V.

*P R A E L I V M C V M C L A S S E D V C I S  
M E D I N A C E L I , E T C V M C L A S S E  
L V S I T A N I C A . A N N O C I O I : 2 X I I .*

**D**UM invisa Belgis Albani dominatio extremam ruinam minaretur, Rex Philippus, sive quod ejus acta non probaret, sive quod Principum nocte artes sint calamitatum causas ministris tribuere, successorem statuit Ioannem Cerdam Ducem Medinæceli, qui clementiæ fama clarus animos Belgarum ad se traheret. Is classe quinquaginta quatuor navium Laredo vela ventis dedit, & in Belgium adventabat. Ex navibus viginti sex maiores erant, reliquæ minores, quas Assabres Cantabri appellant. Præter pretiosas merces Julianum Romerum Præfectum militiæ

litiæ veterem cum bis mille (alii cl<sup>o</sup> l<sup>o</sup>) Hispanorum copiis classis vectabat. Interea Blancenbergam, portum Flandriæ maritimum, Cerda appulerat, ignarus Vlissinganæ defectionis, & Geusiorum vires mari in immensum crevisse. Quippe hominum genus mari innutritum proprio veluti elemento, multis direptis hostium naviis, victorias victoriis cumulaverat. Vlissingani præcipue Albani odio & insita ferocia virtutem acriter intendere, nullis periculis moveri, ubique hostem excipere, aduersis naviis concurrere, non desistere nisi victores, denique fluctuante gressu mare veluti calcare, & sibi obnoxium habere. Hic cum cæteris Geusiis coniuncti semper victores nunquam vici, quia viciis extrema fati necessitas reliqua erat. Quippe ab utraque parte captivorum pedes vel mari abluabantur, vel infamibus destinabantur suppliciis. Sebastianus quidem Langius necessitati non virtuti succubuerat, qui unius navigii Præfectus commeatum regium, ne miles & annona militaris Medioburgum veheretur, impedire tentaverat. Illum quatuor regiæ naves circumvenire, harpagonibus injectis manus conserere, foros transilire, pro se quisque ferro ferire, Nostri propulsare, resistere, hostem loco movere: denique ubi Nostri se multitudine hostium oppressos vident, pulveri pyrio inaudita virtute ignem injicere, atque ita suo exitio hostem quoque involvere. Hoc primum illud est horrendum spectaculum, quo usi Belgæ in hostem, cum nulla spes reliqua esset, sed in morte ultimum esset effugium, atque ita infamem mortem antevortebant, & extrema quoque hostibus intentabant. Ubi igitur cuncta prospere mari Geusiis succederent, clas-

sem quoq; Hispānicam Ducis Medinæceli duodecim mino-  
ribus bellicis navibus invadere constituerunt; & primo qui-  
dem ostium Slusani portus insidere , cymbis advecti signa  
maritima, quîs brevia & syrtes monstrantur, succidere, quo  
mare importuosum & vadis cæcum securam navigationem  
in Slusanum portum præpediret. Ita majora navigia pro-  
pe Blanckenbergam unco anchoræ fixæ mari sustinebantur:  
minora , quibus eâ aquarum profunditate opus non erat,  
cum Duce ejusque familia Slusam appulerunt, nisi quod  
quatuor vadis hæsitaverint , queis una Balduini Ewaldi  
Vlissingensis juncta. Tum passim pubi Vlissinganæ clamor  
mixtus hortatione , strepitus & fragores tormentorum to-  
nare , & sua fulmina cum globis ingentis ponderis excute-  
re, undique terrorem circumferre : deniq; eò res processit,  
ut plures ex Hispanis cymbis vicinam terram peterent. Tum  
Nostrî modicis navibus , majores enim vada attingere ne-  
quibant, hostes undiq; fatigare, premere, certos globorum  
ictus torquere , præpropera victoriæ cupidine abripi , sum-  
mo ardore eniti, festinare , denique hostem in ditionem  
accipere. Primæ ditionis auctor Balduinus Ewaldus, qui  
nautica pube incitata Hispanos in suo navigio in ordinem  
coegerat , quîs superatis æstu navem allevante plenis velis  
Vlissingam tendit. Interea nautica juventus, uti solet, præde  
avida inconsulte reliquas devictas naveis deprædatur, atque  
ira & vindictæ cupidine pessimis consultoribus abrepta igné  
immittit , cum iis opulentæ lanæ merces stiparentur. Me-  
dinaceli convocatis Slusæ nauarchis , quibus & sicca arena-  
rum , & profunditas maris nota erant , artium harum inso-  
litus eos consulit, qua ratione majora illa navigia , quæ  
prope

prope Blancenbergam in anchoris stabant, in portum deferri possint. Illis affirmantibus nimis profunde classem aquas premere, non esse sibi copiam consilii, quo tuta importum devehatur; Dux stomachatus, atque judicans partium studio inclinatos ita sermones ferere, severe imperat, ut quocunque modo id tentarent, qui hoc edicto territi Urbe aufugerunt. Interea pecunia & aromatibus dives classis Lusitanica procul vela ostentabat, & secura periculi, pelago ante jactata, portui vicina omnia prospera animo conceperat. Et Cantabricæ naves, quæ prope Blancenbergam hactenus moratæ, rerum commotarum in Walachria certiores eos non fecerant, turgido & favente vento anchoris solutis Vlissingam prætervecte, que tormentis frustra intonabat, Rammekenum munimentum attigerant, & hinc militem cum mercibus Medioburgi exposuerant. Lusitani cum præter Vlissingam vectarentur, specie amicitiæ à Vlissinganis tormento signo dato, uti ante urbem anchoras mitterent, amicos esse rati facile obtemperarunt. Ita classis magna & opulenta prædæ fuit, neque insultu sed dolo victa. Tres ex iis per Hontam, vastum Scaldis brachium, Antverpiam contendere, una ex iis à minori bellica nave intercepta. Ita rebus accisis subita fælicitate Fortuna immelius vorsa, cum sine nervo opum nulla militia diu consistere possit. Auri argenteique signati sexcenta millia, aromatum, unionum, pretiosorum lapidum dimidio plus repertum. Cæterum merces illæ difficulter emptorem inventere, sive quod eædem publicè rebus dubiis distrahi nequirent, sive quod mercatores cum animo suo reputarent, & periculum & damnum ingens in emptione consistere,

præsertim quia rigidus exactor Albanus edicto prohibuerat. Ingenti tamen hâc prædâ in immensum Geusiis animus crevit, & , uti fieri solet, rebus secundis promptissimi quique, spe prædè ducti ex vicina Britannia & Gallia eodem confluabant, plureisque cupido opum quam bellum trahebant.

## C A P U T X V .

*P R A E L I V M I N T E R S A N C I V M  
A V I L A M E T Z E L A N D O S ,  
A N N O C I O L C L X X I I I .*

**V**R B E M Medioburgum non tantum Walachrię sed Zelandiæ principem obtinebat adhuc pro Rege tribunus Mondragonius, Zelandi obsidione premebant. Qui Fortunæ fiducia freti perruptis catenis ex ipsa Antverpiensi statione plerasque naves avexerant. Virtus virtute augebatur, & nobilis civitas commeatu defecta extrema expectabat. Sancio itaq; Avilę Præfecto arcis Antverpianę Alba-nus imperat, ut expedita classe obsidionem solvere, vel annum procurare, summa ope niteretur. Propere quinquaginta majores holcades milite armatae, minores commeatu stipatae vela ventis dederant. Occurrerunt sibi invicem naves juxta Terneusam, & primo certamine Prætoria nostra, cui præerat vir militię maritimę vetus & impiger Evaldus Petri Worstius, à pluribus hostium valde quassata. Nondum justa pugna, verum ubi ad Borsaliam insulam ventum, utrinque inter proprætorias naves acre certamen con-

consertum est. Sed vento prælium dirimente nostra Borsaliam , hostium classis Terneusam se receperat . Sequenti luce flante Favonio Nostri virtutem cum velis intenderant, hostemque adoriri decreverant, sed illi omne præsidium in fuga posuerant , & perculsi Antverpiam contenderant, fugiendo tamen in primis prope Barlandiam graviter excepti. Interea Antverpiam versus inter Lilloam & Ordammum pluribus navibus cum ruderibus disjecti monasterii in Scal-di submersis , majoribus hostium navigiis commodam navigationem præpedire Nostri tentabant . Neque id frustra fuit , cum majores naves in vado hæsitantes per aliquod tempus miserum in modum colliderentur , neque flectere proras immobiles possent , leviores quę in celeritate præsidium posuerant, vel evaderent , vel in manus nostras deve-nirent. Paucis post diebus , ubi impetuosus amnis rudera illa in altum ejecerat , Avila instructa classe Fortunam ite-rum tentans inter Borsaliam terreumque Walachrię mu-nimentum ex advorso nostrę classi stetit. Tum primum immenso clamore aér perstrepere , tormenta tonare , fumo & igne mare regi , cadavera volvi , cadentibus alii succe-dere. Maximam primo hostilium navium , cui nomen Elephantis erat , adorti cum alia præsidiaria navi intrepidi duces Groenevenius & Everkitius. Ceterum hostium animus virtute accensus sub imperio strenui præfetti & pri-marię inter Walones nobilitatis Domini de Blicquy. No-stri tamen fortiter pugnando foros transilire , implicare se hosti , punctim cædere , avidius alteri alteros sauciare , quam semet defendere. Plures ex nostris cum ducibus trucidati. Tandem devicta navi spectaculum horibile se exeruit.

Cuncti occisi, vel submersi, nihil denique crudelitatis reliquum fuit. Alterum hostium navigium, cui terę promisę nomen erat, cum juxta munimentum terreum Regio militie insessum se recepisset, à Iusto tamen Morio acri insultu superatum est, atque adeo ipse miles, certior factus Vlissinganum terrā adventare, suum munimentum reliquit. Calamitas calamitatem urgebat, & quocunque hostis intenderat, res advorsę erant. Quippe ex hostilibus navibus quatuor vadis impactę non pugnando devictę sunt. Namque cum militaris & nautica juventus se præcipites in cymbas dedissent, antequam litus tangerent velivolis nostris navibus oppressi, plerique mari vitam dederunt. Intotum sex majora navigia tormentis & commeatu probe instructa Vlissingam devecta, reliqua juxta Rammekenum munimentum saluti suę consuluerunt, nisi quod unum vadis allisum ipsi Hispani igne corruperint, & quas victi ab hostibus pænas metuebant, ipsi antevorterint. Octingentes admodum ex hostibus vel aqua, vel ferro periisse constans fama est. Sancius tamen per ferrum & igneis commeatu urbem providit, sed magna suorum calamitate. Ubi prima secundi venti & æstus copia, Antverpiam iterum tendit, quo rebus afflictis consuleret. Verum in faucibus freti ita exceptus, ut due naves superatę, una ægre liberata, cæterę fugiendo Antverpiam reversę fuerint.

CAPUT

## CAPUT XVI.

*VELITATIONES NAVALES INTER  
BOSSUVIUM ET HOLLANDOS IN  
LACV HARLEMensi,  
ANNO cIc IXXIII.*

CUM Harleum à Frederico Toletano arcta obsidio-  
ne premeretur, lacu Harlemensi instructis navibus  
infractam civium virtutem contundere, annonam interci-  
pere, & cum ferro res non procederet, fame, quod ultimum  
rerum humanarum supplicium est, vincere tentabat Bossu-  
vius. Cæterum res ardua in primis propter obices & claustra  
æquor illud tentare, atque adeò paucis licet naviis obsessi  
aditus præcludebant, qui omnes labores, res dubias asperas-  
que, omnia pericula metu imminentis periculi facile tolera-  
vēre. Perfodere primum aggerem, qua Yæ torrens lacui  
vicinus cataracta coërcetur, advorse parti consilium fuit.  
Pulsis fugatisque, cum dies aliquot intercessissent, multo  
atrocious redintegratum fuit prælium. Harlemenses tamen  
unâ admodum triremi, pontonibusque aliquot ingenti in-  
sultu hostibus ita incubuere, uti turpiter fugam corriperent,  
quorum unum navigium flammis involutum fœdum spe-  
ctaculum præbuit. Miles ferme omnis ignibus fumique  
tenebris cinctus vel aquis, quo se præcipitem dederat, vel  
ferro misere interiit, reliquis gulâ fractâ spiritus interceptus  
fuit. Cum non prospere hoc negotium cessisset, animus  
Bossuvii consilio fluctuans, neque vigiliis, neque quietibus  
sedari

sedari potuit, donec novi facinoris maturandi occasionem arriperet. Opportuna illi res cecidit, ut perrupto obice, qua sacra via Amstelodamo imminet, in lacum nonnullas naveis dimitteret. Pubes nautica Harlemensis incitata desiderio pugnandi, nimioque æstu flagrans, incomposito ordine hostilem classem adoritur. Cæterum inconsultus ardor pene extremam nostris calamitatem intulit. Una triremium, longa octuaginta & quatuor pedes, longius à cæteris semota, quatuor aut quinque navibus cincta, expedire se nequibat, atque cum nihil opis aut spei reliquum haberet, victoris tandem arbitrio cessit. Gerardus Iunius Præfectus graviter sauciatus scapha ægre se recepit. Eminebat in Iacobo Antonio, qui cæteras naves ductabat, excelsa fortitudo, qui omnia advorsa parvi ducebat, neque fractus Fortuna, sed eadem superior, omnia sibi in sese posita judicabat. Incerti sunt præliorum exitus, atque aliquotiens jam victoria exultantes oppressi inconstantis fortis ludibrio se exposuerunt. Antonius itaque cum cæteris navium Præfectis plus quam virili insultu hostem iterum fatigat, triremem devictam post duarum horarum atrox prælium superat. Victa & altera eadem virtute: cæsi ferme omnes tanquam piaculares victimæ sanguine vicinas aquas imbuerunt. Sparsa passim fluitabant ingloria cadavera, enses cruore imbuti, neque satiati, adeò impotens sui vindicta mentem æstuantem conciverat. Ita penuriâ civium sublevatâ nostri victores incredibili virtute suas veluti aquas tuitabantur. Inauditum facinus prædonis Hoenii omnem admirationem excedit, qui duabus cymbis, quæ remigio agitantur, octodecim viris armatis Yam flumen insederat.

Forte

Forte lancearii equites ad centum & quinquaginta Amstelodamo Harleum versus iter instituerant. Pluvio coelo (hyemis enim rigor se non nihil remiserat) viarum glaciales crustæ, equorum ungulis perruptæ, inferius lubricas implicitasque secum aquas trahebant. Cum itaque ad aggerem ventum esset, quæ ad latera nullum effugium patebat, Hoenius, divisus tam exiguis copiis, ante principia certis telorum iætibus vibratisque hastis, quæ illorum lanceis longiores erant, ita hostem fatigavit, uti retro cedere cogeretur; ubi iterum tam furioso impetu eques impellebatur, uti neque à fronte neque à tergo ullum effugiendi, vel cominus arma conserendi, copia esset. Namque equi huc atque illic cursitando cœno ventre tenus impliciti se expedire nequibant, certoque cum infessoribus suis exitio confodiebantur. Atque adeo tam prosperè hæ insidiæ cessere, ut aspera fœdaque strage ad unum omnes occumberent. Porro, ut ad institutum revortar, Bossuvius nuper lacu fugatus, tantæ contumeliæ impatiens, quo honori suo consuleret, Fortunamq; restitueret, iterum navale prælium meditabatur, atque in eam rem strenuissimos quosque milites, quorum promptam cognoverat audaciam, naveis instructas, quæ ad septuaginta excreverant, & cuncta quæ prælio usui forent, quam celerrimè comparavit. Diversa nostræ classis species, quæ navibus exiguis, non probe instructis, milite, annona longe inferior, omnibus ferme ad expeditionem necessariis laborabat. Nihilominus, quod urbs nobilis non tantum milite feroci, qui jugulis illorum imminebat, verum etiam lenta fame pressa, nullam moram admitteret, Batenburgius militiæ, Marinus Brantius classis Præfectorus ex-

trema quæque experiri , quam ancipitem occasionem corrumperet, potius judicabant. Temerarius hic impetus , neque enim periculum sine extremo periculo vinci poterat . Gratum id Bossuvio , qui non modicis suis viribus fretus, divisis copiis à fronte & latere Nostros invadere tentabat. Atque adeo inter hostes victorię veluti certos clamor virūm , tubarum clangor , tympanorum sonitus terribilis ita increpuit , ut utrumque Præfectum suarum virium gnos ingens concusserit consternatio. Ubi animus timore obstupuit , consilia omnia in ancipiti fluctuant. Imperatum quidem sociis navibus , uti in adventantem hostem recta vela intenderent. Cæterum dum ipsi Imperatores cursum quam celerrime ab hoste defleterent , nonnullę naves simili sorte clavum vortunt, superstites, cum solę hosti resistere nequirent, in fœdam fugam actę, viginti & duę à Boshu-  
fio captæ : reliquis Caga pagus , qui lacui incumbit , rece-  
ptui fuit. Plerique ex militari & nautica pube , qui se præ-  
cipites profundo dederant , tamdiu lassas manus in aquis  
jactarunt , donec ripam attingerent . Ex quo firmatę res  
hostium deditonem urbis Harlemensis maturavere , quam-  
quam in longum tracta obsidio , neque virtute vel ar-  
mis , sed fame ignobili genere vincendi fortissimi cives ad  
deditonem compulsi. In cives militesque quæsitissimis  
suppliciis sævitum , lassę conficiendis cadaveribus carnifi-  
cum manus , & , donec Hispanus armis, cadaveribus, luctuq;  
omnia complevisset , vix tam ferali spectaculo se satiavit .  
Quâ crudelitate id peractum est, ut cæterę civitates extrema  
potius pati , quam Hispanis se permettere , decreverint.

## CAPUT XVII.

*PRÆLIVM INTER COMITEM BOS-  
SUVIUM ET WEST-FRISIOS IN SINU  
AVSTRALI, ANNO CI<sup>O</sup> LXXIII.*

**V**IDERAT Albanus non terrâ sed mari West-Frisios superandos esse, neque proclivem esse victoriam adversus eos, qui ex vicinis aquis ferociam & confidentiam contraxerant. Ingentem itaque classem propere construi jubet, uti sinus Australis imperio potiretur. Instructa hæc triginta naviis, commeatu, milite, armis stipata. Præ cæteris eminebat Prætoria navis, cui invisum Inquisitionis nomen datum fuerat, triginta & duorum tormentorum capax, dupli tabulato impervia. Præter centum & quinquaginta socios navales, duo signa militum navem impleverant, inter quos ducenti Hispani, sub Præfectis Alfonso de Corquera, & Ferdinando Lopezio. Præfectus classi erat Maximilianus Henninius Bossuvii Comes, militiæ impiger, & Albano gratus. Primo die, quo classem solverat, vada Yæ fluminis transitum denegabant. Quippe vetustis naviis, ingentibus lapidibus & ruderibus refertis, claudere flumen tentaverant West-Frisii. Proviso jam ante malo, & fero- ciente vento, periculo classem exponere inconsultum vi- sum fuit Comiti. Verum postridie aquarum, quæ admodum excreverat, superficies, vento minus aspero, ostia classi ape- ruit. Extra Nostrorum quoque suspicionem impetuoso flumine disjecta aliò navigia fuerant. Dum classis hostilis

adventat, jussu Archithalassi Cornelii Theodori accersiti  
in Prætoriam reliquarum navium duces, uti decerneretur,  
an tutum esset ad Yam flumen hostem opperiri, an potius  
se profundo committerent. Concilio militari visum æqua-  
ra petere, atque ibi hostem fatigare. Maxima quidem eos  
cum hoste manus conserendi cupido invaserat, sed ceden-  
do vincere, & laxo æquore prælium tentare consultius vi-  
sum fuit. Secessum solutis anchoris à nostra classe ad eum  
locum, qui Pampus appellatur. Erecti hac secessione ho-  
stium animi, & Schellincwoudanum munimentum terra  
marique valido impetu impugnant. Præfectus Broechu-  
sius cum suis singulari virtute munimentum tutabatur, ve-  
rum impar tantis copiis (neque enim ulla suppetiæ in pro-  
pinquo, & classis nostra cursum inde divorterat) Edamum  
& Monachodamum se recepit. Cæteræ quoque hinc arces  
vicinæ eodem die fidei Comitis se dederunt. Ingens hic rusti-  
cis calamitas incubuit, quibus, inconsulto mandato Broec-  
husii, ne quidem sua in urbem deferre vetitum fuerat,  
forsitan quod illorum robur usui sibi fore crederet, quan-  
doquidem pro privatis facultatibus multo acrius quam pro  
publico bono pugnatur, atque adeo damno proprio mor-  
talium animi magis accenduntur. Verum res longe aliter  
cecidit, cum enim terra marique ab hoste cinctus Broechu-  
sius necessitati parere cogeretur, ubique ruri res trepidæ,  
metus ingens, malum improvissum, damnum grave rusti-  
cos affligebat. Relictis navibus spoliis incumbebat nautica  
pubes, & passim per agros diffundebatur. Pulcherrimi tum  
facinoris nata nostris erat occasio, classis nimirum diripien-  
de, si virtus & audacia in promptu fuisset. Edamenses op-  
portuno

portuno tempore ejus rei classiarios certiores fecerant, sed metus & diffidentia, infirma virtutis vincula, pectora pulsabant. Qui autem metuit, victo similis, qui victoriam magno animo sibi spondet, ut plurimum victor evadit. Verum integra adhuc nostrâ classe Hornani vicinique trepidi improviso metu, attamen antiquæ virtutis memores, iterum novam spem concipere, incredibili celeritate cum Enchufanis nova navigia ædificare, classi jungere, omnia expeditre. Classis nostra viginti quatuor navigia numerabat, sed militaris pubes deerat. Decretum, uti dimidia pars Hornanorum civium, sive jaculatorum, se aquis mandaret. Jamque adeo sortitio facta, cum defensandæ urbi eos reservare consultius visum fuit. Præsidiarius itaque miles ex dimidia parte duce Ruichavero huic expeditioni destinatus. Inter ea rebus secundis insolescere hostis, probra jacere, convitia torquere, Nostris tanquam victis insultare, quod frequentissimum initium calamitatis esse solet. Cunctando quoque Bossuvius Fortunam non prensabat, sed inspiciendis munimentis tempus trahebat, in quam rem Franciscum Verdugo ad Ducem Albæ miserat. Horrida dein tempestas per aliquot dies mare exasperaverat, & Hispani aquarum insolentes navigationes instituere nequibant. Bossuvius ipse postmodum Amstelodamum profectus moras necundo occasionem negligebat. Namque bella consternatis hostibus fama & impetu valent, intermissa integrum spem spiritumque eisdem restituunt. Tertio demum Octobris Amstelodamo profectus anchoras solverat, sed quinto demum die ferociente vento superavit vada loci, qui Pampus appellatur. Nostri intrepidi ad Marcam insulam

hostem opperiebantur. Tum primum ab hora tertia usque ad extremum diei tormentorum fragores audiri, strepitu & clamore nautico omnia misceri, Nostri frustra eniti, ut se navibus hostilibus innecterent, quia celeritate mobiles facile elabebantur. Neque Bossuvio consilium erat manibus consertis dimicare, sed naves tormentis fatigare, velocitate illarum impetum eludere, & sine periculo vincere. Quę cum Nostris deessent, virtutem in manibus ponere, modo sequi, modo cedere, omnem occasionem cominus prælian-di captare. Hisce velitationibus præcedens sequensque dies tractus, donec, duobus hostiū naviis interceptis, cominus præliandi incubuit necessitas. Uni præerat Sculenburgius, affinis Boshusii. Quem aggressus Iacobus Tillus centurio navalis tertio insultu superavit, Præfectum cum sex vel octo captivis Hornam misit, cæteri circa quinquaginta vel ferro confossi, vel aquis perierunt: tantum duo ex Nostris occubuerent, cæterum Præfectus cum viginti aliis saucius. Itaque hosti placuit iterum Fortunam maris experiri, atque adeo successit belli alea, extortā iterum navi, verum jam antea tormentis bellicis ademptis. Præfectus Tamesius Frederici Monachodamensis aliud aggressus fuerat navigium, sed frustra. Præatoria enim hostium navis cum duobus vel tribus aliis expeditis naviis confestim illum insultare, atque tormentis simul omnibus explosis ita excipere, ut quadraginta viri una vice occumberent. Non minor tamen hostium strages, constrata passim navigia cadaveribus, & infecta sanguine. Neque Præfectus homo imperterritus navem hostilem, nisi cum morte reliquisset, verum hoc furore bellico, solutis ab hoste harpagonibus, ab eādem dis-

junctus

junctus fuit. Hoc die plurimi utrinque violento fato occubiere , ipse Archithalassus Cornelius Theodori dextra sauciis. Certam sibi spoponderat victoriam hostis , ignarus rerum humanarum , quæ præter opinionem sæpe mobiles in aduersa mutantur. Jussum fuerat , uti eodem die , quo hoc prælium consertum fuit , illi , qui Alcmariam obsidione urgebant , & vicina Waterlandie insederant , pagos ignibus subjicerent,(quod & patrarunt) ut vicino incendio clasfariis , inter quos & rustici , extrema metus & desperationis incuterent. Verum nullum emolumentum hosti cessit , nisi quod ventum antevorterit. Nostra quippe navigia ad inferiora versus Hornam delata prope Neccam sederant , hostis nostram stationem occupaverat. Bossuvius jam antefitus expeditæ classi , & militaribus copiis , Nostris animum conserendi manus defuturum crediderat. Verum cum eâ de re Ioannes Simonis Rollius cum Comite sermones serereret ; sibi notam esse illorum virtutem , robore infractos esse , plerosque mari innutritos , prudentia opus esse , hostem contemnere proclive , vincere magni operis fore , Comes risu illa excepit , & in opprobrium hostium vortit. Verum post prælium invicta illorum virtus patuit , neque eos vite suę pepercisse , sed mortis contemptores etiam hostibus graves fuisse. Quinque sequentibus diebus nihil ab hoste etiam propitio vento tentatum. A nostra parte , ubi nata occasio , non velitationibus , sed confessim legitimo prælio hostem adoriri ex usu esse videbatur. Deërat enim pulveris pyrii copia , neque comparandi ulla erat facultas. Monitus quoque à Proceribus West-Frisiæ Præfectus clasfis fuerat , ne pulverem frustra consumeret , verum valido impe-

impetu quam primum hostem adoriretur, non esse eandem hostium promptitudinem, vehementes motus post ultimum prælium subsedisse, timoremque incussum, omnia virtuti nostrę prona, non tam pro gloria, quam pro omnium salute pugnari. verum, uti Procerum voluntates subito inclinant, atque ipsæ sæpe sibi ad vorsę sunt, undecimo Octobris, à Præfecto Sonoio Archithalassus literas accepit, quis cunctandum ad tempus, neque manus cum hoste conserendas scribebatur. Verum ille pugnandi desiderio flagrabat, & literas, quarum tenor clam habebatur, in ignem misit, ipse motu corporis atque animi igneus. Euronoto spirante, qui secundus erat, sublevatis anchoris recta in hostem fertur. Nulla illi utilis videbatur cunctatio, neque ex crastino pendere, consultum erat, cum confestim tutius hosti manus intentarentur. Interea hostis, cui inopinatus hic obtigerat casus, ad prælium quoque se parat. Jamq; adeò medium diei processerat, & (sicut postmodum compertrum) prandio jam constratæ mensæ erant, cum Bossuvius alio ferali & sanguinolento exceptus est convivio. Nauclerus quidem Prætorię navis consternatus hosti propinquus clavum deflexerat, verum per vim illo excusso Iohannes Florentius, dignum virtute Batavicā se virum præsttit, & intrepido pectore recta in hostem tendit. Sicuti autem non raro timidissimus quisq; primus occumbit, ita prior vix clavum vorterat, cum fatali telo confuditur, is autem, qui vices ejus obierat, nullo vulnere saucius evasit. Utrinque hinc tormenta tonare, igne & fumo cælum & mare obduci, classiarii horribile spectaculum edere, Nostri per medios ignes in hostem ruere, vitam ac mortem juxta æstimare. Bossuvius

vius ex Prætoriâ navi anchoram jacere satagebat, ne versus inferiora fluitaret, sed veloci impetu nostrorum, qui harpagonibus se innectebant, intercepta anchora in medio hælit, neque dimitti in profundum maris potuit. Quod & illi præsenti exitio fuit. Nostrri autem, et si tormentis bellicis & militari pube longe inferiores essent, fortitamen paratoque animo patriæ salutem atque libertatem in dextris suis portare, summo nisu aditum in hostilem navem urgere, neque minus illi qui advorsæ partis occursare, audaciam pro muro habere, plureis vulneribus acceptis concidere, neque tamen quietem pati. Verum nostris melior erat pugnandi conditio, quod ex altiori navigio certius ignitos globos & missilia jacularentur, quod proclivior in hostilem navem descensus, quod cuncta, quæ hostes gererent, omnium oculis paterent. Quis accesserat memorabili arte lorica ex vetustis retibus in unum compacta, quæ & minoribus tormentis impervia esset. Dum hoc modo tela eluderentur, securi à metu ingentem hosti terrorem intentabant. Namq; ex corbis fastigio promptissimi quique cum ignivomis machinis calcem vivam in hostes jacere, quâ aspersis oculis officia militaria turbabantur. Adorti mox eandem navem à latere Petrus Backius, à prora Iacobus Tryntgesius, à puppi Boërius, centuriones infractæ virtutis, quorum ultimus machinis igneis admodum impetus, navem avortere ab hoste cōactus fuit, ne extrema incendii expectaret. Interea treis Nostratiū cum Prætoriâ hostium navi luctantes, atque eidem innexæ versus inferiora fluitarunt, atque ex advorso Neccæ juxta Wynessam vadis hæsere. Emicuit inter præliandum Ioannis Harin-

gii virtus an inconsulta temeritas, qui in hostilem navem transiliens, per funes nauticos mira celeritate transcurrens aplustre ademit, & jam erepto victoriæ signo ad suos reverti cupiens, pectore confossus fortissime occubuit. Neque minus fortiter à cæteris Præfectis contra hostem dimicatum est. Regia navis, cui præerat Gulielmus Vestius, summo impetu capta, quæ antea tormentorum violentis iætibus quassata, captivis ægrè, juxta cum quatuor æreis, & quinque fusilibus ferreis machinis, subductis, aquarum plena fundum petiit. Quinque aliæ minoris ponderis vadis collisæ, non difficulter expugnatæ, cum illud anxie metuerent, ne vicino Martis fulmine vel conflagrarent, vel pessum irent. Reliquæ naves infami socordia trans locum, qui Pampus dicitur, aufugere, nonnullæ, ne cæcis vadis hæsitarent, etiam machinas bellicas mari dederunt. Tanta subito torpedo animos illorum oppressit, ut oblii honoris sui, quod primum esse viris bellicosis solet, oblii sacramenti militaris, Fœderatorum prædæ Bossuvium reliquerint. Decretum quidem concilio fuerat, prima luce iterum se Nostris sistere, fortunam maris tentare, aut mortem oppetere, aut Prætoriam navem exitio eripere. Sed creperâ luce Simon Rollius Propræfектus cogente Hispano milite Amstelodamum recta tendit, cæteris vexillum navale sequendi necessitas incubuit. Sin primâ fugâ, hoste formidine attonito, uti nonnullis visum, insecuti Nostrî fuissent, tota admodum classis fusa, profligata, sicco arenarum allisa, exitioque destinata fuisset. Hortante acriter consule Theodoro Edamensi, cui bonum publicum in primis cordi erat, plurium tamen suffragia contra prævaluerunt, tum quod nox tenebris cosa

cosa navigantibus infesta esset, tum quod vulnerorum multitudo naveis premeret. Interea Bossuvius militiē impiger à tribus Fœderatorum naviis cinctus, neq; probi militis, neque Imperatoris officium prætermittere, lorica ferrea munitus, clypeo gladioque horridus invicto animo non tantum contra hostes, verum etiam contra Fortunam subfiliare, omni nisu conari necessitates effugere, quas tamen vincere nequivit. Flagrabant & micabant oculi, sanguine ex imis præcordiis exæstuante vultus ardebat, corpus nimio spiritu tumidum, & concitum, crebro & vehementi motu agitabatur. Ipse omneis voce, gestu instigare, non tantum aliis, verum etiam sibi virtutem imperare. Nostri continuis ictibus tormentorum undique hostem fatigare, ex corbita calcem vivam, lapides jacere, ita ut ad extremum nulli tabulatis insistere auderent: hostes tamen ex inferiori navis parte plurimos nostrum confodere, queis virtus in temeritatem fere vorsa fuerat. Nostrum alii in foros transfilire, & vel fato occumbere, vel vulnerari, labi, iterum eniti, omnia impetu & violentia agere, nihil præter victoriā pensi habere. Cadentibus aliis vel vulneratis, novo milite continuo suppetias ferebant Hornani, sauciosq; avehebant. Tantusque pro patria tuenda ardor fuit, ut multi cives, immixtique agricultores se ferventissimo prælio sponte immiscerent, sanguinemque suum libertati consecrarent. Tandem vero Bossuvius non animo, sed necessitate vicitus, postquam per viginti & octo horas etiā nocturno tempore acerrime pugnatum esset, ex trecentis omnes præter quatuor decim vel quindecim milites cruenta morte cecidissent, vel vulnerati essent, duodecimo Octobris die conditionibus qui-

busdam Præfecto classis Cornelio Theodori, centurioni Rui-chavero, & Ioachimo Nievindio quæsitori navalí se dedidit. Omnibus vitam incolumem, sibi honestum & Comite dignum carceré stipulatus est. Conventum quoque est, uti milites, vel cum aliis captivis commutarentur, vel menstruo stipendio, more antiquo militari, redimerentur. Hispani tamen, inter quos Corcuera & Lopesius Præfecti navales, quod se plebi invisos scirent, conditiones recusabant, antequam à Sonoyo, Proceribusque West-Frisiæ firmarentur. Præter plures ex nobilitate trecentos captivos fuisse à plerisque memorię relatum fuit, verum literis West-Frisiæ Procerum ad Principem Auriacum ducenti tantum memorantur. Bossuvius ubi Hornam advectus, fremere plebes, probra jacere, cædem Roterodamensem illi objectare, cum idem advorsum se animus fuerit, nunc in promptu scelerum præmia esse. A magistratu tamen officiose exceptus est; sicuti Procerum moderatores animi, quam inconsultæ plebis, atque utramque Fortunam pensare soliti. Aplustri Archithalassī in templo Hornano suspenso, omnium ordinum homines, lætitia immodici, concursare, gratulari sibi Patriæque, apertis templis Deo immortali grates age-re, lachrymis gaudio exilientibus ad cælum manus tendere, precari uti hæc fœlicitas perpetua foret. Contra hostes luctu immenso perfundi, fugitivi culpam Bossuvio impunitare, uti suam apud Ducem Albæ diluerent. Verum ille imperterritus corpore & animo fortissime dimicaverat, per triennium tamen carceri mancipatus pace demum Gandavensi ad suos reversus est.

## CAPUT XVIII.

*PRÆLIVM NAVALE IVXTA RO-  
MERSWALIAM INTER HISPANOS ET  
FOEDERATOS, ANNO CL LXIV.*

**L**UDOVICUS Requesenius in Belgium à Rege missus erat, uti rigorem atque invisam crudelitatem Albani clementiæ & modestiæ fama temperaret. Erat illi ingenium mite, accessus facilis, ad simulanda negotia solertia mentis profunda: quis non tam virtutibus quam artibus trahere Belgarum populum nitebatur. Prima illi navalis fuit expeditio liberandæ principi urbium Walachriæ Medioburgo, quam prope biennium ad extrema necessitatū redactus defendebat pro Rege Mondragonius. Ipse Antverpiam profectus, quo præsentia sua expediundæ classi vim & robur adderet, animosque civium accenderet. Neque minor Principi Auriaco cura, qui Delphis Vlissingam profectus, Hollandiæ Zelandiæque bellica navigia coegerat, quo incitante immane quantum animi omnium in primis pubis nauticæ exarserant. Requesenius ubi vidit etiam immensam classem modicis viribus in angustiis amnium sisti posse, duabus classibus duplici quoq; cursu tentare Fortunam statuit, qua Scaldis in duos se scindit alveos, uti Fœderatorum vires divideret, & hac vel illac, extrema necessitate Arne-mudâ tenus, quæ Regi adhuc erat obnoxia, obsessos liberaret. Triginta majoribus naviis præposuerat Sancium Avilam, septuaginta minoribus defuncto Beauvosio Gli-

mesium Belgam, inani specie imperii, quo indigenarum animos non ignotis artibus ad se traheret. Namque summum imperium, & militiae cura Iuliano Romero tradita fuit: vel quod Glimesio etsi rerum militarium gnaro, momentum tanti operis non crederetur, vel quod insita Hispanis superbia nullum alium, quam suæ nationis Præfectum admitteret. Quindecim enim vexilla Hispani militis classibus imposita. Extremo Ianuarii Avila Antverpia, neq; multo post Glimesius & Romerus Bergâ ad Zomam vela ventis dederant. Futuri advorsi certaminis præsagium veluti dedit primum discessu Bergensium naviū infortunium. Dum enim honori summi militię Belgicę Imperatoris tormenta paſſim exploduntur, incuria igne in pulverem pyrium jacto navis collisa, plerique, qui in tabulatis forte consistebant, præcipites in aquam missi, mortique erepti, plures tamen aſſeribus navium iecti, misere multato corpore evasere, inter quos Præfectus Franciscus de Bovadilla vulnere saucius navigio ſedare nequibat. Romero præceps & velox erat navigatio, tardior Glimesio, quem impatiens prior prope Romerswaliā expectabat, ſive quod Glimesii naves navigationi non adeò commodè eſſent, ſive quod ejusdem cunctatio consulta eſſet, & propior constantię, alterius autem velocitas temeritati. Ludovicus Boisottus Zelandię archithalassius, qui ſumma cura hostium molimina explorabat, certior factus, octo minora navigia velitationi cum hoste conſerendę quām mature præmittit. Ingens ipſe virium atque animi concilium militare vocat. E re judicatum, vento ſecundo, cauro nimirum flante, contra æſtum advoſum obniti, uti poſtmodum ſecundo fluxu certamen inirent.

inirent. Quatuor interea bellicę naves jussę à Gulielmo Principe copiis suis navalibus adesse, quis Sancio Avile occurreretur. Verum ex parte Boysotti in concilio de modo hostem adoriendi contentio non levis orta inter Scottum & Nicolaum Nicolai Præfectos militareis. Ea tutissima Nicolao pugnandi ratio visa, se infra tabulata recipere, ubi simul tormenta hostium lethales globos ejacularentur. Stipatus enim miles certo mortis periculo objiciebatur. Scottus impotens & nimius animi, primo insultu in hostium foros transiliundum censebat. Omnia magna facinora primo impetu valere, cum qui quocunque modo cedit, etiam Fortunæ cedere. Placuit hæc ultima sententia, uti objectu corporum prælium conficerent, & per mortes victoriam raperent. Quippe victis nihil spei reliquum, quam mare. Anchoris itaque solutis in turmas tres se dividunt, ex quibus prima sedecim majoribus, decem modicis navigiis, secunda, uti & tertia, decem majoribus, quatuordecim modicis constabat. Ita vitę juxta ac mortis contemptores plenis velis in hostem feruntur. Ingenteis hinc contentiones inter summos hostiles Præfectos coortæ. Glimesius in maritimis præliis vento & æstu advorso se hostibus objectare insolens esse dictabat: neque enim tantum cum adversariis, sed cum aquis præcipiti fortunā luctandum esse. Quem Romerus immodicus animi rogavit, an ignavia & timor illius pectus percelleret, respondente altero, certaminis eventus hoc indicabit. Duabus itaque divisis navium catervis Zelandis obviam itum. Juxta Lodicense ostium tormentis jam invicem peti quibant. Glimesius, ubi in tabulatis prætorię navis confertum militem cum nauti-

nautica pube conspicit, flexo confestim clavo, ex latere tormentis duobus æneis, quæ præter globos scruto constipata erant, excussis, centum admodum fistulis & bombardis sua spargentibus jacula, plures è conglobatâ multitudine è medio sustulit. Volvi passim cadavera, morientum gemitus audiri, vulneratorum ingens clamor cœlum rumpere. Boysotto aculeo ligni oculus effossus, quod ille de honestamentū corporis virtuti suæ imputabat. Nicolaus pede usque ad crus ablato, Scottus adempto brachio, majoribus venis sanguinem fundentibus, glorioso fato quanquam miserabili occubuerunt. Rebus supra votum primo impetu Hispano fluentibus, imminebat Prætorię atque adeò jam insultabat hostilis pubes, sed suppetias ferendo hostem quoque adortus Adrianus Cornelii centurio: atque adeo virtuti jam cuncta patebant, nihil socordia claudebat. Namque eodem tempore novem regiis naviis injectę pedicę, atque in plures idem tentatum fuisset, nisi angustia fluminis impeditivisset. Nullus amplius erat tormentorum usus, gladiis cominus res agebatur, alterum alterum confodere, vulnerare, incertâ fortitudine cadere, atque iterum eniti, vago motu & disjecto inter se luctari. Acerrimo prælia Caspar Leinsenius Zoetelandus, unus ex promptissimis inter globorum nimbos aplustre Glimesio ademit, quo involutus ad suos in columis revorsus est. Virtuti præmium vestis nautica constituta. Romerus, signo classis dempto, metuens ne reliquæ naves sine duce vagę fluctuarent, mali culmine novum erexit, quod sequerentur: atque adeo virutem militis auxit, ut jam sexaginta, callide non renitente Boysotto, in nostram Prætoriam navem transilierint, quos illâc

illâc accensus pulvis pyrius in altum certa morte adegit. Cujus horrendi spectaculi pars magna fuisset Romerus, qui in tabulata quoque se demittere tentabat, nisi paulo ante ignis feralis suas vires exeruerisset. Utique peritia militiæ nauticæ, machinarum artificiosis ignibus, quîs continuo hostis quassabatur, navium magnitudine & robore, hostilis classis longe inferior erat. Romerus itaque metuens, ne à pluribus nostratium naviis, quæ recta in illum ferebantur, cingeretur, in primis quod plerique suorum jam ad fugam se expedirent, cuncta vela etiam ad proram intendit, uti manibus nostris elaberetur. Verum uti nihil tam fortuitorum capax quam prælium navale, & si uspiam pleraque hic ex lubidine Fortuna agitat, antennâ excussâ nullum patuit effugium; itaq; ut necessitati consuleret, præcipitem contra Tolensem ripam navem Præfectus egit, & cum sociis, qui vel cymbę se commiserant, vel enatarunt, ad proximum litus in columis evasit. Interea Requesenius cum prima nobilitate spectator pugnæ in Scakerlöensi aggere, largo imbre perfusus eventum expectabat, cui adventans Romerus non deprecatur culpam, vel temeritatem, sed mari horridus voce aspera Imperatorem alloquitur, se non navalii sed terrestri militia assuetum, idoneum cunctis admodum classibus perdundis. Navis, quę ante sicco arenarum hæserat, æstu levata nullo adjutante in profundum se iterum egit, ubi sorte advorsa quinque naves nostræ occurrentes per diuidium horæ illi implicitæ, aliis hostilibus naviis fugiendi occasionem dedere. Namque sole cadente, vento, æstuque secundo, ingenio loci diffisi, plenis velis Bergam ad Zomam contendere. Ozorius de Angulo subsidio classi

futuris postrema tenebat, atque ad vorso æstu ulterius pro-  
gredi nequibat, neque etiam consilium fuit periculo are-  
narum se exponere, quis jam cæteræ naves hæsitabant.  
Cruento itaque se huic certamini proprius non immiscuit,  
sed tormentis & fistulis nostros fatigabat. Pugnando in-  
teriorim vadis quoque allisa Prætoria navis Glimesii, qui ta-  
men infractus animo, contemptu summo vite, extrema ex-  
pectabat. Ille ducis simul & militis munia obire, cuncta  
pericula post decus & gloriam ponere, omnibus locis adesse,  
festinare, per medios ignes hostiumque jacula, per strictos  
enses ruere, donec tandem duobus globis iectus occubuit.  
Navis incensa, incertum an nostra, an hostili manu. Ex aliis  
navibus octo occupate tanta ferocia, ut nulli parceretur,  
semianimes nonnulli in mare volverentur, neque torques  
aurei neque militaria ornamenta cupidam alioqui præde  
juventutem morarentur. In tormentis itaque bellicis præ-  
cipua præda, nulli admodum captivi. Plures quoque na-  
ves, quæ commeatum vehebant, vel vadis ruptæ, vel con-  
tinuis tormentorum iectibus hiscentes fundum petierunt.  
Mille ex hostibus hoc prælio sanguinolentâ morte succu-  
buerunt, uti à nostris Historicis relatum est, ipsi septingen-  
tos fuisse memorant, & quidem duplo majorem cæsorum  
à nostra parte numerum. Non insolens tamen Hispanis  
suas calamitates premere, alienas in majus augere; imo  
aliquotiens victi, arcano Regio apud suos famâ victores  
fuere. Interea tamen ab alia parte Sancius Avila, classe sua,  
syrtibus jam antea effractis duabus navigiis, inter Terneu-  
sam Vlissingamq; horrorem Principi Guilielmo intulit. Ne-  
que enim naves resistere validæ, neque militares copiæ,  
quas

quas Boysottus secum duxerat, in promptu. Et hostis jam victor, si tempore, quod omnium rerum primum est, uti scivisset. Æstu secundo Medioburgum tendere in proclivi fuisset, sin anchoris fixis juxta Breskenum non cunctatus occasionem neglexisset. Et mox nuntiata Glimesii clade, in celeritate fugę turpem fortunam posuit, & modo metuendus, nunc consternatus confestim inde Antverpiam se corripuit, veritus ne infesta belli navalis tempestate obrueretur, victoribusque novam largiretur victoriam. Ita utraque classe vel victa vel fugata, Medioburgum opulenta Walachrię civitas pressa fame Principi Auriaco se dedidit.

## C A P U T X I X.

*P R A E L I V M N A V A L E I N T E R Z E-  
L A N D O S , E T C L A S S E M A N T V E R P I A-  
N A M , A N N O C I C I O L X X I V .*

CUM Antverpiæ Hispanorum militari seditione propter stipendia non persoluta cuncta flagrarent, atque ferociens miles, qui nihil consulti, neque pensi habebat, neque ulla auctoritate mitigari poterat, electo duce, turbulentis consiliis, nocturnis diurnisque tumultibus, plurimum terroris atque periculi urbi opulentissime minaretur, classem triginta majorum minorumque navium, quæ juxta urbem sedem posuerat, longius removere Proceribus ex usu publico videbatur. Ingens enim metus incesserat, ne miles exuto omni Magistratus imperio rebus suis tutandis etiam propinquam classem invaderet, atque ita

M 2 . . . . conju-

conjurationis suum quisque negotium exequeretur. Verum stipendiis partim ære, partim pretiosis mercibus, postmodum persolutis, sedatis animis, simul ob Mochensem victoriā festivus & triumphalis processerat dies. Triumphalibus vestibus luxuriabat miles, lætitia tota diffuebat Civitas, post dissonos tumultus summa erat tranquillitas. Cæterum mens humana futuræ sortis nescia, dum advorsa & secunda caliginosa nocte premit Deus immortalis. Ad tuendam fœlicitatem alia fœlicitate opus est. Hâc enim occasione Zelandi natura feroces, vehementes, manu prompti audaciam acuebant, & lubidine exscindendę hostilis classis supra modum instigabantur.. Ludovicus Boysottus archithalassus modico navium apparatu Scaldis fluenta ingressus, quò facilius tantum negotium procederet, velocissimas præmittit, quę de omnibus illum certiorem redderent. Duæ hostiles bellicæ naves, quę longius à cæteris semotæ excubias agebant, haud difficulter occupatæ. Ex captivis cognitum, classem juxta Ordam, Calloam, Lilloam que inter stationem posuisse. Boysottus, qui maximum bonum in celeritate putabat, ocyus eò contendit, quo imparatum hostem deprehenderet. Classis sparsim diffusa imminens periculi secura anchorarum uncis tenebatur. Cumque adeò jam ad tertiam partem milliaris non procul hostilis classis fœderatorum oculos stringeret, subsidente subito vento consilia nutabant, nunquid non irrita expeditione cursus iterare relictos expediret. Dum animus dubius huc atque illuc impellitur, derepente motantes iterum auræ vela impleverunt, & ad conficiendum pulcherrimum facinus navalem turbam aquis indomitam incitarunt. Hostis

stis subito periculo commotus , neque diu cunētandum ratus , vela intendit , atque omne in fuga præsidium quærens , Antverpiam proficisci maturabat . Zelandorum naveis conficiundo itineri expeditiores , imprimis quod Oceani illuvie & sordibus nuper purgatę essent , Regias , quæ Calloam prætervectę jam erant , alsecutę , ita tormentorum continuis ictibus quassarunt , uti duæ bellicæ naves , præter minorem Britannicam , extrema necessitate ingruente ad dditionem compellerentur . Treis aliæ ad Brabanticum latus , una ad Flandricum vadis hæsitantes , ignibus consumptę . Cæterę ; cum nautica hostium turba cymbis sinistro fluminis lateri appulisset , immenso labore funibus attractę ægre se receperunt . Atque hæc causa fuit , ne totam classem extrema corrumperent , quanquam etiam Historicis , qui hostium partes secuti , sedecim , ab aliis viginti naves vel concrematas , vel occupatas fuisse , memoratum invenio . Interea subito tumultu & periculi magnitudine commota Civitas , atque , uti rebus trepidis solet , festinando , agitando omnia , sibi suisque diffidebat . Iussus Hispanicus miles , uti ad latus Brabanticum infra aggerem opportuna loca obsideret , violentiam hostium virtute pulsaret , atque , sicut res & tempus monebat , patriam armis suis tegeret , defenderetque . Neque detrectavit miles in audaciam exercitatus , quò antea seditione contumacior , eò nunc obsequio promptior . Neque aqua , neque cœnum , quis stationem habere cogebantur , tardavere impetum . Atque adeo continuis fistularum explosionibus Zelanos supra modum fatigarunt , etsi & illi ancipiti malo se suaque fortissime tutarentur , hostilibusque globorum ictibus respon-

dere parati, intentique essent. Boysottus interea Justo Morio, & Martino Drogio centurionibus imperavit, uti, quantum pericula gliscebant, in tantum virtutem atque robur intenderent, quò præter hostium munimenta duas jam ante occupatas naveis, quarum una Propræfctus classis Hamstedius attinebatur, Vlissingam ducerent. Cæterum ea res in primis ardua, cum Ordammum sclopetariis infestum, majoribusque machinis probe instructum terrorem ingentem incuteret. Dum enim adversante vento contra fluctus eniti, & obliquare cursus necesse erat, certis undique machinarum iectibus admodum naves quassabantur. Unius, cui præerat Justus Morius, vela juxta corbem lacerata præcipiti se involverunt ruina, malus antennæque gemebant, æreum tormentum, quod superiori parte possum fuit, incredibili violentia concussum, mutilatumque. Cæterum nullibi plus potest audacia, quam cum ad defendendum minora sunt subsidia. Ipse per igneis, densosque globorum procellas evasit, erupit. Altera tamen navis ita dedolata, uti rimis fatiscens jam aquas exciperet, ventoque secundo ad Boysotti classem se recipere cogeretur. Deliberatum, an perforare navem, vel igni subjicere satius tutiusque esset, cum nulla evadendi spes reliqua videretur. Non diu consulto sed festinato opus erat, antequam vicino aggeri tormenta imponerentur, queis eo in loco contundere nostram classem, usque ad extremam perniciem proclive erat. Consilii hæc sententia sedit, ut junctis bellicis navibus, continuis machinarum verberibus munimentum quaterent, navis devicta pone sequeretur, atque ita occasio nem evadendi raperet. Consilium hoc prospere cessit, &

quan-

quanquam etiam ipsi fortunæ violentiam tolerarent, tamen id tandem peractum, ut horribili & continuo tormentorum fragore cuncta dissilirent, ruptisque imis compagibus cælum & terra misceri viderentur, lorica mænium præceps rueret. Tantæ veluti furiæ atque intemperiæ classiarios nostros agitabant, ut hostis lorica nudatus ex vallo ad interiora abigeretur. Ita devicta jam ante navis bellica cum minore Britannica, postquam cuncta sibi prona videret, sub præsidio classis nostræ iter suum expedivit. Requesenius cladem hanc non tam Zelandorum egregiæ virtuti, quam militarium quorundam à sua parte ducum perfidiæ, conspirationiq; imputabat. Neque suspicio deerat iis, qui vinci crimen censebant, Hamstedium ipsum tanti criminis reum esse: Jamque adeo, ut in reis læsæ majestatis fieri consuevit, facultates ejus annotatæ: cæterum integrum fidei scele risque purum fuisse compertum, socordiæ tamen & negligentiæ probro vacare visus non fuit. Ipse post diuturnam captivitatem, Zirizea demum occupata certis conditionibus libertati restitutus est.

## C A P U T   X X .

*EXPEDITIO NAVALIS LIBERANDÆ  
OBSIDIONI VRBIS LVGDVN NI BATAVO-  
RVM, CVM AB HISPANIS VNDIQUE  
PREMERETVR, ANNO  
c I ɔ I ɔ LXXIV.*

**L**UGDUNUM Batavorum duobus & sexaginta castellis erectis arcta obsidione Hispanus premebat. Exercitus erat

erat instar undecim millium, Præfector militiæ Valdesius. Summa quidem ope nitebatur Auriacus obsecris suppetias ferre, sed incertus consilii nulla spe reliqua huc atque illuc fluctuabat. Tandem Oceanum ipsum in partes vocare Partibus visum, magis uti obsecris animum adderent, & ne nihil agendo tempus socordia atterere viderentur, quam ut spes ulla liberandæ urbis reliqua esset. Mosæ atque Iselæ perforatis aggeribus, apertisque cataractis, turgidum maris elementum in campos admissum, quo submersi agri planis navigiis insolitam viam præberent. Omne privatum damnum libertate potius censebatur, atq; Fortunæ leges ponere invicti animi indicium erat. Jactura autem septingentis florenorum millibus censebatur. Classis centum & sexaginta navium in expedito erat, quis præerat Ludovicus Boysottus ingens animo, militiæ impiger, disciplina & autoritate inter suos rigidus, quæ ubi paullum vacillavit, cuncta apud militarem & nauticam pubem nutant. Majora navigia densa asserum compage constructa, retibus compactis, hostium jacula comprimere quibant, inter quæ ex duabus junctis navibus moles lignea fabricata, quæ neque velo, neque remis movebatur, sed rotis interius à duodecim nautis circumactis per aquas vectabatur. Plures triremium instar carinis planis remis decem, duodecim, & pluribus agitantur. Navales socii ex Zelandia ad octingentos erant, animo præferoces, vultu truces, multi vulneribus & cicatricibus nobiles, nonnulli brachio vel crure mutili, conjurati vel vincere, vel pulchræ occumbere morti. Quidam ex argento laminas pileis insertas gestabant, quis inscriptum, Potius TURCAE QUAM PONTIFICI. Illi aquis nutriti

nutriti ferociam quoque ex mari contraxerant, atq; Hispanici nominis infesti hostes bellis intestinis inter cædes, & rapinas juventutem suam exercuerant. Animus vastus, vindictâ ardens, audax, corpus, supra quam credibile erat, laborum patiens, velox, cedere nescium. His promptissimi quique milites immixti, sclopetis cincti, ad mille ducentos. Naves maximæ tormentum majus unum aut alterum admittebant in prora, sex minora (bassas vocant) in lateribus. Æreæ ferreæq; machinæ in universum centum erant, præter multiplices bombardas, ex quæs nonnullæ plurimos simul globos ejectabant, certa hostium pernicie, nec minori metu. Iuxta erant conti, harpagones, dimidiatæ hastæ, cæteraque instrumenta, quibus cominus pugnatur. Ad undecimum Septembris Rota amne ad aggerem limitaneum vetus, eodem perfozzo ad pagum Zoetermeram, ubi statuñ tenebat Martinus Aiala, non leves cum Hispano incidere velitationes. Batavi, quique acrius cælo suo animantur, Mattiaci, festinare, periculo occurrere, aliis alium hortari, salutem in armis ponere, nulli parcere, ipsi advorsis vulneribus mortem contemnere, si occumberent, etiam vindictam adhuc in vultu ostentare. Tanto autem odio flagabant Hispanici nominis, ut cor intimis evulsum penetralibus dentibus primo morsum, dein ut amarum canibus projectum fuerit. Quod tamen exceptum, Delphosq; delatum, compluribus, vel abominatione tantæ crudelitatis, vel in ludibrium & opprobrium Hispanorum, ostentui fuit; manifesto indicio, quo non se præcipitem agat mortaliū animus, ubi odium & vindictæ dira cupido eos intravossum rapuit. Neque postmodum minus acriter ad

pontem Soetermeræ pugnatum , & quanquam Nostri summo opere hostem fatigarent , tamen neque illi animo frangebantur , sed virtutis gloriæque maximum utrimque certamen erat. Triginta signa Hispanorum sub Ludovico Pi-mentello sedem ibi fixerant, neque ullo etsi valido & feroci insultu inde turbari poterant. Cum hic Fortuna ex voto non cederet , atque una ex majoribus navibus violenta tormentorum explosione disrupta esset , alia via eniti visum fuit . Neque ventus commodus aquas ciebat , quæ & ipse arte hostili à latere in avia derivabantur , adeo ut intumescere vasta illa agrorum planicies aquis procul distantibus nequiret. Segwartensi itaque via , ad duodecimum sequentesque dies Septembris cauro aquas promovente , fæliciter transitus tentatus. Soetermerâ atque Benthusâ fugato milite , ad modicum lacum , qui Norta dicitur , ventum . Post acres illic velitationes à meridie usque ad serum diei , miles hostilis opportuno loco cessit , ubi nostras copias sisteret in proclivi erat , Fœderatis autem superare arduum asperumque fuisset. Interea miserabilis fames in Urbe gliscerat , ita ut absumptis naturalibus alimentis ad fœda & inaudita se vorteret necessitas. In pampinis vitium , arborumque præcipue pyrorum foliis , amylo & sale condiendis , ingeniosa erat penuria. Canes , feles , glires in deliciis erant : ossa è simetis protracta , jam ante à canibus rosa iterum rodebantur : coagulatus sanguis ex fœtidis canalibus hauriebatur : gravidis in utero fœtus liquefiebat , puerperis infantes ad exucca ubera moriebantur. Corpus itaque multorum macie confectum , nutantibus genibus ægre admodum sustentabatur , pallor in ore , cava lumina , dissutæ genæ.

Neque

Neque fames , quam pestilentia tristior , quæ sex millia hominum subito in Libitinæ numerum recepit . Adeò quidem, ut dimidia fere pars civium (quatuordecim enim milia numerabantur) ferali fato occubuerint. Discordia quoque intus , extra hostium promissa minis conjuncta , miserum in modum civitatem vexabant. Quibusdam ditionem acrius poscentibus , quod fame & peste tot millia hominum occubuissent, cordate respondit Petrus Adrianus Werius Consul , se sacramento Deo Patriæque obstrictum ; si ita visum , corpus in partes secarent, distribuerent : mortem omnibus à naturæ lege semel indictam , nullum discrimen fore an hostes , an cives illam sibi intentarent. Quâ constantia rubore cuncti suffusi recessere. Nimirum exemplum sapientis magistratus arcano motu trahit , rapit ad obsequium subditorum animos , in primis ubi eadem mala & bona simul ipsis esse intellexere. Quis accensi cives, objectantibus hostibus nihil præ fame eos reliqui habere præter miseram animam , gloriose responderunt , consumptis omnibus alimentis sinistram manum in cibum , dextram in usum Patriæ fore. Quod si extrema moriendi incumbat necessitas, incensâ Urbe, dimicando pro libertate , pro religione , Deo immortali vitam lubentes oblaturos esse. Interea tamen aquæ deerant , quæ vix novem pollices altæ, imo flante aquilone retrò fluere , & res sublapsa referri. Fluctuantibus consiliis consultum visum, templarem viam perfodere, & ni æstuante Oceano aquæ crescerent, triginta vel quadraginta navibus transmissis , obsessis suppetias ferre. Cæterum violento cauro asperum mare & pleno lunæ orbe exæstuans, undas magno impetu campis infudit aperi-

tis, & ingenti miraculo aquilone iterum concitata æquora  
Lugdunum versus rapiebat. Jamque adeo ad viginti octo  
pollices increverant aquæ, cum secundo Octobris Boysot-  
tus intempestâ nocte templarem viam adoritur, & quam-  
vis hostis ad tempus resisteret, atque excussis globis ferali-  
bus ignibus nox illucesceret, stetit tamen hostium flamma-  
rumque contemptor, donec vinceret. Nihil est quod non  
expugnet pertinax fortitudo, & virtus imperterrita. Victor  
itaque munito loco murices passim sparsit, ut illorum acu-  
leis pedes hostium premerentur, si invadere iterum ten-  
tarent. Tribus admodum locis perforatis, centum fru-  
mentarię naves immissæ, atque ubi vada cursum fistebant,  
etiam humeris ab exilientibus nautis vectæ. Interea qui  
circa pagum Souterwoudam præsidia tenebant, partim igne  
vicino incensarum ædium, quammaxime autem subito a-  
quarum incremento territi receptui se dederunt, atque  
inter eos Valdesius militię Imperator, quem Alphonsus  
Lopezius sequebatur.. Inter postremos fugientes (serius  
enim fuga animadversa fuit) plures aquis incilibusque hau-  
sti, alii vel ferro, vel contis interfecti ingloriam mortem  
obibant. Facies totius negotii fœda, miserabilis, dispersi  
à suis nullos ordines observare, aquæ, tela, harpagones, ho-  
stes undique premebant, & si qui evaderent, insolentia loci,  
aquarumque retinebantur, ita ut varia & dubia mors illis in-  
cumberet. Memorabile hic eluxit Petri Ciacconii Borgiæ  
subcenturionis facinus, qui unco à nostratibus attractus, sau-  
ciusq; pro mortuo in cymbam conjectus, dū ceteri expiscan-  
dis aliis se inclinant, à tergo securi arrepta tres confecit, reli-  
qui perculsi in aquas desiliunt, ille victor cū spoliis & cymba  
ad suos

ad suos revertitur. Interea & cives calamitatibus misere afficti, & fœderati in superando castello munitissimo, quod Lammum appellabatur, suminopere angebantur, & more mortalis ingenii, ubi metus spe potior est, adversa ex adversis pensabant. Verum hostis omnis intempesta nocte cesserat. Et (mirum dictu) mænium urbis subita ruina prope vaccariam portam, eruptionisque imago hostem quoque terruit, decepitque. Tardius, indicante primum puerō, hoc creditum ab iis, quibus mala abunde omnia erant, sed neq; res neque spes bona ulla. Ita Urbs liberata, quę cum extrema inopia, mortalitate, dissidiis intus luctata, extra tamen fortissime hosti restitit. Et summo miraculo, aquas, quæ se in campos late effuderant, quasi perfecto opere iterum in mare Oceanum advorsa tempestas agitavit. Dum ita nobilis extorta fuit victoria, eadem tempestate in Hollandia boreali Hispanis aquarum insolentibus ab indigenis magna incubuit calamitas, quippe locorum gnari cymbis ubiq; iis insultabant, ita ut Præfectus Chevreauxius ad duo millia militum, vel ferro vel aquis perdiderit, ducenti & quinquaginta capti, Hornaque delati in carcerem compacti fuerint.

## C A P U T X X I.

*DE CLASSE HISPANICA PROFILI-  
GATA, VEL TEMPESTATE PERDITA,  
ANNO C I C I O LXXXVIII.*

CUM immensa Hispanorum classis, quæ centum & quadraginta quinque non navibus, sed maris veluti

castellis constabat , quarum alię octingentos , alię millos , tormenta autem quadraginta vel quinquaginta vectabant , cum ipso horrore Oceani Britanniæ regno immineret , Battavi quoque gloriose partes suas tutati sunt . Vicere quidem aliquotiens Angli , vicit quoque fœda tempestas , sed non minor victoria Parmensem classem , quę jungere suas vires Hispаниæ tentabat , propriis clausisse portibus . Cæterum , ut hanc expeditionem longius repetam , existimabat Hispanus Britanniam occupatu haud difficilem , cum & potentiores ex nobilitate Romanę religioni faverent , & res novas quærerent , quę Bernardinus Mendosa , qui nomine Regis non tam legatum quam speculatorem per aliquot annos illic egerat , in majus augebat . Anglia occupata , Scotiam Daniamque , imo Galliam dissidiis fluctuantem , Belgii servitutem , dein totius Europę imperium ambitiosus Regis animus meditabatur . Et Pontifex Romanus ( erat is Sixtus nomine , ) quod quondam , cum Romanis cæremoniis imbuta esset , Anglia fuisset illi Sacerdotio tributaria , tanquam vacuam occupanti exposuerat , indigenis sacramenti religionem , qua Reginę tenebantur , remiserat , etiam innecem Elisabethę homines nefarios & facinoribus coöptos præmio illexerat . Magnis itaque impensis nobilem classem , quâ tanquam alter Xerxes maria tegeret , per quadriennium construi Rex curaverat . Per omneis Hispanię Regis ditiones coactus miles ad viginti millia hominum , nautica pubes ad duodecim millia ex variis gentibus cōempta , commeatus semestris , pecunię stipatę ingens vis , & tormenta vicies quinques centena vectabantur . Classi præerat Alphonsus Peresius Gusmannus , Medinæsidonię Dux , dignitate

gnitate familiæ illustris, opibus potens, cæterum artium maritimarum rudis, atque adeò inconsultus. Sequebantur quoque proprio ære militiam complures homines nobiles, tanta victoriæ fiducia elati, uti honores, fundos, regias opes inter se divisiſſent, antequam victores eſſent. Accesſerant & laquei, uti ex devictis navibus postmodum compertum, aliaque necis crudelia instrumenta, queis vel gullam adversantibus, inprimis aliter de religione sentientibus frangerent, vel alio modo mortem approparent. Nonnulli impatientes viſtoriam, uti rebantur, tardari, ad Tamesin statim exponendum militem, regiam Urbem Londinum occupandum censebant, alii Batavicum portum (Marchionis Sancticrucii & Parmensis salubre illud consilium, verum improbatum fuerat) præripiendum judicabant. Immanis illa clavis, terror Oceani, quæ malis tanquam editis turribus, levatisque tabulatis instar propugnaculorum eminebat, cum vere adulto Olyſſipone solviſſet, in Gallæciæ portum abrepta, partim fœda tempeſtate concita, partim remigum, qui libertatem affectabant, perfidia, treis naves ad Galliæ litora allisit. Parmensi ingentes erant militum copiæ in procinētu, (namque ad triginta millia numerabantur) fossasque idem duxerat, queis præſidiarius miles in maritima oppida commode transferri posset. Aderant eidem viginti & octo præſidiariæ naves, quadringentæ planis carinis, ne incertis vadis litorum alliderentur. Regina, quæ fallaci pacis nomine circumveniebatur, angustias freti, Britanniamque peti non credula, tandem tumultuariis militum cohortibus obſideri litora, quâ exſcensus Hispanorum opportunus videbatur, imperavit. Minoribus navi-

giis

giis, quæ ipso in freto vel propter Tamesis ostium usui esse possent, Seimorum præfecit, centum alias in statione Pleimuthæ hostium insultus opperiri jussit, queis præfectus Carolus Howardus, secunda Francisco Draco potestas, qui totum terrarum orbem maritimis navigationibus lustraverat, obtigerat. Cæterum Reginę iterum jussu ingenti socordia præcipuis navium exarmatis, quod subdolis nuntiis decepta nondum venturam classem credéret, illa subito adventante, magna cunctos incessit consternatio, consilia in incerto fluctuabant, vix coactus miles, qui licentius vagabatur. Nata tum erat occasio debellandi Britanniam, nisi Præfectus obtendisset, se mandato Regio stringi, non prius expeditionem moliri, antequam Parmensis suas junxisset copias. At illum Dunquerçæ inclusum Batavus premebat, omneisque exitus obsidebat, neq; Hispanica classis mole suâ labrans Flandricum littus, syrtibus & ceco arenarum horridum, attingere quibat. Non procul à Pleimutha Franciscus Dracus modicis viribus experiri pelagi Fortunam ausus, mobilitate suarum navium immensas hostium moles, quæ pigro incessu mare secabant, supra modum fatigabat. Junctim quoque lunatam in speciem classis procedebat, ideoque certiora vulnera, vel pericula, ne sibi invicem colliderentur. Quod & præceptorię contigit, quæ impacta aliis arbore mutila rapinæ opportuna fuit. Provecta itaque classis (ut hæc breviter perstringam, quæ virtuti Anglorum debentur) post variam Fortunam præceptoria nave à Francisco Draco expugnata, Cantabrica incensa à proprio jaculatore, & deinceps calendis Augusti inter Britannos & Hispanos acri admodum conficto prælio, quo continuis octo horis mare ignibus &

bus & fumo obductum erat, globis tormentorum instar grandinis volitantibus, unâ Hispanicarum rimis fatiscente & Caleti litoribus allisâ) dein, quantum altitudo navium permittebat, circa Caletum in anchoris stetit. Omnis jam labor in eo vortebatur, ut dux Medinæsidoniæ, qui summum in classem, etsi maritimæ militiæ rudis, imperium tenebat, cum Parmensi vires jungeret. Patres non vano metu perculsi sub præfecturâ Justini Nassovii ingentibus impensis classem in procinetu per totum annum habuerunt, semper illis locis imminentem, quîs hostiles naves constiterant, ne qua parte in Oceanum erumperent. Medina nuncios ad Parmensem mittere, se gravi necessitate circumventum, expeditionem frustra fore, nisi prope raret copias jungere; contra Parmensis, neque suppetias satis expeditas, atque adeo Duinkercæ portum Hollandica classe constringi. Interea ille, sicut consilii inopes solent, tempa circumcursare, cælites passim precibus fatigare, nihil pensi habere. Neque vero Britanni occasionem intermittere, verum ad hostilem vim pulsandam omnia tentare. Nocte itaque intempesta, vento & æstu secundo, octo incendiariis navibus immisis, tormentis, pulvere, ferro & lapidibus refertis, tanta hostem incessit consternatio, ut subito consilii expertes anchorarios funes præciderent. Hinc ad decem horas ita pugnatum acriter, ut plures hostiles naves lace ratæ, submersæque fuerint, una maximarum (galeonem vocant) quę octingentos homines vectabat, alteraque Cantabrica, rimis fatiscentes, & fluctibus Wilingam versus actæ; quarum una à Vlissinganis, cum præfectus Fredericus Toletanus reliquique primores scapha se recepissent, non

O

diffi-

difficulter superata, altera , cui præerat Pimentellus , cum  
diu contra extrema Fortunæ se defendisset , tandem Petri  
Dousæ masculæ virtuti cessit , qui & vexillum inusitatæ ma-  
gnitudinis in templo Lugduni Batavorum suspendit. Na-  
veis , exemptis iis quæ usui esse possent , urgentibus aquis  
Oceanus depressit. Plurimi interfecti , vulnerati gratis Ant-  
verpiam missi. Nonnulli quoque illustris dignationis in Hol-  
landiam abducti : inter quos primi Didacus Pimentellus ,  
Marchionis Taverani frater , Didacus Velascius , Alphonsus  
Vargas , Marchio Ulyssiponensis , pluresque alii præcipuæ  
inter populares nobilitatis. Superata hostium navi s , vino  
cæteroq; commeatu onusta , cum sociis admodum navalibus  
xxv , qui vino graves sentinam ingenti socordia haurire  
obliti fuerant , aquis obruta. Alia quoque actuaria vastæ  
molis ( galeassam appellant ) cui præerat Hugo Moncada ,  
sub idem tempus ( nonnulli tamen antevortunt ) alterius  
navigii rudentibus implicita , gubernaculo excusso , vento  
æstuque violento vado Gallici litoris impulsa , Duce pluri-  
busque aliis , qui fortissime navem tutabantur , cæsis , tan-  
dem Britannis cessit. Quinquagies mille ducatorum præ-  
da , remiges trecenti in libertatem asserti , classiarios qua-  
dringentos infestum pelagus absorbuit : pauci admodum  
fessa jactantes salo brachia evaserunt , primi in Hispania  
tantæ calamitatis nuncii. Anglis ad tormenti iustum infe-  
quentibus , fœda strages Hispanis incubuisset , nisi pulve-  
ris pyrii penuria consilia impedivisset . Tanta eâ tempe-  
state formido Medinæ cæterorumque Præfectorum ani-  
mos concusserat , ut , fœdum dictu , de tradenda classe &  
vita paciscenda agitaverint. Sed avoris necessitate Britannis

spes

spes nova gliscebat classem cum Parmense jungendi. Neque vero Parmensis ullam operam intermittere, militem suum, ut in Hollandorum classem irrueret, & loco moveret, compellere, postremo ferocius agitare, quam solitus erat. Quippe nonnullos centurionum propriâ manu confosso fuisse, qui mare aperiri non posse affirmaverant, rumor sparserat. Tandem tum præmiis, tum minis lectissimi mille jaculatores conditionem accepere, quorum animus pulsandę classis hostilis victoriæque cupidine æstuabat, facinusque egregium super virilem audaciam commisere, dum ferro viam aperire tentabant. Et quidem ingenti impetu Nostros adorti non levia damna inflixerant, ad extremum tamen misere omnes fere trucidati sunt. Hinc Medinæ Dux animo dejectus spem omnem jungendarum virium deponere, consiliis fluctuare, timide & ignave omnia administrare, denique neque famę parcere, neque quicquam consulti habere. Re itaq; desperata (cum retro angustię freti obsecrè essent) Hiberniam & Orcades circum, quā indomitus & procellis infamis debacchatur Oceanus, neque sine periculo navigatur, in Hispaniam revorti in animum induxit suum. Placidus primum ventus naveis mole sua laborantes & laceras ægre promovebat. Tertio demum Septembbris die fœda admodum tempestas mare exasperavit, atque ita classem disjecit, uti intra eundem mensem triginta duæ naves vel mari haustę, vel ab Hibernis superatę fuerint. Ad decem millia hominum perierunt. Aliæ in Norvegiam actę, quædam quò pertigerint, ne fama quidem vulgavit. Unam tantum bellicam cum x x x onerariis incolumes in Hispaniæ portum Medina deduxit. Lætus hic & festivus

dies Britannis Batavisq; eò lætior, quod nulla alicujus pretii  
navis eorum desiderata, centum viri tantum cecidissent; con-  
cursare omnis ordinis homines, Proceres omnia lætitię si-  
gna edere, quis plebs captari solet, imprimis autem Deo  
immortali supplicationes decernere. Contra apud Hispa-  
nos ingens consternatio, alii fortunam Regis, alii patrem,  
vel fratrem, vel maritum, vel necessarium & propin-  
quum deplorare, adeò ut luctus tempora Rex contraxerit,  
uti magnitudo damni, quæ omneis ferme nobiles domos  
funestaverat, oculis subtraheretur. Complures domum re-  
versos, vel ex maris jactatione languor, vel formido, ne  
more dominantium fortuna culpę imputaretur, confecit.  
In Parmensem torta tantę cladis invidia, uti suam ignomi-  
niā, notis in aula artibus, criminatioībus apud Regem  
magnates Hispanię diluerent.

## C A P U T XXII.

*DE EXPEDITIONE BRITANNICA  
HISPANIAM VERSUS, QUIBUS FUN-  
CTÆ XXIV FOEDERATORVM  
NAVES, ANNO cI° I° xcvi.*

**C**UM de novo apparatu classis Hispanicæ rumores ite-  
rum sererentur, quanquam nuntio vanescente, con-  
stituit tamen Regina classe Hispanias ipsas invadere, atque  
in propriis hostium visceribus bellum & fortunam experi-  
ri. Autor tanti facinoris erat Robertus Essexiæ Comes,  
magni excelsique animi, immodica & vasta cupiens, po-  
tens

tens opibus, plurimę apud Reginam auctoritatis. Ipse nullis impensis parcere, complures nobiles ad eosdem sumptus impellere, hortari, festinare, nullis laboribus fatigari. Carolus interim Houwartus maris apud Britannos præfectus, qui consiliis illius multum advorsabatur, cum Caleto victo in propinquo hostis esset, necessaria classis tarde suppeditare, moram nectere, trahendoque negotio nihil omittere. Atque adeò Regina mox aliena à periculosa expeditione, cum jam classis Pleimuthi in procinctu esset, serio per literas Essexium monuit, ut eam intermitteret, se sumptus restituturam. Ille, si Regina juberet, obtemperaturum, sin se cùs, expeditioni non defuturum respondit. Classis constabat ex centum & L navigiis, quorum quatuor & viginti Fœderati miserant, octodecim nimirum bellica, sex quæ commatum vectabant, sub præfectura Ioannis Duenvordii, Warmondæ domini. Pleraque Essexius suo & propinquorum ære armaverat. Quæ quidem expeditio ut propria Britannorum fuit, ita neque minor Batavorum eluxit gloria. Pridie calendas Julias ante portum Gaditanum in anchoris classis stetit. Bellicę Regis naves una & viginti eadem in statione morabantur, onerariæ totidem machinis vicenis: galeones quatuor vastissimæ magnitudinis à sanctis nomen acceperant, hæ tormenta ærea quatuor & quinquaginta, homines septingentos singulæ vectabant. Duæ Epidauriæ naves, tres Fregatte ad instruendam classem Olyssiponensem tormentis onustæ. Namque Olyssipone aliisque in portibus & alię expediebantur: & tertia duntaxat pars maritimarum in Hispania virium hæc censebatur. Destinata quoque Americano itineri regia classis

ventum opperiebatur. Præter onerarias privatorum quinquaginta leviter instructas, sub mænibus urbis viginti quoque & duæ longæ naves defensandis civibus, prohibendoque hosti constiterant, quæ primo vespere cum Britannis pugnam occuperant, verum præ formidine in statu nem se recepere. Summopere flagrabat Essexius, (idemque urgebant Batavi) noctem, quæ instabat, antecapere, consternatos opprimere, ne quid compositis iterum animis & consiliis & viribus novaretur. At Houwardus vel studio partium (namque inter æmulos rara concordia) vel quod Regina vetuerat, regias naves, mari ventis turgido, angustiis pelagi, queis aquæ ferocius compressæ contra infida navigantibus vada maxime subsultant, exponere verebatur. Kal. Quintilibus classis Hispanica prima luce Portum Regalem petit, relictis interius in sinu Gaditano quatuor versus Punctale galeonibus, qui locus non procul ab urbe, ubi mercatoriæ naves faburram exponere solite, eminebat. Longis navibus quæ ad urbem relicte, levioribus ingenti impetu horrorem incusserat Verius equitum Magister. Namque per integrum horam fortiter dimicando compages illarum ita perruperat, ut quinis laceratis vel corruptis, reliquæ ægre se pone galeones reciperent. Quis dum hebescere virtus ceperat, Essexius nihil reliqui penitus facere in animum induxerat suum, & vincla minacia transstris galeonum injicere tentaverat, sed adverso maris recessu impediebatur. Jactis tamen anchoris, per quatuor continuas horas utrinque tormentorum fragore cœlum & maria misceri, donec æstus crescens in ministerium altiores aquas suppeditaret: una ex Hollandicis navibus, cui Delphinis

phinis insigne erat, cum Præfecto Gulielmo Henrici, & plerisque nauticę p̄ebis, proprio igne correpta, in sublime abripiebatur: passim capita, trunci artus horrendo in altum ferebantur spectaculo. Immensum hinc gaudium oppidorum mentem excitam agitabat, spiritumq; erigebat. Verum dubiam & irritam spem, qua afflictorum animi sustentabantur, subito violentia fregit. Ubi enim mare æstu intumuerat, anchoræq; sublatæ forent, tantus repente horror hostium pectora concussit, ut non expectando pugnam galeones in vada impingerent, in cymbas frequentes se conjicerent, nonnulli natando vel evaderent, vel mari absorberentur. Essexius confestim minores aliquot naves & pinassas immiserat, prohibituras, ne suis navibus ultro ignem hostis injiceret, qui calamitatem suam, modo inimici præda non potirentur, in lucro reputabat. Verum incenso pulvere pyrio galeo, cui S. Philippi nomen, horrendo admodum iætu dissiluit, adeò quidem ut malus cum corbe instar rapidissimi teli in suprema aëris raperetur. Tam acri impetu cunctæ circa naves subsultare, & compages dissilire videbantur: verum una tantum ex Britannica classe pinassa igne periit, homines evasere. Hostilem S. Thomæ navim flamarum quoque violentia postmodum absumpsit. Ita turbatis rebus & tumultu fluctuantibus, Hollandi Zelandique ingenti virtute Punctale munimentum occupant, vexillumque archithalassi Warmondi figunt. Ne oppidani Nostros afflictarent, imperatum, uti confestim pons, qui urbem modico æstuario à litore divulsam Hispaniæ jungit, abrumperetur. Magna omnium consternatio-ne, dum sexcenti equites ex nobilitate Xeritana, totidemq; pedites,

pedites, ad defensandam urbem concurrunt, à Ludovco Nassovio & juxta quadringentis hastatis haud difficulter pulsi, vel intra portas urbis fugiendo se receperunt, vel in vicinum enixi propugnaculum, quod jussu Regis inchoatum, & nondum consummatum erat, viam ingrediundi oppidum monstrarunt. Urbs non difficulter capta paucis resistentibus, nisi quod ex planis ædium cives Gaditani, pondera saxorum, lapides, volverent. Reliqui in arcem aufugerant, sed spe auxiliorum sublatâ, ditionem maturarunt, & centum & viginti millibus ducatorum incolumentem pepigerunt. Obsides in Britanniam avecti, vel quod Regina gravius irritata redemptionem detrectaret, vel quod Rex Hispanię à propinquis & necessariis quenquam redimi prohibuisset, in custodia perierunt. Direpta urbe & arce, in qua armamentarium Regis erat, & omnis generis navalis apparatus, opulentissimam Indicam classem, quæ centies centenarum ducatorum millibus æstimabatur, invadere constituerat Essexius: atq; adeo nobile & illustre facinus patratum fuisset, nisi temporis mora consilium diremisset. Adnitebatur Petrus Herrera censor militaris, pluresque mercatores, fortunas suas duobus ducatorum millionibus redimere. Atque adeò Comes secum animo reputabat, providi ducis esse certa pro incertis arripere, nihil tam capax fortuitorum quam mare, fluctuare potissimum cum aquis incertam præliorum fortunam, avidum prædæ militem & victorem nulla autoritate ab opulentis spoliis arceri posse, quis illorum animi potissimum accenduntur. Pactio ita instituta, uti Regiæ naves conditionibus eximerentur. Dum ita cunctando tempus trabitur, jussu Medinæ ducis opulentissima classis

classis triginta quinque navium incenditur. Vastum illud incendium igneis latissime fudit, flammorumque vorticem fumo immixtum nubibus inseruit, gemebant mali & antennæ, atq; nutante lapsu præcipites jaëtabantur, transtra & carinæ cum opibus immensis crepitabant, stridebant aquæ, & cum ignibus colluctabantur. Invisum hoc fuit mercatoribus facinus, sed Medine dux jussu regio divitias tantas, tertiamque partem maritimarum Regis virium subjecere ignibus maluit, quam hosti tradere. Galeones per pontem excisis columnis evaserunt. Consultatum dein, an urbem, ex qua visceribus admodum Hispaniæ ultima intentari poterat pernicies, retineri, an deseriri è re esset. Inclinabat eò Comes Essexius cum Magistro equitum Verio, & voluntaria nobilitate, quatuor militum millibus illic sedem figere. Hollandiæ quoque archithalassus militiæ impiger talem stationem non deferendam censebat, quæ opportunissima esset hosti in propria regione debellando, spem magnam dominationis in manu esse, non debere per ignaviam aut socrdiam bonam fortunam atteri, Regem foras potentem, domi imbellem esse, gentes illas armis non assuetas, animos molles, & fluxos, & jam fama fere bellum confitum esse. Quamquam autem summo opere maximum pulcherrimumq; facinus incipere autor esset Essexius, & jam commeatum urbi inferre tentaret, Houwardus tamen, Præfectus classis, qui semper illius consiliis advorsus fuerat, multum refragabatur, neque jussisse Reginam, atque ob dubia tempestatum annonæ militaris difficultatem obtendens. Cæterum neque Warmondius audiebatur, qui menstrua alimenta pollicitabatur, posse interea ex Italia, vel

Britannia, prout ventus incidisset, commeatum peti, neque  
Mauros, queis continua cum Hispanis bella, denegaturos.  
Gadibus itaq; dilapsa classis, Pharo urbe ab Hollandis incen-  
sâ, cum Olysliponem, Bajonam, Coronam, aliosque Hispa-  
niæ portus impetere, navesque diripere vel corrumpere pro-  
clive esset, urgeretque Essexius, (quo & vota Belgarum abi-  
bant) quamdiu alimenta suppeterent, Hispanicam classem,  
quæ ex Indiâ septuagies centena ducatorum millia advecta-  
bat, juxta Azores, sive Flandricas insulas, exspectandam esse,  
& prævorsis celeritate famæ nuntiis auxiliisque, facile in-  
tercipi posse: verum iterum contra tendebat Houwardus, at-  
que invisa æmulatione omnia præclara Essexii consilia sup-  
primebat. Propere itaque relicto Essexio, qui per horas xx  
& i v solus in mari Oceano agitabatur, domum contendit.  
Sed Warmondius vago per maria cursu tandem illum in-  
venit, & Pleimuthum usque comitatus ingentes à Regina  
accepit gratias. Namque eadem officiosis admodum literis  
Warmondæ Domino Hollandiæ archithalasso retulit, se  
ex classis Præfectis intellexisse, augustissimam victoriam  
magna ex parte virtuti, solertiæ & industriæ illius, Belga-  
rumque tribuendam, se multis magnisque tempestatibus  
fideles socios expertam, jamque antea Procerum in auxiliis  
suppeditandis alacritatem & liberalitatem sensisse, qui con-  
ficiundæ tali expeditioni immensos sumptus toleraverant,  
nunc vero subditorum tam prolixam fuisse voluntatem,  
uti pro Regina nullis laboribus, atque adeo ne quidem ipsi  
vitæ pepercerint. Ingentes quoque gratias agere Præfecto  
classis Batavicæ, quod prætoriâ navi solum reliquisque de-  
stitutum Essexium per maria fluctuantem, cum cursum  
flestan-

fectendo illum tandem repperisset, in columem portui restituisset. Tantorum beneficiorum opportuno tempore non immemorem fore. Sub finem anni nonagesimi sexti Hispanus, qui concoquere Gaditanam injuriam nequibat, indignationis impotens, navibus centum octo & viginti, militum quatuordecim millibus, classiariorum ingenti copia, inter quos complures Belgæ ad sacramentum militare coacti, instructam classem sub Martino Padilla mari iterum immittit. Mensis erat November, fœdis ut plurimum tempestibus hyemans, quo tempore turbidum & vorticosum mare non impune tentatur. Verum tantus fervor erat novi patrandi facinoris, ut æstatem opperiri nimis quam longum videretur. Fama erat Cornubiam Angliæ provinciam peti, quo Hibernis, qui sacra Romana sequebantur, suppetias ferrent, & simul junctis viribus in Britannia rerum potirentur. Alios metus incessebat, ne naveis, quæ modica mole profundum non fatigabant, portibus Belgicis imminerent. Cæterum Angliam peti non dubia fama fuit. Tanta erat victoriæ fiducia, ut Regnum illud in filiæ dotem destinasse Hispanus referatur. Cæterum quam facile collabescant improba mortalium consilia, maximeque vires, quæ divinâ ope non sustentantur, subito lapsu graviore corruant, summus rerum arbiter ostendit. Sæva enim tempestas, quæ supra modum turgidum mare conciverat, unâ nocte quadraginta naves in brevia, infamesque scopulos ita compedit, ut fractæ super urgentibus aquis cederent. Ignobili morte ad quinque hominum millia perierunt. Vicies quinques centena ducatorum millia hausta memorantur. Dif-  
fidentia Hispanorum hanc calamitatem properavit, cum

imminentia pericula Belgæ vadorum circa hæc loca gnari  
mature prævidissent, & incassum monuissent, quod in avia  
& syrtes vectarentur. Serò creditum illis, cum clades su-  
perasset. Tota admodum periisset classis, nisi nauta Bata-  
vus complures præsenti exemisset periculo, quod idem  
anno octuagesimo octavo solerter factitaverat. Ita nobili  
classe non ab hostibus, sed à calamitate victa, frustra eam  
Duinkerquani, ut suas conjungerent copias, expecta-  
bant. Nostri autem, ne opportunitatem temporis corrum-  
perent, fortunam experiri ausi, duas naves, quæ ad Neopor-  
tum oppidum struebantur, igni subjecere. Anno quoque  
sequenti non prospere cessit Britannis, Batavisque nova ex-  
peditio, qua circa Azores opulentas insulas, maria rapinis  
fatigare, in primis classem Americanam opperiri consilium  
erat. Naveis Regiæ Anglicanæ erant sedecim, viginti Bata-  
vici sub præfectura Warmondi: sexaginta minores mi-  
liti & commeatui vectando. Militum sex erant millia su-  
stentandæ terrestri militiae. Toti classi supremo imperio Es-  
sexius prærerat, comperto parem potestatem magnis pa-  
trandi facinoribus inutilem esse. Cæterum fœda admo-  
dum atque horribilis tempestas consilia fregit. Prætoria  
navis arboribus mutilis, furore fluctuum compagibus so-  
lutis, exitio propinqua erat, tota classis ita lacera, ut vix  
summa ope aquis exhaustis super fluctus attolleretur, salva  
tamen post decimum diem in Angliam reversa est. Milite  
languore morbisque afficto dimissoque, majoribus navi-  
giis fortunam tamen tentare placuit. Verum iterum tem-  
pestate advorsisque ventis agitata classis, invadere opu-  
lentissimam classem Hispanicam, quæ in Azorum unam se-

rece-

recepérat, non potuit. Treis tantum, quæ deviæ oberrabant interceptæ, quarum una à Batavis occupatâ, dum alteram prædè avidi persequuntur, superatam sibi retinebat Rale-gus Anglicanæ classis parti præpositus. Hinc jurgia & contentiones in nervum eruperunt. Caracca ex India ve-niens propriis ignibus absumpta, ne prædè cederet. Op-pidis exiguis, queis nulla prætexebantur munimenta, in-censis, in cæterum improspera hæc fuit expeditio, & virtuti advorsabatur fortuna. Gravior fuit Padillæ calamitas, qui fœdam cladem corrigerem cupiens in graviorem incidit. Horridus septentrio totam classem, quæ centum & octo na-vibus, præter classiarios militum octo constabat millibus, disjecit, dissipavit, galeones tres & sex alias naves, virûm-que & auri immensam vim profundo mersit. Reversus do-mum præfectura movetur, atque in ejus locum suffectus Didacus Brocurus. Incerta casuum non tantum infortunio, verum & culpe imprudentiæque, imputata fuere.

## C A P U T   X X I I .

*DE PRIMA VERSVS INDIAM NA-VIGATIONE, PRÆLIIS QVE NAVALI-BVS CVM LVSITANIS ET BARBARIS, ANNO cIɔ Iɔ xcV.  
& duobus seqq.*

CUM per rigidam arcton anno cIɔ Iɔ xcIV & duo-bus sequentibus, tertium infeliciter successisset Si-nas, Moluccas insulas, Indiamque versus Batavorum me-

memorabilis expeditio, ubi non tam cum hominibus, qui nulli reperiebantur, sed cum immanibus belluis ursisque, atque mari congelato, quod glaciali compage veluti edita montium attollebat, pugnatum fuit, eadem tempestate nimirum anno c I o l o x c v mercatores nonnulli quatuor naveis instruxerant, ut austrum versus navigando fortunam ancipitem, & longe difficillimam in Indiis experientur. Maxima illarum erat trecentarum vehitam, tormenta in universum centum. Quadringentis florenorum millibus classis æstimatatur. Nimirum fata viam invenerunt, & iis quos Rex Hispanica negotiatione interdixerat, penetralia Indiæ divitiasque aperuit. Jam ante qua quavorsum maria navigationibus, commerciisque Batavorum, Zelandorumque fervore ceperant, & quos Principum iniquitas vel metus oppresserat, ne potentiam suam pelago in primis utraque India experientur, nunc lucri in primis & libertatis avidi, totum terrarum orbem, incognitaque litora lustrabant. Neque frigus, neque incendium æstuantis solis eos territabat. Et, quis credat, hominum septuaginta perpetuo millia in mari habitabant, cumq; illis regionis suæ obtigisset angustia, animum terrarum mariumque omnium finibus vix terminabant. Præter Europæas regiones etiam in Mauritaniam itum, qua mari Oceano & interiori alluitur. Guineam auri eborisque feracem eadem cupido invasit. Neque America vota interruptit. Nunc in Indico Oceano biennii spatio lustratæ insulæ, aromatum feraces. Mira autem illorum, qui in Indiam primi navigarunt, abstinentia, & fidei cura. Quandoquidem mandata exceperant, ne primi hostibus vim intentarent, verum sua tantum tuerentur,

aperto

aperto mari , quod Africam & Americam interluit, Hispanicam navem opulentam mercibus , à reliquis distractam, quę extrema expectabat, intactam dimisere. Quoniam autem Lusitanorum insidiis plures asperę nobis difficultates obtigere, velitationes & prælia maritima hic ex ordine proponemus. Prolixis itineribus à nostris ad Javam ventum , quę à Sumatra , quæ veterum Taprobane fuisse creditur, viginti circiter milliaria maritimo itinere distat. Urbium Princeps Banta , commerciis Orientis nobilis. Ubi cum frequentes Lusitani commerciorum causâ ætatem agerent, tum Cæsarem Javanum , tum proregem quotidie precibus fatigare, donis, quibus barbari maxime capiuntur, tentare , invidia & odio pessimis consultoribus perniciem nostris machinari , criminari Nostros , esse illos totius generis humani hostes , omnia maria & terras lucri cupidine infestare , quicquid obvium , haud secus atque avitum , inter se partiri , rapere aliena jus belli vocare. Si nunc ipso initio non cohibeantur , fieri mox posse , ut illo incendio omnia Orientis regna conflagrent. His similibusque verbis Cæsarem Javanum, Proregem Bantensem, & Sabandarium, qui à primis consiliis erat , ad nefanda facinora incitabant . Cæsarem promissis eò impulerant , ut sub amicitiæ velo Præfectos classis, cum iis qui aliquo munere insignes essent, ad geniales epulas invitaret, & , dum vinum securitatem suaderet , ipsi classem ducibus vacuam armato milite invaderent , præda & merces cunctæ Cæsari cederent, pro navibus tria ducatorum millia persolverent. Cæterum cum insidię , quas occulte tentaverat , non procederent , Prorex icto fædere commerciorum specie iterum allexit. Verum,

cum

cum dolis hic omnia componerentur, Præfectusque Houtmannus aliquique nonnulli detinerentur, post varias expostulationes frustraneas, placuit tandem extrema omnia experiri. Captato itaque à meridie maritimo vento, qui stato indies illic attollere se solet tempore, plenis velis, explicatis vexillis, litori, quam proxime potuit, propinquantes, tormentis urbem concutere, tecta lacerare, tumultu & metu omnia miscere, rapinis litus infestare, myoparones treis aromaticibus refertas abducere: altera à Lusitanis incensa flagrantibus ad urbem ignibus delata fuerat. Prorex ex eo tempore ira & metu anxius insidias tendere, atque ea modo in animo habere, quibus classi extrema intentaret. Houtmanno relliquisque captivis implicitis laqueis gulam frangere minabatur, nisi explosione machinarum nostri desisterent, ab urbe ad stationem suam recederent, prædam restituerent. Perlectis Houtmanni literis cordatè senatus nauticus Proregi rescripsit. Fide, industria, aliisque bonis artibus se nullis unquam mortalium cessisse, cæterum qui nunquam injuriis laceſſere alios consueverant, nihil gravius atque injurias ferre. Circumventos se dolis, retentos populareis contra jura gentium. Ubi omnis fidei religio excessit animis, naturæ ratio dictat, ut vim vi repellamus. Credidimus vos popularium sanguine cruentasse manus vestras, quod ad literas nostras nihil responsum foret. Tacentibus vobis sanguinem expiaturi venimus. Modò intelleximus implicitis collo laqueis extrema captivis vos minari, nisi tormenta cohibeamus, & confestim in stationem veterem recedamus. Sin captivi & merceis restituantur, sancte omnia amicitiaœ officia pollicemur, sin secus, periculum virium

virium experiemur. Neque verò hæc tam vobis, quam calumniis Lusitanorum tribuimus. Haud facile animus verum providet, ubi alterius partis gratia dominatur. Eligas nunc, an pacem, an arma velis; salubre consilium, ne certa incertis mutes; impone felicitati tux frenos, facilius illam reges. Cum ad illas literas iterum Prorex non respondisset, maritimo vento prope ipsam urbem accesserunt, ita ut fundo propemodum ac vado carinæ hæserint. Utique liburnica quodammodo arenarum syrtibus involvi ceperat. Interea continuus tormentorum furor mœnia & tecta urbis undiq; quassabat. Quibus rebus permota civitas trepidare, festinare, militem cogere, insolito tumultu cuncta miscere, majoribus pilis territi non amplius loco cuiquam satis fidere. Tandem oppidani cum Lusitanis ad arma convolant, celocibusque viginti quatuor, armatoque milite, liburnicam, quam arenæ impactam credebant, invadere tentant. Acie instructa sex à tergo, octodecim à fronte immittunt, certam sibi spondentes victoram, quod paucō milite insideri navem non ignorarent. Cum iis, qui subsidio venerant, viginti quatuor viri liburnicam contra confertam undiq; multitudinē defensabant. Summo nisu ex arenâ navem eduxerant, quæ fluitans in propinquos & confertim irruentes certos ictus jaculabatur. Depressis aliquot celocibus, hinc ab aquis, illinc ab ignibus, miserabilis mortis imago apparabat. Reliquæ metu territæ confessim in fugam conversæ, ultra centenos partim occisi, partim saucii, nullo nostratium incommodo. Dum ita liburnica, virtute & Diis volentibus, viginti quatuor celoces in conspectu urbis summo hostium opprobrio in fugam agit, plureis cæsos tanquā purgamenta

Q

maris

maris fluctus ad vicina litora volverent, accessit & alia op-  
pidanis calamitas, quod ex classe nostra, quæ propter vada  
suppetias ferre liburnicæ nequibat, tanto horrore densissi-  
mi globi ex majoribus tormentis in urbem jacerentur, ut  
undique immenso fragore collisa tecta nequidem refugium  
fugientibus relinquerent: in primis suburbium, in quo fre-  
quentes Lusitani cum Chinensibus victabant, totum pe-  
ne dirutum disiectumque cum gravi infortunio luctabatur.  
Neque nocte quies, sed ingeminatus terror. Ponderosissi-  
mas machinas centies & ultra explosas constat. Quo ne-  
gotio vehementer Prorex permotus, multa cum animo suo  
volvebat. Terrebat eum natura Batavorum, quæ fatigata  
injuriis, præceps ad implendam vindictæ cupidinem ruit,  
& vitam atque mortem juxta aestimat. Cæterum instigan-  
tibus Lusitanis, ut ex Houtmanni literis intellectum, Javani  
in eo erant toti, ut artificiosis ignibus, machinisque flam-  
mas evomentibus, quis conficiundis ingenio pollent, clas-  
sem flammis fœdarent, opprimerentque. Quo comperto, &  
simul quam grave periculum popularibus immineret, con-  
stituit Senatus nauticus iterum Proregem monere, ne ni-  
miū Lusitanis, qui calumniandi libidine transvorsi ageban-  
tur, fidem adhiberet; esse hominum genus leve, perfidum,  
multisque vitiis coöpertum, jamdiu tentasse omnia maria,  
omneis portus cæteris gentibus præcludere, quinet insatia-  
bili habendi cupiditate flagrare, adeò ut eorum aviditatem  
ne quidem totus orbis capiat. Altera manu Orientem, altera  
Occidentem premere. Magnas illi opportunitates in gente  
Batavorum sitas, quæ fide inlyta regno ejus magno posset  
esse usui. Proinde si sibi regnoque suo consulere velit, ne  
res

res suas fortunasque perditis Lusitanorum rebus immisceret. Ad extremum iterum petere , uti captivi restituuntur , neque calumniis Lusitanorum fidem adhibeat . Pacem ante omnia se cupere , quam ut ipse quoque amplectetur , neque incerta pro certis mutet , ipsius quam maxime interesse. Prorex , et si longe alia volveret , ubi se videt difficultatibus circumventum , neque per vim neque per insidias classem opprimi posse , tandem certis conditionibus fœdus percussit , captivos liberavit. Interea Malaccā Legatus venit , qui decem realiorum millia Proregi obtulit , ut exploratores ( ita Hollandos appellabat ) vivos in potestatem suam redigeret , aut commerciis , regnique sui finibus in totum prohiberet. Ita rursum Proregi divitię bono honestoque potiores erant , quanquam consilium illud incepturnque frustra fuerit. Nostri ubi cuncta admodum fœdera ludibrio exponi vident , extensis velis Iacatram petunt , cum jam ante aliquot parones vi armata sui juris fecissent. Ab uno tamen hostili lembo in aperto mari , antequam deseretur , cum Barbari toxicō infectas sagittas imbrium in morem ejacularentur , nonnulli ita vulnerati , uti nisi carne & cute excisa curari nequirent. Cum itaque relicta statione Bantæ , anchorisque levatis Iacatram , aliud Iavanorum emporium petiissent , Iavæque postmodum litora pedentim legerent , tandem sub tertium Decembbris diem ad Cydaiam anchoras jaciunt. Ibi rursus Barbarorum perfidia in nervum erumpit. Cum enim Sabandarius ( princeps consiliariorum ita appellatur ) nomine regis officiose petisset , uti classem oculis usurpare fas esset , cuius lustrandæ desiderio summopere flagrare Regem simulandi promptus

finixerat, cum revera longe aliter animo agitaret, Nostri pro tempore benigne omnia officia humanitatis obtulerunt. Cum itaque sedulo cuncta nostri paravissent, ut Regem accuratè & liberaliter exciperent, postridie multi lembi patronesque vectorum pleni partim navem Amstelodamum, partim liburnicam petunt. Præfectus Hellius, & navarchus Scellingerus, qui Amstelodamo præerant, circa foros adventantem, uti arbitrabantur, Regem expectabant, quo solitis officiis humanitatis & blandimentis regem prensarent. Vix nobilium præcipui, cum satellitio navem intrarant, quin ferrum continuo stringunt, & primo impetu duodecim conficiunt. Hellius, cuius partes erant Regi adventanti gratulari, à Sabandario dolone confoditur, Scellingerus quoque letali accepto vulnere exanimis concidit. Nauclero, qui clavum tenebat, intestina ex vulnere aqualculi in pedes propendebant, quod vulnus quoque Sabandarius intentaverat, cuius animus ferox in cædem promiscuam grassabatur, qui ab uno ex primipilaribus itidem saucio medius transverberatus. Interea qui in navis interiori parte erant, tam nefando facinore exciti, ipsi quoque strepitu & tumultu omnia miscere, contis hastisque occurantes per tabulata confodere, in superiora eniti, deinceps gladiis sclopetisque cominus agere, hominesque omnium, quos terra sustinebat sceleratissimos, ad certam mortem adigere: alii transfixi, alii in mare præcipites agebantur. Quorum fortuna territi cæteri, qui liburnicæ insidias tendebant, summa cum trepidatione ægre se receperunt. Iavani plures, qui in litore victoriam sibi certam pollicebantur, navem Hollandiam, quæ vorsus terram ferebatur, fugere rati,

rati, læti magno impetu lembis suis insultant, marique se committunt, scelere atque superbia se efferentes, proximam navem primam sui sceleris prædam facere tentabant: cæterum ubi propinquant nostris, longe alia immutata rerum facies, tormentis enim impetiti plures lembi depresso, ex insulanis alium alia clades oppressit, ferrum, ignis, mare multos consumpsit. Neque enim pugnandi audacia, neque fugiendi copia erat. Ita perfidiæ pœnas Barbari, quos à Bantensibus & Lusitanis incitatos postmodum comperatum fuit, justissime reddiderunt. Domum reversa classis anno c I o I o x c v i i . post multas difficultates, damni tamen exors, lucri cupidos mercatores, Hollandos Zelandosque plures, & ex Brabantia extorres facile impulit, uti majori classe certa spe incerta casuum in India tentarent,

## C A P U T XXIV.

*EXPEDITIO NAVALIS, QVA AB  
ANNO C I O I O X C V I I U SQUE AD C I O I O C I  
OLIVERIVS de NOORT, TOTVM TERRARVM  
ORBEM TRIENNII SPATIO CIRCVMNAVIGA-  
VIT, EIVS QVE CONFLICTVS CVM DVA-  
BVS HISPANORVM CORBITIS  
IVXTA MANILLAS.*

**I**NTER Argonautas, qui totum terrarum orbem navigando lustrarunt, aliud cælum, alia suspexerunt sidera, gloriosum quoq; nomen obtinet Oliverius de Noort, Ultrajectinus, cuius vastus spiritus nullis limitibus coarctabatur,

sed vagus æquoris hospes, terrarum mariumque ambitu vota sua satiabat, quanquam aliquotiens adversus hostium vires, vel adversus fœdas tempestates eluctandum fuerit. Anno c I o I o x c v i i i Mosæ ostio tribus naviis, unaque liburnicâ egressus, dubio secans æqua cursu, superato freto Magellanico triennio exacto domum reversus est. Principes hujus expeditionis erant Viri amplissimi, Petrus de Beveren, Hugo Busius, & Ioannes Benningus. Antequam vero Oceanum australem longis admodum itineribus attigissent, multa Nostris aspera atque aduersa evenere, & mox fœda tempestate infestoque mari duabus amissis navibus, virtus tamen omnibus calamitatibus major iisdem accendebatur. Sicut arbores, quæ continuis ventorum flabris agitantur, duriores evadunt, ita neque ventorum neque fortunæ tempestatibus frangitur inconcussus animus, sed robur accipit. Cæterum neque fortuna semper nobis iniqua fuit, verum, uti omnium rerum fatalis quidem orbis est, non simpliciter postmodum nobis indulxit. Præter plureis interceptos lembos, prope insulam S. Mariæ navem Hispamicam diu insectati, facile superavimus, quod Franciscus Buarra non in armis sed in fugâ omne præsidium quæreret, cumque nulla evadendi spes reliqua esset, arbitrio victoris se permitteret. Cæterum post discessum Præfeti hostilis, quem cum plerisque aliis in columem dimiserat Imperator noster, ex captivis compertum, auri decem milia & ducenta pondo, quæ tribus cymbis in navem Hispamicam inventa fuerant, in profundum jacta fuisse, idque factum nocturnis tegentibus tenebris, ne ingens vis auri nostro usui cederet. Mox Japoniam versus, atque Manilias

Ias profectis duæ ingentes Hispanorum corbitæ occurrerunt, quas Franciscus Telus, qui nomine regis insulas illas summo cum imperio obtinebat, opprimendis nostris navibus miserat. Cum iis horribilis & longe acerrimus conflitus fuit. Postquam Nostri in Prætoriam hostilem simul cuncta ejaculati essent tormenta, conferta hostium multitudo numero freta summo cum impetu in principem navem se effudit, tantoque furore manus conseruit, uti infra tabulata se noster miles reciperet. Ibi primo commoti aspera forte, mox vindictæ libidine incensi, divorsi agitabantur, verum postquam vitam Fortunamque suam in extremo sitam vident, ex periculo ad extrema experiunda adacti fuere. Hastis sclopetisque ex inferiori parte passim oecursantes confodiunt, quorum sparsa cadavera aliis terrorem injiciebant. Dum Prætoria hostilis per integrum diem annexa nostræ divelli nequibat, post cruentum prælium fessi fatigatique spiritus utrinque cadebant. Et nostri aduersis vulneribus fracti animum jam desponderant, verum Oliverius igneo spiritu extra se raptus, comminatus se pulverem bellicum incensurum, nisi ad restaurandam pugnam properarent: Nondum victores, qui foros transfultaverunt, virtute & audacia pelli posse: temeritatem hostium, ubi primum impetum effudit, sibi imparem fore: concumulata cadavera ostendere etiam vinci posse. Et jam fugæ propiores monent vos, quam breves & mutabiles rerum vices sint, modo vos virtutis pristinæ memores conservata robora vestra opponatis. Arma viri, ferte arma. Et simul incaluerunt in immensum Martio sanguine sociorum præcordia, secutique Imperatorem suum, qui in agmine,

in præ-

in prælio consultor, & socius omnium periculorum in confertissimam hostium turbam se dederat, tanto insultu dimicarunt, ut viri viris, arma armis innexa forent, neque prius cederent, quam victores, vel adversis vulneribus procumberent. Omnia perrumpit virtus cedere nescia. Fusi, fugati hostes magna strage, & Prætoria hostilis admodum laborabat, quæ arctius fixa divelli nequibat. Tandem densissimus machinarum verberibus quassata ægrè admodum se dimovit, & non multo post derepente aquis hausta pessum ivit, subitoque ab imo usque ad mali culmina gurgite pressa obrutaque fundum petiit. Vectores & clavarii cum Duce suo propemodum quingenti præcipiti fatid perierunt. Oliverius sex aut septem tantum occisos, vulneratos viginti quatuor habuit. Neque nostra navis ab ignibus immunis, nisi industria navalium extinctum illud fuisset incendium. Cæterum, liburnica nostra, quæ ad duos millaria longius processerat, à vicaria hostili facile oppressa, cum viginti tantum quatuor viros puerosque contineret, illa autem tantæ esset magnitudinis, ut quingen-tis ferme armatis hominibus stipata, decemque tormentis instructissima esset.

CAPUT

## C A P U T X X V .

*PRÆLIA ET VELITATIONES IN-  
TER NONNVLLAS NAVES CLASSIS HIS-  
PANICÆ, HOLLANDICÆQUE,*

*ANNO C I O I O XCVIII.*

**D**um Duinkerka prædonum domicilium, & cruentum maris nostri flagellum complures naves, etiam inermes piscatorias raperet, prolixæ exaudiebantur passim querelæ, in primis piscatorum, qui exiguo quæstu vitam tolerantes, non tantum contra incerta casuum, verum ipsam mortem navigabant. Constructis itaque novis naviis, modica tamen classe Petro Douzæ viro nobili cura commissa, uti partim egressus prædonum observaret, partim obliquando vagos per mare cursus, in freto Britannico ferociam contunderet, rapinas arceret. Cæterum compeitò classem Hispanicam milite refertam, triginta octo navium, cuius imperium Pretendona obtinebat, adventare, magna opprimendæ ejus cupidine Dousa æstuabat. Verum vento acri & secundo turgidis velis ferme integra portum Caleensem tetigit: Nostros enim adversa venti violentia retinuit, quo minus virtutem experirentur. Cursibus tamen obliquis obnisi, paucas hostiles naves, antequam importum se receperant, litori impegere. Una superata: insolitaque id temporis clementia vitæ classiariorum parcitum fuit. Non multo post ex eodem portu furtim duæ clapsæ naves mercibus opulentis referte, multoque milite

R

stipate,

stipatę, qui militię & laborum fessus missionem flagitaverat, in Hispaniam iter moliebantur. Post acrem Batavorum insultum superatę, ingenti prædę cessere.

## C A P U T   X X V I .

*DE NOBILI, SED NON FOELICI EXPEDITIONE NAVALI LXX NAVIUM,  
SVB PETRO DOVZA PRÆFECTO  
MARIS, A. c. 1515 xcix. & seq.*

Interdixerat fœderatis Belgis Hispаниcam negotiatio-  
nem jam ante Philippus artium politicarum vetus, ve-  
rum libertas commerciorum in totum non tollebatur, cum  
sub nomine aliarum gentiū Fœderati tutò fallerent. Et Rex  
ipse velle decipi, prudentiam censebat. Cæterum, ubi ille  
mortalitatem explevit, à successore filio severissima in His-  
pania Belgioque edicta promulgata. Retente naves, bona in  
fiscum acta, nautarum complures cruciatibus vel extremis  
suppliciis enecti, vel in carceribus loca humi depressa, in-  
culto tenebris, illuvie atque odore fœda habitabant, alii  
ad remos damnati miseram vitam trahebant. Albertus quo-  
que severissime edixerat, frustra renitentibus Brabantis,  
Flandrisque, ne ullarum mercium travectiones fierent,  
& pescatoribus, hominum generi innoxio, qui ex mari  
vitam sustentabant, adempta quoque securitas. Patres et si  
non modice hāc re commoti, generose tamen consilia in  
asperiora vorterunt, contrariumque edictum promulga-  
runt, quo vetitum, non tantum Belgis, sed & aliis popu-  
lis,

lis, ne ulla commercia in Hispaniam, vel Hispano obnoxias ditiones transvectarent: si qui secus faxint, hostium loco futuros. Missum ad Reges, Principes, & Civitates, quæ commerciis florebant, edicti exemplum, ne ignorantiam obtenderent. Interdictum quoque pescatoribus, ne redimerent ab hoste pescandi necessitatem, sibi præsidiariis navibus curæ fore, ne quid magna pescatio detrimenti caperet. Decretum quoq; classe ingenti ipsam Hispaniam oppugnare, uti primus Rex in suis regionibus damnum sentiret, atq; in propriis visceribus attereretur. Verum ingens pecuniæ vis in eam rem requirebatur, nam pleræque gentes Europe commerciis illis quæstum factitabant, quibus resisti non nisi vi majori poterat. Accisæ erant ærarii vires, & patrando pulcherrimo facinori facultates deerant. Præter onera navibus imposta inventa ratio pecuniæ conflande. Excoxitata fuit ducentesima, quod tributum tam prompte collatum fuit, ut plurimi ultro, plus quam indictum erat, persolverint. Pro tutanda patria, pro commerciis, quis pesum euntibus etiam fatiscebat Resp. veluti certatim effundebatur argentum. Instructa itaque à Patribus classis LXX navium, quibus additi sena sociorum navalium, & duo militum millia. Summum classis imperium Petro Douzæ militiae maritimæ impigro, Præfectura militum Stormio data fuit. Cujus rei fama simulatque in Hispaniam pervenit, belli timor insolitus incesserat, plurimi maritimis locis difidere, & in mediterranea se recipere, suo quisque metu pericula metiri. Rex Hispaniæ cunctas, quæ illâc appulerant, naves detinuit, quis major vis arceri posset, sed mali, rudentes, cæteraque rei navalis adminicula deerant, & pro-

hibentibus Belgis , arcessi nequibant. Mense Mayo egregie expedita nostra classis mari se dedit. Mandatum à Patribus, uti Hispaniam, insulasque omnes ejusdem ditionis infestarent, regias in Coronensi portu naves adorirentur, atq; in eisdem disjiciendis corrumpendisque fortunam tentarent, classem Americanam investigarent , in omnibus dominationem contunderent Hispanicam. Non ex voto successit tanta expeditio, quanquam ingens damnum Regi inflictum fuerit. In portu Coronensi jactis anchoris, eminus tantum tormentis certatum. Classis enim Hispanica sub tutelam arcis confugerat, quo machinis undique detonantibus difficultissimus erat accessus, & quanquam incendiariis navibus regias naves corrumpere in promptu esse videretur , Hispаниcis tamen portibus insultasse ea tempestate sufficere Præfecto videbatur, ne occasio occurrendi Hispalitanæ classi, quæ Americam petebat, elaberetur. Verum & ea quatriduo ante solverat. Recta itaq; in Atlantico Oceano Canarias, quas antiqui Fortunatas insulas vocant, contendit, & primum maximam insularum adortus , ubi post acrem detonantium machinarum procellam una Hispanica navis mersa, duæ virtuti nostrorum cessere. Exscensum quidem in terrâ minoribus machinis telisq; prohibere Barbari nitebantur : verum tormentis simul excussis , in scaphas expeditus miles cū Imperatore se receperat, atq; ubi ad impervia navigantibus vada ventum , ipse Dux imperterritus primus omnium aquis insultat, neque frigido elemento ignibus virtutis extinctis, tribus vulneribus sauciis , in vicinam tellurem se corripit , & hic abrupta militari facundia, aut vincam, inquit, aut moriar, & vos commilitones sequimini , periculum nunc declinare summum

summum periculū est. In manibus nunc omne præsidium, infuga certa clades. Paucis opus erat verbis, cum & propria militum virtus vel etiam pudor idem suaderent. Tria castella insulanis multum reluctantibus expugnata, urbs Allagona dedita, prædâ receptâ igni tradita est. Idem fatum Gomera insula & oppidum habuit. Parte hinc classis cum præda in Hollandiam remissa, ulteriora Præfectus petiit, & Guineæ litora legendo in itinere quatuor naves mercibus Hispanicis stipatas velitando intercepit. Exin S. Thomæ insulam sub ferventi linea sitam, quæ præter ardorem propinqui solis cum noxiis admodum colluctatur vaporibus, spe prædæ adiit, castellisque & urbe Pavoazâ potitus, incensa illa, quod non ultra decem ducatorum millia redimendę illi cives pollicerentur, immensam prædam nactus est. Cæterum pestilens & malignus aër illi regioni incumbit, vultus quoque indigenarum luridi & veluti veneno infecti. Hæc pernicies insuetos imminentis solis multos rapuit. Intra x i v dies, qui ibi consumpti, milleni in classe periere, qui intolerabili capitis dolore simul cum febrili incendio usque ad insaniam agitabantur, quibusdam præ calore in ipso abdomen liquefactus adeps: tertio plerique aut quarto die mortalitatem implebant. Præter vehementem æstum nostratibus insuetum, etiam venenatus aër erat, antequam radiis solis excuteretur, quando domi manendum erat, quod uti neglectum Belgis, ita & intemperantia potus saccharo mixti, cum Æthiopicis mulieribus consuetudo, cubile humi captando frigori nocturno, mortalitatem auxere. Imperatorem classis, cuius virtuti torridum cœlum invidebat, abripuit quoque eadem fatalis necessitas. Adipe lique-

facto ( erat enim supra modum obesi corporis ) periisse creditur. Cadaveri alte humi defosso , ne postmodum reperatum ludibrio exponeretur , superjectis urbis ruinis parentatum est. Commota hinc pubes nautica & militaris excrari pestilentem insulam : una omnium vox , ut abitum mature molirentur , antequam omnes è medio tollerentur. Neque hic navigantibus malum imminentum , sed contagio fœdusque odor in arcto navium morbos mortesque sparsit. Namque ubi ultra quadragesimum & sextum gradum frigidius se aperiret cœlum , uti subita mutatio perniciosa mortalium corporibus , derepente languentia plororunque corpora violentus morbus vel attrivit , vel oppressit . Numerati uno tempore ægri mille octingenti , ita ut præ infrequentia una navis deprimenda fuerit. Una densissimis nebulis in Slusanum portum delata , ingenti cum præda in hostium potestatem venit . Eadem sors obtigisset aliis quatuor navibus , sed bellicæ nostræ præpediverunt , una tamen depressa , alterâ hostis potitus est. Ex omni centurionum numero duo tantum fuere superstites , quibusdam navibus vix sex integræ valetudinis viri numerabantur. Infelix quidem hæc fuit expeditio , sed præda tamen sumptus fere æquavit. Atque Hispanus , qui classe iterum Anglos Belgasque tentare in animum induxerat suum , votis excidit. Audito enim Canariam insulam à nostris occupatam , atque ulterius in Americam Belgas contendere , Rex Adelantadum , penes quem classis imperium erat , Terceram proficisci evestigio jubet , uti Americanæ classi , quæ immensas vectabat opes , obviam iret . Cæterum illi , prope Terceram fœdis jactati tempestatibus , dispersi q; : plures navium mersæ , alię quassę diver-

diversis temporibus Hispaniarum portus appulere. Atq; ea tempestate admodum regiē potentiē fama deminuta est, qui cum ab ortu ad occasum late regna possideret, divitiē, quę prima mortales censem, affluerent, vix tutari domi sua poterat, atque prohibita in Hispaniis Belgarum negotiatione Remp. obstinato animo perditū iverat, atq; Orientis & Occidentis invadendi cogitationes Fœderatis ultro indiderat.

## C A P U T XXVII.

*LEGIERII PRÆLIVM CVM SEX  
SPINOLÆ LONGIS NAVIBVS, ITEM  
ALIÆ VELITATIONES, AN-  
NO EODEM.*

**A**DUXERAT Fredericus Spinola ex Hispania in Slu-  
sanum portum sex longas naves, quæ homines ad-  
modum mille & sexcentos, tum milites, tum servos remis  
impellendis, aliisque ministeriis suetos vectabant: quæ  
primo adventu non modicum terrorem mercatoribus, &  
Zelandico litori, damni non multum intulerunt. Verum  
ubi fama, quæ adventare classem Hispamicam operosæ mo-  
lis disperserat, evanuit, paucō milite contusa fuit Hispano-  
rum confidentia. Posteri vix credent Legierium centurio-  
nem hominem infraetæ virtutis, & promptę audacię, solum  
sex hostilibus navibus circumventum ita dimicasse, ut per-  
ruperit totam aciem, hostibus insignem calamitatem infli-  
xerit. Captato cœlo, tranquillo & strato æquore cunctæ  
admodum longę naves, præter ordinarium militem è præ-  
sidiis

sidiis mille & ducentis assumptis, Legierii navim, qui classi  
Zelandorum vicaria potestate præterat, tanto impetu adortæ,  
ut in omnem partem retinaculis annexæ viderentur, ferali-  
bus ignibus tormenta undique quaterentur. Hostiles naves  
ultra bis mille & octingentos homines vehebant, Legierius  
septuaginta tantum homines numerabat. Propinquæ no-  
strorum bellicæ naves placido mari nullisque ventis agi-  
tato, &. advorsu æstu suppetias ferre nequibant. Legierius  
itaque solus imperterritus fortissime rem gessit, atque fistu-  
lis propinquantem hostem ita excepit, ut eundem post dua-  
rum horarum certamen cæsis ccl viris in fugam infami  
dedecore egerit. Ipse vulneratos, aut imperfectos xxv tan-  
tum habuit. Neque minus hostium naves quassatæ à tribus  
postmodum bellicis nostrorum navibus, quas simulantes  
se mercatorias esse, spe præde aggressæ fuerant. sex admo-  
dum horis in conspectu Vlissingæ nunquam vehementius  
dimicatum est. Viæ eodem anno debellatæque vel astu  
vel virtute naves aliquot, quod obiter memorare pretium  
esse operæ duxi. Mense Junio, duæ Hollandorum naves,  
quæ à Rege attinebantur, profugere, & cum tertiam par-  
tem, Hollandorum captivi facerent, singulari virtute subito  
in nautas & ministeria Hispanica insilientes pluribus con-  
fossis, reliquos in fluctus præcipites egere. Eadem tempe-  
state quinæ quoque bellicæ Hispanorum debellatæ, captivi  
omnes in patibulum acti. Unam haud procul Norvegia  
depressæ molis bellica navis, mercatoriam simulans supera-  
vit. Alteram Cloierus expugnavit admirabili fortuna, cum  
enim vixdum connexis navibus homo præcipitis audaciæ  
primus in foros hostileis transiliisset, interea navim non-  
dam

dum harpagonibus alligatam, ventus in diversa rapuit, & centurionem in hostium potestate reliquit. Sed omnino cuncta pubes hostilis, rata cum centurione cæteros quoque socios navales eodem impetu transultasse, infra tabulata se commiserat. Interea, antequam rescirent, Nostri conversis velis suppetias tulerunt. Memorabilis quoque virtus fuit mercatoriae Enchusanæ navis, quæ à quinis Dunkerkanorum acriter impetita, & harpagonibus retenta, hostem, qui in superiora jam se receperat tabulata, incredibili fortitudine depulit: namque singulari prudentia maiorem medii mali antennam, ne præcideretur, catenæ suspensam alligaverant, & cancellos acutis clavis confixerant, ne quis temere ulterius transcenderet.

## C A P U T   XXVIII.

*CONFICTVS HISPANICÆ CLASSIS  
CVM NOSTRIS SOCIETATIS ORIENTA-  
LIS NAVIBVS, ANNO MDCXI.*

**S**Ic ut i difficultima cunctarum ferme rerum initia sunt, sita Nostri in Indiâ multis circumventi difficultatibus, in primis Lusitanorum artibus, qui maxima ope nitebantur, ambiebant, fatigabant passim Reges, ne commerciis illic Nostratum nova sedes aperiretur. Verum agendo, vigilando omnes ærumnas eluctati, tandem advorsa Fortunæ superavimus. Uti cæteras expeditiones prætermittam, rebus feliciter & ex voto cedentibus, anno millesimo sexcentesimo primo tredecim instructæ naves ad Indos missæ

S erant

erant ex tribus conflatę societatibus , quatuor Jacobus Heemskerckius, totidem Johannes Grenirius , quinque Volphardus Harminius imperabat. Invisa hæc Regi Hispaniarum , qui avidus dominationis , potentię , divitiarumque, Orientem hactenus & Occidentem velut utraque manu complexus , Regibus Principibusque terrarum formidabilis erat. Cæterum ubi res mortalium ad summum fastigium venere , dominandi impotens lubido , fœda avaritia, superbiæque comes crudelitas imperium tenent , exiguis momentis, etiam ab invalidis , summa imis confunduntur. Videbat Rex , nisi Batavorum navigationes præciderentur, vacillare fortunas suas, interiora viscera discerpi, sine quīs vitalia Reip. non consisterent. Classis itaq; tredecim navium, quę mole, milite , commeatu instructissima erat , mari magno nostris naviis , quę octo tantum juncta numerabantur , (cætera namq; inquieto pelago jactata longius aberant) occurrit , quibus virtus & audacia abunde supererat , cæterum navium mole,milite & commeatu ab hoste superabantur. Verum nostrę naveis agiles , expeditę, huc atque illuc facile vorti circumagique poterant , hostiles mole sua lababant,& velut reluctantibus aquis pigre agitabantur. Itaq; cum Nostri viribus nequirent , velocitate freti certis ictibus tormentorum hostem verberabant,summaq; iterum celeritate hostilem impetum eludebant. Pilę hostiū grandiores vel supra minores naveis,vel præter volitabant. Ubi vires modicæ, consilio & sagacitate juvandæ, quibus plura sæpe perfici, quam armis, periculo & negotiis compertum est. Summa itaque celeritate sequi , atque iterum se subducere, non cominus sed eminus dimicare consilium firmum stetit , ne magni-

magnitudine hostilium navium, & multitudine armatorum hominum obruerentur. Magna utrinque virtute & alacritate dimicatum fuit. Dissonis militaris & nauticæ juventutis clamoribus, continuis machinarum verberibus tremefactum inhorruit mare, strepitus permixtus hortatione, gemitus ad cælum ferri, telis, cadaveribus naveis utrinque constratæ, atque inter ea horribili spectaculo sanguine fluitantia tabulata. Tandem hostium vicaria, & liburnica nostra ita dedolatæ, ut aquam immodicam haurirent, fatigatæque pugnando deficerent, ita receptui signo dato pari ferme forte recedunt. Paucitas tamen nostrorum, virtus, confidentia, quæ confertissimam hostium multitudinem aspernabatur, in immensum illorum gloriam auxit.

## C A P U T   X X I X.

*PRÆLIVM VOLPHARDI HARMINII,  
QUI ANNO CLIOCI CVM SUMMO CLASSIS  
IMPERIO IN INDIAM MISSVS FVE-  
RAT, CVM CLASSE LVSI-  
TANORVM.*

**V**OLPHARDUS Harminius anno sexcentesimo & primo cum imperio navibusque aliquot in Indiam missus fuerat, uti difficultates Indorum commerciorum perrumperet, quas inter dubia haec tenus discrimina immensarum divitiarum spes pensabat. Cæterum cum ad Sundæ fretum pervenisset, ex Chinensi parone comperit, Bantamum à Lusitanorum classe, cui imperabat Andreas

Fortado Mendoza, arcte obsideri. Constatbat hæc classis hostium Lusitanis militibus octingentis, Indis supra mille quingentis præter navalem pubem, octo majoribus navibus, triremibus viginti, quæ in eam rem expedita erat, ut Batavi, quorum industria in commerciis obeundis facile omnium artes superat, urbe pellerentur, cives & incolæ vel prolixis pollicitationibus, vel si id minus succederet, per vim & arma ab eorundem societate avorterentur. Interea Harminius, quamquam quinque tantum naves suppeterent, quæ ferebant homines circiter trecentos, ita ut prætoria hostilis sola plures numeraret, communicatâ cum concilio militari causâ, nihil agendo domum reverti turpe & inglorium judicabat. Ipse militiæ exactus, virtute & ingenio pollens, prorsus intentus omni modo pubem militarem accendebat. Regulus & cives Bantensium, qui ante annos aliquos Lusitanos expulerant, validâ classe triremes invaserant, omnesque internecioni dederant, se patriamque suam ad extremum armis tegere in animum induxerant suum, atque ideò ingenti diffundebantur gaudio, quod junctis nobiscum viribus obviam nunc ire tantæ potentiæ non diffiderent. Quippe insolens superbia, immanis avaritia, crudelitasque Lusitanorum invisa indigenis, qui apud illos fidem, pietatem, postremo honesta atque inhonesta omnia, quæstui esse non ignorabant. Uti autem Batavorum virtus in his oris semper Lusitanis formidolosa fuit, ita nunc iidem extremam fortunam experti. Primo aggressu continuis & certis tormentorum explosionibus, mobilitate navium fissus, classem Lusitanicam fatigare Volphardus studuit, mox etiam proprius adortus duas triremes, & naveis insu-

insuper tres , tam incredibili impetu insultavit, ut victoris lubidini cederent. Plures aliæ machinis convulſe depreſſæque , aliis ipſi Lusitani violentos ignes injecerunt , ne in nostrorum vel Bantensium potestatem redigerentur. Reliquæ , quæ fædâ fugâ ſe receperant, Amboynam vorsus vela ſinuarunt , ubi plures insulanos , quod cum Noſtris com-merciorum iis interceſſiſſet necessitudo , crudeliter obtruncarunt , ſucciſisque caryophyllorum arboribus ſpem fructuum in posterum barbaro ritu ademerunt. Volphardo victori occurſare paſſim cives Bantensium, immenſis in cælum laudibus tollere , alii fulmen belli , alii liberatorem ſuum indigetare : undique lætitia permixtusque gratulan- tium ſtrepitus. Ipſe Rex immenſas illi gratias egit, immodi- cisque honoribus auxit. Ille autem mortalitatis memor, animi modestus, Deo Imperatori, qui nutu ſuo omnia tem- perat, gratiam tribuendam publice decrevit.

## C A P. X X X.

*VARIÆ VELITATIONES SPILBER-  
GII CUM LUSITANORVM NAVIBVS.*

ANNO C I C I O C I . &amp; seq.

**G**EORGIUS Spilbergius , virtute militari multisque bonis artibus pollens, omnem industriam intende- rat, ut in India commercia Noſtratiū promoveret, malas artes Lusitanorū corrumperet, vires contunderet, pro- fligaret. Pericula longi itineris , quas oras appulerit , cum

rege Candesia<sup>z</sup>, qui illum summopere suspexit, nova fœderia, multa insuper alia, quæ referre nostrum negotium non est, editis diariis continentur. Velitationes nonnullas, & diversos in Lusitanos insultus memorare, id otii atque negotii mei esse duco. In abitu quidem (anno autem sexcentesimo primo se mari dederat) cum ubique fortunam urgeret, & oblata casu consilio rationique subjiceret, primus illi circa Promontorium viride cum tribus Lusitanorum navibus, quas caravelas indigerant, conflictus fuit. In portu Dalensi stationem illæ ceperant, atque adventantes Nostros excussis machinis ingenti turbine globorum ferme obruerant. Etsi autem militibus cupido pugnandi flagraret, Imperator tamen noster providendo, consultando, cunctando portum omnibus communem violare nefas duxit. Cæterum iterum atque iterum irritatus, ingens animus, injuriarum impatiens, memorabile incepit facinus. Namq; sine ullo militari tumultu, vel tormentorum explosione, liburnica sua unam hostilium ex improviso aggreditur, innexisque navibus prompta militum manu hostem fatigat, urget, atque extrema molitur. Cominus res gladiis telisque promiscuis agitur, pro se quisque ferit, vulnera edit, perturbatos atque alios alibi resistentes interficit. Hinc inde clamor virûm, dum nostri acriter instant, hostis contra nititur, & iniquam sortem superare contendit, ad extremum victo propior ingenti terrore agitabatur. Ubi duæ reliquæ hostiles naves vident sociorum rem in extremo sitam, suppetias ferendo majori vi atque potentia bonam occasionem Nostris corrupere, quo minus victoriâ uterenzur. Eodem itinere cum ad Ceilon insulam perventum esset,

esset, amicitia regis Fimalæ, qui Lusitanos regno suo ejectos  
propulsare animo ardebat, Nostris admodum opportuna  
fuit. Imperator noster, quò certo experimento Regi pro-  
baret, se quoque Lusitanorum infestum hostem esse, in gra-  
tiam ejus treis illorum naveis, quæ in propinquuo mora-  
bantur, facile superavit, & Regi incensis navibus captivos  
tradidit. Eadem expeditione cum prope Sumatram insu-  
lam Britannorum classi, cui præerat summo cum imperio  
Lancestrius, Nostri se junxissent, ingenti studio adnitezban-  
tur, uti potentiam Lusitanorum contunderent: comperto  
autem corbitam ex S. Thomæ insulâ mercibus onustam in  
propinquuo esse, cursu dupli mari iterabant, ne opima  
illa præda elaberetur. Conspecta procul vela omnium  
spem atque animos intenderant. Itaque ex sententia Lan-  
cestrii omnibus rebus paratis compositisque, Spilbergius  
Præfectus cum centurione Britanno cursum velocissime  
eo properant: in primis quia multum diei processerat, ne  
obscuram noctem pro præsidio hostes captarent. Relliquæ  
naves, ne hostibus fugiendi copia esset, diverso itinere for-  
tunam maris experiebantur. Cumque nocte illuni densæ  
tenebræ cuncta tegerent, à nostro Generali cymba armato  
milite referta investigando præmissa, signo ignibus dato  
ingentem corbitam esse nunciavit, interrogatosque clas-  
siarios quinam essent, silentio transegisse. Imperatum No-  
stris fuerat, si advorsa pars percunctaretur, fingerent se  
classem esse Andreæ de Fortado, qui circa Malaccam, Sun-  
dam, & Moluccas exterarum nationum negotiationes ar-  
mata manu prohibere summopere nitebatur. Ad extre-  
mum ubi hostis extremam vim parari animadvertisit, coä-

Etus

Etus rerum necessitudine, ad prælium asperrium se accinxit. Quanquam autem per treis horas tormentorum incerta jactarentur verbera, & obscurum noctis, horrorem ingeminaret, hostis tamen duabus navibus circumventus se suaque ingenti discrimine tutabatur. Adventantibus etiam cæteris navibus per totam noctem intonuere machinæ, multi ex hostibus confossi, vel saucii cum ultimo spiritu luctabantur, ipsa corbita admodum lacerata, amplius adversus vires nostras contendere invalida, cū sua conflictabatur calamitate, ubi dies primum appetebat, versus Malaccam vecta, circa Darienses insulas fessa & nimis quam quassata animum despondit, velaque submittendo, arbitrio victoris se permisit. Sexcentis illa hominibus, inter quos pueri mulieresque, referta, mille & quadringentorum vasorum capax, merceis copiosas stipabat. Quam luculenta præda fuerit copia mercium ostendit, queis transferendis per octiduum classiariorum impensæ fuere operæ.

## CAPUT XXXI.

*DE OCTO LONGIS HOSTIVM NAVIBVS DEPRESSIS VEL CORRVTIS, ANNO CI 1521.*

**A**DVEHERE in Flandriam octo longas naves infestandas Zelandorum oris tentaverat Fredericus Spinola, Ambrosii frater. Nongentos milites virtute validos quam Hispanos qua Lusitanos, mille & quingenta servitia classis numerabat. Verum ea fere tota præceps ierat, fœdis pressa cala-

calamitatibus. Duæ naves à Britannis in Lusitania prope munimentum Setubalis incensæ fuerant, reliquæ in fauibus freti Britannici gravissime exceptæ. Regina enim Elisabetha tres illic naves, uti hostiles opperirentur, locaverat: quîs accesserant quatuor Batavorum, præter eas, quæ Flandriæ oram tenebant. Manselius Eques, qui præerat Britannicæ navi, cui Spei insigne erat, & pinassam comitem habebat, maxima spe medium fretum inter Doveram & Caletum secabat, ne improvisus hostis elaberetur. Neque procul aberant duę Hollandicæ, quæ fiducia plenę Reipubl. juxta ac sibi consulebant, neque alio animo quam cum victoria prælii eventum expectabant. Cæterę in Dunensi statione anchoram fixerant. Tertio admodum Octobris die circa meridiem Manselio visæ hostiles naves, quæ Britannicam oram legendo silente cælo evadere tentabant, quod densior nebula ultiorem conspectum inhiberet. Neque tamen, uti ex captivis postmodum relatū est, configere cum Nostris hosti animus deerat, sed Reginæ sublimior navis, quæ veluti castellum mari imminebat, horrorem incusserat: retrorsum itaque remos agitando, obscuro noctis hac vel illac Neoportum vel Duinquerkam se recipere posse sperabant. Verum Manselius evestigio Nostros ad Flandricam oram adventum tremium monuerat, & binę Hollandicæ usque ad extre-  
mum dici breves cursus obliquando, ne elaberetur hostis, providebant. Reliquæ, quę in Dunensi statione sedem fixerant, explosis tormentis monitæ, uti vento se committerent. Hinc nocte cadente, vela iterum hostes intenderant, quos æquo cursu nostri sectabantur. Manselius ad Gallicam

T

oram

oram cursum flexerat, ut Flandriam petentes interciperet, exin auditō fragore tormentorum, versus vada, quæ Goeingæ appellantur, navigavit, ut hosti occurreret. Exceptæ primum hostiles naves à Dunensibus crebris tormentorum iictibus, sed ulteriorem conflictum positis ventis tranquillum mare diremit. Interea effugio hostes remis maria torquebant, & concitatiore cursu agebantur, sed surgente iterum vento nostræ velivolæ naves quantum poterant infestabantur. Juxta Goeingas Manselius unam longarum navium triginta simul explosionis tormentis ita quassavit, ut erupta antenna multi è medio sublati, plurimi saucii horribilem ediderint clamorem: jamque adeo victa, nisi propinquæ quinque triremes suppetias tulissent, cum quibus omnibus simul certamen inire non consultum videbatur, quod ingenti militum copia stipate essent. Interea quatuor Hollandicæ naves sequendo hosti incumbebant, & prope Grevelingam hora decima nocturna plenis velis nave quadringtonitorum vasorum in unam triremium Gerbrandus Salius fertur. Illam fractâ puppi, lacero clavo, vasto hiatu mare absorbuit: trunca tabulata, avulsa puppis, Oceano fluitabant: juncta calamitati alia calamitas, duobus enim ante tormentis, quæ globos ferreos ad viginti quatuor pondō ejaculabantur, ita excepta, ut morientium & sauciorum gemitus & ejulatus horribilis exaudiretur, & quasi una mortis species non sufficeret, hinc ignis, illinc aqua extrema intentaret. Centurio noster, implicitus sua navi alteri hostili, metuens ne multitudo militaris propriam navim obrueret, velis ruptis ab eo cursum deflexit. Verum eadem triremis (quæ Lucera appellabatur) ab Hartmanno & postmodum

modum iterum à Salio nocturnis tenebris dure excepta, tandem dehiscens media nocte cum pleraque juventute fundum petiit, ingens clamor & planctus ad astra tollitur, unusquisque lethi fugam quærit, neque invenit, ubique mortis dira imago ante oculos versatur. Præter navarchum Johannem Enoutum, qui primo confictu lacera puppi in Hollandicam navem transilierat, & pubi nauticæ se immiscuerat, quadraginta Hartmannus centurio incolumes recepit. Nocturno hoc impetu magna hostes cepit consternatio, festinando, agitando omnia, hac atque illac se vertendo, & timorem & periculum auxerant. Idem enim fatum longę navis, cui Padilla nomen erat, cui Johannes Cantius, qui vicarium in classe imperium habebat, extrema intulit. Præter ducentos cæteri aquis mersi: quod plures non reciperentur, periculum vetabat, ne multitudine hostili obruerentur. Reliquæ virtute nostrorum centurionum ita fuere quassatæ, ut duæ in litus Flandricum actæ restaurarſ nequierint; una ad Caletum naufragium fecit profugo milite, Spinolæ autem navis etsi ægre fluctuaret, bonis in mare jactis, servis libertate promissa, Duinquerkam appulit. In his autem devictis navibus longis plurimi Belgæ intolerabili servitute remigia egerant. Præcipue Cailliadus centurio, qui præterat triremi Luceræ, quæ prima à Salii naui impetita præceps fundum petierat, gubernatorem navis, quâ Salius ferebatur, captivum antea dure admodum habuerat, qui pedibus machina ablatis mortalitatem misere implevit, dum paulatim dehiscentem cum militari pube navem suam conspectaret. Ita crudelitatis summus minister à Deo immortali punitus, uti à servo

quondam suo, nunc vero gubernatore, extrema illi incumberat calamitas. Fata nimurum viam inveniunt, dum cælestè illud numen tacito impetu omnia ad se trahit, & veluti connivendo pro tempore criminibus, postremo graviori pæna moram pensat.

## C A P U T   X X X I I .

*DE PRETIOSISSIMA LVSITA NORVM NAVI, QVAM CARACQVAM INDIGENT, ABATAVIS SVPERATA.*

A N N O C I O I C I C I I .

**D**IFFICILLIMA quæque virtuti jugique industriae cedere Indica à Fœderatis suscepta navigatio abundè ostendit. Nimurum animus ingens supra sortem positus, ubi virtutis via ad gloriam potentiamque grassatur, et si reluctantibus mortalibus, sibi ipsi imperium constituit. Multotiens Lusitani Barbarique Batavis perfidiæ incautis specie amicitia, qui proclivis est decipiendi modus, imposuerant, nefariis cædibus tumultibusque omnia miscuerant. Verum perniciosa lubidine paulisper usi, suis victi fuere artibus. Nostri rebus florentibus cum Regibus Principibusque Indiæ societates novas inierunt, atque adeò Rex Achemi (est hæc Sumatré urbium facile Princeps) quo præsente Houtmannus primus Indicarum navigationum autor anno C I O I C I X à scriba transfossus fuerat, multumque sanguinis fusum, Legatos ad Fœderatos Proceres Principemque Mauritium stabiliendæ amicitię misit. In itinere  
juxta

juxta Helenę insulam occurrit ingens Caracqua Lusitanica, quæ margaritas & pretiosa mercium ex Goa vectabat, quadringentis hominibus stipata, septendecim æreis machinis instructa. Nostre binę naves, quis præerat Laurentius Bicquerus, vix centum & viginti viros numerabant. Una navium nihil hostile molita, hostilibus machinis excepta, nonnullis cæsis vulneratisque, quamquam virium impar concoquere talem ignominiam nequivbat, & integrum horam suis contra nitebatur machinis, donec altera, cui Zelandia nomen, adventans suppetras ferret. Quibus prædē & vindictę cupidis, queis animi mortalium supra modum incalescunt, ingens audacia increverat. Junctis itaque viribus tanta fiducia vincendi hostilem corbitam adoriuntur, uti illa, cum effugiendi copia non esset, pressे versus insulę litora se reciperet, ne ab illo latere circumveniretur. Cæterum Zelandi, quibus nihil mari intentatum, solita solertia littus corbitamque inter se medios dedere, perfossumque & anchorariis funibus incisis fugientem insecuri, vela, rudentes, atque armamenta pertundentes, tandem ad ditionem coëgere, cum ipsa corbita ad tredecim pedes aqua hausta exitio propinqua esset. Victi ita vitæ conditionem accepere, ut nihil margaritarum, pretiosarumque mercium occultarent, atque uti per triduum continuo sentinam moverent, cui negotio & Nostri, ne pretiosa navis fundum peteret, nonnullis quoque mercibus in profundum jactis, summa ope incubuerunt. Corbita ipsa ad quindecim millia florenorum æstimata fuit. Quicquid hominum erat, ad insulam, quæ Ferdinandi le Rona nomen acceperat, expositum. Ex ta-

bulatis lacerę corbitę constructā naviculā, Præfectus in Brasilię continentem, quæ octuaginta hinc dissita milliari- bus, iter expedivit, quo cætera juventus navibus eodem ab- duceretur. Ingens hæc hostium calamitas: neq; tamen hic subticenda Præfecti hostilis virtus, an ex indignatione ani- mi ferocia, qui, ubi cognovit paucitatem victorum, ultro mortem affectavit, rogans uti Nostri in cæteris fidem ser- varent, ipsum fistularum globis è medio tollerent. Quip- pe judicabat cuncta mortalium fluxa brevi dilabi, egregia autem facinora & virtutem etiam post mortem immorta- lia esse. Cæterum virtuti ille honos datus, ne jura gen- tium violarentur: & ferox nautica pubes, quę extra con- ditiones nemini parcebant, devicto quamvis ultrò petenti extrema intentare, grave dedecus flagitiumque judicabat. Nostri cum pretiosissima corbita incolumes in Zelandiam appulere, Legati Regis Sumatræ liberaliter admodum ex- cepti, adducti in castra Mauritii, qui Graviam urbem ob- sidione premebat, attoniti moles operum insuetas illis gentibus spectabant. Principi Legatorum, Abdulzamat- nomine, qui mortalitatem paulo ante impleverat, hone- stissimis exequiis publicum monumentum Medioburgi ere- etum fuit. Cujus honori Epitaphium ipsum hic subscri- bere visum fuit.

HIC. SITUS. EST.

ABDUL. ZAMAT. PRINCEPS. LEGATIONIS.

A. REGE. TAPROBANAE. SEU. SUMATRAE.

SOLTAN. ALCIDEN. RAIETRA. LILLO. LAHE. FELALAM.

MISSAE.

AD.

AD. ILLUSTRISS. PRINCIPEM. MAURITIUM.

CUM. DUABUS. NAVIB. ZELAND. QUAE. IN. DEDIT.

ACCEPERE. LIBURNICAM. LUSITANICAM.

VIXIT. LXXI. OBIIT. ANNO. CLCII.

PRAEFECTI. SOCIETATIS. INDICAE.

H. M. P. C.

### C A P U T   X X X I I .

## FREDERICI SPINOLÆ CVM ZE- LANDIS NAVALE PRÆLIUM, ANNO CLCIII.

FREDERICUS Spinola quietis ingloriæ impatiens, qui-  
que ex virtute famam inclytam captabat, ingentemque  
animum incultu atque socordia torpescere non permitte-  
bat, octo longas naves, minores quatuor, populandę Ze-  
landicę orę ex portu Slusano in mare eduxerat. Obsede-  
rant portum tres bellicę, quis vicaria potestate imperabat—  
Justus Morus, duæque longę naves; qui ubicunque aliquid  
infesti oriebatur, illic adversus vim armatam parata habe-  
bant præsidia. Quarum quatuor (quinta vento iniquo lon-  
gius aberat, tormentorumque usui tantum inserviebat) ul-  
tro obvias dissono nautico clamore, quo initia præliorum  
accendi solent, bipartitò Spinola adoritur. Favebat patran-  
do facinori cælum tranquillum, constratumque ferme  
ęquor leniter spirantibus auris, remigiis idoneum: ad-  
erat præter nauticam turbam, hominum armatorum mul-  
titudo

titudo (mille & quingentos jaculatores nonnulli numerant) qui tubis globorum procellam confertim jaculabuntur. In Batavorum classe præter classiarios triginta tantum sex milites è Vlissingano præsidio, mentis igneæ, tuborumque flammæ ostentabant. Spinola igitur & navium & virorum multitudine circumvenire nostras nitebatur, & crebro insultu modò hat modò illac circumcursabat. Zelandi, qui ferocia ex mari contractâ obdurato animo contra omnia pericula obnitezabantur, jam ante metum mortis, quam hostem vicerant. Illi modò propius, modò longius machinis contra niti, armis hastisque cominus vulnera intentare, furioso insultu cunctos territare. Nubes atra ex fumo cælum mariaque obduxerat. Claro die tanquam intempesta & tenebricosa nocte, incerto prælii evenitu, per duas horas dimicatum. Ipse demum Fredericus, victoriq; supra modum avidus, & præceps ad explendam animi cupidinem hostili puppi insultat, plurimis vulneribus, etiam mutilo brachio, animam cum sanguine expiravit: cæsorum numerus incertus, alii enim octingentos, alii trecentos tantum numerant. Pauci admòdum ex nostris desiderati, quod densior illorum naviis compages jactus machinarum eluderet. Cæsâ tantâ hominum multitudine, laceris triremibus, fractis remis, ingens incesserat hostem consternatio, ne adventantibus ex Zelandia navibus, queis summo cum imperio præerat Haultainius virtute & genere nobilis, circumveniretur, atque extrema patetur. Itaque rectâ per aquas eluctati portum Slusanum petunt. Hac victoriâ terror longarum navium, quæ nostro mari insuetæ remigiis agitabantur, evanuit, comperto etiam silen-

silentibus ventis , quo tempore nulla velificandi est opportunitas, vinci debellarique posse.

## C A P U T   X X X I V .

IACOBI HEEMSKERKII CVM LV-  
SITANORUM PRETIOSISSIMA COR-  
BITA PRÆLIVM, A N N O  
c I o I o c i i i .

**M**E MORABILE quoq; illud prælum Jacobi Heemskerckii cum corbita Lusitanorum pretiosissimâ silentio transmittere nefas duco. Acceperat hæc onus Macauæ, (quod oppidum apud Cantonem amnem in imperio Sinensi Lusitani precario tenent) & pretiosissimis mercibus stipata carinam fatigabat. Merces omnes ultra quatuor millions fuere æstimatæ. Ipsa navis centum & quadraginta vehium octingentos viros, inter quos centum fœminæ, ve-  
ctabat. Cæterum quicquid magnis impensis Divum largita fuerat indulgentia, id una dies dissipavit & potentioribus tribuit. Namq; ipsa Malaccam rectâ petens, freto inter eandem & Sumatram medio , duabus forsan modicis Heemskerckii navigiis, quæ ducentos tantum continebant milites, occurrit, atque ex suo veluti castello Nostros despectans, secura prælli extemplo classicum canere, sanguineumq; à puppe vexillum expandere instituit. Contemptus hostium frequens initium calamitatis , & superbia ut plurimum primo impetu flaccescit. In tanta rerum humanarum volutatione , pugnæque maritimæ cum mari suo fluctuantis in-

certitudine, exiguis momentis summa imis vortuntur. Nostris sola fortitudo munitum inexpugnabile erat, quam qui pectori suo circumdedit, securus in hac vitæ obsidione perdurat, & per aspera eluctatur. Atque hoc tum in aliis, tum in hoc prælio periculo rei compertum fuit, quantum valeat lassitia virtus. Quod enim minores vires, eò acrius furioso quodam impetu ipso initio incubuit nautica & militaris pubes. Et vicit quoque fortuna nostra, quæ nitenti, laboranti, ut plurimum succurrit. Continuis enim machinarum verberibus lassata hostilis corbita, tandem uno alteroque loco ingenti ruptura ita perforata, ut jam gurgitem aquarum immodicum hauriret, atque extenso candido vexillo supplex se suaque omnia potestati victoris permitteret. Ex Lusitanis septuaginta cæsi, reliqui, uti conventum fuerat, terre expositi.

## C A P . X X X V .

*STEPHANI VERHAGII PRÆFECTI  
IN INDIA CVM LVSITANIS PRÆLIA.  
ANNO CL<sup>o</sup> I<sup>o</sup> C<sup>o</sup> IV. & seqq.*

**P**RÆFECTUS Stephanus Verhagius, qui summo imperio classem ductabat, anno admodum millesimo sexcentesimo tertio mense Decembri in Indias ablegatus fuerat, uti crebris novisque expeditionibus hostem fatigaret, conficeretque. Quippe juxta Proceres, penes quos suprema Reip. cura, Mauritius Princeps, ingens consiliis, invictus bello, qui vincendo vitæ spatium aquaverat, qua-

quavorsum mare commerciis & armis penetraverat, & cum oriente Sole famam quoque terminaverat, auctoritate sua summopere res Indicas promovebat. Ex diversis corporibus Fœderati Patres societatem fecerant, cui soli publico nomine commercia tractandi potestas data. Collata à civibus ad sexagies centena millia. Ex quo tempore ita lassatus Oriens navigationibus, uti nervi potentiae Hispanicæ succisi, opes Regis exhaustæ fuerint, commerciisque Indicis usque ad invidiam Batavi florerent. Continuò Patres successus successibus urgendos, quò à Belgis hostilia avorterentur, dissitis terrarum lacerandam regis potentiam censebant. Hinc classes classibus junctæ, maria pene ultra solis ambitum ac metas navibus constrata, continuo hostem lassabant. Inter cæteros Verhagijs initio itineris sui varia & ancipiti fortuna usus. Ad insulam statim Mosambiquam Lusitanis occurrens, navem ebore onustam expugnavit, vacuamque ignium furori reliquit, & mox quinque alia minora navigia instar subiti fulminis repente prostravit, cum vix hosti contra feriundi aut conserendi manum copia esset. Goam prætervectus non minimam civibus injectit consternationem, præsidiarii omnes in armis, classis triremium in procinctu, cæterum se periculis objectare non ausa. Unam tamen navem mercibus probe onustam offendit, verum ubi Arabicam esse Meccâ profectam animadvertisit, liberam dimisit. Hinc Cananoris oram legens, & postmodum cum Malabarum Rege ad Callicutum percusso fœdere, Sumatram, atque inde Bantamum contendit. Ibi commodum Lusitanica navis, quæ magnam vim pulveris pyrii cum annona militari vectabat,

bat, Ambonamque petebat, intercepta. Et mox Ambonæ propugnaculum, quod Lusitanus insederat, Gubernator, dum tumultu improviso, atque incertâ formidine cuncta turbarentur, nullum insultum operiens æquis conditionibus dedit. Neque verò hic trahendum tempus esse ratus Imperator, quod fama in rebus prosperis validissima esse solet, Tidoram petiit. Cumque ex aduerso arcis Tidorensis naves appulissent, per tubicinem dditionem confessim postulavit. Cæterum præsidiarii, quorum spectata virtus, fidei & obsequii in regem suum gloriosa erat constantia, ingens illud flagitium ducebant, si non usque ad extremum spiritum defensioni incumberent. Propter litus juxta castellum duæ naves Lusitanice magnè statu-  
nem ceperant, quas in primis debellandas censebat Impe-  
rator. Ablegatus eò cum duabus navibus Joannes Mollius  
vincendi animo, qui primus ad victoriam gradus est, in-  
genti impetu hostes aggreditur, neque asperitas loci aut  
insolentia intrepidum militem territabat. Neque hosti  
animus deerat sua defendendi, machinisque majoribus &  
minoribus acriter nostros fatigabat. Horrendo strepitu  
tormentorum mare vicinumque litus cricumtonabat, plu-  
reis armati cadebant, idem tamen fervor, eadem ferocia gli-  
scebat. Igitur eò intentior Præfectus ad victoriam niti,  
omnibus modis hosti imminere, opportunitates omneis  
captare. Ad insultandum scaphas undique armaverat,  
quibus undique naves cingebat: Lusitani tandem oppressi,  
cum nullum in fugâ præsidium esset, incompositi, qua pe-  
des ferebant, divorsi in mare insilentes, naves diripiendas  
nostris reliquerunt. Per aliquod tempus fluctuasse animo  
vide-

videbantur, an ignes navibus subjicerent: inventi enim plures igniti funiculi, stupæque incendiariæ jam paratæ, uti pulveri pyrio injicerentur. Nostri tormentis inde majoribus duodecim & nitrato pulvere suas in naveis translati, igne easdem accensas ventorum simul & aquarum ferociæ commiserunt. Neq; tamen hisce consternatus præsidiarius miles, qui propugnaculum obtinebat, verum eò magis contra advorsa virtutem firmabat. Rex Taranatensem quatuordecim navigiis, quæ singula centum & quadraginta armatos viros continebant, in subsidium venerat, qui, ubi se terræ dederat, impediturus erat, ne Tidorensis Lusitanis suppetias ferret. Interea Johannes Mollius simulaque cum centum & quinquaginta armatis vestigia terræ pressisset, duos vicos incendere, quo late formidinem in cuteret, munitione factâ tormentis arcem ferire, ipse cum duobus militibus per insidias nocturna tempestate castellum explorare. Comperto continuis machinarum iactibus quassatis mænibus aditum patefactum, incitare postridie militem, uti acri in arcem insultu virtutem solitam exerrent, arce patefacta Lusitanis præceps exitium imminere. Jamque adeo ipse Mollius imperterritus cum sex septemvè militibus arcem superaverat. Cæterum jam intra mænia erecto Auriaci vexillo, Lusitani ex editâ turre infensi ardentibus pilis nostros territare, fortunam præclari facinoris urgere, omni modo eniti, uti Nostri iterum arce expellerentur. Mollius, cum in turba cadens dextrum crus frengisset, vexillo quoque ignibus fœdato, ad munitionem reverti coactus. Interea idem crure licet fracto, animo tamen validus & impiger, accendere iterum militum ani-

mos, hortari, urgeré singulos, ut nunc fortí paratoque animo essent, ferro iter aperiundum. Non virtutem, sed paucitatem obstitisse, quo minus consummarent victoriam. Nunc centum & quinquaginta armatos homines propulsare hosti fatigato grave atque iniquum certamen fore. Ita Nostri incitati, postquam majore vi hostes urgent, undique clamor ingens oritur. Cæterum præsidiarios aspergium prælium non territabat, sed infensi intentique eminus tela jaculari, occursanteis vulnerare, denique Nostros expellere. Cum non opportuna hæc res cecidisset, naveis ad machinas excutiendas reversæ, turrim potissimum, unde ardenteis pilas Lusitani torquebant, continuis ictibus verberabant. Erat in illa turri ingens vis tormentarii pulveris, qui partim incuria hostium, partim continuo machinarum impetu subito ignem concepit, horribilique spectaculo simul cum viris turrim in sublīme jactavit, tanto fragore, uti dissilire terrarum compages videretur, mare & tellus late contremiserent, & veluti per attonitas nubes lapides, arma, tela, viri, trunca capita, artusque latè dispergerentur. Ita Castellani repento metu perculti sibi suisque deditione consuluerunt, cum Batavi novum insultum tentarent. Ipsa arx diruta & solo æquata, Tidoræ rege, qui nova cum Batavis fœdera simulabat, postulante, quam tamen servari, præsidioque augeri satius fuerat. Lusitani, quorum quingenti adhuc cum uxoribus & liberis numerabantur, naviculis tum ad alia loca, tum maxime ad Philippinas delati.

## CAP. XXXVI.

PRÆLIVM NAVALE INTER PETRVM  
CUBIARRAM PRÆFECTVM CLASSIS HI-  
SPANICÆ, ET HAVLTAINIVM ZELAN-  
DIÆ ARCHITHALASSVM,  
ANNO c I o I o c v.

**P**E REGRINUM militem , qui duodecim constabat centuriis, rebus firmandis tutandisq; in Belgum transferre Regi consultum videbatur. Conductæ Olyssipone decem naveis, vectandis mercibus suetæ, celocesque aliquot, quò milite refertæ tutius imponerent. Classi præcrat Petrus Cubiarra , militiæ Sarmientus ejusdem prænominis, militiæ impiger & vetus tribunus. Vere adulto sub finem mensis Maii simul cum aliis compluribus onerariis navibus mare ingressus , duodecimo die Junii propter Britanniam velis impellebatur. Quo comperto Zelandiæ archithalassus Haultainius, in parteis consilii convocato Joanne Gerbrandi , qui secundam in classem potestatem obtinebat, constituit , quadripartito classem distribuere , binę alæ Doveram & loca inter , quæ Cingula vulgo indigetant, Swartenessam & Caletanam rupeim , præpedirent , ne Flandrica litora Hispanus attingeret , cæterę juxta Britanniam oram, si illac appelleret, hostem opperirentur. Binę naveis hostium , quę onerarias se dissimulabant , binis nostris circa Cingula occursant , jussoque , uti hostileis vela submitterent , hosteis primo surdis ad postulationes auri-

auribus, silentio cuncta transigebant, dein, ubi nullum effugium vident, ex fistulis militaribus densam glandium procellam in nostras naveis immittunt, quis & damnum modicum inflixerent. Nostri machinis omnibus admotis ita intonuere, uti navium una globis perforata, rimis fatiscens, ne aquis absorberetur, præcipitem se in vicinum litus egerit. Plureis cæsi, cæteri nando, aut scaphis Anglorum excipientibus, evaserent. Aliam navem juxta portum Doverensem cum duæ Zelandicæ premerent, sicco arenarum simul hæserent. Cæterum hæ leviores ultro fluitantes, haud difficulter vadis emergunt, atque acerrimo insultu hostilem oppugnant, capiuntque. Cuncti, uti jussum fuerat, in profundum præcipites aguntur. Prolixe milites, & quidem veterani, cum ingloriam inter aquarum vortices mortem imminentem spectarent, de Fortuna sua conquesti, dictitantes, se, quod difficillimum inter mortales, mortem aspernari, verum hoc dolere, se veteranos milites, totiens adversa & secunda ancipitis belli expertos, non ferro non acie occumbere, qua liceat etiam ante extrema vindictam sui agere, & mutuis vulneribus cadere, verum aquis gloriam militarem simul cum vitâ obrui. Cæterum nullis verbis flecti misericordia potuit, adeò uti & illi qui occultati fuerant eidem violento fato cesserint. Supradicatos miserabili sorte aquis hausti periérunt. Postridie & aliæ naves eadem ferocia superatae, una incensa inter aquas & ignes luctabantur. Ex captivis bini quique à tergo sibi invicem alligati in mare jactabantur. Quod cum unus indignatione æstuans oculis ardentibus conspiceret, memorabili facinore, non opus esse inquiens vinculis hostilibus,

stilibus, præcipiti gradu in mare sponte desiliit, & gloriæ avidus mortem sibi liberam properavit. Reliquæ naveis et si supra modum quassatæ, plurimis cæsis sauciisque, (quippe continuò tormenta nostra fulminabant) vento ferente ægre portum Doverensem tetigere. Ex arce Britanni acriter majores globos in Nostros jaculabantur, quod juxta litus portumq; suum prælium conserere illicitum dictitarent. Accusantibus postmodum Anglis jura portuum violata, responsum à Batavis, impetum præliorum, quando mens concita & extra se posita hosti incumbit, cohibere non esse in manu pugnantis, hostem, se non verò vicina telluris respexisse. Hæc clades dimidiā partem virūm naviumque consumpsit. Qui superstites terram tetigerant, litore tenus in tuguriis degentes, omnium inopes, miserabilem vitam tolerabant, complures vulneribus vel morbis confecti, inter quos & ipse Cubiarra, extremum diem clauerunt.

## C A P U T XXXVII.

*LAMBERTI PVLCHRI CVM PRAE-  
TORIA DUINKERCAÑORVM MEMO-  
RABILIS CONFLICTVS,  
ANNO CIɔ Iɔ c v.*

**L**AMBERTI quoque centurionis, cui Pulchri nomen adhæsit, pulcherrimum & memorabile facinus hic subticendum non videtur. Treis naves hostiles, infestando mari & prædæ insectandæ, mense Decembri Duinkerca solverant, inter quas Prætorię Adrianus Theodori militiæ ma-

ritime vetus infractæque virtutis , summo imperio præ-  
erat. Joannes Gerbrandi , qui inter Nostros vicariam mari  
dignitatem obtinebat, juxta cum Lamberto vestigia pre-  
mens , insectandis navibus frustra ex parte operam inten-  
derat. Duabus elapsis, Prætoriam Lambertus sero diei na-  
tus(erat is Decembris undecimus) primo tormentis utrinq;  
tonantibus , dein retinaculis injectis mascula virtute comi-  
nus prælium occipit : bombardis, ensibus, lanceisque, quæ-  
que alia instrumenta furor militaris ministrat, acerrime  
dimicatum , ita ut sanguine fluitantia tabulata tingerentur,  
cadavera in mare volverentur. Neque tamen hostis ani-  
mum despondit, advorsis vulneribus plerique cadebant,  
cæterum ubi & Ioannes Gerbrandi adventaret, insertaque  
antenna anterioris veli posticæ arbori, eandem frangeret,  
Imperator hostilis ventre tenus lancea transfossus terro-  
rem auxisset, deditio properata fuit. Ex captivis octua-  
ginta novem ( centum & viginti sex armatis viris navis sti-  
pata fuerat, cæteri occubuerant ) sexaginta infœlici ligno  
suspensi , cæteri vel veniam meruerant, vel ad supplicia du-  
cti , renitente nemine , evaserant. Ex Nostris treis tantum  
cæsi, duodecim circiter vulnerati fuere.

## C A P. XXXVIII.

*MALACCÆ OBSIDIO, ET PRÆ-  
LIVM NAVALE INTER MATELIVVM ET  
LVSITANOS, ANNO cI° I° cvi.*

**R**Ex Hispaniarum , cum quaquavorum non tantum  
publicis Nostratium , verum etiam privatorum opi-  
bus

bus fortunę ejus, qua sol oriturque caditque, lacerarentur, viscera ac nervos imperii, quis universum ferme orbem territabat, præcidi summopere indignabatur. Neque enim amplius nomen regium ac splendor se sustentabant, cum Batavi, Mattiaciq; mari innutriti assiduo contactu lucri ac successu utrumque soleim fatigarent, neque ultima terrarum, ipsiusque naturæ occultantis ac fugientis abdita à rapinis prohiberent. Anno itaque millesimo sexcentesimo & quinto severissimum edictum promulgat, quo Hollandis Zelandisque sub pœna capitis, atque amissione bonorum, utriusque Indiæ navigationem interdixit. Cæterum frustra prohibet, qui inhibere nequit, neque bella minis sed viribus geruntur, sustentanturque. Atque adeò, uti omnia fortitudo periculorum secura perrumpit, eò acrius invetus animus atque lucri ingens cupido, quæ omnium mortaliū in primis mercatorum animos in transvorsum rapiit, ad fortunam ulterius experiundam summopere stimulabant. Eodem itaque anno Curatores societatis rebus suis intenti novam classem expedire, neque sumptibus neque laboribus parcere, atque ut animo cupienti nihil satis festinatur, omni ope niti, ne cunctando bonam occasionem corrumperent. Instructissima itaque classis navium duodecim mari committitur. Præfectus illi erat Cornelius Matelivius, militię impiger, quem societatis quoque consortem non tantum publica sed & privata commoda summopere incendebant. Et vix ea solverat classis, cum anno proximo sub imperio Pauli à Caerden octo naves iterum commeatu, & milite probe instructæ in Indiam missæ, ut in præsidiis ibi vitam agerent. Magna quippe consilia,

ubi mature perpensa, impetu valida sint, cunctatione  
languescunt. Cæterum de Matelivio ejusque molimine, &  
cum Lusitanis acri prælio, nonnulla hic in medium adduce-  
re, res ipsa & locus postulat. Cum itaq; anno cl<sup>o</sup> I<sup>o</sup> c vi sub  
finem Aprilis ad auream Chersonesum, in cuius extremi-  
tate ad maris sinum Malacca obtenditur, classem appulif-  
ser, contra hanc Lusitanosque periculum facere audax il-  
lius consilium fuit. Cum autem proxime ad urbis mænia  
accedere nequiret, frustra machinarum verberibus impe-  
rebat. Rex Ihortanus, qui Nostris fœdere junctus erat, cum  
aliquot triremibus bis mille Æthiopes subsidio miserat.  
Octingenti, qui in tellurem se dederant, suburbio incenso  
incolas in ipsam urbem se recepisse compererunt. Nostris  
nihilominus cum auxiliaribus Indis oppidanis imminere,  
verum ubi proprius accessissent, ibi verò præsidiarii Lusitani  
virtutem ostentare, urgentes pellere, maxumâ vi cædere,  
ita ut plureis Nostrum sauciati, vel letaliter iecti occubue-  
rint. Pulsis tamen in urbein Lusitanis, quatuor suggestibus  
in ipso suburbio erectis, machinarum nostrarum strepitus  
ad cœlum ferri, horrendoque mugitu pilas ingentes in ur-  
bem ejectare, promptis paratisque ad arma præsidiariis,  
qui mænia defensabant, & undique sua tela jacientes vi-  
brabant. Ubi neque ita res procedit, & classis Lusitanica  
Goâ quotidie expectaretur, machinæ bellicæ cum sauciis,  
& ægris ad naves reductæ. Cæterum trecenti in litore reli-  
eti strato per fluvium ponte proximum cœnobium inva-  
dunt. Hinc ulterius meridiem versus, infesto per paludes  
itinere centum & quinquaginta nostrates cum quadringen-  
tis Æthiopibus, derepente opportuno loco castra metati  
sunt,

sunt, quâ urbs minus valida invia paludum prospectabat. Oppidani, qui se locorum asperitate satis munitos credebat, insolita re perculsi nihil ex virtute militari intermittere, Nostri contra niti, namque ibi propugnaculo subito excitato tormentisque dispositis, frustra tamen dedicationem postularunt. Hinc per occultos tramites nocturnis tenebris tecti loco, qui vix sexaginta passus ab urbe distabat, vallum dimidiatę Lunę formā tanta celeritate excitarunt, uti ope divūm aggestus illuc cespes videretur. Dum ita hostibus imminent, magnitudo tanti incepti adventu Lusitanę classis suppressa, quæ robore militum & magnitudine navium ferox perniciem Nostris moliebatur. Quanquam autem militaris pubes, quæ immensā cupidine incepta patrandi exagitabatur, divelli se inde ægre pateretur, tamen & commune periculum & pugnandi iniqua necessitudo eos ad naveis reduxit. Ubi Fœderatos se recipere Lusitani animadvertunt, Civitas ingenti gaudio permota virtutem intendere, nostris tanquam victis insultare, castris direptis deprehensos cädere: verum ubi Nostri advorsa iterum corpora ostentant, turpi fuga quinquaginta plus minus cæsis in urbem acti. Ita insectandi cupidine festinatum prælium pari celeritate & formidine deseruerunt. Dehinc Nostrī naves ingressi, levatis die decimo & septimo Augusti anchoris, hostili classi obviam eunt, quę quatuordecim immensę horrendaque molis naviis, totidemque minoribus, nec non triremibus quatuor, pigro motu ipsi Oceano gravis aquas pulsabat. Summum in illam imperium Prorex Goæ obtinebat. Ille, uti secura est credulitas, viribus fretus victoriam animo volutabat, ipse imperterritus, atque

imperandi in iis locis vetus. Naveis, quæ è vasto mari tanquam castella eminebant, multis tormentis graveis, continuis machinarum ictibus nostris erant terribiles. Centum & quinquaginta ictus eâdem vesperâ intremiscente Oceano numerati. Postridie, cum una ex Nostratium navibus, cui Nassoviæ nomen, à cæteris foret sejunctior, cui propter malaciam maris difficulter succurri poterat, hosteis opportunum circumveniendi illam tempus rati, facibus infestisq; ignibus propemodum obruerunt, ita ut classiarii, cum res suas afflictas viderent, scaphis ægre periculum effugerint. Ipsa quoque Matelivii Prætoria navis, cum aliâ, cui Medioburgum nomen, à tribus majoribus Lusitanorum navigiis circumventa, ferme cum exitio luctabatur, nisi adventantes socii ignita tela in unam Lusitanarum tam confertim ejaculati fuissent, ut exorto incendio, horribili spectaculo, ignis magna vi agitatus obvia quæque corriperet. Ita imperator, qui & fortiter rem gesserat, præcisis anchoribus funibus, furori ignium se subduxit. Cæterum Medioburgum navis ita arcte duabus hostium innexa erat, ut dissolvi nequiret, & simul cum hostibus violentis ignibus deflagravit. Classiarii nostri pleriq; imminenti se subduxere periculo, Lusitani igneis vitando, & in profundum profilientes contrario elemento perierunt. Prælio hoc usque ad medium diem prolato, reliquum tempus reparandis navibus, quæ utrinque supra modum labefactatæ erant, datum fuit. Die deinde vigesimo Augusti, Imperator hosti, qui anchoris fixam classem tenebat, occursare atque ad prælium laceſſere in animum induxit suum; eò magis, quod militaris pubes eò sponte ferebatur, qui omnes labores & peri-

pericula consueta habebat, tum quod illi, qui inferunt periculum, fortiores videantur. At Lusitani, vel quod formidine agitarentur, vel quod non satis reparatis navibus magis opportunum tempus opperirentur, Malaccam versus tendērunt. Nostri interea apud vicinos Reges divortere, cuncta officia humanitatis intendere, providere ne quid hostis rerum novarum moliretur, reparandis navibus & commeatui operam summa vigilantia præstare, saucios & ægros reficere, denique nihil militaris exercitii intermittere. Lusitani deinceps relictis ad Malaccam septem navibus, cæteris probe expeditis mari se committere, Fortunam iterum experiri, atque extrema Nostris intentare. Nunquam enim magis impigre ad certamen itur, quam ubi pro imperio, salute, divitiis, quæ prima mortales ducent, dimicatur. Batavi intellecto hostem in propinquuo esse, expeditâ classe occursantes, ingens horridumque prælium iterant. Imperator cum duabus aliis navibus, Lusitanorum navem, quæ paululum separata à sociis inquis fluctibus agitabatur, summo impetu adoritur, superat, in profundum protrahit, occisisque pene omnibus, sociis, qui in altera navi erant, comburendam relinquit. Ab altera parte, Præfectus qui vicarium in classe nostrâ imperium obtinebat, à duabus Lufitanicis corbitis apprehensus, non prius utramque reliquit, quam una igne corrumperetur, altera continuis machinarum ingentiumque pilarum verberibus perforata, atque armamentorum usu destituta temere per incerta fluctuum oberrans, & mox iterum comprehensa eandem sortem nacta fuerit. Et Fortuna hostibus advorsa non simpliciter nobis indulxit. Nam-

que

que & altera Dis faventibus summa vi & virtute militari  
Nostratum expugnata, in potestatem nostram venit. Ita  
rebus afflictis, metus ingens & consternatio hosteis con-  
cussit. Interea Imperator animo fluctuans, cum ad portum  
Malaccensem cursum flexisset, an reliquias hostiles naves,  
quæ ibi sedem fixerant, adoriretur, Lusitani, qui omnia  
extrema metuebant, navibus suis igneis immisere, pul-  
cherrimo Fœderatis spectaculo, qui quæ vix sperare ausi,  
hosteis faces propriis navibus injectantes oculis usurpa-  
bant. Ita terribilis classis, quæ viribus suis tumida & fe-  
rox extrema minabatur, funditus deleta, ingens gaudium  
Batavis cumulatò auxit. Primores ex captivis sex millibus  
coronatorum redempti, gregarii, cum Nostris, qui Malac-  
cæ in vinculis erant, permutati.

## C A P. X X X I X.

**GEMINA EXPEDITIO GVLIELMI  
HAVTAINII, ET PROPRÆFECTI REINERI  
NICOLAI MEMORABILE PRÆ-  
LIVM, ANNO c̄lo c̄vi.**

**I**NITIO hujus anni nobilem classem viginti quatuor na-  
vium Batavi expediverant, uti sub imperio Hautainii vel  
Americanam classem interciperent, vel Lusitanicis, quæ in  
Indiam iter moliebantur, exitum præcluderent. Hautainio  
ventis advorsantibus, & iniquo mari tardum iter, ex di-  
reptione mercatoriarum navium, & populationibus vicino-  
rum litorum, præda haud modica supperebat. Lusitanicæ  
naves

naves mare ingredi non ausæ : de Americanis nuntii allati, unam argento stipatam funesto prælio Batavicæ implicitam simul conceptis ignibus conflagrassæ , treis fœdis tempestatibus depressoæ , quatuor Havanæ portu opum inanes (hoc enim subdole addebat) navigandi opportuna tempora opperiri. Ita alimentis quoque deficientibus , quia vectoriæ nostræ naves obluctantibus ventis adferre nequibant , maturatus in Patriam abitus. Æstate inclinante novata iterum sub ejusdem Hautainii imperio navalis expeditio , uti viginti quatuor navigiis , quorum sex tempestas in divorsa abripuit , adventanteis ex India & America naves exciperet . Cæterum ex improviso Ludovicus Fiasciardus octo galeonibus , quarum moles ferme invicta terrorem incusserat , occurrit : aderant præterea plureis longæ naves, sed quæ propter asperitatem venti inutiles juxta litus stationem elegerant. Hic erat ille Fiasciardus , qui inermibus septem navibus , quæ sali quærendo destinate fuerant , juxta Americæ insulas superatis , crudelitate nobilis quæsitissimis ultimis suppliciis in nautas sævierat. Vnam galeonum ferocia horridus ille Præfectus in Zelandicam vicariam , cui Regnerus Nicolai præerat , impingit , tanto vicinarum navium horrore , uti proprius accedere non ausæ pugnam ex longinquæ aspectarent , & mox oborta nocte ingenti decore retrò cederent. Regnerus tanto periculo à sociis relictus , quamquam extrema imminere non ignoraret , frectus tamen sua militumque virtute , quantum poterat armis contendebat. Atque adeò solus per duos integros dies , arbore disjecta , nave supra modum truncata , plerisque sociorum cæsis , impiger animi , consilioque potens hostilem

Y

impe-

impetum sustinuit. Denique, dum cæteri suppétias ferre cunctantur, metuendumque esset, ne navis lacera fluctibus ingruentibus deprimeretur, ne ab hoste gravius in captivos consuleretur, Imperator, classiariique extremum ausi facinus, ultro horribile genus mortis, incenso nitrato pulvrey, elegerunt. Primo itaque supplices Deum immortalem precati, quod mortem, ne ludibrio & crudelitati hostium se sisterent, prævorterent, tandem veluti à supremo numine impetrata venia, se suaque omnia, funiculo ignito pulveri immisso, ignibus feralibus subjiciunt. Dissidue re immenso fragore compages & tabulata navis, mali antennæque in sublime raptæ, miserandaque fortuna truncata corpora, sparsim disjecta, ex alto iterum mari injeta fluitabant. Sexaginta homines violentia fati oppressit. Duorum semiustulata corpora in hostilem navem dimissa, horrentibus tale spectaculum ipsis hostibus, veterem invultu ferociam, moriendique contumaciam retinuerunt. Ita neque victi ab hostibus, de ipsa morte, à qua ipsa natura cuncti admodum homines abhorrent, triumphum egere.

## C A P U T X L.

*DE NOBILISSIMA VICTORIA JACOBI HEEMSKERCKII IN FRETO TARTESIACO CIRCA GIBRALTARAM,  
ANNO CIO IO CVII.*

**C**ONVENERANT Patrię Proceres ad petitionem Archiducis, uti de pace, induciisve colloquia consenserentur

rentur, verum jam ante classis triginta majorum minorumque navium mari commissa, uti ipsos Hispaniae nervos peteret. Princeps classis erat Iacobus Heemskerckius, navigatione ad Polum arcticum nobilis, qui que ante tres annos in India ingentem corbitam Lusitanorum, quæ ultra milliones aliquot æstimabatur, incredibili virtute duabus minoribus navibus expugnaverat. Cæteri omnes prefecti classiariique, tanquam Argonautæ, mari & procellis nutriti, ab horrido elemento marinam fortitudinem conceperant, & periculorum consuetudine omnia pericula contemnebant. Inerat Imperatori contemptor mortis animus, præliorum maritimorum sagax, victoriæ avidus, sine temeritate audax: atque adeo vultu ad civilem vitam compito intimis pectoris penetralibus militarem virtutem occultabat. Ipse victoriam certam sibi spondens, non tam pecunię, quam ingenti animo aspernabatur, sed heroice glorię avidius, nullum affectaverat stipendium, nisi partem demum octavam ejus præde, quę quinquaginta florinorum millia excederet. Vigesimo & quinto die Martii Tessalia classem solverat, decimo Aprilis Tagum flumen, quod ultra Ulyssiponem in mare Oceanum excurrit, penetraverat, eo animo, ut naves Lusitanorum expugnaret, deprimeret, fœdareretve. Sed comperto corbitas plerasque se mari dedisse, & quę securę essent, nondum paratas, sedecim Galeones Indiam Occidentalem, decem cum pluribus aliis bellicis Fretum Tartessiacum petiisse, ut navibus mercatoriis Belgarum, quę ex mari interno Oceano se committerent, insidias tenderent, huc continuo vela direxit, prout venti ferrent, modo Mauritaniæ, modo Hispanię

spaniæ oram proprius accedens. In faucibus Gaditanis, concilio militari inito, visum neutquam dies prolatando, opportunitates corrumpi opportere, primum consulto, dein mature facto opus esse. Decretum itaque, uti Præfectus Heemskerckius, & centurio Lambertus, cui Pulchri nomen adhæserat, vir natura imperterritus, vehemens, & manu promptus, simul in Prætoriam navem impetum facerent, Propræfectus Alterassius cum centurione Brassio vicarię Hispаниę classis se innectorent, atque ita juxta ordinem singulas bini adorirentur, præterea uti duæ cœloces cum actuario navigio post principia starent, & huc atque illuc se vorterent, quo hostileis naves, si elaberentur, oppugnarent, annonariæ naves extra certaminis periculum consisterent. Addidit Præfectus homo militariter facundus masculam orationem, qua singulorum centurionum, sociorumq; virtutem incendebat, uti fortitudinis pristinę memor res generosum, & nunquam antea tentatum in ipsis Hispaniæ finibus secū facinus aggredierentur: præstare emori per virtutem, quam socordia atque ignavia tam bonam occasionem corrumpere: victoriam in manu esse, si modo vincendi animus adsit. Difficile esse Batavis mari non vincere, quibus ubiq; virtus Fortuna non simpliciter indulsisset. Hoc demum prælium cruento bello finem impositurum. Naviū magnitudinē ne extimescerent, quæ pigro motu exitio propiores essent, easdemq; certis tormentorum ictibus fatigari posse. Adesse hosti milites maritimis præliis insuetos, heic nautas marisq; indigenas pugnaturos. Nunc hoc agendum, ut serio Hispani, pacem, quam affectare videntur, cupiant, honestasque conditiones offerant. Non tam Imperatorem se, quam

se, quam militem; uti Principem classis, ita principem in adoriendo futurum, se modo sequerentur; timidis cuncta advorsa, in præliis audaciam pro munimento esse, plura non addere, ne de virtute dubitare videretur. Assensere cuncti centuriones, sociiq; & sacramento se obstrinxerunt, nunquā se mandatis Imperatoris defuturos, pro victoria vitam & mortem juxta æstimantes, vel hostium vel mortis victores fore. Quibus peractis tormentorum præfecto imperatum, ne, antequam archithalassī Hispanici lateri proxime adhæreret, ulla tela nisi ex contiguo in hostem jacularetur, neque proreta prius anchoras jaceret, ut gubernator ipse clavum dirigeret, denique promissi Philippei centum illi, qui primus aplustre Imperatori classis Hispаниcæ sustulisset. Hinc implorata cælesti ope, cum pro more in signum fidelitatis & constantię singuli vini haustum sumpsisserint, plenis in classem Hispanicam velis vigesimo quinto die Aprilis delati sunt. Consistebat illa juxta urbem Gibraltaram in Fretō Tartessiaco, (veteres Carteiam appellabant montis Calpes radicibus adsitam, ubi ille se theatri in speciem cavans tutum maris recessum navibus exhibit) navium numero & robore, denique militum frequentia formidabilis. Naves majores viginti & tres, inter quas novem galeones, præter negotiatorum aliquas, que antea prædæ cesserant. Classi præerat Ioannes Alvarezius Avila, militię maritimę vetus, & quondam Ioannis Austriaci in Naupacteo prælio comes, cuius prætoria ingentis molis octingentorum vasorum erat, & præter classiarios quingentis stipata erat militibus, instructa viginti & uno tormentis æneis, horror & propugnaculum Oceani: tota classis ultra quatuor millia

hominum numerabat. A propugnaculi quoque grandioribus machinis, ubi juxta stationem fixerat, multum solatii expectabat. Ubi Alvaresius nostros adventare vidit, illorum conatus Hispanico supercilie ridebat, sicuti regię potentię ministri regios quoque sibi arrogant spiritus, ante victorię tumidi, præferoces, atque adeò vinci posse contumelię ducunt. Iudicabat ille totam Batavorum classem ne quidem cum sua Prætoria comparandam: percunctatus nautam Batavum, quem forte captivum habebat, ecquid tantum facinus ausuri Nostrī viderentur, responsoque, se vel populares suos non nosse, aut præliandi animo mox præsto futuros, indignans animoque æstuans, tam præceps & temerarium consilium, ut illi videbatur, ludibrio habuit. Verum arrogantia mox in metum cessit, cum enim extensis velis recta in Alvaresium ferretur Prætoria Nostrorum navis, dissectis anchorariis funibus in interiora se recepit. Prætervectus Heemskerckius proprætoriam hostilem, quę cum tribus galeonibus principia jam tenebat, maximo insultu Principem classis aggreditur. Hinc circumfuso vasto clamore nautica pubes utrinque fremere, hostis primo in Nostros globos jaculari, sed nullo fere detimento, contra Præfectus noster tormentis, quæ ad proram posita, graviter hostilem navem quassare, denique jactis anchoris se eidem innectere. Tum horribile spectaculum unusquisque edere, plures utrinque vulneribus acceptis non tantum cum hoste, verum etiam cum morte colluctari, nisi modo ac statim concidere, amputata virorum membra paſſim jactari, & quia recentibus & calidis vulneribus non sentiebatur dolor, mutili quoque arma non omittebant, do-

nec

nec languentes effuso sanguine corpus inclinarent, atque procumberent. Nunquam majori virtute pugnatum. Dum utrinque tela volant, secunda hostili explosione majoris tormenti globus, juvenem, qui ejaculari sclopo suo ferrum tentabat, medium secuit, Præfecto totum fere sinistrum pedem à superiori parte laceravit, ita ut subito laberetur, eodemque ictu dextra manus alteri ablata, qui tormentum fune ignito accendebat. Ita invictus animo Imperator, virtute nulli secundus, lorica indutus, gladium dextra vibrans, certus victoriae, ne quidem à morte vinctus, ingenti spiritu fatali necessitati cessit, neque virtus ante, quam vita illum destituit, atque adeo, antequam mortalitatis leges impletret, imperandi sortem in persequenda victoria alteri reliquit. Ne autem pubis nauticæ animi fatiscerent, atque, uti fieri solet, pugnantium fervor languesceret, ultima hora gloriosissimi Herois à centurione Verhoevio clam habita fuit. Sicuti enim militaris juventus etiam conclamatis rebus Imperatore incolumi fortitudinem crebro humanam excedit, ita ubi excessisse apud eos divulgatum est, subito confusis imperiis animi liquescunt. Interea tormenta omnia Prætoriae nostræ navis à dextro latere in Hispamicam intonuere, contra Hispani sclopos confertim ejaculari, queis densa telorum nube nostri respondebant. Clamor permixtus hortatione, lætitia & dolore, prout nostris vel hostibus strages incubuerat. Centurio Lambertus, sicut imperatum antea fuerat, Prætoriam quoque hostilem adoratus, puppim ex prora sua ita tormentis quassavit, ut ferreæ pilæ per ipsa adigerentur penetralia, dein lateri connexus tam animose cum hoste, qui acerrime resistebat, conflixit,

ut Ba-

ut Batavi, & qui solo & cælo acrius animantur Mattiaci, instar leonum, qui excandescentes obvia quæque lacerant, manus conseruerint. Plerosque vindictæ quoque privata cupido accenderat, qui captivi durius in vinculis habití fuerant. Interea Propræfctus Alterassius, ita uti constitutum fuerat, advorso vento Proprætoriam hostilem nancisci nequibat, sed duas galeones evestigio corrupti, reliquis ingens damnum incussit. Centuriones Adrianus Roestius, & Marinus Chollartus, aliique, conspecto Alterassium non posse velis proprætoriam attingere, incredibili impetu, atque præcipiti insultu in illam feruntur. Tum tormentis undique majoribus & minoribus cuncta resonabant, densa globorum tempestas navibus incumbebat, feralibus ignibus fumo mixtis conspectus adimebat, adeo ut medio die nocturni certaminis species videretur, aplustrique ab uno ex sociis ablato, post conflictum dimidię horę propræatoria conflagravit. Verum igne concepto, fusum quoque fuit in vicinas nostras incendium. Jamq; vela quarundam exarserant, quanquam omni ope subducere naves Nostri nitentur: industria tamen & agilitate nauticę pubis ignis suppressus est. Verum hostilis navis, dum nullo renitente ignis cundo robur acquireret, tota usque ad ima tabulata exusta fuit. Nonnulli ex militari & nautica turba ignibus, alii aquis perierunt, vel natantes globis trajecti sunt. Ardente Proprætoria, Henricus Longus cum aliis quibusdam navium Præfectis galeonem adortus, tormentis undique adactis etiam extrema intentabat: verum ille humeris transfossus occubuit. Ceterum & ipsa galeo, vexillo, quod nomine vi-  
carię assumpserat, adempto, ita continua tormentorum ictibus

ictibus contusa est, ut & ignem conciperet, eodemque penitus absumeretur. Altera non minori violentia quassata, ruptâ compage aquas hauriens depressa fuit. Interea vicia navi Alterassius adventabat, qui, uti & alii centuriones, immissa globorum tempestate horrendum in modum intonuere, sed, secus atque ab Archithalasso constitutum fuerat, cominus non confixere. Peccatumque in eo fuit, ut incerta iactum non tantum hostiles naves, verum & nostras læderent: sicut & hostilibus tormentis ex urbe & castello peractum fuit. Dum hæc ita aguntur, & Prætoria utrinque navis acerrimum iniret certamen, hostiles reliquæ acriter missilia & tela in nostros vibrabant, non tam proinquantes se navibus implicare satagebant, quod neque nostris contra mandatum Heemskerckii cordi erat, sed denso globorum nimbo se invicem impetebant, donec una, incertum an nostro an hostili igne, pulvere pyrio accenso cum vicinâ, quæ flammæ proxima erat, horrendo sonitu, tanquam si cælum & maria miscerentur, in sublime rapta fuit. Idem fatum & aliæ nonnullæ habuere, quæ vel tormentorum ignibus, vel furore pulveris nitrati, quem lacere navis reliquiæ incenderant, horrendo spectaculo collisæ dissiluerunt. Reliquæ metu consternatæ in brevia & vada impegere, uti extremo se subducerent periculo. Tandem Prætoria navi, cui loco defuncti Imperatoris præterat centurio Petrus Gulielmi Verhoevius, Principem classis hostilis ita pressit, ut vexillum candidum, quod pacis & ditionis indicium esse solet, explicaret, sed nihilominus violentia tormentorum superavit, & militaris insultus sedari nequibat. Accessit & intrepidus miles centurionis

Cleinsorgii, qui, cum continuis tormentorum ignibus propinqua hostilis galeo conflagraret, in scapham se conjiciens, contra Prætoriam insurgens, aplustri primum detracto, incredibili illam virtute superavit. Tum demū horribile spectaculum visum fuit, omnia constrata telis, armis, cadaveribus, alii morti occumbere, vulneribus affigi, eniti atque iterum prolabi, alii fugiendo mortem in mari se præcipites dederunt, sed cum enatare luctarentur, plerique à classiariis, qui scaphis se exposuerant, confossi vel submersi sunt, adeò ut cadavera cum sanguine fretum paſſim summo cum horrore volveret. Fuerant immixtæ classi Hispanorum treis Gallicæ privatorum naves, quæ in prælii consortium assumpτæ, nactæ occasionem, ad victores tutò se recepero. Servati & captivi, quos cum crudeli mandato centurionis Hispanici miles transfodere pararet, globo interemptus, mox & alijs, qui idem tentabat, simili morte occubuit. Quin &, mirum dictu, majori telo vincula captivorum dirupta commemorantur. Vespera cadente relictæ à Nostratibus Prætoria navis, admodum perforata, à paucis, qui se occultaverant, sectis anchorariis funibus, versus urbē pulsa est. In sequenti (xxvi Aprilis) die iterum à nostris scaphis impetita, verum oppidani malo dissesto ignem injec- runt. Hic exitus celeberrimi illius prælii fuit, cuius fama totū terrarum orbem pervasit, atque ipsam timore concussit Hispaniam, docuitque in propriis penetralibus ambitiosam gentem debellari posse. Damnum ingens, foedam & cruentam cladem Hispanorum luctus publicus & privatus ostendit. Compertum fuit Hispanis referentibus quatuor armatorum millia & amplius in ea classe fuisse, quorum maxima pars

pars cum summo classis Imperatore, qui eodem quo Heemskerckius fato secundo tormentorum i<sup>ctu</sup> ceciderat, cum præcipuis Præfectis, plurimis nobilibus, qui fidei in Regem virtutique ostentandę crebri confluxerant, & milite veterano, qui expeditioni Joannis Austriaci interfuerat, in numerum Libitinæ venit, bellicis rostratisque navibus incensis, subversis, aut funditus deletis propemodum omnibus. A parte nostratium, sicuti in præliis ut plurimum iis minimum est periculum, qui minimum timent, & audaciam pro munimento habent, præter vulneratos centum plus minus perierunt. Heemskerckii, qui strenui militis & maxi mi Imperatoris officium executus fuerat, cadaver unguentis medicatum Amstelodamum delatum fuit. Ibi publicis exequiis illum, qui pro Rep. novissimum spiritum effuderat, admodum magnificè terræ mandarunt Patriæ Patres. Duo signa militum inversis armis funus præcedebant, tympana atro velamine induta pulsata lugubre quid sonabant, vexilla syrmate suo solo trahebantur, dein galea, lorica, denique antiquę Equestris nobilitatis insignia portabantur, à quatuordecim Præfectis funus gestabatur, post consanguineos & necessarios rerum maritimarum Curatores, Consules & senatores urbis, cum urbana nobilitate civium præfecti, & ex omni ordine spectatissimi quique atrati incedebant, circumfusa plebes in primis nautica & verbis & vultu luctum ostentabat, alii Neptuni domitorem, fulmen belli, terrorem Hispaniæ, prout unicuique dolor verba laxaverat, appellabant. Honori & æternitati nominis ejus illustre à Patriæ Patribus constitutum fuit monumentū, sic ut excelsa ejus virtus merebatur. Defunctus est in flore vi-

riliſ atatis , cum annum trigesimum atatis & nonum a-  
geret.

## C A P U T X L I .

**E X P E D I T I O I N F O E L I X S V B P R A E-**  
**F E C T U R A P E T R I G U L I E L M I V E R H O E-**  
**V I I V E R S V S I N D I A M , A N N O**  
**c l o I o c v i i . & seqq.**

**E**XPEDIVERAT anno c l o I o c v i i Indica Societas  
 classem tredecim navium , cuius summum imperium  
 obtinebat Petrus Verhoevius , qui comes nuper Heems-  
 kerckio , illoque interempto partes Præfecti gloriose tut-  
 tus , victoriam nobilem in Calpetano ſinu Hispano extor-  
 ferat. Ipsa fortuna tempeſtatibus , ſanguine , ferro atque  
 adeo cæde Præfecti fœda ut plurimum , & calamitofa. Com-  
 plures tamen naves à Noſtris intercepte prædam auxerant.  
 Circa Mosambiquam mense Julio anno c l o I o c v i i i  
 corbita pretiosis mercibus opulenta , quanquam ex arce  
 ſimul & navi , majoribus tormentis vehementer obnите-  
 rentur hostes , haud diſſiculter ſuperata. Eadem ærumna  
 duas alias oppreſſit. Binas alias , ne eodem malo ſuccum-  
 berent , prope arcem ejusdem Gubernator Stephanus de  
 Attaida vadis impingi curaverat , ne injuriis opportunæ eſ-  
 ſent. Inſequenti mense galeonem quoque , que procella-  
 rum turbine circa Canarias insulas à reliqua claſſe Ulyſſi-  
 ponensi ( conſtabat illa octo ingentibus corbitis , & ſex ga-  
 leonibus , atque Proregem Goæ veſtabat ) avulſa per in-  
 certa

certa fluctuum mari sævo turgidoque jactabatur, post modicam velitationem occuparunt. Mense Novembri, juxta Malaccam incensâ à nostris corbitâ, furor ignium eandem usque ad ima tabulata corrupit. Plures & alię capte, vel ab hostibus ultro incensæ. Hæc adhuc secunda & prospera nobis, cæterum anno sequenti sors advorsa turbare res nostras cepit, & velut ex condicto opprimere. Bandenses, sub specie iciendi fœderis, Præfectum cum consiliariis ex insidiis circumventum plurimis vulneribus confodere. Neque enim ob paucitatem nostri obniti quibant, quod jam ante Barbari impetrassent, uti remoti à præsidio jaculatorum sylvam versus fœderis negotia agitarent. Milites nostri, qui vicina litoris insederant, tumultu subito perculsi, et si omnibus locis vis magna hostium, periculum anceps esset, festinato itinere in arma prorumpere, obvios quoque tuborum glandibus cædere, fugientium ad sylvarum invia terga premere, nihil reliqui victis facere. Quæsitis nostratium cadaveribus repertum Præfecti cadaver viginti & novem vulneribus confectum, caput amputatum, ludibrio habitum, triginta alii primates eādem sorte occubuerant. Postridie quatuor centuriis militum aucti per campos cædemadentes suorum quæritabant cadavera. Inventi & juxta oppidum obsides Nicolaus Molrius & Joannes Vischerus fœde trucidati à Barbaris, qui nè quidem jura gentium noverant, sed cuncta cruenta lubidine violaverant. Neque socios abducere præ telorum ingruente tempestate nostri poterant, sed recipere se cogebantur. Præfecto, ceterisque primoribus in arce, quam invitis jam antea insulanis construxerant, parentatum, ultimo honori quinquies ex n-

vibus tormenta explosa , ter jaculatores globos excusserunt . Plureis postmodum aliꝝ Barbarorum naviculꝝ captæ , incensæ , quarum unâ ( juncum ipsi appellant ) cuncti ferme Æthiopes , qui ditionem detrectaverant , & infra tabulata se receperant , aut ignibus , aut ferro perierunt . Nimirum in tanta rerum humanarum volutatione , nunquā ferme scelerata impunita manent . Et indigenæ mox omnia jam alia optabant , supplicesq; pacem bello præferebant . Cæterum ne extra institutum longius procedamus ,( namq; & Paulus Cardenius præfectus alterius classis bis carceri mancipatus , Tidor , & Terenate ulterioris calamitatis testes erant ) prælium horridum circa Manillas & Nostris exitiale commemorare , nunc jam ipsa res postulat . In hoc vitę fluctuantis & turbida statione ita natura comparatum est , ut advorsa secunda sequantur , neque cuiquam mortalium ita Fortuna indulxit , ut omnia ex voto fluant . Effugere advorsa casuum nemo potest , contemnere & conculcare generoso spiritu quis potest . Quatuor naveis sub finem anni c l o i o c x cum celoce sub Præfectura Francisci Witterdi opperiebantur galeonem pretiosis Chinensis mercibus opulentam , quæ ex Maccao Manillas petebat , cæterum illa ex infortunio vadis hæsitans , fluctibusque pulsata , dissoluta compage una cum centum & viginti viris , fundum petierat . Irrito hoc molimine cunctando circa hanc oram Chinenses & Japanenses naves , quæ expectabantur , excipere firmum consilium stetit . Verū ubi ex quatuor captivis , qui se telluri forte dederant , copias Nostratium consiliumque hostis intellexit , Ioannes de Sylva Moluccarum insularum gubernator , confessim duodecim naveis , inter quas & longæ , expediri & mille

mille armatis hominibus, inter quos octingenti Hispani, insideri jussit. Duæ Nostrarum, quod sparsim à se invicem remotæ anchoras fixerant, post acrem conflictum superatæ, tertiâ, dubium an hostilibus ignibus an ex infortunio, incensâ, Nostri projecta navis cura in mare præcipites paſſim agebantur, & vel ignibus, vel aquis, vel ferro plerique ceciderunt. Ex superatis navibus duabus Præfecto supremo Witterdo caput tormento ablatum, centum & viginti captivi: hostium quinquaginta tres cæsi, septuaginta sauci. Duæ alię naves, quę exploratum ierant, an alię Chinenses adventarent, intellecta clade fuga sibi consuluerunt. Ita heic inducię ferrum occultaverant, sub æstivo sidere nimium quam incalescentibus animis arma crepabant, heic pro tempore amici, illuc hostes furioso impetu in mutuam perniciem grassabantur.

## C A P U T   X L I I .

*C O N F L I C T V S   C L A S S I S   B A T A V I C A E  
C U M   H I S P A N I C A ,   A N N O  
C I C I C X I I .*

**Q**UANQUAM per inducias belli furor paullum se remisſe videretur, idem tamen horror sub calente sole Oceano incumbebat, sive quod sub infestis ardoribus plus satis incalescant mortalium animi, sive quod præde cupidine, vel commerciis tutandis Hispani Batavos infestare, atque in ordinem cogere niterentur. Batavi tamen, qui fide nihil potius habebant, non primi hostilia tentabant,

bant, sed quieti se suaque tantum defensare, injurias manu vindicare satagebant. Cum enim anno c I c I c xii ex Hollandia Zelandiaque duodecim naveis probe viris, commeatu & necessariis instructe pelago se dedissent, Indianque peterent, juxta Salarias insulas Hispanicæ classi septendecim velorum occurrunt. Batavi recto itinere per aquas tendunt, ne metus vel dissidentia eos incessere videretur, neque tamen Hispamicam classem vorsus cursum flectebant, ne hostem lacecerent, atque ad prælium irritarent. Non minus tamen flagrans cupido Hispano minuebatur, quippe qui pugnandi desiderio ardens totam jam classem nostram animo invaserat. Itaque tumidis velis vento secundo in naveis nostras invehitur, machinisque explosis acri insultu prælium occepit. Fœderati, ubi intelligunt eo processum, uti armis se suaque vindicare necesse foret, necessario virtutem suam intendunt, atque, uti se dignum erat, prælium grave conserunt: quippe ingens animus, eo magis quod plura mari strenue patrassent, hostilem injuriam minus tolerabat. Et prospere res ex voto cessit, ingenti hostilis classis detimento. Prætoria namque navis post cruentam pugnam subito incendio conflagravit, cui dum galeo suppetias ferre nititur, iisdem ignibus ardens pessum ivit. Pleraq; aliæ (quatuor enim tantum evaserant) consumptæ, deletæ, seroque Hispani tumidi ante, & præferoces fortunas suas in extremo sitas perceperunt. Nostri ingenti præda classiariis partita Indico itineri rursum se accinxerunt.

## CAP. XLIII.

*ACERRIMVM PRÆLIVM GEORGII  
SPILBERGII CLASSIS INDICÆ PRÆ-  
FECTI, EVM CLASSE RODERICI  
MENDOZÆ, ANNO CLO C XV.*

**G**eorgius Spilbergius, qui septem probe instru-  
ctis navibus superiori anno ex Tessaliæ statione mari  
se dederat, superato freto Magellanico, australi Oceano  
anno clo c xv horibile cum Hispanica classe prælium  
victor maris, victor hostium gessit. Decimo & sexto Julii  
superata modica navi, cui cum imperio nautico præerat  
Joannes Baptista Gonsales, octo naves ingentis magnitu-  
dinis procul turgida vela mari ostentabant. Compertum  
ex captivis Hispanis, classem hanc exscindendæ nostræ à  
Rege Hispaniarum expeditam, & dubio procul fortunæ  
mari experiundæ periculum nobiscum facturam esse. Fue-  
rat quidem (ut postmodum retulere Hispani) ingens in-  
magno concilio Peruviano inter Proceres contentio, qui  
fluctuantes consiliis huc atque illuc impellebantur. Pleri-  
que enim eò abierant, in Caliovensi statione opperen-  
dos Batavos esse, erigendos undique vicino telluris tor-  
mentorum suggestus, sub quorum præsidio, ubi pugnan-  
di copia facta esset, se suaque sine periculo defensare, cer-  
tisque machinarum verberibus extrema Nostris intentare  
possent. Contra Rodericus Mendoza, qui Marchionem  
Monteclarium Proregem sanguine attingebat, juvenili ma-

A a

gis

gis ardore, quam militari virtute vel prudentia, obnitezatur,  
& cupidine cæcus ad pugnandum fatis ita volentibus rapie-  
batur. Meticulosi esse hostem opperiri, ubi primo impetu  
vincere possis. Duabus tantum suis navibus Angliam oc-  
cupari posse, quid humilem depresso classem, quæ præ  
magnitudine Hispanice imbellium gallinarum vel pullo-  
rum instar referrent? Hostem totiens victorem mari non-  
tam virtute, quam temeritate, quæ ubi primum impetum  
effudit, obtorpescit. Suis vires integras esse, illis præ longo  
itinere defectas collabascere, vel morbis afflictari: omnia  
mari vel tellure ab Hispanis cincta, ne quidem pulsis fugæ  
locum fore. Denique pavore consternatos nihil molituros,  
verum ultrò se dedituros. Atque hæc tanto molimine ani-  
mi impotens urgebat, ut certam sibi spondere victoriam  
videretur. Ita tumidâ ambitione cæcis pejus consilium in-  
senatu vicit. Atque adeo Prorex fastu distentus, nihil aliud,  
inquit, impero, quam ut perditissimos mortaleis, manibus  
pedibusq; ligatos, pulcherrimo spectaculo huc adducas. Eo-  
que incitatus Mendoza juramento morti se devoverat, nisi  
victor hostium navibus aliquot superatis domum revorte-  
retur, atque in eum finem consecratum panem assumpsit.  
Nimirum arrogantia calamitatem ut plurimum præcedit:  
atque id apprime in vitâ utile, ne homo supra humanæ  
superbiæ mensuram intumescat, alioquin spreti Dii im-  
mortales excandescunt, atque humana consilia ex alto de-  
spiciunt, castigantque. Decimo & septimo ejusdem men-  
sis utrinque classis oculos præstringebat. Hispanica ultra  
mille quingentos milites & classiarios vectabat, omni ap-  
paratu bellico instructissima. Extremum dici processerat,  
atque

atque adeo nox tenebricosa mari incumbebat, cum Propræfctus Petrus Alvaresius Pigarius, maritimè militiæ vetus, & consilio validus, cymbam ad Mendozam misit, monens ne incerta casuum maritimo nocturno prælio committeret, periculum anceps tenebris augeri. Sin aliter illi visum, nolle ut suæ culpæ imputaretur. Cæterum ille rigido hæc supercilio contemnens, circa horam decimā juxta prætoriam nostram progreditur, & postquam utrinq; Imperatores sermones conseruerunt, primo fistulis militaribus, dein majoribus machinis cælum & maria intonuere: incredibilem machinarum sonitum silentium noctis supra modum auxerat. Spilbergius continuis fistularum machinarumque iactibus, ita Prætoriam Hispamicam impetierat, uti divortere cuperet, sed sudo tranquilloque mari nequiret. Hinc & illinc machinarum ingens fragor exaudiri, tubarum tympanorum sonitu cœlo saloque quieto undique perstrepare, vulneratorum horribilis clamor & ejulatus late terrorē incutere. Vix evaserat Prætoria, cum alia navis veſtificando expeditior levi noxa præternavigavit. Tertia, quæ à Divo Francisco nomen acceperat, cui præerat Ludsonicus Albedinius, cum malacia maris vorsus Prætoriam nostram fluitaret, ita tormentis quassata, ut propinqua exitio videretur. Verum illa, quanquam vehementer lacera, elapsa, celoci nostræ, quæ opportuna injuriæ videbatur, se innectit: quanto autem densior hostis constiterat, tanto magis pubes nautica in prælium exarsit, ita ut pulsa, rimisque perforata navis tandem subsideret, atque ingruentibus fluctibus obriueretur. Hispani vel ferro cæsi, vel inglorie submersi pelago jaetabantur. Serius Prætoria Hisp-

nica suppetias ferebat, cæterum ubi lateri celocis & ipsa se applicuit, iniquum omnino à nostra parte certamen gliscerat: quanquam neq; illa desponderet animum, virtute, non viribus nisa. Præfectus noster iniquam illorum sortem conspicatus, cymbam armatis viris refertam subsidio miserat, imperans Propræfecto, ut idem factitaret. Cæterum cum proprius cymba adventaret, Nostri, qui celocem defendebant, hostilem rati, quanquam alta voce Auriaci nomen usurpasser pubes nautica, neque præ fragore tormentorum audiretur, majori machina everterunt. Præter unum omnes recepti vitam servarunt. Interea altera cymba propinquabat, quę tuborum ingruentibus missilibus celocem calamitati præsentī subduxit. Dum obtenta nocte tenebre densantur, navigia duo Nostratium, queis Æoli & Luciferi nomina erant, latitabant, neque tranquillo mari nostris se jungere copiis potuerant. Quæ à vicariâ Hispaniensi, cæterisque promiscue navibus impetita, non vanus metus incessebat. Ubi dies primum illuxerat, Prætoria, etsi à Nostris admodum fatigata, cui nondum animus neque consilia conciderant, ingenti insultu cum iis manus conserendi periculum fecit, sed perrupit violentiam virtus & audacia Batavorum. Vento postmodum increbescente, quinque hostium navigia cymbis ad Mendozam missis (uti postmodum ex captivis compertum) indicaverant, ita præcedenti nocte laceratas compages, uti animo viribusque fracti iterum præliandi copiam detrectarent. Spilbergius cum vicario, dum flaccescere Hispanorum animos vident, virtute confisi, territis insistere, atque omne fugę præsidium præcludere, consultum judicabant, & simul magno impetu in

Præto-

Prætoriam vicariamque Hispamicam ferebantur. Illę pavore  
attonitę, atque, uti in subitis fieri solet, consiliis fluctuan-  
tes in fugā salutem quærebant. Cæterum Proprætoriam,  
quod pigro motu per æquor incederet, ne in manus no-  
stras veniret, modicis velis Mendoza opperiebatur. Acre  
hinc oritur inter Prætorias Vicariasque utrinque prælium.  
Quis cum tertia nostra, Æolus nomine, accessit, tumido  
ore ingentes globos jaculando, ferventem supra modum  
mari movit bellicam tempestatem. Fumi nebulę ingentes  
ipsum diem obduxerant, intermicantibus veluti fulmini-  
bus tonantium machinarum sonitu latè cuncta persona-  
bant. Accessit & fortuna, quippe utraque Hispanica sibi  
invicem impacta, cingendi illas, & undique certis machi-  
narum ictibus quassandi facultatem dedit. Hinc magna  
hostes incessit consternatio, neque pugnandi iis erat ani-  
mus, neque pugnam detrectare poterant, adeo ut Hispani  
ex vicaria, quę exitio propinqua erat, & rimis fatiscens  
plurimum aquarum hauriebat, in Prætoriam insilierint, cui  
ex trecentis & quod excurrit hominibus vix quinquaginta  
supererant, qui que, ut postmodum intellectum, confertum  
agmen in prora densaverant, ne paucitas illorum percipe-  
retur. Jamque adeò ponere arma, & innoxiam ditionem  
facere, unum erat afflictis remedium. Vexillo itaque can-  
dido erecto pacem postulare videbantur, verum homines  
nobiles, equestris dignitatis, qui crebri huic expeditioni  
se dederant, iterum eodem ablato prælium mortemq; glo-  
riosam præoptabant. Itaque qui ex vicaria in Prætoriam  
præcipites se miserant, iterum in suam insilientes navem  
funestum prælium iterant. Fit via vi, telis, cadaveirbusque

cuncta cooperiebantur , reliqua prælii casu non consilio regebantur. Vicaria nostra fluctibus jactata inter medios hostes agitabatur , & undique machinis impetita extrema expectabat . Et prætorianus hostium miles tabulata illius jam transfilierat , & victor per ora virum volitabat , quem modicis machinis , telis , hastisque ita excepit nostra juventus , ut plerique asperrimo loco cœsi procumberent . Interea horrendus fragor tormentorum undique intonuerat , adeò uti duę principes hostium naves retro cedere cogerentur , ita compagibus solutę , ut vix fluctibus attollerentur . Spilbergius Mendozam usque ad serum diei insectatus , qui , ubi nox infausta tenebris cuncta tegeret , oculis ereptus , nunquam amplius apparuit . Ruptis tabulatis quas immodicas haurientem , onere pressam subsedisse , postmodum nuntiatum fuit . Eadem sors navigio , Marię nomine , obtigit , ut paulatim fatiscens fundum peteret . Præfectus cum Æolo navi vicariam Hispamicam fugientem insecutus , ita machinis continuo pressit , ut confestim pelago obducenda quoq; videretur . Alvaresius Pigarrius , qui secundam in classem obtinebat potestatem , vexillo candido erecto , se suaque omnia dediturum promisit , modo vite parceretur . Cymbis nostris armato milite refertis postulatum , ut ipse Præfectus se arbitrio victoris permitteret , atque navi nostra in ditionem acciperetur .. Quam conditio nem ægerrime tandem haetenus accepit , ut aliquis centurionum , qui præsto erant , obses linqueretur . Quod cum jure negaretur , diu cunctatus , multa secum animo volvens divorsus agitabatur , ad postremum ita sermonem instituit , se non discessurum , nisi ipse Præfectus præsens illum

lum abduceret. Alioquin se mortem honestam servili capti-  
vitati præferre, quam nemo generosus æquo animo tole-  
ravit. Non ita sibi ab ignavia & socordia corruptum ani-  
mum, ut non & mortem contemnere possit. Omnes ho-  
mines mortalitatis conditionem à summo Imperatore ac-  
cepisse, serius ocyus quis ex hac vita decedat, parum re-  
ferre. Hoc esse cordati hominis, super humana omnia  
se extollere, & ex quacunque conditione supra fortunam  
surgere, terroresque mortalium sub jugum mittere. His si-  
milibusque verbis, ambitiose insistebat, quanquam moni-  
tus à nostris singulis horis compagibus solutis navem extre-  
ma minari, & pluribus in locis laxatam jam mari cedere.  
Dum hæc ita transiguntur, unus sociorum aplustri adempto  
citato gressu, mobilibus & fluitantibus artubus, hosti victorię  
confessionem extorsit. Ita nostri cum cymba reversi, præter  
duodecim viros, qui spe potiundę prædę in dehiscentem  
jam navem insilierant, vitæque prodigi communi se ex-  
posuerant periculo. Interea cuncti admodum summa ope  
sentinam trahere, succurrere, quantum poterant, ingenti-  
bus foraminibus fatiscenti navigio, cæterum ubi nulla sa-  
lutis spes affulsit, luminibus facibusque accensis horribi-  
lem clamorem edere, denique subsidente navi aquisque  
obruta submersi pessumire, alii catervatim in fluctus des-  
sire, & frustra mari magno natando aquas pulsare, & obni-  
tendo lassatis manibus aquis succumbere: septuaginta circi-  
ter tabulatis laceris, malisq; hærentes fluitabant, ex quibus  
postridie pauci à nostris recepti (inter quos nauarchus cum  
centurione) reliqui injuriæ maris relictæ, frustra opem im-  
plorantibus Hispanis. Ipse Imperator Alvaresius acri in-  
genio,

genio, consiliis senilibus pollens, prudentia juxta atque arinis clarus, patiens laborum, firmissimus contra pericula, fortis magis quam temerarius, qui que inconsulto ardori juvenili Mendozæ multum aduersatus fuerat, denique mortis contemptor, ne ab hostibus vinceretur, aquis obrutus victusque fuit. Hac victoria insulanî, in primis cum ad oppidum Limam naves nostræ proprius accederent, insolito metu trepidare, armati per littus discurrere, prorsus intenti nihil nostris noxium omittere, machinas undique in primis ex vicina tellure, quarum una triginta pondo ferro jaculabatur, excutere, ingens ubique periculum facessere, ita uti Præfecto nostro visum fuerit ad milliare unum vel alterum mare eligere, ne ulterior expeditio irrita foret.

## C A P U T U X L I V.

*MELCHIORIS KERCHOVII PRÆFECTI CLASSIS BATAVICÆ CVM HISPANIS  
PRÆLIVM NAVALE, ANNO  
C I O I O C X V I I I.*

**D**UM inter Neapolitanos suppetiis Hispanicis & Venetos mari Adriatico simultatum gliscunt incendia, consultum videbatur Patribus sub Præfecto classis Melchiore Kerchovio Fœderatis exercitatum militem subsidio mittere, ne libera Respublica, quę ab Attilæ turbulentis motibus, ipsis maris æstuariis erecto imperio, invicta stetit, aliquid detrimenti caperet. Inter Tarifam & Gibraltaram vigesimo & quarto Junii octo Hispanicę naves cum ingenti galeo-

galeone occurrant, queis impedire suppetias, classem fundere, præsidium militum pulsare, consilium steterat. Ita necessitas pugnandi, quæ prima sæpe virtutis esse occasio solet, nauticę & militari juventuti incubuit, quę præliis pluribus virtute & robore edurata, ipsis admodum lætabatur periculis; sicuti enim arbores, quas frequens tempestas incurvavit, duriores evadunt, ita ipsa virtus assiduitate periculorum constringitur, radicesque in ipsis cordis penetralibus altius figit. Ubi ad pugnam ventum, audax iis & minax vultus, animus contumeliarum impatiens, concitum corpus, manus inquietę & vulneribus intentandis certę, denique post multum sanguinis effusum victoriæ compotes evadunt. Fusi fugatique Hispani, quadringenti cæsi, ex Nostris quinquaginta circiter ceciderunt. Pauci vulnerati, qui audacter cruro inimicorum imbuti suum quoque sanguinem spectabant, & mutuis mortibus vulneribusque satiabantur.

## CAPUT XLV.

*PRAELIVM CLASSIS BATAVICÆ  
CVM HISPANICA IVNCTÆ CONTRA TVRCAS  
PRÆDONES, SVB PRÆFECTVRÆ HAVTAI-  
NII, ET LAMBERTI PVLCHRI VI-  
CARII, ANNO CL<sup>o</sup> I<sup>o</sup> C X V I I I.*

**P**RÆDONES Turcici ubiq; mare, in primis internum, infestabant, & quanquam omnibus modis prædam traherent, præ nimia avaritia cupidinem insatiabilem vincere nequibant. Itaque mari pollentes sine modo mode-

B b

stiaque

stiaque naveis omnes invadere, vastare omnia, nihil pensi  
sanctique habere. Hinc prolixę mercatorum, quorum  
opibus sustentatur Respublica, querelę, cum non in bona  
tantum, verum in ipsa corpora, libertate adempta, imma-  
nis sæviret prædonum crudelitas, nisi religionem ejura-  
rent. Inventi tamen homines, quos cælum ambit, sceleratissimi,  
contemptores supremi numinis, quibus fides, probitas,  
& religio ludibrio habebatur, qui crudeliores in Chri-  
stianos hostes erant, quam ipsi Turcæ, & sanguine popu-  
larium suorum non satiabantur, ac frontibus advorsis (pa-  
rentum enim liberorumque sæpe contraria erant sacra-  
menta) cum propinquis dimicabant. Quos ego morta-  
leis, qui Deo ipsi patriæque infestas manus inferebant, ex  
finibus humanæ naturæ exterminandos jure existimo. Pro-  
ceres itaque, qui maritimo Fœderatorum collegio præerant,  
expeditâ classe sub Præfectura Hautainii, Lambertique Pul-  
chri, qui vicariam potestatem obtinebat, sicut & ante  
factum, (in primis anno hujus sæculi x i v, incensis quatuor  
navibus, Mamoram superaverant) ita nunc de integro ma-  
ria purgare decreverunt. Qui junctis cum Hispano copiis  
mari mediterraneo ingenti prælio classem Africanam tri-  
ginta sex navium, probe instructam, virisque armatis re-  
fertam, consumperunt, fugarunt, Christianos servituti  
exemerunt. Qua clade commoti prædones, qui Tuneti, &  
Algieræ stationes insederant, diu latebris suis se occultare  
cogebantur, qui magis socordia, atq; ignavia nostra, quam  
virtute suâ victorias cumulaverant. Quę fœlicitas, cui nulla  
ratio suberat, non potuit esse diuturna, cæterum ad ultimum  
temeritati non suffecit.

C A P.

## C A P. XLVI.

*PRÆLIVM HERMANNI CLEUTERI  
CVM DUABUS HOSTILIBVS NAVIBVS  
ANNO CLXII MENSE AVGUSTO: EIVS-  
DEM CVM IOANNE MICHAELIS ACER-  
RIMVM CERTAMEN, EODEM AN-  
NO, MENSE OCTOBRI.*

**F**INITIS induciis, quæ motibus civilibus exarserant, bellum externum firmam iterum concordiam peperit, atque summo horrore terræ marique contra hostem incubuit. Prima maris tempestas contra duas naveis hostiles, quæ concubia nocte Ostendâ solverant, mari inhorruit. Signo dato à centurione Jacobo Vinckio, qui juxta Geulam excubias agebat, Præfектus Hermannus Cleuterus anchorariis funibus sectis, Ostendam & Blanckenbergam inter hostibus exeundi copiam præpediebat. Quibus, cum neque manus conserendi, neque perfringendi facultas, animusque esset, cursus iterare relictos consilium stetit. Cæterum cum & illic lunata acie classis nostræ obsiderentur, gravis illos pugnandi necessitas pressit, fatigavit. Nonnullæ quidem naveis (Fregattas vocant) milite stipatæ ex urbe suppetias ferre laborantibus extremo periculo nitebantur, cæterum compluribus cæsis sauciisq; recipere se cogebantur. Et mox vitandæ calamitati binæ bellicæ, de quibus modo memoravi, præcipites in vicina litora agebantur. A mediâ nocte hora secunda usque ad meridianam tertiam duro certamine mare inhorruit, fulmineisque machinarum ignibus unde

exarserant. Hostis ultra centum & sexaginta quatuor cæsos, octuaginta vulneratos numerabat, quatuor tantum à nostra parte ceciderant, paucis sauciatis. Et hæc quidem minora commemorasse sufficiat, ingens enim Cleuteri animus majora volvebat, & inquies gloriæ stimulis supra modum agitabatur. Gravior mense Octobri maritima procella hostilem classem, cui summo imperio præerat Ioannes Michaëlis, exagitavit, qui noctis præsidio fatus ostendâ tribus navigiis bellicis mari se commiserat. Singula ducentis armatis viris stipata, quibus Nostra virtus formidolosa erat, non pugnandi desiderio, sed elabendi studio ex opportunitate nocturnas tenebras elegerant. Signo dato à Ioanne Volcardo, qui juxta excubias agebat, hostem adventare; Propræfectus Hermannus Kleuterus militiæ impiger, etsi nocturna maritima prælia in incerto sint, virtutem intendere, aleam prælii tentare, & magno insultu Prætorię Duinkerkanę se innectere, contra hostis acerrime niti, prorsus ab utrisque nihil reliquum fieri. Illa continuis tormentorum ictibus fatigata, expedire se amplius nequibat. Cæterum Cleuteri navis latere proræ ingenti foramine perforato, cum imperiosum æquor nullo molimine excludi posset, rebus afflictis extrema expectabat. Plerique ex sociis navalibus, uti præsenti periculo se subducerent, in cymbam insultabant. Præfectus cum iis, quibus imperandi inferior sors obtigerat, paucisque navalibus, etsi fluctibus navis deprimeretur, ignibus suis super aquas attollebatur, & tam diu cum hostibus dimicavit, donec imminentे naufragio, ita, ut fors tulerat, frætis tabulis irato mari unusquisque se committeret. Cleuterus

terus cum paucis aliis per integrum horam profundo jactatus , tenui ligno fluitans, præsentि ubique mortis imagine, ope divina incolumis à suis receptus est. Ex sociis navalibus cum Optione ultra quadraginta morte gloria aquis obruti sunt. Præfectus hostilis tanto periculo exemptus in graviorem Fortunam incidit. Namque ita à Præfecto Lambertō Pulchro , reliquisque nostris navibus exceptus est, ut, cum amplius sibi consulere nequiret , pulvere pyrio incenso navem in sublime egerit , ita ut horrendo mugitu cuncta contremiserent , miseroque fato omnes occumberent. Cæterę naves hostiles Angliam Galliamque vorsus actę , à Nostris obseßę , fugiente intellurem pube nautica, pessum ierunt. Captivi , tanquam prædones Oceani , gula fracta Roterodami & Enchusę patibulo affxi. Cleuterus à Proceribus , quibus cura maris incumbit , aurea torque decoratus , classiariis , qui tanti periculi virtutisque confortes fuerant, præmia partita.

## C A P. XLVII.

*PRÆLIVM ACRE PROPE GADES,  
INTER HISPANICAM CLASSEM ET NOSTRAM,  
CVI PRÆERAT SVMMO CVM IMPERIO  
IOACHIMVS HENRICI SWARTE-  
HONTIVS, ANNO c̄c̄ Ic̄ cxxii.*

**R**Ex Hispaniarum , cum non ignoraret , quantum negotii contra Batavos sustineret , qui commerciorum flagranti cupidine concitati maria constraverant, acer-

rime adnitebatur, uti suis, id est maritimis artibus potestatem illorum frangeret, itaque turbandis commerciis in Freto Gaditano classem, quę viginti quatuor navibus constabat, expediverat. Cæterum iis vim majorem intentare, quibus suo veluti elemento vincere consuetudo erat, quique naturam horridi & efferati maris, cui innutriti, obnoxiam habebant, longe opinione asperius erat. Namque Fœderati Proceres ex bellicis & mercatoriis navibus impediendo huic molimini classem coegerant, qua impetum hostilem antevortere in proprio solo consilium erat. Namque prior insultus animis suorum fiduciam parit, & victoriā promittere videtur, contra hostibus terrorem incutit. Classi nostrę cum suinmo imperio præerat loachimus Henrici Swartehontius, qui omnem ætatem terra mafique in militaribus artibus egerat, multis maritimis præliis, quibus interfuerat, laboribus & periculis suis gloriam ingentem quæsiverat, vitam atque mortem juxta æstimaverat. Deductis mari interno onerariis navibus, confestim, (namque periculum in morâ erat) expansis velis quinque bellicis & compluribus mercatoriis naviis columnas Herculis petit, uti Herculeum aliquod & memorabile facinus tentaret. In primis, ubi ad Gades perventum, Heemskerckiana victoria glorię flamas incitabat, quietisque impatientem in transvorsa rapiebat, sicuti Themistoclem trophya Miltiadis excitabant. Iuxta promontorium, quod Molle vocant, sibi invicem utręque classes occursant. Cæterum hostes non tam sanguinis, quam opum cupidine flagrantes, mercatoriis magis navibus imminere videbantur. Cum enim majoribus tormentis ulterius Nostris globos

bos jacularentur, confertasque naveis certis i<sup>c</sup>tibus quassarent, ipsi extra principia nullo suorum incommodo Fœderatos despectabant. Verum Præfctus noster, ipse & imperator & socius periculi, lanceam manu vibrans, corpore inquietus, oculisque ardens, paucis suos hortatus, postquam omnium animos arrestos videt, plenis velis ingenti impetu hostem adoriri tentabat, cæterum advorso vento obniti, propriusque accedere nequibat. Tormentorum utrinque missilibus armamenta pertusis velis admodum quassabantur. Lacerato Prætorię Neapolitanę sanguineo vexillo, s<sup>i</sup>parioque rupto, Nostri superioribus velis, minorique ad proram dimissis, hostem opperiebantur. Neapolitana, quod velis mutilis commode pro lubidine vento uti nequiret, paulatim invita vorsus nostram Prætoriam fluitabat. Quam occasionem nactus Imperator Noster, Præfecto tormentorum edixit, ne prius machinas vibraret, antequam propinqua certis impeti posset verberibus. Interea hostis ducentis & quinquaginta tubis militaribus in Nostros missilium procellam effudit. Verum ubi proprius accessum, Batavi ad omnem audaciam furoremque militarem prorumpere, graviores machinas certis i<sup>c</sup>tibus excutere, adeò ut Neapolitana navis miserum in modum perforaretur, morientium vulnerorumque clamor horribilis exaudiretur, hostis fugè proximus cum sex septemve naviis septentrionem vorsus deflesteret. Dehinc Noctiluca Hispanica proprius fluitans, ab Imperatore cæterisque centurionibus, in primis Alterassio, qui inter fistularum glandes ferali globo percussus, animam Patrię Deoque immortali imperterritus devovit, ita excepta, ut infecta sanguine, polluta ca-

daveri-

daveribus, & fatiscens in latus inclinaret, atque imperioso  
 æquori cedere videretur, denique inter hosteis precariam  
 veluti animam traheret. Neapolitana interea, cum aliis  
 navibus cursu iterum versus austrum flexo, inserere se ite-  
 rum nostræ classi tentabat, innexaque uni mercatoriæ, cui  
 præterat Iacobus Salius, ab eadem duodecim à latere tormen-  
 tis tam graviter pressa, ut vela vorteret, & hinc undique  
 iterum à Nostris impetita, uti responsare machinis nequi-  
 ret. Pleraque quoque alię naveis lacere, quassę, expedire  
 se amplius, ordinemque suum obtinere non poterant. In-  
 ter centurionem Liefhebberum, qui superiori vento ute-  
 batur, & duas Hispanicas certamen quoque ortum, sed ille  
 tenebrarum præsidio evasere, & nisi iniqua fortunæ no-  
 stræ nox adventasset, omnes ad internacionem deletæ fuissent.  
 Ita postridie, cum tenebris tectæ quam occultissimè  
 evassissent, exemptæ conspectui nostro fœdâ fuga vix por-  
 tum receperunt. Ex Nostris quatuordecim tantum occu-  
 buerunt, neque ultra quindecim sauciati, præ cæteris na-  
 vibus in primis Prætoria cunctis velis laceratis, triginta jux-  
 ta aquas foraminibus hiscens ægre ferventibus operis fa-  
 brilibus restituta fuit.

## C A P U T X L V I I I .

*CENTVRIONIS IACOBI STENBA-*  
*CHII PRÆLIVM CVM HISPANICA*  
*CLASSE, ANNO cIɔ Iɔ cXXIII.*

**I**MPERIO Præfecti Swartehontii, Jacobus Stenbachius  
 Imperterritus centurio complures onerarias naves Ge-  
 nuam,

nuam, Liburnumque deduxerat, atque iterum cum quatuor mercatoriis in altum profectus circa Gibraltaram cum hostili classe acre certamen conseruit. Propræfectus Ioannes Fachardus, virtute nobilis, in quinque naveis summum imperium obtinebat : quarum princeps quadraginta octo æneis machinis, quingentis militibus stipata, horrorem mari incusserat, treis galeones triginta sex æneis tormentis, una Gallica viginti duobus, militum complures centurias vectabant. Quibus unâ bellicâ, & quatuor onerariis navibus, resistere difficultimum factu videbatur. Cæterum ubi ad prælium ventum, generoso pectore in immensum fortitudo crevit. Martius undique tumultus, & machinarum sonitus mentes conciverat, ingenti spiritu pectus concutiebatur, & præ ulciscendi cupidine totum corpus affluabat, horridus clamor & furiosa vocis eruptio colla distenderat, manus & pedes inquieti, atque ad perniciem intentandam hostibus celeres. Inter Prætoriam dein hostilem, & nostram bellicam acerrime, si unquam, dimicatum fuit. Cum enim hostis proprius adventasset, verberibusque machinarum nonnullos ex sociis è medio sustulisset, Nostri undique supra & infra tormentis explosis ita Prætoriam dedolarunt, ut ingenti foramine ad proram compages laxarentur. Ita invicem lateribus junctis ferociter per integrum horam pugnatum fuit, donec vento mutato (ante enim caurus, tunc euronotus surgens vela impleverat) prætoria hostilis fluitans puppim prorę nostrę infereret. Tum demum juventus nautica non votis tantum, vel suppliciis muliebribus auxilia cælitum implorare, sed laborando, enitendo, effervescente circa cor sanguine, omnem

operam intendere. Ipse labos & periculum generosos animos nutriebat. Sex æneis machinis hostilis porticus una coöperta (duæ enim erant) dissiluit, ruptisque obicibus late stragem edidit. Miles huc atque illuc circumcursare, neque volitantibus asseribus ulli loco satis fidere, pavore attoniti nihil pensi consultique habere. Non emicabant tantum densis undique machinis horrenda Martis fulmina, terribilique squalore horridæ fumi tempestates diem occultaverant, cæterum & nauarchi cubile ignibus ardens horrem auxerat. Interea Fachardus, minorisque sortis Præfecti, quibus indignatione concitum pectus æstuabat, milites strictis gladiis ad puppim cogere, & nisi pugnare cuperent, mortem minari. Cæterum nullę res bene procedunt, ubi degeneri trepidatione artus intremuere, turbata omnia & confusa, metu contunditur animus, & festinando, agendo, nihil agit. Atque adeo Stenbachius ita rursum tormenta contra hostem torsit, uti cadavera, sanguinemque horribili spectaculo diu mare volveret, ingentique clamore, mixtoque ejulatu cuncta personarent. Fugientem per medium horę insecuto nostro Præfecto, tenebrę noctis ingruentes texerunt, certoque eripuerunt exitio. Eadem sors cæterarum navium, quæ valde quassatę ægre se receperunt. Stenbachius, cum Fretum Gaditanum septendecim aliis navibus insideretur, Africam versus vela intendit, atque Algierę (Fœdus enim cum Bassa ictum erat) naveis reparari curavit.

## C A P. X L I X.

*DE ILLVSTRI EXPEDITIONE SVB  
PRÆFECTO JACOBO WILLEKENO,  
ET VICARIO PETRO HEINIO,  
ANNO C I O C XXIII ET XXIV.*

SOCIETATE Indiæ occidentalis edicto Procerum stabilita, intima perrumpere novi orbis penetralia Directoribus visum fuit. Magnis facinoribus prima initia constant, & prima fama in mentibus mortalium validissima esse solet. Jacobo Willekeno Præfecto militiæ maritimè veteri illa Provincia mandatur, uti instructissima classe viginti sex navium fortunam experiretur. Militaribus copiis præerat Tribunus Ioannes Dorthius militiæ expertus, consiliorumque sagax. Classis illa partim anno millesimo sexcentesimo vigesimo tertio mense Decembri, partim sequenti Januario vela ventis dederat. Secunda navigatione Promontorium viride, insulasque, quæ veterum Gorgones sive Hesperides esse creduntur, quæque à Ludovico Cadamusto anno c I O C C C C x L , decem numero inventæ sunt, Imperator obtinuerat, ibique juxta insulam S. Vincentii opperiundis cæteris commorabatur. Sola navis, cui Hollandiæ insigne erat, qua Tribunus Dorthius vectabatur, ventorum fluctuumque impetu usque ad Serram Lionam abrepta, quæ à Promontorio ultra centum leucas, Oliviera teste, dissipata est, classi non nisi expeditione consummata juncta fuit. Interea dum cæteros opperitur

Imperator, nauticam & militarem pubem ignavia & sordia torpescere non permisit, continuis exercitiis militareis animos fatigare, atque uti otii adjumenta tollerentur, cymbarum partes, quas nondum compaginatas secum sumpserat, adaptare, corbes munitorios omni opera nectere, denique quicquid usui militari excogitari poterat, præparare jussit. Dein cum cæteræ omnes naves fœliciter eodem jam diu appulissent, Imperator frustra tribunitia navi expectata varius agitabatur, an itineri se daret, an longiorum moram institueret, tandem è re esse judicavit, ne agendi tempus transmitteretur, & prolatando tempus bona occasio perderetur, vela totius classis intendere. Simul literas arcanaς Concilio secreto militari aperit, quis ex mandato undeviginti virūm continebatur, uti civitatem S. Salvatoris adoriri, atque expugnare omnibus viribus niterentur. Cuncti admodum Præfecti militares patrando tanto facinori sacramento se invicem adegere, & quæ expeditioni conficiundæ necessaria consiliis junctis constituerunt. Neque enim res tam ardua & difficilis sola virtute militari, verum & prudentiæ ingeniique viribus potissimum sustentari poterat. Ad quartum demum Maji Brasiliæ ora in conspectum venit, adversoque vento, namque status, quod insolens illis regionibus, non flabat, & malacia distenti, octavo demum ejusdem mensis die ad ostium sinus Sanctorum anchoras jecerunt. Imperator negotio tam arduo intentus, quique præclarri facinoris famam quærebat, communis Præfectorum consilio ita constituit, divisis copiis terra marique hostem adoriri. Quatuor nauigiis unique cœloci militem imponere, & cymbis septem juxta munimentum

tum S. Antonii syrti arenaceę committere , atque ita urbem invadere , reliquis navibus intima sinus penetrare , hostem utrinque fatigare , omnium sederat sententia. Neque vero talibus viris ullus labos insolitus , sed utrinque gloriæ maximum certamen erat. Eodem enim tempore medio diei miles syrtim arenaceam ascendit , & pubes nautica in ipso si nu urbi terrorem injecit . Adventante classe ex valido munimento Tapesipe , & castello S. Philippi , in primis ex arce valida , quæ rupi imposita , quisque circumflua urbi imminebat , tam horrenda & feralis tempestas ingruit , uti tormentis undique sævientibus , densissimæ fumi tenebrę , perpetuus ignium intermicantium splendor , machinarum non secus atque tonitruum continens mugitus , globorum violenti turbines , confundere elementa ; & cælum ipsum terræ miscere videretur ; denique ad terrorem extremę calamitatis cuncta composita essent. Verum nostris , qui vitam ac mortem juxta æstimabant , nullus locus asper & inaccessus , atque extrema pericula virtus imperterrita domuerat. Petrus Heinius classis vicarius , virtutis nobile exemplum , intra ictum sclopetorum junctis navigiis , Geldria , Groninga , & Nassavia , contra suggestum tormentorum , propinquasque naveis Lusitanas quindecim numero , incredibile facinus patrare properabat. Neque hostis , ubi ferox prælium sævire ac miscere omnia cepit , quicquam pensi atque moderati habuit . Usque ad septimam horam vespertinam atrociter pugnatum , quisque labores , pericula , ipsam mortem facile tolerare , prorsus in vultu facieque ingens vincendi cupido flagrabat. Cæterum Propræfектus , ubi nequicquam densis tormentorum

ictibus rem agi prospicit, & navigium, Groninga nomine, ita dedolatū esset, uti defensioni impar velut impotens huc atq; illuc fluctuaret ( præter cæteros enim, qui in itinere perierant, vel cum morbo conflictabantur, quinquaginta tantum sani supererant ) è re judicavit, treis cymbas viginti sociis navalibus implere, uti incredibili audacia in naves hostiles insilirent, victoriamque extorquerent. Qui tanquam effusa tempestate cum præcipites in hostes agerentur, tanta subito illos incessit consternatio, ut relictis navibus fugę se darent, maximę omnium igneis immitterent, queis & aliax tres exarsere: octo alię victoribus cesserunt. Imperator insistendum occasione ratus vicario mandat, ut quatuordecim cymbis viginti itidem sociis navalibus instruetis, quos multis & magnis tempestatibus fortissimos esse noverat, in lapideum ex topho candido tormentorum suggestum, quem rupi impositum urbi imminere diximus, ex quo ingens damnum navibus nostris infligebatur, eniti tentaret. Petra erat inaccessa, lævis, novem pedes ex aquis alta, expugnatū difficultima, insederant eam sexcenti milites. Hic, inquit Heinius, socii & fratres, virtutis vestræ scopolus, huc vos expeditos juvenes exercitatę pernicitatis transilire oportet. Invenietis viam virtute & fortitudine vestra. Nihil tam arduum natura constituit, quo non asurgat sublimis generositas. Experiundo & laborando, que cæteri desperant, perficiuntur. Dixerat, simulque cum eo socii imperterritō animo contra majorum minorumque globorum densos turbines tanta pertinacia & perniciitate iverunt, uti, humeris invicem nixi, perticisque nauticis sublevati, incredibile dictu, inaccessum locum superarent.

Atto-

Attoniti illi, qui infederant, turbatique, fugiendo festinare, neque nostrorum insultum expectare, per aquas plurimis interfectis in urbem contendere. Post cubicinem primus Petrus Heinius murum ascendere, hostem ferire, ferrum vibrare, adversus omnes difficultates luctari, quis accensa nautica pubes, animosa gens & casibus infracta, se post Præfectum transiliisse veluti indignabatur. Cæterum quia interius nullâ loricâ petra illa munita erat, continuis fistularum globis Nostri impetebantur, quamquam duobus illic tormentis positis, nudum quoque hostium latus gravi damno quassaretur, summusque terror consternatis pavore incuteretur, tenebris tamen appetentibus recipere se Præfectus consultum censuit, in primis quia pugnando juventus lassata, neque pulveris pyri copia suppeditebat: tormenta hostilia perforata, ne usui postmodum forent. Postridie, refectis somno viribus, classiarii iterum urbi incumbebant, verum comperto Nostros, qui terrâ fortunam experti fuerant, urbe potitos, cuncta munimenta deserta, nisi quod primâ luce in Tagasipe aliquotiens tormenta excussa forent, quam celerrime iis se Vicarius junxit. Terrestris namque miles, quæ pridie per syrtim arenaceam se terræ commiserat, angusto tramite, ubi facile ab hoste sisti potuerat, primo excubias, dein urbem tentaverat. Oppidani quidem primo impetu graviter nostros sauciabant, adeò quidem ut Allardus Scoutenus, qui pro tribuno militari Dorthio absente imperabat, disiectum jam militem suâ autoritate sisteret. Noctis tenebræ prælium hoc non incruentum diremerunt. Verum caligine hostilis terror geminatus, tantaque repente concitam civitatem consternatio

inva-

invasit, ut sibi suisque diffiderent. Suo quisque metu pericula metiri, cunctari, atque iterum festinare, inconsulte omnia agere, vacuam denique civitatem opesque per summam vecordiam relinquere, maximoque tumultu vicinis sylvis nemorumque secretis se abdere. Inter primos Marcus Teixera Episcopus cum sexcentis se subduxit. Ceterum Praefectus urbi Didacus Mendoza de Furtado, ne tam fœdæ fugę persidiæque, ut loquebatur, consors esset, cum filio familiaque in urbe extrema expectavit. Miles noster natura ferox, manu promptus, prædæ avidus, quiique in celeritate omne momentum ponebat, crepera luce levioribus tormentis frangere portę obices in animum induxit suum, verum Lusitani indicio, qui candidum pacis velum extra muros ostentans desertam urbem monebat, insidias primo metuens, apertis portis, compositis ordinibus urbem ingressus, nihil hostile reperiens in opulentissima civitate prædæ effreni licentiæ se dedit, fana atque domos mercatorum spoliare, argenti pretiosarumque mercium immensam vim trahere, atq; pari luxu prodigere, disciplinæ omnis exorteis insolitis lubidinibus se mancipare, tam improbam aleam exercere, ut non numerarent, sed metirentur argentum. Et quanquam post tantam licentiam Imperator classis modum imponere tentaret, nihil tamen pensi habitū. Sericę aliæq; pretiosę merces, quę occultari ab effrenato milite nequibant, in plateis pedibus calcabantur: quæ postmodum composita in Iesuitarum collegium delata sunt. In urbe vicinisq; munimentis tormenta ærea viginti & tria, ferrea viginti & sex reperta. Interea oceano vagus Tribunus Dorthius, frustra quæsitâ classe, ostium Bahiæ penetrauit,

vit, urbem captam, cui destinatus fuerat Gubernator, compertit, nihil prius agendum rarus, quam ut autoritate sua disciplinam militarem restitueret, effrenem juventutem coerceret, quæ luxu perdita præceps lubidinibus suis morem gerebat. Erat tribunus prælio strenuus, & autoritate severus, qui ubi licentia militum maximis se circumveniri difficultibus vidi, rigida edicta proposuit, sine quis perdita pubes in ordinem redigi nequibat. Et jam immutata rerum facies erat, cum tribunus ad decimum & septimum diem Maji stipatus quinquaginta sclopetariis nō procul ab urbe à Brasiliensis, qui tesquis & saltuosis in locis se occultaverant, ex improviso telis confossus occubuit. Corpus sectum, projectum, caput amputatum, ludibrioque habitum; cæterum Æthiopes, qui nostrarum partium erant, pulsis Brasiliensis corpus in urbē retulerunt, cæterisque, quos eadem fors manebat, subsidio fuerunt. Ingens detrimen-  
tum in tanti viri funesto obitu Resp. cepit, rebus adhuc in civitate fluctuantibus. Namque & peritia militari & au-  
toritate pollebat, consiliorumque prudentiam cum invi-  
câ fortitudine junxerat, multi laboris & solertię, &, quod difficillimum esse solet, illibata autoritate summe apud militem gratiæ & favoris, cuius morte cuncta postmodum licentiâ negligentiaque pessum iere. Magnum alioqui momentum societati in hâc victoria fuit, quippe capta fuit urbs nobilis, Præfecturę Brasilię metropolis, commerciorum, divitarumque horreum, aqua tenus inaccessa, edito enim colle posita (construxerat illam Thomas Zouza gubernator) centum ulnis majoribus, quantum inter exten-  
sas manus continetur, ardua, vepretis & tesquis invia: ex

qua navigatio in Orientem, (insula enim S. Helenæ tribus tantum gradibus distat) & Peruviana impediri poterat. Quæ uti gloriose victa, ita fœde perdita, opprobrium nostris fuit. Quippe uti in occupanda urbe majores fuerunt, quam viri, ita in tutandâ minores, quam fœminæ. Et qui ante vitam atque mortem juxta æstimaverant, victi fœdis voluptatibus, fractis socordia & luxu Imperatorum & militum animis, urbem nobilissimam perfida ditione Francisco Toletano, classis Hispаниæ Præfecto, tradidere, antequam ferme ad arma ventum esset: & quanquam suspectias in propinquuo esse non ignorarent (ad octavum enim Decembris nuntium acceperant) scelera sceleribus auxerunt. Ita cassa classis nostræ potentissimæ fuit expeditio, quæ octodecim majoribus navigiis, & septem liburnicis constabat, quæque classiarios mille sexcentos nonaginta, mille trecentos quinquaginta milites vectabat. Et quanquam aduersa tempestate jaçtata serius adventaverit, nullum tamen grave periculum eos urgebat, uti mortis metu nutantes, sicuti Toletano lubuerat, conditiones acciperent.

## C A P U T L.

*EXPEDITIO NAVALIS SVB PRAE-  
FECTO JACOBO HEREMITA, ET RES  
GESTÆ, ANNO CLO L CXXIII.  
ET SEQUENTIBUS.*

**I**acobus Heremita classis Imperator novem probe instructis navibus, celocibusque duabus, mari se anno clo-

c I o I o c x i i i commiserat , uti in India Occidentali  
nervos potentię Hispаниę contunderet , frangeretque , re-  
giisque thesauris immineret . Hæc classis mille sexcentis ,  
& quod excurrit , viris referta , ducentis nonaginta quatuor  
æreis ferreisque tormentis horribilis , impensis Procerum  
societatisque Indicæ constructa , omnia magna promitte-  
bat . Non tam justa prælia , quam post crebras velitationes  
compluribus onerariis naviis direptis ( inter quæ quatuor  
Hispànica saccharo onusta ) opima spolia non ignobilem  
hanc expeditionem fecere . Sequenti dein anno , cum  
superato freto Australi juxta Limam insulam ventum ,  
naviculâ , quam Prorex Peruvianus exploratum miserat ,  
interceptâ , ex captivo centurione Martino Del Rea com-  
pertum , treis naves argentiferas probe onustas cum dua-  
bus bellicis Pantamam vorsus vela direxisse , Prætoriam  
navem , cum galeone quadraginta æneis machinis munita ,  
onerarias supra quadraginta juxta tormentorum tria sug-  
gesta , quò securitati suæ consulerent , se recepisse . Erant  
hæc suggesta lapidea sex vel septem tormentis instructa ,  
cætera enim quinquaginta majori violentię arcendæ vici-  
no litore exposita fuerant . Metuebat enim Prorex , ne claf-  
sis nostra , quam præcipiti cupiditate circa omnes terras ,  
omnia maria spes lucri duxerat , urbi insulæque hostilia in-  
tentaret . Neque animus Nostris deërat pulcherrimi patran-  
di facinoris , jamque adeo quinque militum centurię , &  
quinque classiariorum cymbis impositæ , uti Callao & flu-  
men inter vicinam tellurem arriperent , cæterum concitus  
fervor aquarum circa litora profluentemque , spem omnem  
accessus interciderat , densataque Hispanorum agmina tel-

luris extima circa ipsa maris æstuaria insederant. Cum  
reluctantibus itaque aquarum vorticibus, & hoste simul  
velle pugnare, multum se fatigare, neque quicquam pro-  
ficere, verum sibi ipsis certum exitium properare, ea de-  
mum dementia videbatur. Cum hæc itaque expeditio inju-  
ria loci ægre procederet, in alias artes versare se animus Im-  
peratoris cepit. Jussum, uti centuriones aliquot duodecim  
cymbis armatis, quibus ærei dracunculi, ignivomæque ma-  
chinæ, ad incendia hostilibus navibus immittenda abunde  
suppetebant, intempesta nocte classem adorirentur. Et pro-  
spere ex voto cessit Fortuna: quadraginta circiter naveis vel  
nostris ignibus, vel sparsò vicino incendio concremaban-  
tur, pulcherrimo nocte spectaculo, cum veluti festivus & tri-  
umphalis dies mari incubuisse videretur. Et hæc opportuna  
nobis res cecidit, quod, Martio tumultu ad aliam partem  
urbis septentrionalem concitato, perculsi oppidani illac, ubi  
nullum periculum erat, concursarent. Dein ubi cymbis no-  
stris ex ordine Hispanicæ naves ignem concepissent, & cæ-  
lum antè nocte atque nubibus obscuratum haud suis igni-  
bus late fulgeret, periculum anceps periculi metu augeba-  
tur. Interea animo confirmato hostes ex propinquis tor-  
mentorum suggestis, galeone binisque navibus, quas pa-  
tachas vocant, vicinoque litore machinas omnes torque-  
re, Nostri dracunculis missilia spargere, & post principia  
Hispanicarum navium (quædam enim inermes, & forte  
non exarserant) latitare, postremo cum illic manere tutum  
non foret, se classem versus iterum recipere. Ita totam  
ferme classem furor ignium consumpsit, paucarum incen-  
dium ab Hispanis, Barbarisque ægre extinctum. Audax hoc  
faci-

facinus, neque minor victoria. Quanquam autem rebus ex voto fluentibus, non tamen rectum consilium fuerat, igneis navibus immittere, cum præcisiss anchorariis funib[us] facile omnes in potestarem nostram incidissent, quod ventus turgidus, qui ex tellure incrementum capiebat, illas versus interiora maris fluitantes agitasset. Sicuti prima luce novem Hispanice ignibus feralibus ardentes ita movebantur, ut stationem suam deserere, ne itidem ignibus fædarentur, Nostris necessitas incubuerit. Commemorat Sandius historicus, interea duos centuriones Regnerum Brederodium, & Engelbertum Scuttum, duobus navigiis Punam insulam, & superatis quatuor navibus Guajaquolum urbem, post atrocem pugnam occupasse, & mercibus opibusque refertam, ne spoliis incumberet præde avida juventus, &, ut fieri solet, palabunda ab hostibus cæderetur, ignibus feralibus subjecisse. Cæterum diaria, advorsa sorte fusos Nostros, Punæque insulæ pagum incensum, referunt.

## C A P U T . L I.

PRÆLIVM INTER PRÆFECTVM  
PHILIPPVM DE ZVILEN, ET VNDECIM  
NAVES HOSTILES CIRCA LOANDAM, ANNO  
C I O C X I V M E N S E I V N I O, NO-  
MINE SOCIETATIS OCCI-  
DENTALIS.

P O st quam Philippus Julius Præfектus aliquot na-  
vium, Commendatoris titulo, circa oram Africæ mæse  
D d 3 infe-

infestasset, plureis naves superasset, fugasset, vel in arena-  
rum vada adegisset, Loandam Africę insulam, quæ ad quin-  
que miliaria patet, aggredi in animum induxit suum. Cæ-  
terum classe undecim navium secundo vento hosti, quam  
primum Nostris occurrere, consultum videbatur, cum a-  
vortere, quam, ubi visceribus alicujus regionis infederit,  
disjicere victorem magis proclive sit. Quo comperto Prä-  
fectus levatis anchoris, plenis velis, animi immodicus in-  
hostem ferebatur. Acerime utrinque pugnatum displosis  
continuis tormentorum globis, cæterum hosti virtutis no-  
stræ inexperto primus fervor, atque impetus subito liquef-  
cebat, & in torporem solvebatur. Animose incipere prælium  
multorum, sed per cædes & igneis ad victoram grassari  
illorum est, qui nihil metuunt, nisi ut vincantur. Neque  
diu pugnatum, cum quatuor hostiles naves feralibus con-  
flagrarunt ignibus, prætoria & vicaria cum noctiluca lito-  
ribus ultro allisq; una fugiendo vadis adacta. Duę alię oc-  
cupatę, quę & postmodum redemptę. Postridie Präto-  
riam, duasque reliquas, quę fixę hærebant, Nostrī proprius  
accedentes tormentis ita quassarunt, uti tandem ignem  
conciperent, quanquam ex iisdem, quandoquidem despe-  
ratio ultimum necessitatis telum virtutem illorum acue-  
ret, creberrimos globos ejacularentur. Postquam pulcher-  
rium hoc facinus bene cecidisset, ne quid reliqui victis  
facerent Nostrī, ubi medium diei processit, aliam navem  
vadis impactam impetere tentarunt. Conferta pubes in  
treis cymbas jussu Präfecti insiliit, atque ipse, quo animos  
adderet, in vicinum lembum se permisit. Cæteri omnes,  
viri strenui, virtute Imperatoris accensi, summa celeritate  
foros

foros transilire , ferro iter aperire , denique audaciam pro munimento habere . Cæterum virtuti illorum Fortuna postmodum invidit , cum ex vicina tellure tam acriter globis impeterentur , ut necessitudo gravis se recipiendi eos premeret , adeò quidem ut neque ignem injiciendi copia daretur . Nonnulli occisi vulneratique , inter quos & ipse Præfectus vulnere aduerso saucius . Victoria tamen eò non minor fuit , cum per omnes asperitates eluctari , ne quidem ipsa virtus permittat . Ex hostibus summa cum turpitudine plerique ex navibus se terre dederant , cæsi nonnulli vel submersi , pauci capti . Tres ex nostris modica navi , quam patacham vocant , in litus adacti , in hostium manus pervenerant . Quibus permutandis cum tertia parte plureis ex captivis Lusitanis hosti offerrentur , Gubernator atque Episcopus Loandę fœdam & indignam conditionem proposuerunt , uti pro tribus captivis omnes admodum Lusitani & Æthiopes dimitterentur , binæ superatæ naves restituerentur . Quæ intoleranda conditio ludibrio Nostris habita , cum vieti victoribus summo cum opprobrio insultarent , neque captivorum ea habita ratio , ut alienæ & impotenti superbiæ obnoxii forent . Naves integræ immensa postmodum pecunia redemptæ . Neque multo post Nicolaus de Sosa , qui imperium urbis & insulæ recens obtinebat , treis captivos obtulit , pro quo officio humanitatis viginti Lusitani vinclis exoluti . Juxta urbem Loandam , atque intra sinum viginti admodum naves , inter quas & actuariæ stationem fixerant . Etsi autem Nostrí neque consilii , neque audacię unquam egere , tamen in certum periculum velle incurrere , inconsultum videbatur . De-

rat

rat locorum peritus nauta , qui vada & sicca arenaruin exploraret , sine quo ab illis caveri nequibat : duoque in litore suggestus tormentorum arcere adventantes poterant . Cæterum non tam tormentorum iactus , quam brevia metuebant , queis si hærerent , in extremo Fortuna illorum sita fuisset . Itaque providebat Præfектus , ne tale quid eveniret , vincendique cupiditate , ipsi vincerentur . Audacia quidem propior fortitudini est , cæterum temeritatem nemo unquam sapiens laudavit . Ostio quidem australi Loandę , Præfectus urbis cum tribus se ostentaverat naviis , verum nihil ibi virtus vel audacia poterant , quia periculosa itidem vada imminebant , atque suggestus decem tormentorum capax introitum prohibebat . Neque à peritis locorum facile illa cęca arenarum vitabantur , cum ipsa illa tria navigia remulco difficili nisu inter syrtes veluti , & charybdes attraherentur . Ne itaque hic tempus frustra consumerent , iterum pelago incumbere , incerta casuum , quę mare volvit , tentare , Fortunam in diripiendis hostilibus navibus experiri . Atque adeo virtute , & Diis volentibus , prospere omnia cessere . Vię plures circumcirca naves mercibus divites . Terror ubique hostem prostraverat , dum per ignaviam & inertiam magis incurrerent in manus nostras , quam armis vincerentur .

## C A P U T L I I .

*ACERRIMVM PRAELIVM INTER  
LVSITANICAM CLASSEM , ET HOLLAN-  
DICAS ANGLICAS QVE NAVE S.*

*ANNO cIɔ Iɔ c xxvi.*

**H**oc anno inter Lusitanos, qui antea à Britannis Ormo insula pulsi fuerant, & Anglicas, Hollandicasq; naveis juxta Persicæ oram longe acerrima fuere prælia. Hostes, præter quatuordecim minores naves (Fregattas vocant) octo galeonibus, & quingentis æreis tormentis terribiles erant. Nostræ naveis quatuor numero, uti & Britannicæ, humiles præ magnitudine hostilium navium liburnicarum speciem ostentabant. Undecimo Februarii die cruento admodum prælio mare per quatuor horas efferbuit, dum antea Britanni Hollandique usque ad extrema vitæ se invicem sacramento devovissent. Memorabilis in primis navis Hollandicæ, cui Virginis Dordracenæ nomen, virtus exarsit, que oneraria & octodecim tantum machinis instructa, medio hostium fluitans, per integrum horam cum quinque galeonibus invictas manus conseruit. Neque sudo mari suppetie in promptu. Hostibus cupidine victoriæ flagrantibus, animus supra modum accrevit: Nostris omnem violenciam ipsa etiam morte vincere, quam cum opprobrio vinci, satius videbatur. Surgente leni vento ab hostibus non tantum, verum etiam ab amicis divisi, pelago agitabantur. Virtute itaq; æquabili & inviolata per medios hostes ruere, fu-

E e rioso-

riosoque insultu ad suos reverti, audax consilium sedit.  
Et Fortuna illis quanquam gravi & ancipiti periculo bene-  
cessit: ipsa tamen navis bis ignibus incensa confestim  
iterum extincta fuit. Neque minor interea alterius navis no-  
stre (Wesopum indigebatur) fortitudo gliscebat, que vicarię  
hostili innexa (& prætoria cæteręque naves hostiles in pro-  
pinquo erant) tam cruento certamine dimicavit, uti harpago-  
nibus disjectis ægre se vicaria reciperet, cum omni appa-  
ratu bellico & sexaginta tormentis instructissima esset. In-  
terea concito vento Nostri quinque junctis navibus hostes  
fatigando vincere summo studio adnitebantur. Neque illi  
impotentes & lassi pugna reluctari amplius quibant, cada-  
veribus continuo in mare volvendis intenti. Nox atrox  
prælium diremit: Lusitanique juxta insulam Kismissum,  
Nostri prope Ormusum anchoras fixerunt. Secundo post  
hoc prælium die multo adhuc atrocius dimicatum est, adeò  
ut anceps utrinque victoria esset. Arbores hostium passim  
mutilę vel fractę, autenque gementes jaetabantur, Virgo  
autem Dordracena ita velis pertusa fuit, ut nec ullus qui-  
dem integer nauticus funis esset. Navicula quoque incen-  
diaria in hostem missa, sed frustraneo nisu. Tracto per inte-  
grum diem prælio noctis præsidio tuti hostes prope Ormu-  
sum, Nostri juxta Gumerona oppidū subsederunt. Postridie  
Lusitani prope Larequam insulam, quam infida vada præ-  
texunt, se recepere. Compertumque post modum, nigris  
vexillis erectis, Præfectum classis Alfonsum Boutelium fi-  
lium Proregis extremum diem clausisse. Post aliquot dies,  
cum Surattam versus iter instituere, ex sententia omnibus  
rebus paratis compositisque, Nostri decrevissent, Lusitani  
metuen-

metuentes, ne iterum præliandi difficultate circumvenirentur, quantum possunt celerrime fugiendo patentia æqua-  
secant, & versus oram Persicam Muschetum oppidum pe-  
tunt. Postridie, quod hostium naves arboribus antennis  
que mutilę tam propere expedire iter nequirent, tanto hor-  
rore iterum certamen cæptum, uti prætoria incensa vix ex-  
tingueretur, tres alię sibi invicem innexę hæsitarent. Ob-  
scuro noctis evasere, & propter arcem oppidi stationem  
securam elegerunt. Tam cruentis & atrocibus præliis ex  
Britannis Hollandisque octuaginta cæsi, complures vulne-  
rati, ex Lusitanis præter saucios ultra mille necati, sola ca-  
lamitate nobiles.

## C A P U T L III.

*PRÆLIVM INTER VVIBRANDVM  
SCHRAMMIVM PRÆFECTVM CLASSIS  
INDICÆ, ET PRÆDONEM NICO-  
LAVM COMPANVM, A N N O  
c I o I o c x x vi.*

**W**I BRANDUS Schrammius Præfetus classis Indicæ  
novem naviis anno c I o I o c x x v i mense Mayo  
mari se commiserat, duobusque postmodum men-  
sibus portum Sierre Lionę petebat. Cæterum conspectis  
quatuor naviis, dum in dubio mens hærebat, an hostes  
an amici forent, ubi proprius accessum, compertum famo-  
sum esse prædonem Companum, qui fœdis rapinis ubique  
maria infestabat, complurium mercatorum nostrorum for-

tunas affixerat, & homo profanus scelera sceleribus cumulaverat, multorum quoq; facinorosorum catervas tanquam stipatas circa se habebat. Quanquam autem ille amicitiam obtenderet, tamen Imperator noster omnia ad prælium composuerat, quod prædonis animus subdolus, cujuslibet rei simulator ac dissimulator, ardens præde cupiditate, unicuique pateret. Dicitabat ille se priorum facinorum pertæsum codicillos veniales expectare, postulabatque simul uti cymba nostra vicinę telluri, ubi vultu facieque ignotus erat, exponeretur. Quod cum negaretur, quæsita hac occasione hostilia animo volvere cepit, sanguineoque erecto vexillo in principem navium Hollandiam solita animi ferocia præceps ferebatur, verbisque tumidis se contumeliam manu vindicaturum affirmabat. Responsum à Nostris, se verba incruenta non metuere, si pugnandi consilium esset, experturum, quibus cum viris manus consereret, eligeret nunc, an pacem an bellum cuperet. Cæterum ille animi impotens, tormentis excussis, junctisque aliis navigiis navem nostram undique premere, illique se innectere tentabat. Verum pubes nostra nautica, incredibile memoratu est, quantum virtutem intenderit, quantaque vi tela majora minoraque torserit, adeò ut promiscuè cadaveribus tabulata tegerentur, cæterique metu perculsi carina se recipere cogerentur. Ipse Companius, qui gladium vibrans ferociam in vultu ostentabat, ubi telorum iterum nimbus ingrauebat, pronus in ventrem se misit, brachioque saucius ad inferiorem recessum proreptavit. Cum cominus res non procederet, eminus tormentis navem undique fatigare, atque ad ditionem cogere, constituit. Sed Hollandia navis præcipiti

cipiti insultu in hostem ferebatur, fistularumque militarium certis iectibus continuo ita illum impetebat, uti cæforum crux horribili specie passim in mare funderetur. Vicaria hostilis admodum dedolata, multisque foraminibus pertusa ac dilacerata, fugæ propior, ne vis aquarum illam opprimeret, paulum secessit. Non procul una ex liburnicis nostris machinas quoq; torquebat, quam adoriri primum hostis non affectabat, quod principe navi, uti sperabat, superata, illa se subducere nequiret. Cæterum cum illam debellare, longe opinione asperius acerbiusque foret, mutato consilio liburnicam adoriuntur, verum omnibus expansis velis illicet suppetias ferebat Prætoria nostra, omnibusque ex latere machinis explosis, superiore vento usus, tanto horrore omnes territavit, ut nemo supra tabulata se sistere auderet, vel vela majora intendere, uti præsentis se subducerent periculo. Itaque Companiis, uti in rebus adyorsis fieri solet, consiliorum expers in vicina vada impégit, ne Nostris inseständi copia vel facultas esset. Interea prætoria & liburnica nostra in altum profectæ, reliquos prædones cingere nitabantur, sed elaphi in fuga salutem quæsiverunt. Tanta jam illos incesserat consternatio, uti postmodum comperatum fuit, ut deditio[n]em agitaverint. Pauci ex Nostris fuere vulnerati vel cæsi, sed princeps navis nostra admodum fuit quassata, ita ut triduo vix se expedire iterum potuerit. Virtus quoque & prudentia prædonis hoc prælio emicuit, quippe pollebat magna vi animi & corporis, rerum maritimorum vetus, animus, supra quam cuiquam credibile est; audax, subdolis, cædibus & rapinis innueritus. Eundem postmodum Nostris, prædonesque portum tetigere, metu

piratis perculsis, ne manus nostras iterum violentas experientur. Imperatum, ut prædo stationem suam desereret, quod post multas contentiones detrectare nequivit.

## C A P U T L I V.

**MEMORABILIS PRÆTORIÆ HISPANICÆ CLADES, A NOVEM CLASSIARIIS PERPETRATA, ANNO EODEM.**

CUM mare nostrum hostium damna non caperet, complures Belge, qui Regias partes se etabantur, in Hispaniam migraverant, societatemque inierant, uti cunctas naveis, que Hollandica commercia vectabant, intercipierent. Unusquisque nulla gentis habita ratione ducere, trahere, rapere, sine modo modestiaque polluere, vastare omnia, donec brevi societas ita adolevit, uti quinque naves in mare ducerent, cuius Prætorię Busencolius Dunkerkanus summo cum imperio præterat. Hæc navis, que à Dantiscanis capta fuerat, quatuor æreis, triginta ferreis machinis cincta, milite Hispano insidebatur, pubes nautica variarum gentium militia atque inopia urgebatur. Inter illos novem classiarii Belgæ, qui occupata Bahia captivorum numerum auxerant, servitutis impatientes, quovis modo navem vincere, injuste potentię obviam ire, viatos acerbius ulcisci, quamquam mortis periculo, in animum induxerunt suum. Per duos menses cunctando, opportunum tempus opperiendo, res ex voto non succedebat. Sed quia magna facinora ægre differuntur, & celeritate constant, conju-

conjunctionis Princeps cum sociis concubia nocte, Hispanos, qui excubias agitabant, cum Præfecto, magno & feroci animo trucidat. Plerique cæsi ex Hispanis, ante quam insolitus tumultus classiarios alios somno pressos excitavit. Qui periculi magnitudine commoti, uti rebus trepidis fieri solet, consiliis fluctuare, concurbationibus periculum anceps augere, neque armis obniti, neque conjuratos adjutare. Quæsiti, an partium suarum studia sectari cuperent, an potius ferro decernere, in partes pedibus secesserunt. Electus in centurionem conjuratorum primus, cæteri in sacramentum militare acti. Inventi postmodum quindecim Hispani, quos fortuna occultaverat, quorum supplicum sanguini parcere, viatoribus clementia videbatur. Abducta navi in Texeliæ stationem, centurio Hispanico vestitu tanquam triumphali amictus Hagam magnis itineribus contendens, ab Auriaco, laudata ejus sociorumque virtute, Præfecturam navis impetravit.

## C A P U T L V.

*DE EXPEDITIONE ET PRÆELIO PE-*

*TRI HEINII CVM CLASSE HOSTILI IVX-  
-TAT CONTRA VRBEM S. SALVATORIS IN BRAGA  
SILIA. ANNO C I C I X X V I I .*

**I**N partes nunc veniat virtus incredibilis Petri Heinii, qui obscuris majoribus genitus, maris non tam hospes quam indigena, inter ferocientes tempestates enutritus, horrore efferati elementi animum quoq; exasperaverat, quinimo

imo ipse horror & tempestas Oceani, ad quoscumque casus induratus, nullibi hosti quietem permittebat. Præter odium Hispani ex invisa dominatione, quo nautica plebes etiam domi armatur, accedebat & privata causa. Captus ab Hispanis una cum patre, servilem in modum habitus, flagris ac verberibus cæsus, postmodum triremi impositus, cum cæteris, quos Spinola ea tempestate habebat, Slusam Flandriæ advectus, libertati demum restitutus, quo tempore Mendoza Arragonius ex convento captivos reddi suis impetrasset. Iterum in India ad Occidentem captus, post biennium dimissus, nullis periculis territus, vitæ prodigus ubique se hosti objectabat. Jam ante vicariam potestatem sub Præfecto Willekeno nomine societatis Indicæ obtinuerat, atque urbem S. Salvatoris in Brasilia aggressus, inter primos mūrum superaverat, stipatam hostium multitudinem in fugam egerat, deniq; urbem opulentissimam, ut superius commemoratū fuit, desertam Lusitanis expugnaverat. Anno demum clo I c xxvi Præfectum classi societas Indica, que ad Occidentem, illum communibus votis nuncupaverat. Clas- sis constabat nové majoribus navigiis, celocibus quinque, quæ viribus modica, si Præfecti generalis Balduini Henrici classi, quæ maria sulcabat, jungi potuisset, impetendæ hostili & Regiæ argentiferæ æqualis fuisset. Sed iniqua nos for- tuna pressit. Nostri enim frustra quæsito Præfecto, multa maria emensi, multis quoq; difficultatibus agitati, pluribus tamen interceptis navigiis, que commercia vectabant, tandem ex captivis intellectere Præfectum generalem Balduinum Henrici diem ultimū prope Havanam clausisse, classia- rios patriā versus iter direxisse. In primis Imperator noster,

qui

qui ubique ad gloriam virtutis via grassabatur, erexit sibi classis regiæ argentifere invadendæ occasionem, non per socrdiam vel ignaviam, sed per infortunium, multum querebatur. Namque illa divitiis onusta, & quadraginta sex velis instructa circa promontoriū Floridæ nono Septembris die in conspectum venerat. Quam adoriri concilio militari inconsultum visum fuit, namq; frustra eniti, neq; aliud se fatigando quam certo periculo se exponere, extremitè dementiè erat. Per aliquot menses pelago jactatus Kalendis Martii sequentis anni ad portum Bahiæ delatus, furtim, & per insidiæ hostilem classem adoriri in animum induxerat suum, cæterum malacia maris impeditiebat. Dum cunctantur, non tantum Imperatori, sed & aliis egregiis viris, præfectis simul cum omni militari & nautica pube flamma virtutis glorièque supra modum exarsit, neque prius sedari potuit, quam hostem in propriis visceribus adorirentur. Itaq; Heinius secundo & turgido vento in portum hostilem delatus, classem naviū viginti & sex, quæ propter urbis mœnia suggestumque tormentorum se interius receperat, animo militari invadi imperat. Naves hostiles propriis tormentis munitæ, etiam urbis atque arcis, quæ valida urbem prætexebat, machinis defendebantur. Primus huc cursum intendit Archithalassus, ut qui primus auctoritate etiam virtute esset. Cumque se classi inseruisset, medius inter Prætoriam vicariamque hostium, jaci anchoram & sisti iubet, attonitisque oppidanis, quo tam audax facinus abiret, cruentam pugnam inchoavit. Binæ nostræ naves, quibus Geldriæ & Hollandiæ insigne erat, eodem animo adoriendo hosti anchoram fixerunt, reliquæ non confestim, inferiori vento agitatæ,

præsto fuerunt. A tribus itaque nostratibus navibus tam acriter imperitè dedolatæque hostiles , ut ditionem sub conditione vitæ sponderent. Sed continuo tormentorum fragore non auditæ postulantium voces. Neque abstitit Heinius vicarię affixus, donec illa ita perfoderetur, ut fundum peteret, atque tres tantum ex militari manu superstites reciperentur. Interea dum ex urbe , cui Præfectus erat Didacus Ludovicus Oliverius , impiger militiæ & vetus , dum ex classe hostili terribilem in modum tormenta undique tonabant, incredibile dictu , cymbis socii navales cum sclopetariis se dederunt , & contra densissimam globorum ingentium procellam insultarunt , audacia & celeritate admiranda foros hostiles transgressi tanto impetu se in naves effuderunt , uti confertus hostilis miles ex navibus se in mare præcipitem daret , atque enatando ægre se reciperet , cunctæ admodum naves intra teli jactum abducerentur. Quanquam autem ex omnibus munimentis, tam majoribus, quam manuariis tormentis, instar grandinis densi globi torquerentur in Nostros , tanta tamen fortitudine & virtute cuncta expedita fuerunt , ut intra tres horas victoriam hostibus extorserint , summo Lusitanorum opprobrio atque contumeliâ. Et major hostium clades, quam nostra, quæs tamens se defensantibus omnia prona , nostris adeo ardua & difficultia , ut veluti cum morte colluctandum, atque ex cymbis in fastigia navium enitendum esset. Abductæ tamen viginti & duæ naves ex portus intimis penetralibus. Cæterum dum Nostri revocare gradum ab urbe & suggestu tormentorum cupiunt , navem Prætoriam viætricem , aliquamque Geldrię nomine insignem , mare ni-  
iquum

iquum deseruit, ita ut utraque vadis hæreret. Geldria summo nisu laxata, Prætoria altius fixa, et si omni ope succurreret pubes nautica, liberari nequibat, & cum postridie omni molimine à cæteris navibus, quæ pròpius adventabant, frustra idem tentatum esset, ita hostium tormentis perfossa fuit, ut ne quidem navis speciem referret. Et cæteræ quoque naves, in primis Geldria, continuis globorum iectibus nonnihil quassatæ fuerunt. Dum Martis hæc horribilis tempestas ingruit, dubiū an negligentia an casu incenso pulvere pyrio navis, quæ malus Auriaca indigebatur, unà cum sexaginta viris dissiliit, ex quibus quatuordecim superstites, miserè ignibus ustulati, recepti sunt. Imperator itaque classis, comperto navem Prætoriam abduci non posse, atque ita undique trajectam, ut navigationibus inutilis futura esset, prædam tolli, perfossisque tormentis ignem injici, atque concremari mandat. Quanquam autem horribile, atrox & diuturnum illud fuerit prælium, ex nostris tamen pauci quinquaginta circiter advorsis vulneribus cæsi, Imperator classis sinistro brachio fistule militaris globo vulneratus, aculeoque ligneo tibia tenus adacto sauciis, ejusdemque vicarius manuario tormento sub costis spuriis, non letale vulnus accepit. Prædam omnem quatuor delectis navibus, inter quas & Prætoria hostilis, ad suos propere dimisit, cæteras expeditas maxime refici, reliquias exuri jussit.

*DE EIVSDEM PRÆFECTI PRÆ-  
LIO, ET VICTORIA, EO-  
DEM ANNO.*

**V**ICTOR hostium Heinius multa iterum cum animo suo volvebat, novamque victoriam meditabatur maria lustrans: neque præceps animi cupido debilitando hosti expleri ullo modo poterat, sed inquietus cum inquieto Clemente huc atque illuc fluctuabat. Nonnullæ minoris pretii naves interceptæ vel incensæ. Juxta Bahiam vela intendens, ex Lusitanis captivis intellexit, quinque vel sex navigia crepidine vicini fluminis consedisse. Duabus celocibus imperatum, uti cum omnibus lintribus & scaphis manu militum instructis interiora fluminis penetrarentur. In cuius ostio vacuum desertumque, neque infimæ magnitudinis, navigium, expilatis iis, quæ sors offerebat, sui juris esse permiserunt. Namque omnium animos spes præde transversos egerat, studiisque ita aëcensis pubes nautica, ne qua occasio elaberetur, sollicita summopere & anxia erat. Aliquantum fluvio proiectis angusto sinu aliquot hostiles naves latitare visæ, quæ omnem operam intendebant, uti conspectui nostrorum se subducerent. Propius accedentibus nostris tanto impetu majoribus tormentis, & manuariis fistulis crudelis insævit tempestas, uti opprimendi insultandique in naves hostiles nulla spes illos adducere posset. Reversi itaque ad suos, cum enarrassent quibus fuissent difficulta-

ficultatibus pressi, Imperator tamen, uti erat prompte virtutis & audacie, supra modum glorie militaris appetens, magno animo iterum statuit, seipsum cum promptissimis quibusque objectare periculis, atque fortunam experiri. Luce itaque proxima iterum ingressi flumen, non eodem loco quo pridie, sed penitus retrò cessisse hostem compertum est. Quo investigato repertoque, intonuere iterum tormenta tanta ferocia, ut adoriri hostiles naves supra audaciam cunctorum esse videretur. In primis vicaria manuariis fistulis maxumo horrore explosionis ingentem nostris terrorem incusserat. Praerat illi homo facinorosus, & pluribus criminibus coöpertus centurio, nomine Padilha, qui sanguine nobilissimi & generosissimi Domini Dortæ nefarias maculaverat manus, quem Bahię Gubernator cum centum & quinquaginta militibus præsidio navis imposuerat. Verum Imperator noster, suo adventu ultimo imperio, ne se reciperent, impedivit, cui, cum nullum fere consilium vel inceptum frustra fuisset, facile obtemperabat nautica pubes, & incredibili insultu navem violenta manu superavit. Nusquam magis patuit, audacibus nihil invium esse, & fortissimo cuique minimum adesse periculi. Quippe hostili sanguine præter treis pueros omnibus occisis fori natabant, & per sentinam in flumen se exonerabant, tredecim tantum ex nostris desideratis. Hostiles alienę duę, inter quas & Prætoria, facile occupate, dum miles se profundo committit, & natando eluctatur. Ulterius adhuc duę vel tres sub obiectu arborum latitabant, quae refluentibus aquis vadis hæsitabant, illoque beneficio ab omni insultu facile defensabantur. Consultum visum Imperatori nostro in mare

captas naveis cum suis promovere ; namque per quatuor admodum milliaria Hollandica obliquo & tortuoso amne enitendum erat. Rupta per infortunium una captarum navium : præmissisque cymbis uti prospicerent , quidnam interea hostis moliretur , compertum , hostem interea cum præsidio , ex urbe proxima , quę S. Salvatori sacra , ad ostiū fluvii , qua exitus nostris patebat , vicinum collem munimentis cinctum insedisse. Adhæc navis , quam antea Nostri desertam reliquerant , consilio hostili submersa & vadis impacta viam eximebat. Verum subsidentibus aquis igne injecto flamمام concepit , & certantibus duobus elementis , destinata aquis , ignibus periit . Et quanquam fistulis densos globos ejacularentur hostes , qui collem infederant , dracones tamen nostri ( tormentorum hoc genus est ) ita multifariam suos ignes eructarunt , ut exiguum inde damnum paterentur. Adversus impetus hostiles ex vicino colle aliud excogitatum præsidium . Bouim tergis naves omnes , in primis quę præcedebant cymbæ munitæ ictus crebros fistularum eliserunt. Advorso vento , angusto & vadoſo flumine educi naves nequibant , verum à cymbis ex longinquo jactis anchoris attrahi illas necesse erat. Hoc uti multis difficultatibus obnoxium erat , ita Imperator noster non tantum fortitudine , sed & consilio pollebat , quod longe difficillimum esse solet , cum audacia ad temeritatem , prudentia ad timiditatem proprius accedat. Verum cymbæ velleribus cinctæ eliso glandium impetu incredibili successu anchoras jecerunt , fluvioque tres naves eductæ , ipse Præfectus classis cùm suis postridie sub oculis hostium flumine vadoſo elapsus , certa reportavit victoriæ præmia.

C A P.

## CAPUT LVII.

*PRÆLIVM ACRE INTER TRES NO-  
STRATIUM NAVES, ET PRÆTORIAM VI-  
CARIAM QVE HONDVRENSEM,*

*ANNO CLO CXXVII. VIII JULII.*

**Q**UINQUE liburnicas sub Præfectura Joachimi Gysii Batavi Zelandique expediverant, ut diripiendis hostilibus navibus ad occidentem maria metirentur. Cum immenso & inquieto mari huc atque illuc fluctuantes, multas circumvecti insulas, modo juncti, modo divisi, animum tamen hostem contundendi non diviserant. Cum jam ante Hispanicam fregattam prope Maracaibo igne corrupissent, mare ubique infestantes, inter insulam de Vaca, & Hispaniolam excepta una navi frequentes simul convenerant. Hinc iterum fluctibus divorsi post mensem exactum promontorium Corrientes tetigerunt. Postridie una Hollandica, & duæ Zelandicæ juxta promontorium S. Antonii modicis tantum velis movebantur. Ubi dies processit, vela peregrina conspectui se dederunt, sed quod compositum & tacitum ventis mare sternetur, nulla insectandi copia fuit. Cum secundo dein die suppara velorum iterum paterent, lembo armatis viris referto adnitente remige facile navis superata, quæ ex nova Hispaniola cursum huc intenderat. Postero die eminentem regionem Cubæ oculis usurpabant, eoque districtu usque ad octavum diem Julii cursus huc atque illuc relictos

licitos iterabant. Appetente die conspecta duo vela, quod omnibus expansis linteis vento secundo Nostri ferebantur. Propinquantes duo esse majora Hispanica navigia intellexerunt. Ardorem pugnandi praede quoque cupido acerrime instigabat, quæ prima esse mortales censem, & præcipue militarem pubem trahunt, quorum animus nulla magis tuba quam spoliorum acceditur. Cum itaque omnes labores atque pericula consueta haberent, sibi ipsis incalescente sanguine temperare nequibant, acerrimeque explosis omnibus tormentis in hostem tonabant, verum innectere se hostilibus navibus absente Prætoria nostra non consultum judicabant. Signo dato & illa præsto fuit, atque tormentis omnibus hostem impetiit, quod & reliquæ ex ordine factitarunt. Iteratis dein ictibus, Prætoria non nihil cedente, reliquis dubitantibus, ecquid rei esset, cymba centuriones se Imperatori sistunt. Ibi, quia globos & jacula eminus in hostem torquere frustraneum videretur, impetu atque insultu hostiles naves debellare commune consilium fuit. Virtus nullam longiorem moram ferebat, sed cominus prælium conserere, Archithalassum adoriri, hostem ferire, fatigare, nihil metuere quam turpem famam illos edocebat. Dum ita seruntur colloquia, nostris navibus vento ultius actis, consternatis, uti credebat, & fugientibus immagine summa ope adnitebatur hostilis Imperator. Neque enim credebat (inauditum antea facinus) liburnicas cum galeonibus periculum viriam experturas. Supremo itaq; ex apice vexillo tormentique ictu, signum pugnandi dedit. Cæterum procul à nostris tanta turpitudo atque ignominia abfuit, queis mortis jam ante victoribus, nihil aliud quam hostis

hostis quærebatur. Adversum ventis mare, obliquando vela, superare, Prætorię hostili se implicare, summum illorum votum fuit. Cæterum illam iniquo mari, tum quod expeditior princeps hostiū navis in omnes partes se vorteret, adoriri Fortuna non permittebat. Vicariam itaque adorti ab utroque latere: verum suppetias Prætoria hostilis tulit, atque principi navium nostrarum, cui Leænę nomen erat, se implicuit, quæ vicariæ latere eminentiori, quod velo & ventis non deprimitur, prælium jam concitaverat. Ita illa media inter duas hostiles utrinque atrociter impetebatur. Tum subito cōorta globorum tempestas cum magno fragore, densusque fumi nimbus intermicantibus ignibus visum impediebat. Duæ dein aliæ naveis vicariam summo impetu adoriuntur. Foros transilire Nostri tentabant, cæterum hoc longe difficillimum erat, cum ex sublimibus navium tabulatis hostes Nostros fessos, confessosque lanceis deprimerent. Cum neque ita belli alea procederet, ignitis jaculis (malo punico in militia nomen est) quæ manu atrociter spargebantur, terror hosti incutiebatur. Nihil crudelius repertum, ex quo in terminis mortalitatis properandis ingenium hominum laboravit. Hoc jaculum quicquid obvium convellit, ita ut ipsum Acheronta perrumpere videatur. Terrâ ædes uno impetu disjicit, ipsa telluris viscera atque intima penetralia pandit, ut cuncta misceri videantur elementa: mari atrocius s̄avit, ubi in naves conjectum, angustia loci tabulata hominesque misere collidit. Qua procella miles hostilis laceris navis asseribus misere sauciatur, adeò ut nullibi refugium foret, cum ubiq; furiosum illud jaculum vim suam horrendam exiceret, horribiles ejula-

tus, clamoresque morientium exaudirentur. Dehinc incendio navis corripiebatur, neque militem nostrum ignis suus deseruit transiliendi. Tum totius negotii fœda & miserabilis facies fuit, passim pecudum more hostis obtrunca-ri, cadavera in mare volvi, sanguine denique aspersæ aquæ fluitabant. Pauci Hispani furori militum exempti. Incendium navis summa cura extinctum. Interea prætoria hostilis calamitati se subducere nitebatur, quanquam & nostræ naves, in primis Læna, quæ inter duas hostiles media jacuerat, ita exceptæ, perforatæque essent, uti fessæ laceræque insectandi animum ponerent. Contenti itaque hac vitoria, simul cum superata navi in sinum (Canalem vocant) Bahamæ se receperunt, & circa oram Floridæ exonera-tis mercibus opulentis, Hispanos, quorum vitæ peperce-rant, incolumes Havanam dimiserunt. Ita demum pluribus direptis navibus classis hæc Indica quinto Septembris die fœliciter in patriam appulit, luculentis spoliis turgida, quæ duodecim auri vasa superabant. Præfectus torque-aurea in præmium virtutis donatus, nauticę juventuti tredecim mensium stipendum præter solitam mercedem ab Indicę societatis Curatoribus persolutum, ne virtus sine præ-mio flaccesceret, quę per se dura & amara est, nisi largitione sustentetur. Liberalitas & fortitudo ultro citroque ire debet, & hic est quæstus Reip. maximus, de fructibus nonni-hil impartiri, qui vitam pro commodis Reip. impartiuntur. Et hoc Proceribus nostris semper curę fuit, uti in virtutis præmiis magnifici essent, neque ullis meritis manum clau-derent. Ita Deo juvante, nihil quoque clausum & invium fortitudini Batavorum fuit.

C A P.

## CAPUT LVIII.

*DE PRÆLIO NAVALI INTER CLAS-  
SEM HOLLANDICAM NOMINE SOCIETA-  
TIS INDICÆ OCCIDENTALIS, CVI PRÆFEC-  
TVS ERAT PETRVS ADRIANI ITA, ET PRÆTO-  
RIAM, VICARIAMQUE HONDUREN-  
SEM, ANNO CLO I CXXVIII,  
MENSE AUGUSTO.*

SOCIETAS Indica spoliorum cupidine ulterius fla-  
grans, cuius potissimum causâ & bella geruntur, &  
maria sulcantur, ipsâ hyeme mense Februario fatigandæ  
Americæ, quæ nervos regios sustentabat, classem instructam  
sex majoribus naviis, celocibus tribus, sub Imperio Petri  
Adriani Ita mari commiserat. Post multa maria emensa,  
vagasque navigationes fluctuantes, mense Augusto Præto-  
riæ vicariæque navi classis Hondurensis circa Havanam oc-  
currerunt. Utraque viginti tormentis bellicis munita, hæc  
ducentis quinquaginta, altera ducentis viris stipata. Hostes  
perterriti fugiendo versus litora Havanæ portum, quæ ad  
duo tantum miliaria versus orientem aberat, attingere  
omni ope laborabant. Cæterum una navium nostrarum  
concitatiōr velocitate sua cursum hostilem intercepit, ita ut  
ferro iter aperiundi, configendique illis gravis necessitas  
incumberet. Vicaria primum insultum tulit animosè ad-  
modum, & cum nostris harpagones, quîs se innecterent,  
deessent, elapsa vadis hæsit. Non semper virtus Fortuna  
pensatur, & incerta casuum, si uspiam, indomito maris ele-

mento dominantur. Quippe navis nostra prædē avida, dum non contractè satis se vortit, ex imperitia locorum, cæco vado itidem adhæsit. Quo in loco immobilis, continuis tormentorum verberibus à matutino tempore usque ad horam secundam post medium diem, ita impetita est, ut major malus medius dissiliret. Neque illa impatiens sui in hostem sua vibrare fulmina quibat. Prætoria hostilis versus litus itidem adacta, & cæcis syrtibus fixa. Nostra inter duas hostiles media ita densatis ictibus globorum perfossa fuit, ut sui impotens animum sponderet, undique circumventa de ditione cogitaret. Ita lacera navi, quæ vel ignibus vel Oceano ludibrium debebat, integra quidem fortitudo emicuit, sed contra extrema Fortunæ, cum nihil amplius possis, eniti ne quidem ipsa virtus porest. Dum ita non tam cum hostibus quam iniquitate loci luctabantur, Princeps classis nostræ diu ventis fluctibusque adversis jactatus, cum infensum mare suppetias nostris prohiberet, paulum septentriōnem versus inclinans, à meridie, statim illic ex eadem plaga spirantibus ventis, turgidis velis in hostem fertur. Duabus aliis navibus, Vicariæ, & Fortune, quas penes se habebat, quid faciendum injungit. Ipse consilio & virtute validus advorsa Fortune superavit, quæ brevi momento hoc atque illuc se flectit. Quanquam diu dubia quò se inclinaret, cum & nostra & hostilis virtus utrinque illam prensaret. Quippe ita acriter vicaria Nostris restitit, ut majora quoque tormentorum verbera, quis horrendum in modum à fronte lacerabatur, contemneret. Sicut densa grando tectis illisa dissilit, ita supra cladem est robustus fortitudine animus. Nostris immissis ignitis foculis, terrem

rem incutere , atque ita in tabulata eniti tentaverant , verum æquè animose pulsi fugatique. Naveis deinceps duæ , quâs Delphinis & Fortune nomina erant , cum in Prætoriam hostilem simul globos misissent , præsidio Nôstris fuere . Fluctivaga Delphin proprius accedens à tergo vicariam hostilem premebat , Fortuna certo omine victoriam spondens promptissimum quemque & maxime strenuum militem in Prætoriam traduxerat. Tum demum conferta pubes incredibili insultu in vicariam se præcipitem dedit , atque invictus animus non tam in audaciam , quam in furem prorupit. Flagrabant & micabant oculi , exæstuabat in facie sanguis , concutiebatur crebro spiritu pectus , citatus gradus , manus inquietæ , corpus denique in exitium hostium instar maris fluctuante gressu attollebatur. Pro ingenio quisque glande vel ferro pugnare , atque acriter resistente hoste modò eniti in advorsa navis , modò concidere , modò lapsantem iterum gressum firmare , donec pertinacia & horribilis insultus hostilem navem superaret. Tum promiscue sanguine hostili imbuti enses , omnia , quâ visus se extendebat , constrata telis , armis , cadaveribus , inter ea tabulata infesta cruce fluitabant. Ex trecentis viris , dimidia pars ferro fatum invenit , reliqui , qui natando per aquas ferebantur , vel iisdem mersi , vel pauci admodum evasere. Commemorant nonnulli inter præliandum , cum jam vicaria navis superata esset , hostisque confessus , igne illam conflagasse , quam cum pubes militaris & nautica obflammatur violentiam desereret , Præfectum stricto gladio rutilantibus ferocem oculis fugienteis prohibuisse , atque hæc verba addidisse , ut aut ignes extinguerent , aut iisdem perirent , me-

tuentem nimirum, ne ingentes opes, simul cum devicta navi concremarentur. Quod quidem ab aliis silentio transmissum pro comperto dicere nequeo: hoc constat mercibus, quis stipata erat, exoneratis, cum ad quinque pedes navis aqua premeretur, atque humentia terga boum fœdum & intolerabilem odorem spargerent, postmodum ignibus subjectam fuisse. Interea, uti ad institutum revortar, treis aliae nostrorum naves, fixis anchoris, Prætoriam hostilem adoriuntur, & continuis tormentorum ictibus fatigant, cæterum hosti perculso tam fœdo & horribili suorum spectaculo, animus timore obstupuit, consilia præpedita turbabantur. Ubi enim metus dominatur, etiam fortissimis viris subito omnis mens cadit, neque quicquam pensi habetur. Fuga itaque iis potior fuit, & infido mari vitam suam crediderunt. Ex promptissimis tamen quinquaginta extrema expectarunt, qui tamen mox eadem sorte effugium morti quæsivere. Ita post acerrimum conflictum superatæ prima & vicaria classis Hondurensis naves; singulæ ducentis & ultra infessæ fuerant militibus, qui militiæ veteres ad nutum monentis intenti, arma armis conserere, obfistere, circumire, discurrere, mutare pugnandi vices, virtutem virtute regere cum peritissimis noverant. Ex quibus ultra ducentos obtruncati, præter illos qui miserabili fato mari sibi mortem properaverant. Nostræ tantum duodecim vel tredecim cæsos numerabant, quis recens occisis vultus adhuc ferociam animi & vindictæ studium ostentabat. Majoris saepe virtutis est victoriâ prudenter uti, quam hostem vicisse. Plures saepe quæ ferri virtute quæsiverunt, per fastidium & contemptum hostium perdiderunt. Hanc itaque

For-

Fortunę indulgentiam , qua etiam optimi Imperatores in-  
solescunt , periculo committere , modicisque intentus im-  
modica affectare noluit prudentissimus Imperator. Opu-  
lenta alioquin classis , qua ex Terra Firma immense divitię  
vectabantur , propinqua censebatur : cæterum incerta pro  
certis captare noluit Archithalassus , cui fatales rerum vicis-  
tudines , & incerta maritimæ militię in promptu erant :  
in primis quia pleræque naves sicco arenarum fixæ , atque  
excita illarum moles ægre moveri poterat. Vicaria itaque ,  
quæ tam alte syrtibus federat , uti nullis laboribus iterum  
fluctuare posset , exemptis mercibus , aquis exitium mini-  
tantibus , contrario ignis elemento periit. Prætoria quoque  
hostilis , atque Leæna , quę vehementer pertusa erat , à vicinis  
navibus trahebantur. Ventis itidem silentibus maris æstus  
ad ostium Havanæ classem nostram abripuerat. Et nisi la-  
ceræ naves summo nisu Oceanum versus à cymbis impulse  
fuissent , ab hostilibus munitis , quæ nondum tormen-  
tis pertingere classem nostram quibant , periculum ingens  
incubuisset. Maxima igitur difficultate eluetati , expansis se-  
cundo euro velis per fretum Bahamæ propter oram Floridæ  
vias maris tentarunt , Prætoriaque hostilis , quæ rimis fa-  
tiscens seipsam supra aquam tueri non poterat , sublati  
paulatim mercibus ignium violentia combusta. Ita junctis  
velis Imperator maria feliciter emensus circa finem Septem-  
bris , atque ineunte Octobre in Patriam revorsus , summo  
omnium studio exceptus fuit.

C A P.

## CAPUT LIX.

*DE CLASSE ARGENTIFERA A PETRO HEINIO DIREPTA.*

ANNO CLC XCXVIII.

**A**NNO hujus saeculi vigesimo octavo sub Imperatoris Heinii auspiciis ad Septembris nonum diem sole oriente classis argentifera ex nova Hispania in conspectum primo venit. Nonnullæ naves ex Nostris, vento diutius divulsæ, suas iterum vires commodum junxerant, ut tanquam numinis decreto victoria sponderetur. Quanquam Havanæ litora premerent Nostræ, æstuante & rapido fluxu versus Matanzam delatis opportunus hostium occursus fuit, quo & ipsos rapidius mare impulerat. Ita benignitas fluctuum spolia sui Oceani nobis obtulit. Laurentius quidem de Cabrera Havanæ gubernator omnem curam intenderat, cœlocemque miserat monitum suos, classem Hollandicam viginti circiter & trium navium in propinquo esse, verum illa sex admodum diebus per fluctus varie agitata, intercepta spem atque fidem Nostris intendit. Ad octavum Septembris nuntiato navem hostilem, quæ ex novâ Hispania adventabat, ab una nostrarum occupatam, totamque classem non procul abesse, supremus præfetus opulentissimam classem jam animo invaserat, viceratque. Et socii navales spe accensi prima luce in corbem supremum eniti, & tanquam ex speculâ quaquavorum prospectu suo Oceanum metiri. Primo decem naves eminus oblatæ, quò cum cursum flexisset Im-

set Imperator, haud difficulter ferme omnes (una enim forte evaserat) debellavit. Quippe nihil hostile cogitantes sub obscurum noctis igneis nostræ classis secuti, prius senserunt Fortunas suas in extremo sitas, quam se expedire ullo modo possent. Lintribus & scaphis armato milite munitis, quod majora navigia sudo maris impedirentur, primo insultu facile oppressi. Verum illis naviis non congesta argenti pondera laminæque, neque pretiosæ admodum merces vectabantur. Ubi medium diei processerat, novem aliæ sublimes naves tanquam fluitantes turres in mari spectabantur, quas galeones esse argento stipatas dubitatum non fuit. Quis necessitas tam diu cunctandi in novæ Hispaniæ portu incubuerat, quod unius ruptæ carinæ eximenda fuissent onera. Ita fortuna, quæ in rebus humanis dominatur, vel fatum patriæ nostræ immensam gazam obtulit, quæ si hostilis classis celerius mari se committere potuisset, manibus elapsa fuisset nostris. Citato cursu velis omnibus expansis infectatus Imperator summa ope enitebatur, ut classem hostilem, sinu Matanzæ prohiberet. Verum illa, velis turgentibus hosteis fugiendo, cæcis vadis in ipso portu allisit, uti crebro una calamitas alterius prænuncia esse solet. Subito tumultu, dum animus timore obstupescit, atque opum custodiendarum cupidio incessit, cymbis ultrò citroque pretiosissima quæque auferre in vicinam tellurem nitebantur. Obscurum noctis timorem auxerat, circumspectare omnia & omni strepitu inhorrescere, multum properando parum promovere. Nostri spe immensæ prædæ accensi, cui nunquam satis festinatur, postridie nocti hostilem classem syrtibus hæsitantem, non tam vocibus Imper-

ratoris, quām proprio ardore abripiebantur. Imperator ferro toto corpore munitus, militaris & horridæ abruptæque facundiæ, non tam speciosis verbis quām ignibus oculorum, ignes sociorum inflammabat. Ipse imperterritus, promptæq; audacitæ, in proximum lembum se permittit, ex quo complures sclopetis instructi ex mandato insultum in hostes parabant. Nunquam socordia atque ignavia hostium minus pugnatum, majorque victoria obtigit. Postquam in vicariam armatis validam fistulæ militares aliquotiens displosæ, & si se dederet vitæ incolumitas sponderetur, viæta, antequam se ad certamen fere componeret. Memorabilis hic classiarii audacia silentio obliteranda non videtur. Cum enim ex humili cymba in fastigium Hispaniæ navis eniti nequiret, fune forsan pendulo se ipsum spectantium hostium ingenti opprobrio in superiora attraxit, quæsitisque subito restibus, projectisque, ad eandem audaciam reliquos navales confirmavit. Eadem sorte vitæ conditione Prætoriæ aliisque oblata, ubi classis Hispаниæ Præfectus Franciscus de Beunavida illam accepit, vinci quoque cæteras non puduit. Ita immani præda, nullo nostrorum, vixque ullo hostium sanguine, potiti sumus, cominissis ad Matarancę sinum non confilio, sed æstus marini impetu classibus. Ipse quoq; Imperator non fortitudini suæ, vel præsidiis humanis, sed soli divini numinis benignitati tam ingentem victoriæ tribuit. Prædam trecentorum auri vasorum capacé fuisse à nonnullis annotatum invenio. Compertum quoque ita argenti facti atque infecti pretiosisque mercibus stipatas naveis fuisse, ut pleraque tormenta flecti agitarique nequiviverint. Interea ne militaris & nautica pubes rapaces laxarer manus,

manus, in tempore provisum. Neque severe inquisitum in eos, quos argenti lucisque cupidio in transvorsum abripuerat. Qui nescit temporis velificari, nimiumque rigorem licentia temperare, inutilis est Imperator. Ignoscendum, saepe vel connivendum iis, quæ corrigere est nefas, modo non velut excusso cupiditatis freno in nervum erumpat publica licentia. Exonerandis hinc mercibus quinque dies consumpti, una mercatoriarum velleribus onusta fundo mersa. Quatuor galeones cum una mercatoria Bataviam versus destinatae, cæteræ ignibus consumptæ vel depresso. Inter galeones uni, ne rimis fatiscens in itinere aquis periret, mercibus transportatis, ignis injectus fuit. Cæteræ na- ves, et si nonnunquam ventis disjectæ, mense Decembri & Januario sequentis anni incolumes appulerunt, una tantum Hispanicarum galeonum per diversum (ut loquuntur) canalem adacta versus Hiberniæ litora periit. Plures quidé fero- ciente hyberna tempestate in portu Britannorum, quem Fal- mudam vocant, subsistere coactæ, verum ipse postmodum Imperator stipatus undecim navibus Goedereā, aliæ ad alios portus stationesque delatæ. Quo adventu omnium ordinum homines lætis faustisque vocibus indulgere, præcipue lucri participes, ne sibi quidem ipsis temperare, occursare Im- peratori, dextras porrigere, incondita plebes premere il- lius latus, lætitiae tumultu implere vias, fortitudinem Im- peratoris extollere, ipsum esse maris scopulum, novi orbis domitorem, ignavia & socordia aliorum nihil ibi bene ge- stum. Hoc esse demum incidere venas Regis Hispaniarum, si argenti commercia ex Peru & terrâ firma intercipiantur. Remotiora terrarum nostrarum classium super-

ventu facile labefactari. Hisce nervis Belgis, aliisque nationibus, Hispanum terribilem esse, qui si deficiant, etiam exangue corpus fore. Quæ quidem uti verè ex parte dicebantur, ita virtutem Imperatoris in immensum extolle-re, cum nullo fere sanguine parta esset victoria, insolens & immodicum fuit. Ipse Imperator non ambitiosus sui ostentator, non virtuti sue, sed cœli indulgentiæ tribuit. Et ipse multo augustiora nullo fere populi applausu patraverat, luceento exemplo divitias privatas maximum momentum atque autoritatem victoriæ addere. Quam immensæ autem hujus classis opes fuerint, inde liquet, quod dimidium sortis societatis consortibus distributum, septendecim mensium stipendia classiariis persoluta fuerint.

## C A P U T L X.

*PETRI HEINII ARCHITHALASSI  
HOLLANDIÆ CUM TRIBUS DUNKER-  
KANIS ACERRIMVS CONFLICTVS,  
EIVSQUE INFAVSTA MORS,*  
ANNO CL CXIX. 17 JUNII.

**H**A CTENUS Batavi maris domini, ubique, etiam qua sol oritur, caditque, late terrorem hosti incusserant, famam autem cum utroque orbe terminaverant. Virtus humanum fastigium excesserat, & perdomito fine terrarum rerum humanarum terminos superaverat. Cæterum summa turpitudine mare, quod propriis nostris visceribus imminet, hostis infestabat, an socordia, an rerum quadam vicissi-

vicissitudine haud facile dixerim. Victores foris, domi vi-  
ctis similes: divitiae mercatorum, quo nervo Respublica  
fulcitur, rapinis continuis atterebantur, hinc justæ queri-  
moniæ in nervum erumpabant. Mortuo Gulielmo Nassou-  
vio Archithalasso, qui multis virtutibus decorus obseßâ  
Grolla infelici glande transfossus mortalitatis leges imple-  
verat, Triumviri maritimi Wemmerus Berchemius, Hil-  
lebrandus Quastius, & Guilielmus Melcmannus partito tri-  
bus classibus imperium maris obtinebant, qui ducendis  
onerariis navibus egregiam operam intenderunt. Cæterum  
postmodum Patriæ Patres viro fortitudinis invictæ, Petro  
Heinio, quem tanquam maris scopulum, terrorem Indiæ,  
Hispaniæ procellam etiam hostes admirabantur, partes tu-  
tandi maris cum summo imperio obtulerunt. Ille autem  
evestigio terrore nominis vicinum mare implevit, & ne  
hostem valentiorem negligentia faceret, navibus suis ostia  
Dunkerkæ, quæ opportuna rapinis magnum mari excita-  
verat incendium, obturavit. Verum fissæ noctis tenebris,  
juxta syrtes arenaceas, quîs Dunkerka obtenditur, Præto-  
ria & vicaria hostilis cum altera elapsæ, certas nostri Impe-  
ratoris manus non effugerunt. Ille imperterritus diri ful-  
minis instar, quod durissima quæque frangit vel penetrat,  
non tantum adversus hostium vires, verum etiam adversus  
ipsas calamitates, atque adeo ipsam mortem infractus con-  
tendit. Ipse inter utramque navem medium se sttit, ne  
non nisi vincendo elaberetur. Dum inter horrendos tor-  
mentorum ictsus dextra gladium vibrans socios militari fa-  
cundia accedit, ipse Imperatoris & militis munere fun-  
gens, machina majori humero tenus convulsus, subito oc-

cubuit, atque immortalem spiritum cælo dedit, nomenque æternum per totum terrarum orbem diffudit. Occiso tanto heröe, Martinus Trompius, amplius memorandus, qui centurionis titulo in Prætoria navi virtutem exerebat, diu cœlatâ ejusdem morte ita instigavit classiarios, ut extra se rapti, non tantum pro vita, verum etiam pro gloria, quam ipsi vitæ præponebant, extremis se exponerent periculis. Perrupit tandem, liceat ita loqui, Acheronta Herculeus labor, nihil enim audentibus invium est. Et fortitudo hostium, quamquam partes suas impigre impleverit, tandem tamen ubi, omnem impetum effudit, elanguit. Ita Prætoria cum Noctiluca invasæ miserum humanæ sortis spectaculum præbuere. Furore militari cæsi fere omnes inferias veluti occiso Imperatori nostro obtulere. Tam breves & mutabiles rerum vices sunt, ut qui modo maris domini, nunc jaëtati varietate fortunæ subito cum vita eodem imperio turbarentur. Perterritus tam cruento Martis speculo Michaël Romboutus, qui vicaria potestate classi hostili imperabat, in fuga omne præsidium posuit, neque experiri pugnandi aleam sustinuit. Infectabatur illum Iacobus Vincius, & obscuro noctis incerta tormentorum verbera infligebantur. Cæterum ubi prima lux appetebat, tum primum geminari machinarum tonitrua, certisque iætibus ita quassata hostilis navis, ut disjecto malo, antennisque gentibus, injectisque pedicis, post sesqui horæ acerrimum prælium virium impotens, & exhausta sub sponsione vitæ se suaque omnia arbitrio victoris dederit, quamquam usque ad extremum virtus illorum nihil inexpertum omiserit, & mitiores vices versabilis fortunæ expectaret. Victoria quidem

dem hæc gloria, sed eo minor, quod in morte tanti herois  
ingens detrimentum Respublica ceperit. Quippe vir virtute  
sua nobilis, etsi majoribus obscuris genitus, tumido mari  
inter scopulos ac cautes enutritus, artes nauticas omnes à  
parvo edoctus, ab infimis nautarum vilissimisque ministe-  
riis ad supremam maritimam dignitatem fuerat proiectus.  
Neque unquam illi aut ab infenso mari, aut ab hoste quies.  
Animus illi ingens, Martius oculorum vigor, sermo rarus,  
illustribus facinoribus intentus. Nauticæ pubi carus acce-  
ptusque, etsi disciplinæ strictæ ac contentæ. Casuum incer-  
ta providentiâ ac cura moderabatur, ita tamen ut à temeri-  
tate vel timore intactum nomen tueretur. Idem occasio-  
num momenta captare solers & industrius. In periculis ne-  
mo animosior, eadem neque provocare, neque oblata de-  
trectare solitus. Postremum quatuor summi imperatoris  
virtutes in illo elucebant, militiæ maritimæ scientia, virtus,  
autoritas, & felicitas. Defunctus est summo omnium mœro-  
re, cum maritimæ dominationis restaurandæ unica spes in  
illo sita esset, cum magnis facinoribus patrandis intentum,  
ipso admodum initio fati iniquitas rapuit, an invidit. Luge-  
bant hunc casum Patres, qui maritimam securitatem ner-  
vos & opes Reip. esse noverant, atque imperium iis artibus  
fulciri debere, quibus initio partum fuerat. Publicis im-  
pensis sepultura, æternumque illi monumentum decreta  
fuerunt. Sepultus magnifice Delphis Batavorum, funusque  
centurionum humeris elatum. Exequiis maritimi Impe-  
ratoris spectandis circumfusi civium veluti fluctus attolle-  
bantur. Omnium clamor & gemitus, præcipue nauticæ  
pubis. Una omnium vox erat, cecidisse Oceani invictam  
rupem,

rupem, hostium terrorem ac formidinem, cuius trophæa cum occidente sole terminum invenirent. Hæc Nostri, contra hostis lætitia fremere, & sicut patientia gaudiorum difficilis est, vix se ipsos capere, haec tenus Dunkeræ faucibus clausis nunc iterum apertum mare jactare: In morte unius personæ veluti triumphum prostrati devictique Oceani sibi polliceri. Ita varie ab amicis luctus, ab hostibus gaudium agitabatur: sicut ita compositæ sunt res mortalium, ut unius calamitas alteri sæpe in gaudium cedat.

## C A P U T L X I .

*NOBILIS EXPEDITIO SVB IMPERIO  
HENRICI LONGQVII, ITEM PERICULOSA  
VELITATIO INTER EVNDEM ET IMMENSAM  
CLASSEM FREDERICI DE TOLEDO. OLINDA  
PRÆFECTVRÆ PERNAMBUCI OPPIDVM  
TERRA MARIQUE OCCUPATVR.*

ANNO CLX IOC XXIX.

**C**UM ex argentifera & Hondurensi classe opes sociati Indicæ cumulatae essent, & Fortuna ubique ad Occidentem indulgeret, extremum solem potentissima classe fatigare Directoribus visum fuit. In ipso limine vitoriæ ulterius tendere, neque occasiones intermittere, atque hosti in ipsis faucibus spiramentum intercludere, summa votorum erat. Quænam novi orbis pars petenda, qui per immensa spatia se diffundit, dubiis consiliis agitabatur. Destinata demū expeditioni fuit in Brasilia nobilis Præfectura Pernambuci, quæ propter fertilitatem in primis cannarum, quis

quîs saccharum coagulatur, paradisus Brasiliæ censemur. Quam ulterius postmodum describemus, cæterum nunc in instituto pergit. Expeditæ itaq; classi, quæ quinquaginta & tribus navigiis, & triginta lembis, novem & ultra millibus militaris & nauticæ juventutis constabat, cum summo imperio Præfecti Generalis titulo præficitur Henricus Loncqui, virtutis & expeditionis Petri Heinii nuper socius, cum classis hostilis ex Hispania, quam novam dicunt, quæ fortunam opesque Regias continebat, Cubâ Insula haud procul, ad Matancæ sinum, in Batavorum potestatem concessit. Cum ipse sibi exemplum fuisse virtutis, exemplum tamen Petri Heinii supra omnem virtutem erat. Ipsius animum & vultum semper præ se ferebat, illum semper sibi ostentabat. Militiæ præerat Didericus Wardenburgius, qui ad omnia præclara magno cursu ac totis virtibus tendebat. Cæterum dum summa omnium consternatione hostili tumultu in patria cuncta flagrarent; cæde, incendiis, cruento atque luctu, postremum vastitate atq; fuga Velaviam vicinaque loca late hostis impleret, inter ancipitia fluctuantis patriæ diutius retentus miles, quem per sedecim hebdomadas impatiens moræ Loncqui ad insulam S. Vincentii, ubi conventui locus destinatus erat, expectaverat. Antequam autem Promontorium viride tetigisset Imperator, inter magnam Canariam & Tenarissam insulam, Regiæ classi, quæ sub summo Imperio Frederici Toletani non tam navigiis quam castellis & propugnaculis maris constabat, occursans, periculo certo se subducere omni ope nitebatur. Quippe partitis navibus, octo tantum penes illum erant navigia, quēis belli aleam experiri non tantum te-

meritas, verum & dementia videbatur. Neque enim minus laudis est, ubi necessitas incumbit, prudenter se recipere, quam fortiter pugnare. Omni itaque studio contendit ventum superiorem captare, atque extrema Canariæ superrare, cæterum circa flexum insulæ, ventis cum velo luctantibus, Hectere naveis & in altum proficisci cogebatur, atque ex parte mediis se immiscere hostilibus navibus. Medio diei septentrionem versus navigatum fuit, & quanquam hostis in idem incumberet, & perdendarum navium lubidine summopere agitaretur, turpi tamen metu perculsus ipsas aquas laxabat. Treis tantum naves captato superiori vento, quibus non labos insolitus, non armatus hostis formidolosus erat, inter quas & Archithalassî, qui post Generale prima autoritate pollebat, in quatuor nostras hostilia cuncta moliebantur. Machinæ majores, fistulæque militares undique pilas suas ejaculabantur tanto horrore, uti furiis illis cœlum intonare videretur, incendioque veluti mare arderet, & densissima fumi nubes aërem obduceret. Una navium ad proram implicare se prætoriæ nostræ tentaverat, sed cum in eo frustra fuisset, versus inferiora fluctuans, ita ex sinistra parte explosis omnibus machinis à Prætoria nostra excepta fuit, ut clamor cum morte luctantium, vulnerorumque, late se diffunderet. Dum Nostri ulterius versus septentrionem tendunt, summus classis Regiæ imperator admodum propinquabat, & quia inferius vias maris tentabat, obliquato cursu, rectâ impetum in nostros facere in animum induxerat suum, cæterum deceptus regione viarum prætergressus adoriri nostra navigia, quæ se in unum cōarctabant, nequibat. Postridie, ubi primum lumen aurora

aurora spargeret, undecim tantum regiæ naves se ostentabant, treis à latere ventum superiorem naëtæ, reliquæ septem, inter quas & ipsa prætoria suprema Generalis locum tenebat, vestigia nostra insectabatur. Cæterum cum hostis globum junctarum navium Nostros pro munimento habere cerneret, ne divisæ circumvenirentur, Imperatorem nostrum magna prudentia cuncta ad pugnam composuisse, difficillimumque esse eos insultare, qui vitæ prodigi labores omnes, pericula, dubias atque asperas res, denique ipsam mortem facile toleraturi videbantur, adoriendi consilium omisit. Ita immensa illa regia classis, horror Oceani, sylvæ aquis innatantis ingens spectaculum, ludibrio Nostris se exposuit, & quæ invicta videbatur, ne quidem ausa victoriam periclitari. Porrò nunc cætera breviter expediām, quæ classis nostra junctis navibus & militaribus copiis Wardenburgii patraverit, in primis quia terrestris hæc magis quam maritima fuit expeditio, etsi infracta robore sociorum navalium pectora lacertos quoq; suos moverint, quos & horror efferati maris ad quoscunque casus asperârat, ita ut neque terrâ neq; mari superiorem admitterent. Regio, quam petebant, erat Brasilia, cuius Pernambucum nobilis est præfectura, commerciis sacchari admodum opulenta, quæ ad sexaginta miliaria extenditur, namque versus austrum usque ad flumen S. Francisci excurrit, quo à præfectura Bahiæ separatur, versus septentrionem Itamaracam Provinciam attingit. Vere perpetuo luxuriant agri, montes vallesque arundinibus sacchariferis consistæ, sylvæ Brasiliano ligno horridæ. Quotannis nonaginta naves mercibus stipatas in Lusitaniam appulisse memoriae traditum

est. Plures molas trusatiles, quas Ingenios appellant, mancipia, quæ ex Angola ingenti numero huc traducuntur, immodicis laboribus versant. Caput regionis Olinda civitas, quæ sparsim editis collibus sita in vicinum mare prospectat. Non procul Reciffa pagus flumine Biberibi & Oceano cingitur, vecturis navium destinatus locus. Ubi ad tertium Februarii diem anno sequenti Brasiliæ ora primum se aperuit, divisæ copiis terra marique hostem invadere consilium fuit. Cæterum aquis non prospere cessit expeditio, namque ostia rupis, qua Brasilia obtenditur, mersis navibus præclusa introitum impediabant. Barletta, ubi mare quoque rupem interluit, extensis catenis obturata, omnem intrandi spem ademerat. Tormentorum quoque iætus, quod mare modò attolleret, modo deprimeret navigia, incerti & vagi in extrema munimenta mittebantur, contra ab hoste pilis grandioribus Nostri ita impetebantur, ut non nihil retrocedendi incumberet necessitas. Cæterum quam victoriam mare invidit, terra suppeditavit. Namque Didericus Wardenburgius, militiæ Præfectus impiger & militiæ vetus, cum militem ad septentrionem Olindæ terræ expuisset, latè omnia terrore implevit. Ipse primus, quò cæteros virtutis exemplo traheret, atque adeò quo adversum hosteis expeditior alacriorque esset, saltu vicinam tellurem pressit, simulque genium loci amplexus, aut hic, inquit, moriar, aut victor evadam. Vos autem, milites, me non tam Imperatore quam milite utimini. Spes jam magna dominationis in manibus nostris sita. Cæterum non opus est, ut animum vestrum accendam, qui jam generoso æstu flagratis. Ite alacres & spe pleni, dum hostium impetus cunctatione

tione languescit, dum metus & fuga illos affigit. Neque vero Deus sirit, ut quod sponte nobis offert Fortuna, metu aut ignavia cujusquam elabatur. Tutissimus quisque est qui mortem contempsit, timidissimum quemque invadit. Ollindam civitatem videtis? (distabat illa à litore ad duo circiter miliaria) hic hodie trophæa nostra figemus, aut honesta morte defungemur. Cæterum quid odiosum mortis nomen propono? Proh Deūm atque hominum fidem! victoria in proclivi est, audete modo vincere, cætera res ipsa expediet. Concitata hinc pubes militaris tripartitis copiis ad urbeim tendit. Ubique fuga & solitudo hostis, nisi quod primum impetum ad modicum amnem, quem dulcem (Rio dulce) Lusitani appellant, aggesta ex cespite lorica, contra nostros effuderit. Octingenti milites munimentum illud trans amnem insederant, qui ibi Nostros machinarum ignibus sistere tentabant, cæterum avida spes victoriaribz ibi conatus suos sisti indignabatur, & præcipitem animum ad extrema impulit. Neque igneis neque aquæ sistere audaciam quibant, cum enim machinæ campestres in hostem intonuissent, per amnem vadosum trancurrentes, tanto insultu in hostes irruperunt, ut sua deserentes vicinis se receperint nemoribus. Hinc Nostri campo victores tribus partibus animose admodum ipsam urbem invadunt. Et quamquam acriter resisterent hostes, sicuti fieri solet, quando pro aris & focis opibusque privatis, quæ prima mortales putant, pugnatur, postremum tamen vicit Batavorum virtus, contra illis, quod plerunque in atroci negotio solet, insolito metu omnia trepidabant, neq; consilii, neq; virium copia, cum illæ alterius ope destitutæ mole sua fatiscant.

Itaque passim festinare , consultando nihil definire , modò  
infra fortunam se deprimere , modo vano nisu iterum se  
erigere , ingenti metu sua pericula metiri , omnia paverè ,  
denique sibi suisque diffidere , mulieres quoque afflictare  
se , atque ad Deum immortalem supplices manus tendere .  
Ita capta feliciter urbe cum vicinis munimentis , Reciffam  
vorsus expeditio se contulit . Matthias Albukerkius Olin-  
dæ gubernator natura ferox & vehemens , cum retinendæ  
Reciffæ diffideret , viginti naves igni subjicit , mercium-  
horrea , quîs sacchari & ligni Brasiliiani ingens vis stipata  
erat , flamarum quoque injuriis reliquit . Ad vicies cen-  
tena millia ducatorum hoc damnum aestimatum fuit . Pri-  
mo munimentum S. Georgii duce Steincalefeltio sub ob-  
scrum noctis milites sexcenti irruperant , verum irrito mo-  
limine . Quanquam autem omne discrimen spes uberioris  
gloriæ vinceret , cum tamen scalæ nimis humiles celsiori  
muro non responderent , nulla eo virtus potuit eniti , inpri-  
mis quia pars missilibus ex alto turbabantur , pars machi-  
nis majoribus impetebantur . Terrorem augebat nox ob-  
scura , tanto facinori destinata . Hinc novi animorum motus  
indignatione concitum militem agitabant . Post properatos  
evestigio accessus , ex suggestu tormentorum continuo globi  
majores munimentum ita pressêre , ut tandem jussa facere  
hostes cogerentur . Miles sine ullo vexillo , fistulis manua-  
riis atque ellychniis , gladiis tantum à latere cinctus , eges-  
sus , sacramentoque adactus , ne intra sex menses apud ho-  
stem stipendia mereretur . Qua conditione etiam iis , qui  
munimentum aliud extrema rupe vorsus mare situm defen-  
sabant , etsi tridui primo moram stipulati essent , donec ab

Albu-

Albuquerquo certiores facti essent, tandem tamen, cum frustra obluctarentur, se arbitrio victoris dederunt. Insula Antonii Faazii milite vacua sponte cessit, neque impetum expectavit. Spei inopes extrema experiri, & Fortunam lacessere, lateque victori resistere, inconsultum videbatur. Ita ingens Victoria, paucis nostrorum amissis, incredibili hostium damno procurata, nervos hostileis succidit. Hinc à parte hostium geminatus luctus & mæror, à nostrâ lætitia & gaudium varie agitabantur.

## C A P U T   L X I I .

*P RÆLIVM INTER TRES DVNKER-  
KANOS, ET UNAM CELOCEM, CUI NA-  
VARCHVS ET PRÆFECTVS ERAT  
IOANNES CORNELII LICHTHAR-  
TIVS, ANNO C I O I O C XXX,*

Mense Novembri.

**I**NNOTUIT quoque incredibilis Lichthartii virtus, qui cum anno c I o I o c xxx ineunte Octobre Pernambuco celocem solvisset, sequentique Novembri secunda navigatione Fretum inter Britanniam Galliasque tetigisset, primo à Cantabricis quinque navibus, qui se Gallicas fingeant, frustra dolo impetus, dein cum tribus Dunkerkanis, quîs sub specie amicitiae Nostris imponere, & imprudentes superare in animo erat, pugnandi gravis incubuit necessitas. Præfectus ubi se dolis circumveniri videt, (namque hostes ita propinquo insultu nostræ navi imminebant,

nebant, ut anterioris veli antenna speculo, ut vocant, se implicaret) convocata pube nautica, tormenta omnia evestigio & quicquid prælio usui esse poterat, expediri jussit, simul orare, hortari militem, ne nunc deficerent, ne numerum metuerent navium, virtutem omni numero potiorem, saepe exigua manu victores fuisse, vinci non posse ab hostibus, modo mortem non metuant, se certum esse, antequam sedeat, ignem navi injicere, atque ita post mortem hostes quoque vindicare. Pluribus opus non erat, facile enim juventus accensa, quæ ferocia maris & frequentibus periculis indurata mortem contemnebat. Hinc apertis fraudibus hostis imperat, uti Præfectus pro Rege Hispaniarum vela dimitteret, responsum se nullum nisi Principem agnoscere Auriacum. Dein undique tormenta hostium circumtonare, atque ita medium navem quassare, Nostri quoque expeditate admodum non frustraneis ictibus hostiles naves fatigare: etsi impar omnino congressus esset, nostra enim navis quanquam celeritate in omnem partem mobilis esset, magnitudine longe hostilibus inferior erat, cui cum tribus configendum erat, quarum una triginta sex ænea tormenta, altera viginti octo, tertia duodecim vectabat, queis lacerare & deprimere navem ingens hostem cupido agitabat. Lichthartio tamen animus belli ingens, periculorum vixit, tantummodo gloriæ supra modum avidus erat. Neque insultare in navem hosti fiducia erat, metuebat enim ne Præfectus, vitæ prodigus, sicut ante prædicaverat, ignem pyrium accenderet, atque ita seipsum cum hostibus certo devoveret exitio, igneisque ferales in pestem suam converteret. Hoc prælium per octo horas tanto horrore agitatum

tatum fuit, ut nostra navis undique hostibus cincta infra aquam septendecim, superius ad quadringentos ferme ictus exceperit, malus major in aquas dissiluerit, minor non in totū fractus titubans nutaret, vela omnia essent disiecta, divulsumque gubernaculum: spumante quoque impetu aperta navigii latera urgebat infensum mare, foraminibus tamen obstruendis summa adhibita fuit industria. Ita fluctuabat lacerum navigium vel potius truncus, & cum hoste atque aquis colluctabatur. Lassus tandem hostis neque indemnisi, cum foros transilire non auderet, celocem dimisit, ratus ita dedolatam, uti mari suas deberet inferias. Verum Præfectus sentinam continuo movendo, inter Koxbrotium & Goudtstartium periculoſo ſinui eam commisit, atq; succurrentibus Britannis summo periculo maris subduxit, Pleimuthæq; portui incolumem ſtitit. Ita Lichthartius refecta navi, summo cum hostium opprobrio, post tantas rerumasperitates, (quippe non tantum hostilem terribilem impetum, verum etiam naturam elementi cæteris imperitantem industria vicerat) in patriam appulit, & ab undeviginti viris torq; aurea virtutis præmio donatus est.

## C A P U T   L X I I I .

*P R A E L I V M N A V A L E I N T E R H O S-  
T E S E T F O E D E R A T O S A D S C A L D I M  
F L U V V I V M . A N N O C I O I O C X X I .*

**M**AGNO paratu expediverat hostis classem ex 1. ingentibus cymbis veliferis, decem pontonibus, o-

K k Etode-

etodecim planis naviis, pluresque alii lembi aderant, qui remigio agitabantur. Ne in hostico penuria annonæ premeret, cibaria ad quatuordecim dies sumpta, machinæ maiores decem, ultra quadringentæ leviores, quatuor ignitorum missilium millia, undecim vasa argento, tria funibus stipata: præter nauticam juventutem, quæ ex omni Brabantia Flandriaque huc frequens confluxerat, quinque millia militum, septem Ceurlingorum, quos barbara crudelitas nobiles fecit, millia in universum lustrati fuere. Joannes Nassovius, & Princeps Barbanconius summā præfecturam obtinebant. Ubi hæc classis ad octavum Septembbris Antverpiâ, Archiduce Isabella, & Maria de Medicis presentibus, se Scaldi commisit, tota civitas commota gaudio exultare, certam sibi victoriam polliceri, concursare plebes, lætis auguriis indulgere. Sacris iniciati, postquā religiosa voce fausta omnia vovissent, etiam post mortem virtutis æterna & indubitate præmia largiri. Constat Legatum Pontificis in hæc verba erupisse: Ite sacrata cælo pubes, & execratos cædite usque ad internacionem. Quanquam autem inde tympanorū ac tubarū horror, hinc victoriæ concentus etiam ignavum quemq; accenderent, nunquā tamen efficacius quam adhortatione sacra mors suadetur, quæ etiâtyrones in armis, imo cum multis pereundi libidinē rapit. Die jam ad vesperam inclinato primo ad Perlanum munimentū devecti, atq; hinc Doulam ponè per Saftingense ostium, præter propugnaculum Hogewerfam & Bergam ad Zomam, Romerswaliam contenderunt. Pars navium vadis fixa crescentibus aquis iterum fluitans attollebatur. Naves nostræ, quæ excubias agebant ad Saftingense ostium, paulatim Bergam vorsus

vorsus cessere, ubi classis nostra in procinctu, quæ præter solitam sociorum navalium multitudinem mille admodum & quadringentis militibus auæta fuit. Auriacus, cui arca na hostilium consiliorum patebant, summa celeritate ditionem Tolanam quatuor millibus militum insederat, atque inter hanc & Gulielmopolin, omnes marinas speculas, & dolia, quîs vadorum brevia & crebræ syrtes monstrantur, tolli imperavit. Ita una aquæ species circumfusa ubique obductis vadis, quæ indies mutantur, etiam peritis locorum facile imponit. Dum Marchio de Sanctacruce in ditionem, quæ à Principe nomen accepit, contendit, uti, si res prospere cessisset, consilio & ope suos juvaret: classis hostilis, quam Nostri sub imperio Hollardi, qui absente Præfecto maris, vicaria in classe autoritate fungebatur, & tribuni militaris Maisonneufi insectabantur, iterum cæco arenarum hæsitans pugnandi initium dedit. Horridum hic & cruentum fuit Martis spectaculum, dum densa nebula, qua tanquam nocte cœlum obducebatur, pavorem sibitum & incompositum hosti incuteret. Dispersis quippe hostilibus navibus, sors cuncta turbabat, hinc aquæ, illinc ignes fumi tenebris cincti, suorum atque hostium ignoratio, denique secuta quarundam deditio, vel fœda vorsus novam Vossemariam fuga. Hinc clamor virûm, clangor tubarum, fragores & strepitus tormentorum, Nostris in audaciam, illis informidinem opportuna erant. Fugientibus omnia advorsa, & quod extremum esse solet, confusis ordinibus, nulla supererant calamitatis remedia. Pavidis omnia consilia in incerto fluctuabant. Certis interea tormentorum iectibus naves lacerabantur, vel violentis ignibus consumebantur:

mali & antennæ disjectæ profundo agitabantur: alii vadis insultabant, ut caperentur, alii ignes fugiendo, aquis peribant: mare fervebat incendiis, neque suis sed factitiis tempestatibus horrebat: tabulæ cum hominibus sparsæ vasto gurgite jactabantur, cuncta denique præsentem mortem viris intentabant. Diversa pereuntium facies, certa tamen plerisque mors imminebat, qui capti non fuere. Plures ruptis navibus in profundum transilientes enatare nitebantur, sed lassatis tandem brachiis aquis absorbabantur. Ita instruetissima classis, brevi tempore fusa, mersa vel ignibus fœdata pessum ivit, an socordia & ignavo metu, an quod, ubi fata nutant, consilia cuncta turbantur, distrahunturque. Princeps Barbansonius, Comites, Joannes Nassovius, Bosfuvius, Fresenus, Willervallius, & Meganus circa territorium, quod à Principe nomen accepit, cymbâ sibi salutem pepererunt. Captivorum quatuor millia, sexcenti, & sexaginta quatuor numerabantur, inter quos plurimi primæ auctoritatis & dignationis. Decem tantum cymbæ tantæ calamitati fugâ se subduxerunt. Cæteri omnes (præter pubem nauticam decem millia militum classem impleverant) igne, mari, paludibus fœdâ admodum strage occubuerunt. Diu mare & Scaldis laceras tabulas, puppeis, arma, virosque volvebat, & in vicina litora vel vada tanquam purgamenta Oceani eructabat. Ita tumidi & præferoces hostium spiritus, qui ante prælium certam sibi spoponderant victoriam, subito collapsi ludibrio Fortunæ fuerunt, & quod proprium est arrogantiæ, ante pugnam victores, & supra modum gloriosi, victi infra omnem humilitatem abjecti. Inprimis hoc in Hispanica gente compertum. Victores immodici

modici fastu, hostium contemptores, imponere fœlicitati frenos nequeunt, humanæ denique fortis obliviscuntur, vici muliebrem animum induunt, servilem humilitatem non natura sed extrema necessitas extorquet: cum hoc demum sapientis sit, neque rebus secundis insolescere, neque adversis dejici, & tranquillo animo affectus freno rationis regere.

## C A P U T L X I V.

*P RÆLIVM NAVALE INTER ANTONIUM D' OQUENDO, CLASSIS REGIÆ SVMMVM PRÆFECTVM, ET ADRIANVM PATERVM, GENERALEM CLASSIS HOLLANDICÆ, ANNO c l o i o c x x i .*

**M**issa erat in Brasiliam Regia classis navibus & milite valida, sub imperio Antonii D'Quendo, quo crescenteis vires Batavorum contunderet, eoque magis properatum, quod Bahiam obsidione cinctam rumor in Hispania increbuerat. Noster Generalis obviam eundum hosti ratus, atque mari debellandum, antequam terra ditio nem invaderet, Fortunis cervicibusque cunctorum immineret, assentiente senatu Indico Reciffa solvit, Bahiam versus expeditionem fecit, uti vel in ipso sinu, vel quocunque alio modo classi tante virtute resisteret. Undecimo Septembris die, cum sol jam præceps occidentem peteret, immensa classis in conspectum venit. In quam rem vexillo

Imperator signum dedit, tum celoce nunciavit, uti reliquæ naves in propinquo se sisterent, ineundo prælio cuncta instruerent. Post transactam noctem primo lumine quinquaginta & treis velivole naves mari se ostentarunt, tanquam si integrum nemus mari incumberet. Comperatum postmodum duodecim Castiliæ, quinque Lusitanicæ galeones, duas Patachas, (ut vocant) cunctas simul quadringentis æreis tormentis onistas, ultra tria hominum millia habuisse, præter mercatorias vel actuarias naves milite stipatas, ita ut quinquaginta tria vela numerarentur. Nostra classis sedecim tantum naves, inter quas & celoces, præter juventutem nauticam, novem militum cohortes, queis imperabat Engelbertus Schuttus, summus vigilum Præfectus, numerabat. Ubi hostis in propinquo, Imperator militaris gloriæ appetens, generoso spiritu ardens, militari facundia omnes ad pugnandum hortari, monere ne Remp. ne pristinam virtutem desererent, se nunc decus, gloriam, Indicæ Societatis salutē in dextris suis portare, sin victores præmia certa, sin fortuna victoriam inviderit, ne se inulti paterentur trucidari, vel capti fœdam servitutem servirent, & morte graviorem vitam exigerent. Neque fugam decoram, contra hostem vinci solitum. Fugiendo pericula sæpissime incurri, audacissimum tutissimum esse. Simul imperat, ut binæ quæque naves galeones singulas adorirentur, quas octo tantum numero esse falso certior factus fuerat. De quinque Lusitanicis galeonibus, aliisque navigiis nihil constabat. Cuncti admodum promissis virtutē ostentabant, cæterum, ubi ad prælium ventum, plerisque fides, decus, honestas, postremo divina atque humana omnia contemptui fuere.

fuere. Nonnulli navarchi animum despondebant, ubi instruētissimam classem tot majoribus tormentis horrendam oculis suis usurparent. Imperator tamen, et si sero se imparem hostibus, periculoque ingenti exponi videret, fortunam tamen suam, quæ advorsa nutabat, invicto animo tentavit. Circa horam decimam navi Prætoriæ Generalis Ocequendo se implicuit, quæ instar arcis maritimæ quadraginta octo ænea tormenta vectabat, cui & aliæ galeones suppetias ferebant. Horribile tum spectaculum in patentî æquore, tormentorum horrendus strepitus ad cælum ferri, ardentia utrinque tela, glandesque majores & minores instar densæ grandinis utrinque volare, adversis vulneribus acceptis contra mortem luētari, enī atque iterum concidere, vindictam hostium avidius quam vitam suam æstimare. Animose Nauarchus Walachriæ navis Prætoriæ circumventæ succurrebat, & pugnare pares erant, & respondere parati, nisi advorsâ fortunâ, quæ in præliis ut plurimum maritimis dominatur, Prætoria ignem in puppi concepisset, qui nulla cura extingui poterat. Interea ardentes tabulatis in prora adhuc pugnabant, frustra suppetias expectantes, donec colluctante cum ignibus navigio, ingens vorago faucibus vastis patuit, crepantibusque flammis late se expandit, donec laxata tota compages hisceret, atque seipsum præcipitaret. Pauci qui evasere ab ipsis Hispanis recepti sunt: plerique ex sociis aquis submersi, atque adeò ipse Imperator, perfide à suis desertus, diu fune apprehenso tandem lassitudine confectus animam Oceano dedit, fluctuansque elementum pro vasto sepulchro accepit. Præfectus, cui secunda post Generalem erat auctoritas, Martinus

tinus Thysenius, juncta bellica navi, cui Ultrajectinæ Provinciæ nomen inditum fuerat, Prætoriam Hispanicam eodem impetu adortus, adversus omnia pericula ipsamque adeò mortem invictum animum gerebat: post dimidium horæ tormentorum valida procella Ultrajectinæ navis eminentem malum antennis gementibus fregit, eademq; post geminatam horam feralibus quoq; ignibus, qui extingui nequibant, exarsit, duplicesque fluctus hinc aquarum, illinc ignium attollebantur. Juventus ancipiti periculo commota, ne aquis periret, in vicariam hostilem navem se præcipitem dedit, ex desperatione victoriam sperans, verum ingenti impetu expulsa partim aquis, partim ardenti suæ navi se dedit, quæ tandem & ipsa tota concremavit. Cæterum plures quam ex Prætoria ab Hispanis recepti. Interea rebus suis non diffidebat Martinus Thysenius, verum galeonem præcipue post Prætoriam dignitatis, cui præerat Franciscus de Vallesilla Admirantis Hispanici titulo, ita perforavit, ut immenso specu, alveo navis hiscente, mare admitteret. Ex duabus galeonibus altera quoque depressa, altera devicta fuit, cum ducentis quadraginta captivis, qui plerique erant Castiliani. Utrinque plures obtruncati vel ad vorsis excepti vulneribus, ita ut neq; hostes neq; Nostri victores vel vieti viderentur. Hispanica tamen classis victoriæ nomine tumida mare tenuit nostra, præter illos qui non pugnarant, admodum lacerata quam celerrime Reciffam Pernambuci contendit. In locum defuncti generalis suffectus est Martinus Thysenius vir impiger, & vitæ pro patria & Societate contemptor.

CAP.

## C A P U T L X V .

*P R Æ L I V M N A V A L E I N T E R N A -  
V E M P R Æ F E C T I C O R N E L I I I O A N N I S  
H A N I I , E T D V A S D V N K E R K A N O R V M  
N A V E S B E L L I C A S , A N N O  
c I o I o c x x x i i i .*

**I**M M E N S A S opeis mare Batavis aperuerat, ita ut in punc-  
to & spithama terræ, quæ quotidie furore aquarum exeditur, totius terrarum orbis commercia stringerentur. Altera manu Orientem, alterâ Occidentem navibus nostris contigeramus, ubi rebus humanis terminum voluit esse na-  
tura, & quasi unus non sufficeret orbis, extra solis pene vias emensi mari congelato non amplius cum hominibus, sed belluis pugnaveramus: cæterum prope nostra litora ab infenso hoste opes mercatorum flagellabantur, Dunkerka modicum oppidum, & rapinis suis infame, mare nostrum infestabat. Itaque à Directoribus opprimendæ piraticæ auctoritate publicâ novæ bellicæ naves constructæ: queis strenuissimi quique & virtutis spectatæ præficiebantur. Præ cæteris conspicua erat virtus imperterrita Cornelii Hanii, qui nihil inexpertum atq; inausum contra hostem reliquerat, septies victor superatis navibus ovans in portum revor-  
sus fuerat. Totiens victorem fati necessitas vicit, quanquam & illam contemnendo de ipsa morte magno animo triumphavit, & sanguine suo posteritati æternum nomen reliquit. Quippe, cum forte duabus Dunkerkanis navibus

occurrisset, medium se tanto impetu ingessit, ut prompta ad omne discrimen audacia hosti terrorem incusserit. Illa enim demum incepbat invictus ejus animus, quæ ardua factu magnitudinem ejus capiebant. Cito gloria obsolescit in iis patrandis, quæ proclivia sunt, difficillima quæque virtus segetatur, quam decus, æternitas nominis comitantur. Post horrendum trium horarum prælium una hostilium navium ita crebris tormentorum ictibus perforata fuit, ut hausta aqua profundum peteret, classiarii fere omnes mergerentur. Altera tam fœdo spectaculo territa, expansis velis infuga sibi præsidium quæsivit. Victoria incredibilis fortissimi herois morte tristitiam peperit, cuius virtuti publicum monumentum Amstelodami erectum intuentium oculos pascit, quo memoria tanti viri posteris consecratur.

## CAPUT LXVI.

*PRÆLIVM NAVALE INTER COM-  
MENDATOREM JOANNEM EVERARDI, ET  
ARCHITHALASSVM HOSTILEM CO-  
LARDVM, ANNO cI cI cxxxvi.*

**I**OANNES Everardi Præfectus aliquot navium ducendis Lonerariis Galliam versus operam suam intendebat, cæterum nonnullæ tum Texelia, tum ex Mosæ alveo sine ullo præsidio mari se commiserant; inter quas duæ legatos Fœderatorum Procerum in Britanniam vectabant, aliæ equis onustæ Galliam petebant. Colardus quatuor regiis navibus, quæ ad omnem incursum validæ solidæque erant,

for-

fortunam maris experiri jussus fuit. Cæterum dum Dunkerka solvit, Prætoria vadis fixa hæsit, certo veluti calamitatis omine. Advorsa sorte non fatigabatur ejus virtus, verum, uti in generosis spiritibus solet, imperterrita, potiundæ alicujus insignis victoriæ immenso desiderio flagrabat. Illuxerat decimus & octavus Februarii dies, cum quatuor vela nostrorum suum duobus inde milliaribus expansum tumorem ostentabant, alterum litoribus Galliæ circa Diem vicinum, proprius & opportunum injuriæ videbatur. Illuc itaque propere flectendum cursum ratus, unam bellicarum nostrarum navium, cui præerat centurio Petrus Adriani, præternavigando crebris tormentorum ictibus verberabat, atque insecurè duæ aliæ hostileis eadem sorte glandium furiosam procellam ejaculabantur: neque infirmi animi noster centurio, qui in hoc navium insultu securus, fortitudinis inexpugnabili munimento se circumdederat, etiam suis machinis hostem territabat. Sicut autem uno momento vagum & fluctuans mare vortitur, ita subita à presidiariis nostris navibus coorta fuit tempestas. Audito enim tormentorum sonitu, Ioannes Everardi, quatuor suis bellicis navibus propinquans acriter prætoriæ hostili insultavit, ut speculum, uti vocant, navis rumperetur, tota puppis fœde lacera ingenti se aperiret hiatu. Itaque dum metuit Imperator classis hostilis, ne unico impetu Nostri illâc transilirent, jaëtis anchoris, lanceis gladiisque defensandi se necessitas incubuit. Figere contra anchoram Præfectus noster tentabat, sed casu funibus ictu machinæ ruptis, vento impellente disjectus divulsusque fuit. Interea temporis maritimus Heros Justus Trappenus, qui & Bancerdus appellabatur, à prora

prætoriam hostilem ita dedolavit, ut profundum jam petere inciperet. Præfectus Colardus, qui maritimis præliis suetus, adversa quoque juxta secunda sæpies expertus, supra casus ac vicissitudinum incerta, imo ipsam mortem animum erectum gestabat, infractâ voce iterum atque iterum clamabat, uti ignem nitrato pulvri injicerent, atque cælo potius viam affectarent, quam turpi ditione ignominia hostili se exponerent. Verum pulvis bellicus ad duos pedes aquis immaduerat, itaque frustrato extremo consilio, cum neque navigio dehiscenti ulla ope succurri posset, quod pluribus locis laxari, & aquis cedere ceperat, simul omnes importuno gurgite mare hausit, cujus tamen inclemens plures simul cum ipso Archithalasso Nostri eripuerunt. Præterea ex sorte tam funesta altera hostilis nata fuit calamitas. Binæ namque aliæ Hollandorum rostratæ naveis, quîs suppetias ferebat Præfectus Petrus Adriani, ita superstites duas Dunkerkanas dedolarunt, ut una identidem aquis sorberetur, altera omne in fuga præsidium ponebat. Ita duas ingenteis regias naves cum ducentis hominibus Oceanus tot cadaverum insolens volvit, & præter eos qui aqua vel ferro perierunt, centum & quinquaginta captivitati astricti, inter quos dignitate primus Colardus, cujus tamen animus in quacunque conditione supra fortunam assurgebat.

## CAP. LXVII.

*PVGNA NAVALIS INTER CORNELIUM FOLVM HOUTEBENIUM, PRÆFECTVM CLASSIS BELGICÆ, ET ARGENTIFERAM CLASSEM HISPANORVM,*

*ANNO cIo Ic c xxxviii.*

SOCIETATIS Indiæ Occidentalis Proceres classem expediverant validam, quâ maria fatigare, atque ad Occidentem Regias opes succidere, Heinianæque prædæ memores argentiferam classem pari audaciâ opprimere constituerant. Classi Præfector Cornelius Iolus, qui à teneris mari innutritus, cum horrore Oceani animum quoque efferatum contra hostes induerat, laborum supra modum patiens, cui sanguinolenta prælia ferales epulæ videbantur, neque unquam quietus, nisi impetu vehemens victoriam hosti extorsisset. Egressus ille Tesseliæ portu decima quarta Aprilis die, Anni M DC XXXVIIBI, & cum in Brasiliam appulisset, collatis cum Mauritio Nassavio Brasilæ Præfecto consiliis, navibus, militumque sexcentorum, qui promptissimæ ad omne facinus erant audaciæ, manu, & commeatu in septem menses auctus, fortunæ maris iterū se commisit. Quatuordecim instructæ naves vela intenderant, & quærendæ hostili mari iterabant. Divulgata fama Hispaniæ & Occidenti ingens metus & consternatio incubuit, cum inconcussa & terribilis viri virtus omnia magna etiam supra sortem humanam polliceri videretur. Neque mortis contemptori quicquam invictum futurum censeba-

tur. Rex Hispaniarum nihil cunctandum ratus , quatuor liburnicas præmisserat, uti portuum omnium, arciumq; Præfectos præmonerent, hostilem classem adventare, omni ope suam, quæ ex Terra Firma, tutarentur, neque eam quæ Novæ Hispaniæ est, incerto maris nisi in sequente anno committerent. Cæterum classis Terræ Firmæ jam ante obfirmato animo se pelago dederat , atque ex speculatoriis suis , quæ ad Promontorium de Corrientes in extimis Cubæ oberrabant, intellecto visas duodecim Hollandorum naveis , cæterum modicas , à quibus certaminis advorsa metuenda non essent, Cubam versus & Havanam vela direxit. Iolus longis erroribus actus tandem cognovit , argentiferam classem circa Cubæ portum , juxta scopulos , qui Organes indigentur, æquor navigare. Constabat illa galeonibus octo, aliisque minoribus navibus sex , quîs summo cum imperio præerat Carolus de Ibarra. Immensas illa opes stipabat , namque millionibus novem æstimatam captivi affirmabant , aliorum diaria viginti numerabant . Opeis præcipuas Prætoria Hispanica vectabat . In quam Iolus , cum antea nautica facundia suos accendisset , acerrimo insultu proram vortit , atque harpagonibus validissime se implicuit : quanquam prætoria hostilis ingenti mole castellum aliquod maris , nostra liburnicæ speciem præ se ferret . Secundæ & tertiæ dignitatis naves eodem impetu Proprætoriam & Noctilucam adortæ. Ternæ itaque cum ternis atrociter dimicabant , reliquis nostratibus contra sacramentum militare extra discriminem pugnam aspectantibus. Exiguis limitibus sanguinolenta belli area claudebatur : & , uti in extremis fieri solet , quando non tantum pro victoriâ verum etiam

etiam pro salute dimicatur, hinc fori utrinque constrati ca-  
daveribus, illinc Oceanus humanas inferias captabat. Hinc  
ignes, illinc aquæ ingenio loci exitium minabantur. Mo-  
rientium vulneratorumque ingens clamor, horrida machi-  
narum tempestas piceâ caligine aërem obducebat, favillæ  
fumo tetrico mixtæ, cineresque, undique volitabant. Neque  
tantum majores pilæ glandesque, verum & festucæ tabula-  
tis excussæ dimicantes interimebant, aut vulnerabant. Et  
quanquam ad duas clepsydras varia & anceps prælii facies  
esset, Prætoriæ tamen nostræ miles, ingens virium atque  
animi, foros & Hispаниcæ Prætoriæ tabulata, pulsis ad infe-  
riora hostibus, vicit obtinuit. Ex coribus enim nostris,  
qui jaculatoribus referti erant, pilæ igneæ ad xxiiv &  
xlvii pondo certis iectibus in tabulata immisæ tantum  
terroris injecere, ut vacuam aream relinquerent, atque  
infra cancellos in interiorem navis alveum præcipites se  
darent. Ita suo carcere clausi jam vieti erant, nisi Propræ-  
toria & noctiluca Hispanica suppetias ferendo fortunam  
mutassent. Ferme ademptum à gregario milite, cui mille  
florenorum præmium promissum fuerat, aplustre, cum ful-  
minanti procella hostium ingruente, eadem, qua per funes  
enixus fuerat, celeritate vix incolumis evasit audax ille fu-  
nambulus. Interea reliquæ hostium naves plenis velis in-  
Prætoriam nostram tendunt, queis junctis, metuens ne  
circumveniretur, resistere maritimus noster Hercules ne-  
quibat, quod cæteri centuriones ingenti perfidia prælium  
detrectarent. Hoc conflixtu secundæ, tertiæque dignitatis  
præfecti, cum quinquaginta sociis navalibus, violento fato  
cessere, centum & quinquaginta vulnerati. Interea Iolus ira-

cundæ

cundiæ oestro concitus, exæstuante ex imis præcordiis san-  
guine, flagrantibus & micantibus oculis, fortunam tot men-  
sibus quæsitam, socordia & perfidia sibi eripi crebris & ve-  
hementius actis suspiriis indignabatur. Minax illi vultus,  
torva facies, color varius, inquieti pedes manusque, sermo  
præruptus, denique totius corporis fluctuatio. Convo-  
catis Ducibus, qui fœdâ ignominia pugnam aversati fue-  
rant, rupti sacramenti, militaris socordiæ ignaviæque acer-  
be, uti meruerant, expostulavit, unum ex centurionibus,  
qui superbe & indigne Imperanti responderat, baculo per-  
cussum exautoravit. Cæteros hortatus ne vincere assueti  
occasione optimam corrumperent, ipsam fortunam de-  
cus, gloriam, divitias ultro polliceri, totiens hostium per-  
nicie ac sanguine ostendisse, se invictos esse, modo vincere  
cupiant. Hos esse nervos regios, quibus bellum in Belgio  
alitur, quîs succisis domi impotentem inopiam esse. Ne-  
que navium mole terreantur, sæpe minores cum majoribus  
conflixisse, & victoriam reportasse. Illas immobiles mobili-  
tate Nostrarum debellari posse. Pervenimus ad occiduum  
solem, non ut cadat nobis liquefacque virtus, sed ut exci-  
tetur. Ex ultimo terrarum fine victores reverti in patriam  
in manu vestra situm, nisi obstat ignavia. Meticulosos ho-  
stes suis incumbere thesauris, & cum argento suo expallui-  
se. Non tam ad pugnam quam ad prædam vos duco. Vir-  
tus ipsa vos vocat, monetque ne per inertiam tantam victo-  
riam amittatis è manibus, dignos vos judicat, qui immen-  
sas opes in patriam referatis, si experiri cupitis. Per di-  
vina humanaque omnia vos oro quæsoque, ne Imperato-  
rem vel potius commilitonem deseratis. Ipse primis pe-  
riculis

periculis me offeram, vos modo sequimini. Cæterum cum prælii iterum signum dedisset, frustra omnis fuit adhortatio. Alios formido vel pervicacia, alios hostium potentia in transversum rapuerat. Postera die, tertium singulos duces & navarchos novo obstrinxit juramento, qui syngrapha vitam se ante cum morte commutaturos esse, quam prælium desererent, polliciti fuerant. Verum experiri tunc virtutem vix licuit, cum mari & vento iniquo nostra classis ad inferius latus huitaret, iætibus hostilium tormentorum exposita continuo quassaretur. Et superare gradus, & præter classem hostium eniti iniqua tempestas non permittebat. Neque fecere officium, qui sacramento se obstrinxe-  
rant. Die decimo & septimo Septembris certior factus Præfectus, juxta vada Cube, atque scopulos Organes, Hispanicam classem iter tenere, fortunam iterum tentare voluit. Veterum nautica pubes, quæ socordia & ignavia ducum in partes quoque divisa erat, incusando simul illos, nequicquam ad pugnam incitabatur. Tunc solus, quinque Ducibus abdicatis suffectisque aliis, omnium animis accensis, ho-  
stem jam animo & spe victor obtinebat, verum jam ante ex statione sua hostes elapsi in Novam Hispaniam abierant. Ita paucorum socordia & perfidia tam illustris evanuit oc-  
casio, quæ lubrica, neque invita tenetur. Hujus perfidiae, præter plures alios sequaces, duo fuere antesignani, qui, cum Iolus illis ætate minor esset, obtemperare illi opprobrio du-  
cebant. Simultatibus itaq; privatis collisa Ducis autoritas, in-  
famia & dedecus potiora fuere commodis patriæ. Adeo insi-  
ta mortalibus imperandi profunda cupido, ut difficulter iis,  
quos pares vel minores dignitate habuere, morem gerant.

## CAP. LXVIII.

*PRÆLIVM NAVALE INTER MARTINUM TROMPIVM ARCHITHALASSVM,  
ET MICHAELEM DORNIVM PRÆFECTVM CLASSIS HOSTILIS.*

ANNO CLXIP CXXXIX.

**D**UODECIM naviis fauces Dunkerkæ obsederat invictus Imperator Martinus Trompius. Invisum hoc hosti, quem maria deprædandi cupido ingens incesserat, tum etiam destinatus Hispaniæ miles arcebatur. Inunctum ab Hispanico concilio Præfecto classis hostilis Michaëli Dornio, Batavos portu suo & litoribus pelleret: non tolerandū Regiam classem tam modicis viribus obsideri. Animata quoque pubes nautica à gubernatore urbis Fuentesio, cui persuasum quinque tantum bellica nostra navigia pugnæ idonea, reliqua numerum tantum implere, cæterum invalida, neque ullum insultum ferre posse. Affirmabat ille, licet felicitas hosti aspirare videretur, temeritati tamen non semper fortunā indulgere. Audeant modo vincere, victoriam in promptu. Nunc maris cubili pulsandum hostem, quem valentiores audacioremq; propria negligentia faceret. Ingenti animorum motu læta suis periculis juventus perstrepebat, quâlis solet esset multitudinis, maxime militaris, quando à primoribus incitata cæco studio agitur. Decimo & octavo Februarii die prima luce appetente, commeatu, milite instructa classis, quæ viginti naves, quîs regiæ majores duodecim continebantur, numerabat, Dunkerka solvit. Mar-

chio

chio Fuentesius Præfctus urbi in litore caruca vectabatur, qui jam successus magnitudinem animo metiebatur, fiduciaque victoriae inflatus, tumida cervice, more gentis Hispanicæ, spectandæ cladi Batavorum, oculos in vicina maris circumjectabat. In consulta quoque civium multitudo ejusdem voti consors per universum litus diffundebatur, atque augurio læta utramque classem oculis usurpabat, promiscuo errore vulgi, ne quidem suos sine crimine vinci posse. Cum hostilis classis primo vela intenderet, centurio Hollardus, qui excubias agebat, exploso tormento signum hostilis adventus dedit. Quo audito Imperator noster expediri cuncta ad prælium jussit, ipse circumspectus acer, indefessus, auctoritate, ubi necessitas indicit, astrictus, & simul, quod longe difficillimum, prolixæ & effusæ in socios navales humanitatis, qui illum identidem optimum parentem indigebant, vitam mortemque simul cum periculorum socio (namque dignitate Imperator, etiam cum gregario milite eadem munia obibat) dividere parati. Velificari noverat ingenii nostratum prudentissimus Imperator, quos si nimis dure & serviliter exceperis, irritantur, sin salva autoritate mitigentur imperia, plura præstant quam promittunt invicti robore & audacia. Tales viros, quibus decretum erat aut vincere aut mori, nulla virtus frangere poterat, cum ipsi virtutis modum omnem excederent. Recta itaque in hostem vela tendunt tanta alacritate, tanquam si ad epulas invitarentur. Primum initium hostilis calamitatis binæ regiæ naves dederunt, quæ interceptæ & à nostris cinctæ, laceratis malis, pluribus cæsis, facile captæ superatæque sunt. Interea Martinus noster, Martis illa vera

soboles, cum quinque Regiis navibus solus inaudito successu tam fortiter per treis horas dimicavit, ita armis & constantia prætoriam navem contra omnem hostilem impetu tutatus est, ut summa infamia atque opprobrio hostes proram avorterent, & tam cœrulentæ prælia tempestati se subducerent. Pulcherrimum hoc virtutis spectaculum ingens ludibrium hosti debuit, qui ante victoram victor., veluti certo successu exultaverat, qui nihil modicum locutus in nostri contemptum, ne quidem quinis navibus contra unam Nostratium se sustentabat. Neque hic substitit virtus Imperatoris nostri, verum Prætoriam hostilem adortus, per dimidiā horam acrem conflictum exercuit. Jamque illa propedium vieta, lanceisque duabus minoribus singulari audacia Hispano ereptis, cominus res agebatur, cum levi momento, uti in rebus maritimis solet, sors mutata extremum insultum inhibuit. Flectendo namque navim, quo acrius hostem premeret, tumidiore vento vela inflante, præterlapsa præatoria hostilis turpi fuga terga dedit. Imperatoris exemplo, ingenti undique trepidatione atque consternatione, cæteræ quoque fuga sibi consulere non erubuerent. Nunquam in solido stetit vana superbia, & ingentium conatum fastigia, nisi virtute verâ nitantur, irrito molimine collabuntur. Præterquam quod mortaleis curas suis viribus trans fines præfixos expediri non permittit supremum numen. Neque fugiendo satis tutæ hostiles naves fuere, nonnullæ enim tellurem vorsus flexo itinere, vadis hæsitan tes auctis demum aquis Dunkerkam petiere. Non eadem fuit vicariæ hostilis fœlicitas, quæ itidem, cum ostium urbis, quam Scheurtiam appellant, velis attingere non posset,

quia

quia alte arenis federat, (dubium an rupta, an ita tormentis dedolata esset, ut ultro deprimeretur) fluctuare nequibat. Cui superandæ cum duæ nostrarum navium immitterentur, milite vicino litori exposito proprio igne conflagravit. Magna hæc & inexpectata calamitas vires maritimas hostium plurimum turbavit, præcipue quia & difficile erat attritas opes subito recolligere, & spes fractas novare, vel tanto vulnere consternatum cum socio navalí militem in melioris eventus fiduciam erigere. Namque ad mille & sexcentos, (alii adhuc centum addunt) vel cruento fato occubuisse, vel vulneratos, vel captivos fuisse ipsi hostes non diffitebantur. Subito quoque permota civitas, atque immutata facies urbis erat, namque ex summa lætitia, quam fiducia victoriæ pepererat, repente incredibilis tristitia invasit, neque lachrymæ sanguinem cæforum extinguere quibant: in primis mulieres, quarum pectora in dolorem faciliter liquefunt, afflictare se, manus supplices ad cælum tendere, aliæ maritum, aliæ patrem vel propinquum ingenti ejulatu lugere, quædam misertæ parvorum liborum, fati iniquitatem accusare, & prout cuique dolor verba dictabat, effundere. Archithalassius, cum ipsa clades crimiñi duceretur, in carcerem conjectus, ubi tempestas indignantis plebis deferbuerat, rationibus redditis iterum exemptus. Imperator noster non immodicus lætitia, vel fortunæ suæ prædicator, vigesimo & primo Februarii die Hellevoetam appulit, duabus laceris attractis Dunkerkanis navibus, quæ quingentis antea viris stipatæ, cæteris captivis, ducentos amiserant. Eo quidem hæc victoria majori lætitia excepta, quod procella illa ingens, quam hostis nostris

minabatur, tanquam nimbo undique effusa propere in eundem vorteretur, quod iterum infestum hactenus mare commerciis laxaretur, quod destinatus Hispaniæ miles impediretur. Præmia quoque virtutis insignia Patriæ Patres Imperatori reliquisque Præfectis largiti sunt, prout cujusque merita & dignitas postulabantur. Præter torquem auream, quâ Proceres illum ornarunt, Regis Galliæ & Cardinalis Richelivii effusa in illum fuit liberalitas, quæ alibi recitata, cum luctuosæ ejus morti verborum impari strepitu justa solveremus, nunc repetere visum non fuit.

## C A P U T . L X I X .

*P R A E L I V M C E L E B E R R I M V M D V-  
N E N S E I N T E R P O T E N T I S S I M A M H I-  
S P A N I C A M C L A S S E M , E T F O E D E-  
R A T O S , A N N O C I C I C X X X I X .*

**I**N GENTIBUS impensis, regnis omnibus, quam late se diffundit Hispana potentia, nervos opum fabrilesque operas tribuentibus, vix annuo tempore expedita clas-sis ineunte Septembri Corunna Galliciæ oppido mare elegerat, cui tanquam alter Xerxes Hispaniæ Rex imperium minabatur. Sexaginta septem navigia, vel potius immensæ molis castella, tanquam insulæ natantes profundo incubabant, quibus virorum viginti quinque millia stipabantur. Inter quos prima Nobilitas sponte nomina dederat, tum ut fidem suam atque animum Regi probaret, tum ut gloriose victoriæ consortes forent, cuius certam conceperant fidu-

fiduciam. Quamquam enim plerisque & gloria, & opes atque alia optanda domi superabant, tamen hanc militiam recusare, et si maris insolitis, ingens probrum ducebatur. Supremum classis imperium obtinebat Antonius D'Oquendo, militiae maritimæ vetus, probataeque jam ante in Brasilia virtutis. Cujus Prætoria navis, octingentarum vehium, sexaginta & sex majores machinas vectabat. Archithalassus Castiliæ erat Andreas de Castro, Regni Neapolitani Petrus Quaderonus, Gallicæ Franciscus Feyus Sotomajor, Lusitanicæ Lopezius Docias, qui navigio omnium maximo præerat, quod tabulatis firmisque compagibus impervium, mille ducentarum vehium, sexaginta octo majoribus tormentis terribile erat. Dunkerkanis imperabat Michaël Dornius. Qui rationes accuratius exegerunt, mille septingenta circiter tormenta majora fuisse referunt. Quibus integra regna & ditiones contra impetum hostium sustentari posse videbantur. Principes terrarum Regesque in suspenso hæsitare, quo tam immensa classis ferretur, neque quisquam tamen secretorum adyta penetravit. Hispani, quod laudandum, nihil minus quam arcanorum prodigi sunt, & interius premunt omne secretum. Taciturnitas optimum rerum administrandarum vinculum, sine quo nihil recte in Rep. sustinetur. Consilia sœpe vulgata, hostem instruunt, uti artem arte eludent. Plurium illa fuit sententia, Amas in vel Fretum Danicum turbandis Hollandorum commerciis peti. Alii alia, neque verisimilia variis sermonibus jactabant. Præsertim inconsulta plebes avida futuri in rimandis arcanis ingeniosa sibi videbatur. Nobis certum arcana Principum difficulter penetrari, &

qui

qui maxime se nosse existimant, in primis falli. Nam Principes ipsi alia saepe promunt, aliud pectore clausum tenent. Ceterum longius abiit nostra dictio, nunc ad institutum revertimur. Praefectus classis Trompius circa Bevesiram duodecim navigiis mare tenebat, certior factus classem Hispаниcam Corunnæ portu soluisse. Decimo quinto Septembris die ingentis hujus classis vela conspecta omnium oculos prestringebant. Non tam viribus atque apparatu quam virtute animi res militaris procedit, potentia fortitudine destituta, ubi primum impetum effudit, collabascit. Ut plurimum modicis copiis victores fuimus, ubi viribus propriis nitebamur, magnos apparatus fortuna destituit. Neque tamen calamitatem provocare, ubi subsidia praestos sunt, boni Imperatoris est. Displosis itaque per intervalla tormentis accessum hostilis classis indicavit. Audito signo Propraefectus Witto Wittenius animi acer, qui spiritu excelso & erecto omneis motus fortunæ, omnia humana infra se despectabat, ex loco, quæ Cingula appellant, quam celerrime, cum omnis mora periculosa esset, quinis navibus se proripuit. In sequenti die, cum primum sol surgebat, utramque & hostilem & nostram classem oculis usurpans, diu cum ad vorso vento lucretabatur, ad horam tandem undecimam ægre se Nostris junxit, cum per horæ spatium acres cum hoste incidissent velitationes. Ita septendecim navigiis decretoriis armis contra hostem itū est. D'Quendo, qui per contumeliam navigia nostra depressas gallinas indigebat, & tam exiguis viribus fortunam Regis ludibrio exponi indignabatur, primum impetum in Praetoriam effudit tanta ferociâ, uti evestigio eam superare posse falsa opinio-

opinione sibi persuaderet. Uti non naturalis tumor no-  
xam s̄æpe corpori intentat, ita hominis Hispani, et si re-  
rum maritimarum periti, ventosa arrogantia nihil nisi op-  
probrium sibi ingens peperit. Quippe periculo & nego-  
tiis compertum fuit, in suo maris elemento Batavos vir-  
tute neque velle, neque posse superiorem admittere. Acer-  
rime quidem usque ad horam quartam utrinque pugna-  
tum, donec Prætoria hostilis admodum fatigata, lan-  
guente impetu, septentrionem versus ad angulum loci, quæ  
Cingula appellari diximus, se recepit. Sicut vastum animal  
ægre se movet, ita magnitudine sua torpida illa moles dif-  
ficulter se pugnando flectere quibat; atque mobilitate no-  
stræ navis, quæ huc atque illuc se vortens certis ictibus  
tormenta verberabat, admodum fessa, lassata, dedolataque  
fuit. Hoc tamen inter Hispanos & Batavos prælio, non  
virtute hostium, sed fati iniquitate dura Nobis sors obtigit.  
Proprio enim pulvere tormentario forte fortuna incenso  
una nostrarum navium horrendum spectaculum præbuit,  
cuncti præter unum in suprema aëris jactati miserabili  
morte perierunt, laceri artus, & truncâ cadavera primò in-  
sublime rapta, dein insolenti veluti nimbo in profun-  
dum maris volvabantur. Vespera appetente à Concilio mi-  
litari constitutum, exiguis velis juxta classem Hispanticam  
morari, atque ita hostibus obviam ire. Postridie cælum den-  
sa nebula obducebat, adeò ut prospectus impediretur,  
cæterum fulgore solis discussâ, versus occasum æstivum  
juxta castellum Ydam & Folkstonum ad oram magnæ Bri-  
tanniæ classis se ostentabat, quò ingenti velocitate propera-  
tum. Verum sub meridiem silenti æquore propinquare

veritum fuit. Cum dies cecidisset, militaribus suffragiis visum post medium noctem lucente luna hostem ex improviso adoriri, qui relabente mari æstum opperiens anchoras jecerat, uti opportune postmodum in stationem Dunensem se reciperet. Et si autem, an consultum videtur nocte intempesta per incerta maris, quo nihil æque fortitorum capax est, hostem lacessere, fluctuarent primo animi, tamen mari nostro suetis minus periculum videbatur fortunam experiri: contra noctis horror, locorum imperitis infestum vadis mare, subitum prælium, magis iniqua hostibus videbantur. Quò autem naves dignosci possent, neque amici in amicos incurrerent, tum geminatis in Prætoria, tum alibi singulis accensis ignibus, aliisque indiciis significatum fuit. Junctis quoque navibus pressa navalis acies, ne multitudine hostium circumvenirentur. Ita, euronoto modice vela inflante, fiducia pleni præcipites nostrí in hostem feruntur, sicut in rebus asperis fortissima consilia tutissima sunt. Quinet animo jam superiores videntur, qui ipsi licet validioribus pericula inferunt, cunctatio deses timori atque ignaviæ propior videtur. Hostilis classis, quæ Doveram petens vela quoque jam ventis dederat, secundâ post medium noctem horâ tormentorum verberibus graviter impetita, simul cum nostrâ vorsus promontoria fluctuabat. Postridie Bancardus Commendator duodecim navibus suppetias Imperatori ferens adventabat: hostis territus in stationem Dunensem cursum flebat. Hoc conflictu duæ primum hostileis naves superatæ, quarum unius, quæ Galeo erat, dum prædandi avida nautica pubes incumbit, atque omisso hoste pravum inter ipsos certamen gliscit spolia

spolia consecrandi, ab hostibus recuperata fuit. Cæterum plureis aliæ, dum cedendo salutem suam committunt fluctibus, ab insectantibus certis & continuis machinarum iactibus, summopere quassatæ, ægre in stationem Dunensem se receperunt. Tanta ardoris pulveris cum feralibus globis emissa fuit copia, non secus atque si fulminantis cæli trucem atque horrendam faciem quis aspiceret. Deficiente pulvere & militaribus pilis, Caleto vicino Galliæ oppido quadraginta millia pondo nitrati pulveris, quatuor millia globorum, atque aliæ necessitates bellicæ confessim accersitæ fuere. Revorsus Imperator ad austrum classis Hispаниæ anchoras jecit, ita ut hosti gravis pugnandi necessitas incumberet, si mare eligere cuperet. Ita cincta modicis viribus immensa classis, & quam ante vix laxitas Oceani capiebat, nunc arctata angustiis premebatur. Verum si statim manus conserendi fiducia hosti adsuisset, dubia forsan fortuna pugnatum fuisset, cæterum moram necundo, sicut Hispanorum ut plurimum lenta solent esse consilia, dubium an contemptu hostium, an metu, an quod sub præsidio Regis Britanniae latitaret, neque conflictum ausuros sub litora Angliæ Batavos crederet, certe temporis diuturnitate copias nostras validissimas effecit. Nobis sedet sententia, invisam potentiam exiguis admodum momentis à supremo numine pessum trahi, mortalesque curas inter se fluctuantes tandem collidi, atque in arctum redigi, unde pedem referre nequeant. Interea Patres Patriæ, Princeps Auratus, summo studio naves bellicas expedire, agendo, vigiliando, publicæ utilitati velox remedium adhibere, nauticam & militarem juventutem, cuius animosa & ingens subito

confluxerat multitudo, ad sacramentum cogere, omnia de-  
nique prævidere, ne quid detrimenti Resp. caperet. Intra-  
menstruum spatum centum naveis majores in mare dedu-  
ctas attonitus hæsit orbis, vix posteri credent. Et nos ipsi  
vix fidem adhiberemus, nisi factum constaret. Innatabat  
subito pelago instructissima classis, qualem per annos ali-  
quot vix expedire potentissimus Rex potuerat, qui sole  
Orientem cum Occidente junxerat, cuius veneratio & ma-  
jestas per cunctas nationes latissime diffusa fuerat. Jacent  
**Carthaginienses, Phœnices, Rhodii, & rerum domini Ro-**  
mani immensam maris potentiam, in spithama terræ ar-  
cta tanta maritima potentia omnibus terrarum Principi-  
bus formidabilis visa fuit. Nam quid ego hic primum  
commemorem, an celeritatem expeditæ classis, an multi-  
tudinem navium, an nauticæ juventutis ingentem turbam,  
quæ ferociam & robur ex mari contraxerat, atque hostis  
profligandi, patriæ armis tegendæ immensa cupiditate fla-  
grabat, quibus corpus agile & expeditum, vastus & immen-  
sus animus, mortis hostiumque contemptor inerat? Neque  
verò in unum contracta erat maritima potentia, cum du-  
plo major expediri necessitate urgente potuisset, cæterum  
sufficere illæ copiæ profligando hosti videbantur. Ita cir-  
cumventa hostilis classis omni ope elabi, atque in liberta-  
tem se vindicare nitebatur. Tredecim Dunkerkanis navigiis  
res opportuna cecidit, ut sub obscurum noctis Goyingam  
vorsus, ubi nullæ positæ erant navales excubiæ, elaberentur.  
Neque vero hoc socordia & negligentia Imperatoris con-  
tigit, cæterum fides Anglorum, qui majora illic navigia  
fluctuare non posse asseruerant, heic laborabat. Eorundem  
ope

ope scaphis velivolis, quæ simul huc atque illuc remis tor-  
quebantur, transmisso in naves hostiles noctu Hispanico  
milite, & magno vulneratorum numero, omnis fere pedes,  
qui recens ex Hispania advenerat, incolumis Dunkerkam  
venit. Quo comperto, ad illud latus à Bancardo excubiæ  
actæ, ne plures clanculum in posterum elaberentur. Interea  
Patres primo dubiis agitabantur consiliis, an in statione  
Britannica adoriri hostem consultum foret. Neque tamen  
eundationi locus erat: decretum itaq; sin hostis non prodi-  
ret, pulcherrimum patrare facinus, ut contra eundem jun-  
ctis copiis fortunam maris experirentur. In sex ordines di-  
visa navalis acies. Prima octo velis constabat sub Præfectura  
Dionysii centurionis, secunda octodecim, ductore Archi-  
thalasso, tertia viginti & novem, sub imperio Propræfecti  
Wittonis Wittenii, cui illa cura incumbebat, ut ex ad vorso  
Anglicæ classis consistens prospiceret, ne quid Britannus,  
qui Hispanis clanculum favebat, in prælio rerum novarum  
moliretur, quarta tredecim, sub vicario imperio Ioannis  
Everardi, quinta decem naviis movebatur, quis impe-  
rabat Prætor, ut vocant, nocturnus Catius, sexta totidem,  
Commendatore Houtebenio. Quatuor naveis recipiendo  
militi, si fatalis aliqua necessitas ingrueret, treis annonæ  
vectandæ destinatæ erant. Constitutum, uti Trompius Præ-  
toriam supremi Præfecti D'Quendi, Ioannes Everardi Lo-  
pezii Dociae Lusitani, Catius Dunkerkani Præfecti Mi-  
chaëlis Dornii, Dionysius australis, Houtebenius Septen-  
trionalem partem Hispаниæ classis uno impetu adoriren-  
tur. Vigesimus & primus Octobris illuxerat dies, cum hor-  
renda prælia tempestas Oceano incubuit, tantaque calamiti-

tas visceribus adacta Hispaniæ, ut ægrum Reip. corpus extreum ferme spiritum traheret, neque ullis ferme fulciri iterum sustentaculis posset: non secus atque navi, quæ sentinam trahit, compagibusque solutis laxari pluribus locis cepit, nequicquam succurritur, ita ubi in totum collabi fortuna ceperit, frustra quis remediis obnитitur. Antequam ad prælium ventum, Martinus Trompius ad Præfectum Anglicæ classis Penningtonum, qui iniquior Batavis videbatur, has literas conscripsit, quarum hæc fere summa erat: Certiorem se factum à Penningtono, illi se hostem fore, qui primus in statione Anglica hostilia intentasset, securitatem regiorum portuum primum violasse Hispanum. Quid contumeliosius viris ad arma natis, quam hostili se lubidini obnoxios, inferiores & pene victos victoribus insultare, celocem aliasque naves tormentorum iætibus verberari, etiam unum globo transfixum? omnia incitamenta victoriæ pro nobis sunt, neque Deus siverit, ut Batavorum gloria & virtus ludibrio exponatur. Rogamus te, ut juxta fidem datam suppetias nobis læsis feras, vel, si illud displiceat, neutiquam advorseris. Omnia jam æstuant præcordia pugnandi immenso desiderio. Iussu Procerum, quis obsequi prima semper nobis cura fuit, manu nostra, si prodire nolit, ex suis latebris tanquam septo clausos hostes ejiciemus. Certam autem fiduciam habemus, Regem judicio & sapientia pollentem, qui etiam D'Oquendo indexerat, uti statione Dunensi discederet, approbaturum, vel saltem vitio hoc versurum non esse, quod cædendi hostis publica necessitas extorsit. Hæc vel similia cum rescripsisset Imperator, pubem nauticam jam sponte accensam horari,

tari, ut venienti fortunæ, quæ non simpliciter fortioribus  
jam indulserat, occurrerent, hunc magnum diem victori-  
bus decus atque immensam gloriam polliceri, neque va-  
num hostium aspectum recessu suo metuendum, fugienteis  
in illum se recepisse sinum, nunc cinctos undique obsideri,  
atque suo quoque metu in extremam perniciem agi. Infe-  
stum semper Hispanis mare fuisse, virtutem Batavorum ma-  
ritimam, quaqua soli via esset, Orientem & Occidentem per-  
rupisse, circa punctum hoc terræ mari dominationem Hi-  
spanicam primum retusam, & vexilla libertati erecta. Mul-  
titudinem militarem hostium inertem, & jussu Regio ex  
opificum tabernis, & agrestibus casis extractam armis impa-  
rem esse, illos vero in mari inter sanguinem ac sævas tem-  
pestates educatos, quicquid recte fieri vellent, propitio nu-  
mine etiam prompta manu efficere posse. Ita inflammata  
juventus præceps in hostem ruit, & periculis admodum suis  
lætabatur. Hispanus ubi serio rem agi videt, & aquilonare  
classis latus peti, improviso tumultu excitatus, anchoris se-  
ctis dum pericula fugit, in multo gravius incidit. Nebulis  
enim cælum tegentibus, viginti duæ naves Hispænicæ vor-  
sus litus vadis allisæ hæsitarunt, quanquam jam ante mo-  
nuisset Franciscus Fejus, ne illac ulterius cursum flecterent.  
Ita dum probis consiliis non obtemperant, cum importu-  
no & vadoso mari luctabantur. Neque evadendi ullum præ-  
sens remedium fuit. Luce enim nebularum caliginem per-  
rumpente, pressæ sicco arenarum naveis evestigio invade-  
bantur. Et tanto furore missilia mittebantur, uti fixis navibus  
nullus exitus daretur. Certis glandiū iectibus, nullo refugio,  
tancum mare hostibus patebat. Itaq; milites & socii navales  
peri-

periculi novitate exterriti, alii in cymbas, alii in profundum se præcipites dederunt, quorū pleriq; misere perierunt. Immissis dein incendiariis ignibus, hostiles naves flammis consumptæ. Interea ne litori nimis Batavi propinquarent, ex castellis & munimentis Angliæ aliquotiens displosa tormenta. Reliqua Hispanica classis in divorsas acies partita, ad interiora maris se proripiebat, quem insecatabatur Trompius, successui insistendum ratus, cum ex primis eventibus ultima quæque ut plurimum cedant. Archithalassus Cantabriæ, quam nunc Biscaiam vocant, implicitus galeonis alterius velis dum ipse partem aquilonarem classis suæ turbat, se cæterasque ejus ordinis ingenti præcipitavit infortunio. Turbatis enim semel ordinibus, cuncta admodum nutabant consilia, festinare, trepidare, suo quisque metu pericula æstimare, modo obniti, modo iterum relictis armis fugæ se dedere, nihil denique consulti aut pensi habere. Ita desperatio ac terror, ad afflictos ulterius obsessosque opprimendos multum valuit. Interea Prætoria Lusitanica navis, cui Præerat Lopezius Docias, quæ mater Teresa indigetabatur, Ioannis Everardi socrorumque vehementissimum insultum patiebatur, cæterum cum invictum illud maris castellum nullis perforari posset tormentorum verberibus, & densato militum agmine, qui ad octingentos numerabantur, nullum accessum admitteret, atque adeò in Nostros incredibili ferocia continuos ignes cum missilibus omnibus machinis vomeret, Trompio, Galioque adventantibus consultum visum, quod immensa illa moles nullo alio modo debellari posset, duas incendiarias immittere. Quæcum prætervectæ frustra fuissent, treis aliæ denuo immissæ horrendum

rendum, atque adeò mirabile ignium spectaculum edidere. Ubi enim incendio pulveris nitrati receptaculum dissipavit, tanto fragore cælum intonuit, ut vicina litoris tanquam terræ motu trepidarent, atque densa ignium fulmina veluti per attonitas nubes agitarentur, in primis quia tenebris cædantibus eo magis flammarum violentia in oculos incurseret. Tum incendio navis, in primis verò ubi discusso in aërem pulvere pyrio cuncta in aërem raptarentur, octingenti homines perierunt, inter quos Lopezius quoque Docias, cui ante brachium quoque machina ablatum fuerat, ingenti virtute fato functus est. Cæterum varia erat passim mortis species & imago, alii ferro trajecti, alii ignibus consumpti vel semiustulati, alii profundo mersi, aliorum laceri artus simul cum pulvere in sublime rapti huc atque illuc volvebantur. Navis ipsa in partes collisa hac tempestate non amplius in mari, sed in ipso aëre varie jactabatur. Incredibile dictu unam ex majoribus machinis cædere tam, tanto impulsu in sublime jactatam fuisse, ut instar teli ipsis admodum se nubibus immiscere videretur. Neque iniquitas fortis uni Nostrarum navium defuit, cui præerat centurio Muschius, quæ antenna pergulæ hostili implicita, cum forte per errorem incendiaria, quæ vicinam hostilem petebat, in illam ferretur, ignibus quoque violentis consumpta periit, cæterum juventus pleraque recepta navibus nostris in columnis evasit. Jam antea D'Quendus, & Franciscus Fejus Lusitanicæ navi periclitanti suppetias ferre omni ope annixi fuerant, cæterum tantæ tempestati se objecere inconsultum censuerunt. Fejus dum modicis velis operitur, à Prefecto & vicario cinctus obcessusque, cum etiam

Oo

incen-

incendiarias in se ferri videret, periculi jam antea monitus arbitrio victoris se permisit. Eodem die quinque aliæ Hispanicæ naves superatæ. Neque Magnus Alexander invictus stetit, quem centurio Laarsveldius in suam potestatem redegit. Plures alias non virtus, non arma, sed noctis simul atque nebularum densæ tenebræ texerunt, quis cum accessisset violentior ventus, D'Quendi & Michaëlis Dornii Prætoriæ naves cum nonnullis aliis necessitati se subduixerunt. Petrus Quaderonus Neapolitanæ classis princeps ad Goeingam fœdâ calamitate navem fregit, pleraque cum eo juventus aquis mersa morti cessit. Luctantium cum morte miserabile erat spectaculum, modo natando obniti, modo fessis manibus cedere calamitati, ad extremum, sicut morientium acerrimus esse impetus solet, validissimo robore emergere, & tandem præcipiti fato succumbere. Postridie Batavorum classis vehementi vento, & densis tenebris à se invicem divulsa, neque usquam Hispanica apparuit. Una hostilium navium ventis undisque jactata cum Prætoriæ nostræ occurseret, etsi centum armatis hominibus præter nauticam pubem insideretur, duodecim æreis totidemque ferreis stipata esset machinis, à novem sociis navalibus, qui jussu Imperatoris se cymbæ commiserant, superata fuit. Dubium, an magis incredibilis tam paucorum hominum virtus, an hostium ignavia & socordia fuerit. Secunda post prælium die juxta Cingula mari iterum Hispanicæ quædam naveis vela sua ostentabant, cæterum commoto mari nancisci illas Imperator nequibat. Itaque modicis velis Angliæ oram prætervectus, galeonem obviam, quæ metu territa, quod dux bellicæ cum incendiaria immit-

immitterentur, & ultiro se arbitrio victoris permiserat, facile oppressit. Plureis aliæ circa promontoria & alibi interceptæ, vel ad Gallica litora juxta Caletum allisæ. Ita victo profligatoque hoste, qui tanquam alter Xerxes immensa classe maria instraverat, qui ambitione & cupiditate distensus, quarum causa pleraque inter mortaleis agitari solent certamina, faucibus patriæ imminebat, vindex maritimæ libertatis, infractus fortitudinis scopulus Imperator noster cum classe sua in statione Dunensi anchoras jecit, honori que Penningtoni Britannicæ classis supremi Præfecti, & circumiacentium munimentorum, machinas omnes festivo sonitu circumstrepere jussit. Caterum Britannus, cuius animus haud dubie jam ante ad Hispanum inclinaverat, ne quidem ullo signo explosæ machinæ, sicuti inter militareis gratulationes fieri consuevit, respondere dignatus fuit. Ex viginti tribus Hispanicis navigiis, quæ primo insultu litoribus Angliæ adacta fuerant, cum sex iterum fluctibus attollerentur, ne in jus atque potestatem Fœderatorum cederent, quandoquidem neque fugæ neque præsidii ulla reliqua spes foret, Penningtonus Anglo milite insideri jussit. Quis invadendis cum se eludi sentiret, jam ante monitus Imperator noster, ne quid hostile Britanno intentaret, Colstero demandavit, uti viginti quatuor navibus duplices cursus iterando, mare lustraret, ipse Goereum, & confestim Hagam Comitis petiit. Quacunque iter faceret, vel incederet, plebs avida videndi gloriosissimi Imperatoris latera ejus premebat, ita ut immensi concursantium fluctus pone attraherentur. Nonnulli ex primoribusprehensare dexteram, nullum officii genus intermittere. Ille singulati mo-

rum comitate omnium obsequi studiis, etiam pluribus ignotis eâdem affabilitate respondere, quippe ipse Batavus Batavorum ingenia noverat, quibus pressa pectore taciturnitas contemptus & superbia appellatur. Immenso gaudio cuncta perstrepebant, nonnulli publice acclamabant, hunc esse immortæ libertatis scopulum, Indiæ Hispaniæque procellam, pridie nihil mari recte gestum, illi Provinciam maritimam mandandam, qui inter tempestates atque sanguinem hostium educatus, totam ætatem in mari egerat. Alii, ut judicio suo nimis quam indulget inconsulta plebes, affirmabant, non tantum classem immensam domitam prostratamque, sed in una classe universam debellatam Hispaniam. Cæterum uti magnitudo victoriæ omnia præconia exuperat, ita ipse multo majora jam pridem gesserat. Ita nimirum cum populo comparatum est, ut ea quæ in oculos incurruunt, ac victoriæ prælentē magnitudinem tantum cogitent, cætera etiam pulcherrima facinora negligant. Interea Patres, excepto summo honore invictissimo nostro Imperatore, supplicationes publicas, uti Deo immortalis auctorí supremo & unico tanti triumphi debitas grates persolverent, & simul cum campanarum sonitu festivos igneis per totam suam ditionem decreverunt. Nunquam majori studio ad sacras preces concursum fuit, quîs peractis campanis continuo pulsantibus urbes pagique facibus picatisque dolis ardere videbantur. Plureisque accensæ in turribus laternæ stellarum subito fulgentium speciem jucundissimam referebant. Artificiosi ignes in altum jaëtati, nubibusque immixti, perpetuos cælestis quoque ignes æmulabantur, quîs lapsantibus stellæ cadentes, uti vulgus loqui

con-

consuevit, ad inferiora volvi videbantur. Longe pulcherrimum Hagæ comitis in vivario Principis editum navale spectaculum, cum enim sexaginta tormenta ex vicino colle iterum atque iterum explosa forent, in aquis navicula ad exemplum Prætoriæ Lusitanicæ incendiariis immissis conflagravit, atque in sublime rapta imagine in horrendi atque funesti exitus dedit. Ita immenso gaudio omnium laxabantur pectora, neque tantum externi ignes, verum etiam interni in omnium oculis præcordiisque flagrabant. Et revera longe augustissima hæc fuit victoria, quæ totum terrarum orbem fama nominis implevit. Ultra enim quadraginta naveis depresso, captæ, incenso, vadis allisæ. Ferro, igne, aquis ad septem millia perierunt. Mille & ultra septingentos captivi carceribns stipabantur: vulnerorum numerus subduci nequibat. Plureis quoque tempestatum ac sentinæ insueti, salo nauseaque confecti, in graveis morbos inciderunt, cæteri ferme, inter quos plurimi inviti ad sacramentum militare coacti, militiæque insolentes, Regi inutiles fuere.

## C A P U T LXXX.

*P RÆLIVM NAVALE INTER REGIAM CLASSEM ET SOCIETATIS INDICÆ  
OCCIDENTALIS IN BRASILIA,*

ANNO C I O I O C X I .

**S**I cuti regiæ classis in Freto Britannico miserabilis & fœda admodum fortuna fuit, ita circa Occidentem

mari quoque infesta fuit. Omnem simul Hispanus intenderat maritimam potentiam, qua superba cogitatione Belgium invadere, Occidentem recuperare, sine modo modestiaque invadere, polluere, vastare omnia, nihil denique pensi vel sancti habere, in animum induxerat suum, ceterum prævaluere fata consiliis, potentiaque humanâ operisa raro sempiterna semet ipsam præcipitavit. Primo ipsum cælum turbatumque mare classi iniquum eandem violentâ tempestate circa Promontorium viride disjecit. Accessit & alia extrema calamitas, quod quando mare omne cum aëre in turbines cessisset, & simul variis undique procellis incerti fluctus agitarentur, miles ferme omnis maris bellique insolens (plerique enim ab aratro ad sacramentum militare adacti) tempestatibus fœdis agitatus, simul diutina navium conclusione tetro odore, pestilentique Africæ ora confectus, ærumnis & miseriis coöpertus extremum spiritum dedidit. Volvebantur aquis cadavera, & vel immanum belluarum rictibus relinquebantur, vel respuente mari in vicinalitora ejectabantur.. Classis itaque militibus & classiariis defecta in sinum omnium Sanctorum se recepit: ubi per integrum annum firmandis copiis navibusque resarcendis subsedit. Interea Mauritius Nassovius Indiæ Occidentalibus supremus Imperator certior factus classem ingentem expediri, omnem operam consiliis hostium turbidis intendere, vigilare, neque insomniis laboribusque fatigari, classem præparare, juventutem militarem & nauticam cogere, jubere, hortari, ut semper intenti paratiique essent, virtute & diis volentibus omnia prona fore, hostem vinci assuetum, & militiæ insolentem, rusticam plebem non ita sulcare

sulcare maria atque agros, classem incredibilem in Fretō  
Britannico deletam, jam ipsis vitalibus vulnus afflictum,  
illud reliquum esse, ut vastum illud animal nervis succisis  
venisque conficiatur. Exarsit nautica pubes, quibus ætas,  
animusque ferox erat, & immensa cupidine gloriæ æstura-  
bat. Nostra classis rerum omnium ferme indiga sub Præ-  
fectura Gulielmi Cornelii Lozii tredecim naviis consta-  
bat, quis commodum accessere è Belgio novendecim, ani-  
mosque nostratis auxere. Ea cum erat belli necessitas, ut  
nondum exoneratis navibus, fatigatus maritimo itinere  
miles fortunam maris experiri cogeretur. Adortus Impera-  
tor noster ingenti spiritu duodecimo Ianuarii die intra Ta-  
maricam & Guaianam hostilem classem, quæ sexaginta sex  
naviis, (adeo enim numerus excreverat) quindecim milli-  
bus hominum constabat, cui summâ cū maritimâ potestate  
præerat Fernandus Mascarenga, Comes Torrensis, supre-  
mus Brasiliæ Regius Imperator. Potior ille erat numero mi-  
litum, cæterum paucitas nostrorū virtute & disciplina præ-  
valebat. Non idem vigor corporibus, ardor animis, impa-  
tientes illi maris, tempestatum, & ad sustinendum laborem  
inhabiles, Nostris salo innutritis omnis labos in naturam  
vorterat, neque unquam ab hoste vel tempestate quies, &  
ut paucis absolvam, horror efferati maris, præliorum con-  
suetudo animqs quoque ferocientes asperaverat. Juxta Pa-  
amorellam hostis militem septem millium terræ commit-  
tere constituerat, cæterum conspectâ nostra classe, quæ  
venti superioris præsidio illum premebat, quantum pote-  
rat profundo se dedit. In sestantibus Nostris tribus circiter  
à litore milliaribus post medium diem usque ad seram no-  
ctem

Et em acre prælium commissum est. Imperator Noster, quod maritima prælia ut plurimum impetu valida esse, atque insultanti omnia prona, cedenti advorsa esse plerunque novarat, militarem hostilem aciem perrupit, cæterum Prætoriam invadendi supra modum cupidus, à quatuor galeonibus circumventus, per treis horas dimicando, invicta quidem virtute navem explicuit, verum ipse glorioſæ mortis necessitati, verbis extremis igneam adhuc fortitudinem spiringantibus, imperterritus succubuit. Verum una ex nostris navibus adeo tormentorū ictibus quassata, ut aquam hauriens præsentī se subduceret periculo. Neque damni expers classis hostilis fluitabat. Nox superveniens prælium non animos militantium fregit. Surgente iterum sole, nova surrexit Nostratium virtus, suffectoque in defuncti Præfecti locum Iacobo Hugenio, ingenti ardore nervos contra hostem intendit. Guaianam inter, & Promontorium Album tanto horrore pugnatum, uti confundi cuncta admodum elementa viderentur, sulfurea & crassa sumi nubes igneis intercurrentibus radiis cælum & mare obduceret. Tormenta undique & militares tubi intonabant. Volitabant majoribus machinarum ictibus rapta in sublime corpora, laceri artus sanguine tabulata fœdaverant, densa hostium cadavera per transennas spargebantur. Äquior nostris pugna, quod hostiles naves mole sua immobiles flectere se nequirent, nostræ celeres mobilesque modo puppeis, modo proras, modo concussis lateribus compages certis ictibus lacerarent. Neque enim innectere se hostilibus navibus Nassovii consilium fuerat, ne militum numero obruerentur, sed crebris accessibus recessibusque hostem fatigare. Usque ad seram vespe-

vesperam prælium hoc exarsit, pauci ex Nostris pro pugnæ atrocitate cæsi vel vulnerati. Navium tamen nostrarum una, cuius compages valido machinarum hostilium impetu pertusa, quod irrumpentes aquæ sisti nequirent, cum Duce Mortamero & XLIV militibus, fluctibus urgentibus cessit, reliqui præter cæsos in scapham desilientes necessitatem ultimam superarunt. Sequenti die tertio ad Paraybam prælio uno à litore miliari iisq; ad fugientem solem atrociter dimicatum. Una nostrarum navium, cui Oloris insigne erat, cum rupto minori malo difficulter se expediret, ab duodecim hostilibus cincta jacta anchora extrema expectabat. Cæterum ab unâ Prætoriâ nostra profligata sex, reliquæ innētendo se omnem impetum effuderunt. Iamque trecenti circiter foros transiliverant, Nostrî imperterriti ad vorsis telis in confertissimos hostes incurrint, pro se quisque edit, ferro ferit, cominus acriter instat, utrinque imbuti sanguine enses, tandem fortuna nostra vicit, pulcherrimoque facinore hostes ejecit, quorum plures, cum arma, quibus corpus tegitur, avertissent, atque in sola fuga salutem ponerent, cæsi, alii, qui dissectis anchorariis funibus ad suos revorti nequivant, itidem vel obruncati, vel aquarum violentiâ perierunt. Ita victoriæ fiducia initium hostilis calamitatis fuit, Nostris propemodum victis virtus lacestis omnem modum excessit, fortunæ infestæ contumaciter restitit, donec illam expugnaret. Neque insectari clapsam navem sine periculo hostiles quatuor poterant, quod dedita opera vadis se præcipitem dedisset. Cæterum alia hostilis, quæ suppetiarum insularium Prætoria erat, ignara periculi, cuius Præfectus erat Joannes Andrada de Cunha, fortunam cum

illâ experiri tentavit : verum cum jam lateri immineret, cæco arenarum hæsitans flecti nequibat, utrinque tormentorum fragores densatique iectus inevitabiles erant, itaque cum hostis extremam necessitatem effugere non posset, animum despondit, & vitæ incolumentem paetus arbitrio victoris se permisit. Triginta antea, qui mari se præcipites dederant, ut à Nostris reciperentur, efferatis pugnandi ardore navalium animis, vel mare vel ferrum consumpsit. Accepta demum conditione milites ducenti triginta cymbis telluri expositi, Andrada in Belgium missus. Hæc duobus conflictibus decimo tertio ad Promontorium album, & sequenti Januarii die juxta Paraibam obtigere. Interjectis duabus diebus, silenti æquore, cum appropinquare hosti tranquillitas vetaret, etiam prælia conticuerunt. Postridie vento se attollente multo acrior pugna recruduit. A nona matutina usque ad seram vesperam utrinque ferme pari nisu pugnatum. Tandem verò consummata hostis fuit infelicitas, Prætoria enim ita dedolata, ut fessa & languida suppetias postularet, & fuga sibi consuleret. Treis caravellæ à celocibus nostris in littus aëtæ, ex quibus trecenti admodum Hispani, qui se telluri dederant, à centurione Tourlonio cæsi. Tota classis versus septentrionem vela tendens pone rupes, quas Baxos Rochi indigent, se recepit. Locus ille victoriæ conficiundæ propter difficiles accessus importunus erat, eò quod majora navigia inde cursum repetere advorsi continui venti fluctusque impedirent. Interea quædam naves hostiles duo millia militum telluri exposuerunt, uti difficillimo per tespua & sylvas itinere centum & quinquaginta miliarium Bahiam.

con-

contenderent: aliæ in Lusitaniam, vel ad insulas, nonnullæ lineam æquinoctialem secantes itidem Bahiam profectæ. Ita irrito rursum moliinine, disjecta, fusa, dissipata potentissima classis fuit, quæ Occidenti ingentem terrorem incusserat. Ita nobiles illæ maritimæ Hispanorum expeditiones potentiam, atque existimationem Regis multum detriverrunt, exiguo nostris detimento, sibi ipsi summopere calamitosæ fuere. Calamitas calamitatem trudebat, vastumque illud imperii corpus lacerum undique discerpebatur: sicuti difficile est continere, quæ vix ullo limite stringuntur. In primis infestus Hispano Oceanus, & nostris non simpli- citer indulgebat. Et quidem deleta fuisset hæc tota classis, nisi quorundam nauarchorum ignavia vel perfidia pulcherimam impeditivisset victoriam. Quippe duodecim tantum vel ad summum quindecim naveis vires suas profligando hosti intenderant, cæteri sacramenti immemores fœdo flagitio optimam occasionem corrupere. Quos, ubi Recifam ventum fuit, frequens senatus judicavit contra Rem-publicam fecisse. De nonnullis more majorum extremum supplicium sumptum, quibusdam, prout divorsa meritorum ratio postulabat, mortis poena remissa, & vibrato supra caput à carnifice gladio extrema imposita est infamia, cæteri exuti dignitatibus suis minore ignominia, vel etiam pecuniaria poenâ multati. Quorum socordiâ & perfidiâ cæterorum virtus eo magis emicuit, qui seipso non deseruerant, & experiendo exiguis admodum copiis classem, uti ipsi postmodum Hispani testati sunt, xciiii navium, inter quas viginti quatuor galeones, profligaverant, fuderantque, quibus & integer honos, illibatusque stetit:

## C A P . L X X I .

*EXPEDITIO NAVALIS SVB P R A E-  
FECTO HOUTEBENIO VERSUS ANGO-  
LAM, ATQVE INSVLAM SANCTI  
THOMÆ, ANNO c̄lo l̄o c̄li.*

**P**RÆFECTUS classis Houtebenius simul atque in Brasiliam venit, nobili alicui expeditioni ingenium inten-  
dit, neque obvia sed summa quæque affectabat. Generosi  
spiritus labore, & quæ cum sequitur gloriâ, nutriuntur. Non  
est quicquam tam arduum, quod virtute expugnari nequit.  
Neque ignorabat quanto major illi Provincia demandata,  
tanto majore cura administrari debere. Ipse mari innu-  
tritus omnes labores & pericula consueta habebat, adver-  
sa & secunda expertus, eòq; imperterritus nihil nisi turpem  
famam metuebat. Classis in procinctu erat viginti navium,  
militibus bis mille, classiariis nongentis, & ducentis Brasilia-  
nis cū tribuno militari Hindersonio insidebatur. Trigesimo  
Maji die Reciffa mari se committens, vigesimo demum &  
quarto Augusti sicientem & nimium propinqui solis fervo-  
ribus adustam Africam oculis usurpavit. Prope mare Afri-  
cum Angolæ regnum, & in eâ Loandæ civitas non ignobi-  
lis ab hostibus possidebatur. Incolæ asperi, incultique, vagi  
palantesque, soli servituti utiles, pecorum instar conficiundo  
faccharo in molis agitantur. Quorum ingens quoque nu-  
merus in Brasilia iisdem laboribus summa severitate desti-  
natur. Sin mitigentur imperia, insolescunt, sin durius ha-  
bean-

beantur, in officio retinentur. Ad horæ spatium ab urbe sub strenuissimo Præfecto Hindersonio telluri expositus miles, qui supra ardorem regionis suo æstu agitatus, impiger, avidus gloriæ, prædæ, quæ maxime militaria pectora accendit, cupidus, contra ipsa tormenta munimentorum, quæ litus circumjacent, magno animo insultabat. Cæterum. Nostri ex navibus continuis machinarum iectibus ita præsidiarios fatigarunt, uti invadentibus vacua loca relinquerent. Hindersonius opportunum ratus ulterius occasionem prensare, eâdem vesperâ magnis passibus ad urbem contendit. Contra tria Nigritarum millia, qui in armis ætatem egerant, primo acerrime dimicatum. Quorum virtus, et si diu ad vorso corpore pugnarent, tandem elanguit. Quippe corpora illorum primo impetu valida, si diutius urgendo præsseris, fluxa tandem cum mollitie sui cæli liquefunt. Cedentibus Nigritis, Lusitanus gubernator Petrus Cecerra Menesius consilii inops cum nongentis militibus indigenisque, qui in subsidio erant, in fuga præsidium omne sibi quæsivit, urbem vacuam victoris arbitrio reliquit. Inventa in urbe præter cibaria & annonam militarem, viginti novem ærea, sexaginta novem ferrea tormenta, naves maiores, minoresque triginta. Urbs ipsa edito colle sita nequam munita, portum ipsum, qua introitus ex mari, munimenta prætexebant. Hinderonus urbem ipsam atque ædificium, cui nomen Bengo erat, flumini inhærens, quod ille locus aquationi opportunus esset, muniri jussit. Lusitani validâ manu impedire nova opera tentabant, cæterum prælio aspero repulsi centum ex suorum & Nigritarum numero fato occubuerunt. Prospere hic cesserat Fortuna

belli , verum ne tempus huic occasione se subduceret , insisteret ulterius novis patrandis facinoribus Houtebenio consilium fuit. Insula S. Thomæ ejusdemque nominis oppidum sub nimium propinquo sole radiis verticalibus exusta proventu tamen sacchari fertilis est. Hanc petere , ipsumque veluti Phœbi cubile invadere Houtebenius constituerat. Victoria successit , ( unâ tamen nostrarum navium incensa plerique perierunt) verum Nostris propter aëris intemperiem infausta. Debellato hoste nova victoribus morborum incubuit cohors , quîs plurimi aëris ferventissimi insueti conficiebantur, atque ipse quoque Præfectus mortalitatis leges implevit. Regionem ipsam torridis vaporibus exitiam malignus admodum aër infestat , qui que ibi habitant Lusitani vix quinquagesimum annum attingunt , indigenæ longævi sueti tam maligno aëri inde nullam noxam ferunt.

## C A P . L X X I I .

*PRAELIVM ACRE INTER CENTVRIONEM VELDMUSIVM , ET QVATVOR DVNKERKANOS , ANNO  
c I o I o c x l i v .*

**C**IRCA Flevolandiaë litora se diffuderant quatuor Dunkerkanorum naves , qui spe potiundæ prædæ mercatoriis in primis navibus insidias tendebant. Occursantem centurionem Veldmusium , simul junctis viribus expugnare tentabant. Cæterum ille extremam necessitatem plus

plus quam virili audacia superavit, cum nihil enim reliqui esset, quam imminentem hostium ferociam contundere, aut mori per virtutem, simul militari, & horridâ facundia suos affatus, ne Deus, inquit, siverit, uti prope litora nostra hostium violentiæ pateamus, mori mihi ante quam fœda deditio me prostituam, constitutum est, vos quoque qui virtute humanum fastigium excessistis, oro quæsoque, ne me non tam præfectum, quam commilitonem vestrum deseratis. Cætera vobis totiens imperavi, nunc etiam rogo, etsi imperio uti possim. Neque multitudo vos moveat, plerunque parva manu victores fuimus. Ite alacres & spe pleni, me vel virtutis vel ignaviæ exemplum sequimini. E continentí sex & viginti ferreis machinis ita intonuit, ut Prætoria hostium navis viginti & octo tormentis gravis imenso hiatu aquam hauriret, profundoque absorberetur. Tres aliæ adeo laceræ, ut vix portum attingerent. Nostra tamen navis etsi virtute superior, ita undique quassata erat, ut intra aquam octodecim iætibus lacera rimisque fatiscens, ægre attracta, juxta locum, qui indigenis Robbegat appellatur, pessum iverit. Cæterum Neptuni illos indigenas, ne quidem ipsum mare deseruit. Omnes enim, uti meruerat illorum virtus letho erepti, perennem cum vitâ gloriam junxerunt. Neque ulla erit tam surda posteritas, quæ tantos similesque heroës non in cælum debitibus feret.

## CAPUT LXXIII.

*LICHTHARTII ARCHITHALASSI  
CLASSIS INDIÆ OCCIDENTALIS VIRTUS  
EXPVGNATIS TREDECIM LVSITANORVM  
NAVIBVS. ANNO CIƆ IƆ CXLV.*

**L**usitani, postquam Dux Bragancæ ejecto Castiliæ Rege regiam autoritatem arripuisse, Nobis fœdere nexi erant. Cæterum in Brasilia gens hominum mobilis & rerum novandarum avida, multa nefanda facinora per occasionem agitabat. Et nova pacis necessitudo facile illorum scelerata consilia tegebat. Magnitudo sceleris, quā molitus fuit Antonius Cavalcantelca, Mauritiopolis senator, omnium ingenia exuperabat. Quippe feralibus filiæ nuptiis invitatos, Præfectos militareis atque urbanos confodere immane ejus erat consilium. Aperto facinore ab uno ex consortibus, quem conscientia tanti criminis agitabat, Princes conjurationis fugientes manum militarem cogere, agros incendio fœdare, postremo crudelissimi mortales cruore atque luctu omnia complere. Multa alia aspera & fœda evenerunt, quæ, quia extra institutum nostrum, dicere piget tædetque. Cæterum uti terra potiores, ita mari tamen vicit fortuna Reip. nostræ. Strenuissimus Præfector Lichthartius, cuius & alibi virtus memorata fuit, maria lustrare, surgentem potentiam Lusitanicam collidere, omnia boni imperatoris munia exequi. Lusitanica classis fluxâ fide ad rivum formosum centum & quingentos armatos homines

nes rebellibus junxerat, quibus Serinhaimum ad deditio-  
nem coegerant. Tredecim ibi hostiles naveis octo suis ma-  
gno impetu adortus Lichthartius, facile illas fudit, dele-  
vit, perfidiam virtute vindicavit. Neque verò levis illa  
belli tempestas fuit, ita tormentis horrendum in modum  
sævientibus, ut confundi elementa viderentur, perpetuus-  
que ignium fulgur, mugitus continuus machinarum, pi-  
larumque violenti turbines cuncta turbarent: denique  
omnia ad terrorem ultimæ calamitatis composita videban-  
tur. Quatuor naves superatæ, cæteræ incensæ, vel in litus  
adactæ pulcherrimum nostris spectaculum præbuere. Vir-  
tute & confidentia ut plurimum victores fuimus, insidiis  
tantum & perfidia à Lusitanis circumventi. Nihil sanctius  
fide colunt Batavi, perfidia enim vincere magnum jure  
opprobrium est. Non quod eadem artes iisdem in promptu  
non sint, sed quod tale crimen candor Batavorum non  
admittat.

F I N I S.

Qq

I N-

# INDEX CAPITUM.

## C A P U T I.

- D**E expeditionibus antiquis tempore Romanorum. fol. 2  
C A P. I I.
- D**e pugna circa Damiatam Ægypti urbem. Anno 1218. 9  
C A P. I I I.
- P**rälium inter Hollandos & Flandros. Anno 1295. 13  
C A P. I V.
- P**rälium inter Hollandos & Frisos Orientales. Anno 1298. 15  
C A A. V.
- P**rälium inter Hollandos & Flandros. Anno 1304. 17  
C A P. VI.
- P**rälium inter Margaritam, Filiumque Gulielmum. Anno 1351. 26  
C A P. VII.
- D**e Præliis tempore Iacobæ. Anno 1426. 30  
C A P. VIII.
- B**ellum maritimum cum Osterlingis. Anno 1439. 33  
C A P. IX.
- D**e maritimo bello inter Gallos & Hollandos, Anno 1471. & seq.  
sub Carolo Burgundo, & Maria. 37  
C A P. X.
- B**ellum inter Flandros & Hollandos. Anno 1483. & seq. 42  
C A P. XI.
- D**e Geldro-Frisico bello, Præliisque maritimis. Anno 1504 & seq. 45  
C A P. XII.
- P**rälia Gallica, præcipue Anno 1554. 56  
C A P. XIII.
- D**e expeditione Geusiorum, ut vocant, Aquatilium, ejusque successu.  
Anno 1569. & seqq. 59  
C A P. XIV.

# INDEX CAPITUM.

C A P. XIV.

- Prælum cum classe Ducis Medinaceli, & cum classe Lusitanica, Anno  
1572. 64

C A P. XV.

- Prælum inter Sancium Avilam & Zelandos. Anno 1573. 68

C A P. XVI.

- Velitationes navales inter Bossuvinum & Hollandos in lacu Harle-  
mensi. Anno 1573. 71

C A P. XVII.

- Prælum inter Comitem Bossuvinum & West-Frisios in sinu Australi.  
Anno 1573. 75

XVIII.

- Prælum navale juxta Romerswaliam inter Hispanos & Fœderatos.  
Anno 1574. 85

C A P. XIX.

- Prælum navale inter Zelandos, & classem Antwerpianam. Anno  
1574. 91

C A P. XX.

- Expeditio navalis liberandæ obsidioni urbis Lugduni Batavorum, cum  
ab Hispanis undique premeretur. Anno 1574. 95

C A P. XXI.

- De classe Hispanica profligata, vel tempestate perdita. Anno 1578. 101

C A P. XXII.

- De expeditione Britannica Hispaniam versus, quibus junctæ 24 Fœ-  
deratorum naves. Anno 1596. 108

C A P. XXIII.

- De prima versus Indiam navigatione, præliisque navalibus cum Lusi-  
tanis & Barbaris, Anno 1595. & duobus seqq. 117

C A P. XXIV.

- Expeditio navalis, qua ab Anno 1598 usque ad 1601 Oliverius de  
Noort, totum terrarū orbē triennii spatio circumnavigavit, ejusq;  
conflictus cum duabus Hispanorū corbitis juxta Manillas. 125

## M U N D E X G H I

C A P. XXV.

Prælia & velitationes inter nonnullas naues classis Hispanicæ, Hol-  
landicæque. Anno 1598. 129

C A P. XXVI.

De nobili, sed non felici expeditione navalí 80 navium, sub Petro  
Douza Prefecto maris. Anno 1599 & seqq. 130

C A P. XXVII.

Legierii prælium cum sex Spinolæ longis navibus, item aliae velitatio-  
nes, Anno eodem. 135

C A P. XXVIII.

Conflictus Hispanicæ classis cum nostris Societatis Orientalis naubus.  
Anno 1601. 137

C A P. XXIX.

Prælium Volphardi Harminii, qui Anno 1601. cum summo classis im-  
perio in Indiam missus fuerat, cum classe Lusitanorum. 139

C A P. XXX.

Variæ velitationes Spilbergii cum Lusitanorum naubus. Aº. 1601.  
& seq. 141

C A P. XXXI.

De octo longis hostiū naubus depresso vel corruptis. Anno 1602. 144

C A P. XXXII.

De pretiosissima Lusitanormm navi, quam Caracquam indigetant, à Ba-  
ravis superata. Anno 1602. 148

C A P. XXXIII.

Frederici Spinolæ cum Zelandis navale prælium, Anno. 1603. 151

C A P. XXXIV.

Iacobi Heemskerkii cum Lusitanorum pretiosissima corbita prælium.  
Anno 1603. 153

C A P. XXXV.

Stephani Verbagii prefecti in India cum Lusitanis prælia. Anno 1604.  
& seqq. 154

C A P.

# C A P I T U M.

## C A P. XXXVI.

Praelium navale inter Petrum Cubiarram praefectum classis Hispanice,  
et Haultainum Zelandiae Archithalassum. Anno 1605. 159

## C A P. XXXVII.

Lamberti Pulchri cum praetoria Dunkerkanorum memorabilis confli-  
ctus. Anno 1605. 161

## C A P. XXXVIII.

Malaccæ obſidio, et praelium navale inter Matelvium et Lusitanos.  
Anno 1606. 162

## C A P. XXXIX.

Gemina expeditio Gulielmi Hautainii, et Propraefecti Reineri Nicolai  
memorabile praelium. Anno 1606. 168

## C A P. XL.

De nobilissima victoria Iacobi Heemskerkii in Fretô Tartessiaco circa  
Gibraltaram. Anno 1607. 170

## C A P. XLI.

Expeditio infælix sub praefectura Petri Gulielmi Verhoevii versus In-  
diam. Anno 1607. et seqq. 180

## C A P. XLII.

Conflictus classis Batavice cum Hispanica, Anno 1612. 183

## C A P. XLIII.

Acerrimum praelium Georgii Spilbergii classis Indicæ praefecti, cum classe  
Roderici Mendozæ. Anno 1625. 185

## C A P. XLIV.

Melchioris Kerchovii praefecti classis Batavice cum Hispanis praelium  
navale. Anno 1618. 192

## C A P. XLV.

Prælum classis Batavice cum Hispanica junctæ contra Turcas predo-  
nes,

I N T D I E X

nes, sub Præfectura Hautainii, & Lamberti Pulchri Vicarii. Anno  
1618.

193

C A P. XLVI.

Prærium Hermanni Cleuteri cum duabus hostibus navibus Anno 1622.  
mense Augusto: ejusdē cum Ioanne Michaëlis acerrimum certamen,  
eodem Anno, mense Octobri.

195

C A P. XLVII.

Prærium acre prope Gades, inter Hispanicā classem & Nostram, cui  
præerat summo cum Imperio Ioachimus Henrici Swartehontius.  
Anno 1622.

197

C A P. XLVIII.

Centurionis Iacobi Stenbachii prærium cū Hispanica classe, A° 1623. 200

C A P. XLIX.

De illustri expeditione sub præfecto Iacobo Willekeno, & vicario Petro  
Heinio. Anno 1623 & 1624.

203

C A P. L.

Expeditio navalis sub præfecto Iacobo Heremita, & res gestæ. Anno  
1623. & sequentibus.

210

C A P. LI.

Prærium inter præfectum Philippum De Zuilen, & undecim naves ho-  
stiles circa Loandam, Anno 1624 mense Iunio, nomine Societatis  
Occidentalis.

213

C A P. LII.

Acerrimum prærium inter Lusitanicam classem, & Hollandicas Angli-  
casque naves. Anno 1626.

217

C A P. LIII.

Prærium inter Vibrandum Schrammum præfectum classis Indicæ, &  
prædonem Nicolaum Companum. Anno 1626.

219

C A P. LIV.

Memorabilis prætoriæ Hispanicæ clades, à novem classiariis perpetrata.  
Anno eodem.

222

CAP. LV.

# C A P I T U M.

C A P. LV.

De expeditione & prælio Petri Heinii cum classe hostili juxta urbē S. Salvatoris in Brasilia. Anno 1627. 223

C A P. LVI.

De ejusdem præfecti prælio, & victoria, eodem Anno. 228

C A P. LVII.

Prærium acre inter tres Nostratium naves, & prætoriā vicariamque Hondurensem. Anno 1627. 8 Iulii. 231

C A P. LVIII.

De prælio navalı inter classem Hollandicam nomine Societatis Indicæ Occidentalis, cui præfectus erat Petrus Adriani Ita, & prætoriā, vicariamque Hondurensem. Anno 1628, mense Augusto. 235

C A P. LIX.

De classe argentifera à Petro Heinio direpta. Anno 1628. 140

C A P. LX.

Petri Heinii Archithalassī Hollandiæ cum tribus Dunkerkanis acerrimus cōflictus, ejusque infausta mors. Aº. 1629. 244

C A P. LXI.

Nobilis expeditio sub Imperio Henrici Loncquii, itē periculosa velitatio inter eundē & immensam clasē Frederici de Toledo. Olinda præfecturæ Pernambucci oppidū terra mariq; occupatur. Aº. 1629. 248

C A P. LXII.

Prærium inter tres Dunkerkanos, & unam celocē, cui Navarchus & præfectus erat Ioannes Cornelii Lichthartius. Aº. 1630. Mense Novembri. 255

C A P. LXIII.

Prærium navale inter Hostes & Fœderatos ad Scaldim fluvium. Aº. 1631. 257

C A P. LXIV.

Prærium navale inter Antoniū d'Oquendo, classis Regiæ summū præfec-  
tum, & Adrianum Paterum, Generalem clasēs Hollandicæ. Aº.  
1631. 261

CAP. LXV.

# INDEX CAPITUM.

C A P. LXV.

- Prælum navale inter navem præfecti Cornelii Ioannis Hanii; & duas  
Dunkerkanorum naves bellicas. Anno 1633. 265

C A P. LXVI.

- Prælum navale inter commendatorem Ioannem Everardi, & Archi-  
thalassum hostilem Colardum. Anno 1636. 266

C A P. LXVII.

- Pugna navalis inter Cornelium Iolum Houtebenium, præfectum classis  
Belgicæ, & argentiferam classem Hispanorum. Anno 1638. 269

C A P. LXVIII.

- Prælum navale inter Martinum Trompium Archithalassum, & Mi-  
chaëlem Dornium præfectum classis hostilis. Anno 1639. 274

C A P. LXIX.

- Prælum celeberrimum Dunense inter potentissimam Hispamicam clas-  
sem, & Fœderatos. Anno 1639. 278

C A P. LXX.

- Prælum navale inter Regiam classem, & Societatis Indicæ Occidentalis  
in Brasilia. Anno 1640. 293

C A P. LXXI.

- Expeditio navalis sub præfecto Houtebenio versus Angolam, atque  
Insulam Sancti Thomæ. Anno 1641. 300

C A P. LXXII.

- Prælum acre inter centurionem Veldmusium, & quatuor Dunkerka-  
nos. Anno 1644. 302

C A P. LXXIII.

- Lichthartii Archithalassi classis Indie Occidentalis virtus expugnatis  
tredecim Lusitanorum navibus. Anno 1645. 304

F I N I S.

265

266

267  
268

269

270

271

272

273

274

275

276

277

278

279

HRM  
7785

30475

58 LLB<sup>9</sup>.

